

Suttantapiṭake Majjhimanikāye

Mūlapaṇṇāsapāḷiyā saṁvaṇṇanābhūtā

Bhadantamahābuddhaghosattherena katā

Papañcasūdanī nāma

MŪLAPAṆṆĀSATṬHAKATHĀ

(Paṭhamo bhāgo)



Buddhavasce 2552

Marammavasse 1370

AD. 2008

Romanized from Myanmar version published in 1957

© Buddhasāsana Society

Aṭṭhakathā Series 10

First published in 2008 by Ministry of Religious Affairs

Yangon, Myanmar

THE PĀLI ALPHABET
IN BURMESE AND ROMAN CHARACTERS

VOWELS

အ a အာ ā ဣ i ဤ ī ဥ u ဦ ū ဧ e ဩ o

CONSONANTS WITH VOWEL "A"

က ka	ခ kha	ဂ ga	ဃ gha	င ṅa
စ ca	ဆ cha	ဇ ja	ဈ jha	ည ṇa
ဋ ta	ဌ tha	ဍ ḍa	ဎ ḍha	ဏ ṇa
တ ta	ထ tha	ဒ da	ဓ dha	န na
ပ pa	ဖ pha	ဗ ba	ဘ bha	မ ma

ယ ya ရ ra လ la ဝ va သ sa တ ha ဠ ḷa ၵ ṁ

VOWELS IN COMBINATION

-၁ ၵ = ā ၵ = i ၵ = ī ၵ - ၵ = u ၵ - ၵ = ū - = e -၁ ၵ = o

က ka	ကာ kā	ကိ ki	ကီ kī	ကု ku	ကူ kū	ကေ ke	ကော ko
ခ kha	ခါ khā	ခိ khi	ခီ khī	ခု khu	ခု khū	ခေ khe	ခေါ kho ...

CONJUNCT-CONSONANTS

ကက kka	ဃ န္ဂha	ဏ န္ဓha	ဈ သ္ဃya	ဠ ပla	အ လla
ကွ kka	ဠ cca	ဏှ န္ဓha	ဠ သ္ဃya	ဠ ပba	လျ lya
ကျ kya	ဠ ccha	ဏှ န္ဓha	ဠ နta	ဠ bbha	လှ lha
ကြ kri	ဠ jja	ဏှ န္ဓha	ဠ နtva	ဠ bya	ဂှ vha
ကလ kla	ဠ jjha	တ္တ tta	ဠ နtha	ဠ bra	တ္တ sta
ကွ kva	ည ṅṅha	တ္တ ttha	ဠ nda	ဠ mpa	တ္တ strā
ချ khya	ည ṅṅha	တွ tva	ဠ ndra	ဠ mpha	သ္ဓ sna
ခွ khva	ည ṅṅca	ကျ tya	ဠ ndha	ဠ mba	သျ sya
ဂွ gga	ဠ ṅṅcha	တြ tra	ဠ nna	ဠ mbha	သ ssa
ဠ ggha	ည ṅṅja	ဠ dda	ဠ nya	ဠ mma	သ္ဓ sma
ဂျ gya	ည ṅṅjha	ဠ ddha	ဠ nha	ဠ mya	သ္ဓ sva
ဂြ gra	ဠ ṅṅṭta	ဠ dya	ဠ ppa	ဠ mha	တွ hma
ကံ ṅka	ဠ ṅṅṭtha	ဠ dra	ဠ ppha	ဠ yya	တွ hva
ခံ ṅkha	ည ṅṅḍda	ဠ dva	ဠ pya	ဠ yha	ဠ ḷha
ဂံ ṅga					

၁	၂	၃	၄	၅	၆	၇	၈	၉	၀
1	2	3	4	5	6	7	8	9	0

Nidānakathā

Sirimatā amhākaṃ Buddhena Bhagavatā Arahatā Sammāsambuddhena sakalalokapatthaṭamahākaruṇāsinehasiniddhahadayena sabbattha appaṭihatasabbaññūtanāvarenaḍiṇāṇobhāsasamujjalitena sanarāmaralokagurunā sadevakassa lokassa atthāya hitāya sukhāya dhammo ca vinayo ca desito pañṇatto, so pariyaṭṭipattipattipattivedhavasena vibhatesu tīsu saddhammesu pariyaṭṭisaddhammo nāma, tadeva ca sāsanatṭhitiyā pamāṇaṃ, satiyeva hi tasmīṃ itare uppajjanti, nāsati, vuttañhetam **Aṅguttaraṭṭhakathāyaṃ**— (Am-Ṭṭha 1. 72 piṭṭhe)

“Suttantesu asantesu, pamuṭṭhe vinayamhi ca.

Tamo bhavissati loko, sūriye atthaṅgate yathā.

Suttante rakkhite sante, paṭipatti hoti rakkhitā.

Paṭipattiyam ṭhito dhīro, yogakkhemā na dhamṣati”ti.

Teneva ca saddhammaciraṭṭhitikāmino theravarā Mahākassapādayo pariyaṭṭisaddhammasaṅkhātāṃ Tepiṭakāṃ Buddhavacanāṃ saṅgītimāropetvā Buddhasāsanāṃ saṃrakkhimsu, taṃkālikā ca rājāno saddhammābhivuddhikāmaṃ tesaṃ saṅgītikārānāmanubalappadānena sahāyattamupāgamuṃ.

Tathā hi catūhādhikatimāsaparinibbute Bhagavati Mahākassapattherappamukhehi pañcahi arahantasatehi Rājagahe **paṭhamā dhammasaṅgīti** katā rañño Māgadhasa Ajātasattuno visesānuggahamādāya.

Vassasatparinibbute ca Bhagavati Mahāyasattherappamukhehi sattahi arahantasatehi Vesāliyam **dutiyā dhammasaṅgīti** katā, tadā ca Kālāsoko mahīpati tesaṃ sahāyattamupāgato.

Tathāgataparinibbānato pana dvinnāṃ vassasatānamupari pañcattimśatime vasse Mahāmoggaliputtatissattherappamukhehi arahantasahashehi Pāṭaliputte **tatiyā dhammasaṅgīti** katā sakalalokapatthaṭayasassa Dhammāsokassa bhūpatino niratisayānuggaham laddhāna.

Sammāsambuddhapariniḅbutito pana catunnaṃ vassasatānamupari paṇṇāse vasse Laṅkādiṇe Vaṭṭagāmaṇirājino kāle Mātulajanapade Ālokaleṇe **catutthī dhammasaṅgīti** katā pañcahi arahantasatehi Mahādhammarakkhitattherappamukhehi, yā loke “pothakāropanasāṅgīti”ti pākaṭā.

Buddhavasṣe pana catussatādhikadvisahassānamupari pannarasamasāṅkhyāṃ sampatte imasmimṇi Marammaraṭṭhe **Mindonnā**massa mahādhammarājino kāle Mandalay itipākaṭe Ratanāpuñjanagare **pañcamī dhammasaṅgīti** katā catussatādhikadvisahassattherehi Dakkhiṇārāmaṃvāsītipīṭakadharabhadantaṇāgarattherappamukhehi tasseva rañño anavasesānuggahamādāya, yā loke “selakkharāropanasāṅgīti”ti vuccati.

Itthaṃ sudāṃ Buddhassa Bhagavato sāsanāṃ iddhañceva hoti phītañca vitthārikāṃ bāhujaññaṃ puthubhūtaṃ yāvajjatanā.

Cirakālato panetaṃ Buddhavacanāṃ lekhaṇaparamparāya ceva muddaṇaparamparāya ca anekakkhattuṃ parivattiyābhatāṃ na sakkā dāni vattuṃ “paṭhamadutiyatatiyādīsāṅgītimāropitākāreṇeva sabbaso parisuddhaṃ”ti, aññadatthu paṇādhunikapotthakesu saṃvijjamānehi kehici paṃādālekhaṇādīsāṅgītakhalitādhikaparibhaṭṭhapāṭhehi malīnamevetāṃ, tathā hi nāñadesiyapotthakesu aññamaññaṃ saṃsandiyaṃānesu anekā visadisapāṭhā dissanti.

Tatoyeva ca Buddhavacanassa suparisuddhabhāvakāmino mahātherā sasatthantarapīṭakattayakovidā dhammavinayaṃ vācentāyeva te khalitādhikaparibhaṭṭhapāṭhe disvā evaṃ samacintesuṃ kathesuṃ ca—

“Advayavādino suparisuddhavacanassa tassa Bhagavato pāvacanāṃ advayaṃ suparisuddhaṃ nimmalamevassa, imesu pana pāvacanapotthakesu aññamaññaṃ visadisā ceva aparisuddhā ca pāṭhā dissanti, nissāṃsayāṃ kho ayameva mūlapāṭho, yo nesāṃ yuttisampanno, tadañño pana paṃādālekhaṇapāṭhoyeva, tādisā ca dissanti ādhunikapāvacanapotthakesu kismiñci kismiñci ṭhāne.

Kāmañcetedāni na tāva bahutarā, yāva yathābhūtaṃ Pāḷiyā atthaṃ paṭisedheyyuṃ, etarahi pana asodhiyaṃānā te gacchante gacchante

kāle bahutarā bahutarā jāyeyyūṃ, taṃkālikā ca pacchimā janā te sodhetuṃ asamatthā yathādhippetāṃ Pāḷiyā atthāṃ na sammā jāneyyūṃ, evamete saddhammassa sammosāya antaradhānāya saṃvatteyyūṃ.

Vuttaṃ hetāṃ **Āṅguttaranikāye**— (Am 1. 60 piṭṭhe)

‘Dveme bhikkhave dhammā saddhammassa sammosāya antaradhānāya saṃvattanti, katame dve, dunnikkhittāṃ ca padabyañjanaṃ attho ca dunnīto, dunnikkhittassa bhikkhave padabyañjanassa atthopi dunnayo hoti, ime kho bhikkhave dve dhammā saddhammassa sammosāya antaradhānāya saṃvattanti’ ti.

Yaṃnūna mayāṃ te sodhetvā nimmalaṃ parisuddhaṃ Buddhavacanaṃ sampatiṭṭhāpeyyāma, tadassa saddhammaciraṭṭhitiyā bahujanahitāya bahujanasukhāya ca, taṃ pana na sukaraṃ sampādetuṃ aññatra dhammikaṃrājūnāmanuggahenā” ti.

Sā paṇāyaṃ kathā patthaṭā sādhujanaparamparāya, sutā ca **U Nu** nāmadheyyaggamahāmacappamukhehi Marammaratṭhissarehi, sutvāna te evaṃ samacintesuṃ sammantayīṃsu ca “na kho panetaṃ amhākaṃ patirūpaṃ, ye mayāṃ pubbakehi dhammikehi dhammarājūhi samanuggahitassa Buddhasāsanassa parihānikāraṇaṃ passamānāyeva ajjupekkhitvā appossukkā vihareyyāma, yaṃnūna mayāṃ sāsānopakārupāye sampādetvā visesato ca ādhunikapāvācanapotthakesu dissamāne saṃsayaṭṭhāniye pamādalekhapāṭhe saṃsodhetukāmānaṃ mahātherānaṃ ajjhāsayaṃ paripūretvā Buddhasāsanāṃ anuggaṇheyyāma” ti, atha te sabbepi sāsānānuggahāya katasanniṭṭhānā ahesuṃ.

Anuggahitukāmehipi ca tehi na sakkā āṇāya kātuṃ vinā mahājanacchandasaṅgātōpadesena, mahājanappatinidhibhūtā hi etarahi Marammikā rājāno, upadeso ca santhāgārasamitiyaṃ mahājanappatinidhibhūtānaṃ matisajīvānaṃ chandeneva samuppajjati, tasmā Buddhasāsanānuggahāya santhāgārasamitiyaṃ ekaṃ dhammupadesaṃ paññāpetvā **Buddhasāsanasamiti** nāma mahāsamiti samuṭṭhāpitā. Tassā kho pana samitiyā sabhāpati hoti *Thadosirīsudhammopādhidhārī* **Sir U Thwin** vhayo mahāseṭṭhi, upasabhāpati pana *Thadosirīsudhammopādhidhārī* yeva **U Thein Maung** vhayo padhānaḍḍavinicchayamandiramhi mahākkhadassādhipati, sabbakammavidhāyako pana

hitadharo *Thadomahāsa*resīthūpādhiko **U Chan Htun**vhayo upadesikādhīpatīpadhānanīvedīmahāmantī. Bhaṇḍuppāḍako pana raṭṭhissarānaṃ patinidhibhūto **U Win** nāmadheyyo sāsanaṭṭhānikamahāmatto.

Atha te Buddhasāsanasamitikā “yāyeva kho panatthāya samuṭṭhāpitāyaṃ samiti, tadatthamidāni visesato kāhāmā”ti Marammaraṭṭhebbhipākaṭaḡaḡasamudayasamudite tattha tattha padhānanāyakabhūte paropaṇṇāsamahāthere dīghadassino nimantiya evamārocesuṃ “ayaṃ bhante amhākaṃ Buddhasāsanamahāsamiti Buddhasāsanānuggahatthāyeva raṭṭhissarānaṃ dhammupadesena samuṭṭhāpitā, sacedāni bhante pubbe viya dhammasaṅgītiṃ katvā sāsanaṃ paggaṇhituṃ yujjeyya, mahātherā ca tathā kātumiccheyyūṃ, vissatthāva bhante karontu, mayaṃ tattha kāyañāṇapaccayabalehi niravasesaṃ byāvaṭā bhavissāmā”ti.

Atha kho te mahātherā “dhammasaṅgītiṃ karissāmā”ti katasanniṭṭhānā evaṃ pativedesuṃ “kattabbāyevesā dhammasaṅgīti, nesā na kattabbā, tasmā mayaṃ dāni piṭakapotthakāni pañcamasaṅgītīsilālekhāya samānetvā tāniyeva sarīraṃ katvā Pāḷisaṃsodhanapubbaṅgamaṃ dhammasaṅgītiṃ kassāma, yāya ādhunikapotthakesu paramparāparivattanavasena sañjātā pamādalekhaḡāḡā ca nirākarīyissanti, visodhitaṅca suparisuddhaṃ pāvacaṇamūlaṃ labhitvā taṃ muddāpetvā sakalaloke nānāraṭṭhesu nānādesesu byāpanavasena Buddhasāsanassa ciraṭṭhiti ca sādhiyissati, sabbe ca Theravādīkā raṭṭhā Marammaraṭṭhasahitā ekato hutvā Buddhasāsanāṃ abhūtapubbapaggaḡhena paggaṇhituṃ labhissanti, sā ca purimikā pañca saṅgītiyo upanidhāya **chaṭṭhasaṅgīti** nāma bhavissati, taṅca sabbaṃ bhavissati bahujaṇahitāya bahujaṇasukhāya atthāya hitāya sukhāya devamanussānaṃ, bahūni panettha āvassakakiccāni paṭikacceva samādapetabbāni tumhākamāyattāni, tasmā saṅgītikālavavatthānādīkiccaṃ tumhākaṃyeva bhāro hotū”ti.

Atha te Buddhasāsanasamitikā sāsanaḡalakānaṃ mahātherānaṃ chandaṅca ruciṅca samādāya ovādaṅca sirasā sampaṭicchitvā therānaṃ ceva attano ca kattabbakiccānaṃ pariniṭṭhānasamayaṃ sallakkhetvā “ayaṃ chaṭṭhasaṅgīti Sammāsambuddhapariniḡbānato catussatādhīkānaṃ dvinnaṃ vassasahassānamupari

aṭṭhanavutime vasse vesākhapuṇṇamito paṭṭhāya ārabhitabbā, dve ca vassāni kattabbā, pañcannaṃ ca sāsanaṃvassasahassānamupaḍḍhavasve vesākhapuṇṇamiyaṃyeva pariniṭṭhāpetabbā”ti saṅgītikālaṃ vavatthapesuṃ.

Tato paṭṭhāya ca te punappunaṃ sannipatitvā sammantayitvā saṅgītiyā pubbakiccesu nirantaraṃ byāvaṭṭā honti, “mahantaṃ kho Jinasāsanaṃ mahatiyāyevetaṃ pūjāya pūjanīyaṃ”ti mantvā tehi kārāpitāni mahantamahantāni sāsanaṃmandirāni, tattha saṅgītiṃ kurumānassa bhikkhusaṅghassa sukhasannisaṅgītatthaṃ sannipātaṭṭhānabhūtaṃ mahantaṃ saṅgītiṃmandiraṃ Yangon nāma rājadhāniyaṃ **Sirīmaṅgalatthale Kaba Aye** (Lokasāma) nāmakassa cetiyassa āsanne selapabbataguḥavesena kārāpitāni tibhūmakāṃ pāyaso silā-iṭṭhakāyomayaṃ, evaṃ mahantampetaṃ ekasaṃvacchareneva pariniṭṭhāpitaṃ iddhiyā maññe nimmitaṃ, tañca bahi ṭhatvā apekkhattaṃ sayamjātaselapabbato viya dissati, anto pavisitvā olokayataṃ pana olokitolokitaṭṭhānato dassanīyaṃ pāsādikaṃ ramaṇīyaṃ atittikarameva hutvā devavimānamiya khāyati. Tassa panāvidūre aḍḍhateyyānaṃ saṅgītikārabhikkhusahassānaṃ nivāsappahonakā cattāro iṭṭhakamayā mahāpāsādā ceva iṭṭhakamayāyeva bhojanamahāsālā ca mahāsīmāpāsādādayo ca muddaṇayantasālā ca tatheva kārāpitā.

Mahātherāpi ca “saṅgītikiccaṃ nāma therādheyyaṃ, therānaṃ ovādeneva kattabbaṃ, na vinā tena, tasmā bhikkhusaṅghassa ceva upāsakānañca sabbampi saṅgītipaṭibaddhamovādaṃ dātum bhavitabbamettha ovādadāyakaṃsaṅghasabhāyapī”ti Marammaraṭṭhadhājūpame aggamahāpaṇḍitopādhidhārino ca raṭṭhovādācariyasammate ca raṭṭhavinayadharasammate ca aññe cābhipākaṭaḡarubhāvanīyādiḡuḡaḡaḡasamaḡinoti parosataṃ nāyakaṃmahāthere uccinitvā “chaṭṭhasaṅgīti-ovādācariyasāḡhanāyakaṃsabhaṃ” nāmekāṃ padhānamahāsāḡghasabhaṃ paṭiṭṭhāpesuṃ, te ca nāyakaṃmahātherā Sambuddhavaḡanaratanākarapāraḡe vividhasatthantaragahanāsāḡgacārīne therānuthere pañcavīsatiṃmatte samuccinitvā “chaṭṭhasaṅgītidhurandharasabhā”ti ca sammānitvā tassā sabhāya bhāraṃ niyyātesuṃ sabbāni saṅgītipaṭibaddhakiccāni saṃvidahitum. Te ca saṅgītidhurandharasabhikā therā sakalamarammaraṭṭhe **Nyaung Yan Sayadaw**ti abhipākaṭaṃ “Aggamahāpaṇḍito” pādhiṃā ceva “Abhidhajaṃmahāraṭṭhagurū” pādhiṃā cāti

dvīhi Marammaraṭṭhissarasamappitopādhīhi virājitam jātiyā āsītivassikam upasampadāya saṭṭhivassam “Bhadantarevatam” nāma mahātheravaram sabhāpatim katvā Tepiṭake Buddhavacane ceva nānāsatthesu ca kovide dhammācariyakavipadappatte bhikkhū uccinitvā aṭṭhadasādivaggavasena parosatam Pāḷivisodhakavagge ceva sambahule ca paṭivisodhakavagge bandhāpetvā visodhanappaṭivisodhanehi Buddhavacanam suparisuddhattam paṭipāpetvā dhammasaṅgītimakamsu yathā tam porāṇakasāṅgītikārā.

Evam saṅgītimāropitassa Tepiṭakassa Buddhavacanassa atthasaṁvaṇṇanābhūtā Aṭṭhakathāyo ca saṁvijjanti manoramāya tantinayānucchavikāya bhāsāya Ācariyabuddhaghosādīhi theravarehi katā.

Tāsampi Aṭṭhakathānam sadesīyamūlehi ceva videsīyamūlehi ca saṁsanditvā Tepiṭakassa viya Buddhavacanassa visodhanappaṭivisodhanavasena mahātherā pāvacanadassino saṁvaṇṇanākovidā pāṭhasodhanamakamsu.

Iccevamaṭṭhakathāyo ca pamādakhalitādhika paribhaṭṭhapāṭhānam nirākaraṇavasena visodhitā ceva paṭivisodhitā ca hutvā Buddhasāsanamuddaṇayantālaye samappitā suṭṭhu muddāpaṇāya.

Muddāpaṇakāle ca Piṭakattayamuddāpaṇe viya mahātheravarā mūlasodheyyapattapāṭhakehi gahaṭṭhapaṇḍitehi ceva dhammācariyabhikkhupaṇḍitehi ca anekavāram parisodhitam osānasodheyyapattam paṭivisodhitamūlapotthakena ceva aññehi sadesa desantarika Aṭṭhakathāpotthakehi ca vividhabyākaraṇādisatthehi ca punappunam saṁsandetvā suvisada paribyattakaṇḍavāra vākyaccheda saṅketatañca sampāpetvā mahatā parissamena osānasodhanamakamsu.

Evametāsampi ca suvisodhitānam Aṭṭhakathānam saṅgītibhāranitthārakā mahātherā nikhilamarammaraṭṭhe **Maso Yein Sayadawti** abhipākaṭam “Aggamahāpaṇḍito” pādhinā ceva “Abhidhajamahāraṭṭhagurū” pādhinā cāti dvīhi Marammaraṭṭhissarasamappitopādhīhi virājitam jātiyā chasattativassikam upasampadāya chappaññāsavassam “Bhadantasūriyābhivaṁsam” nāma mahātheravaram sabhāpatim katvā chaṭṭhasaṅgītikārapariyāpannehi therānutherehi saṅgamma paṭhanatthāya samārabhimsu yathā tam chaṭṭhasaṅgītidhammasaṅgāyanākāle.

Evametāsaṃ Aṭṭhakathānaṃ saṃsodhana-muddāpaṇa-sampañhanesu
karīyamānesu raṭṭhissaragaṇe aggamahāmacco **U Nu** nāmadheyyo
mahāsayo ceva Buddhasāsanasamitiyaṃ sampati bhaṇḍuppādako
raṭṭhissarānaṃ patinidhibhūto **U Basaw** nāmadheyyo
sāsanatṭhānikamahāmatto cāti-imepi taṃkiccasampādanāya Pāḷisaṅgītikāle
viya mahussāhena byāvaṭṭā honti.

Icevametāpi Aṭṭhakathāyo theravādīnekāyikavibudhappamukhānaṃ
satthāgamaratanālayasāragāhīnaṃ veyyākaraṇakesarīnaṃ
accantanimmalañāṇavārīnā paridhovitā saṅgamma ca paṭhitā, tā
vibudhappavarekagocarā vimuttirasassādādāyiniyo Piṭakattayassattham
paribyattaṃ pakāsentīyo ciraṃ vilasantiyo lokatthasiddhiṃ sādhayantūti.

Tenetaṃ vuccati—

1. Mūlakam pariyaṭṭiva, sāsanaṃ Mahesino.
Pariyaṭṭipamāṇā hi, ciraṃ saddhammasaṅgīhiti.
2. Tasmā taṃ rakkhituṃ therā, dhammasaṅgāhakā purā.
Rājāno upanissāya, akaṃsu dhammasaṅgahe.
3. **Paṭhamam** dhammasaṅgītiṃ, **Ajātasattur**ājino.
Anuggahena katvāna, pālayuṃ Jinasāsanam.
4. **Dutiyaṃ** tu tathā katvā, **Kālāsokassa** rājino.
Kāle tamupanissāya, pālayuṃ Jinasāsanam.
5. **Tatiyaṃ**pica katvāna, **Dhammāsokassa** rājino.
Anuggahena Buddhassa, sāsanaṃ abhipālayuṃ.
6. **Catutthim** pana Laṅkāyaṃ, **Vatṭagāmaṇir**ājino.
Kālamhi potthakāruḷham, katvāna pālayuṃ tathā.
7. Imasmiṃ Marammaraṭṭhepi, **Mindonnāma** narādhipam.
Rajjam samanussāntam, ratanattayamāmakaṃ.
8. Sannissāya mahātherā, thirasilā guṇākara.
Pañcamim dhammasaṅgītiṃ, karontā sāsanaṭṭhitim.

9. Patthayantā likhāpetvā, silāpaṭṭesu peṭakaṃ.
Vāyāmena mahantena, pālayuṃ Jinasāsanāṃ.
10. Itthaṃ purā mahātherā, rājāno cāpi dhammikā.
Sāsanāṃ paripālesuṃ, jīvitāṃ viya attano.
11. Tathāpi khalitādāni, dissanti Piṭakattaye.
Paramparāya lekhāya, sañjātā muddaṇena ca.
12. Disvāna te mahātherā, vācentāva Tipeṭakaṃ.
Vuccamānanayenevaṃ, cintesuṃ mantayimsu ca.
13. “Katvāna sādhukaṃ gantha-suddhikaṃ sāsānāyukaṃ.
Yaṃnūna dhammasaṅgītiṃ, kareyyāma mayāṃ” iti.
14. Etamatthaṃ suṇitvāna, **U Nu** nāma mahāsayo.
Marammavisaye **agga-mahāmacca**dhurandharo.
15. “Sāsānāyattakiccāni, sampādentā visesato.
Saṅgītiyaṅca therānaṃ, sampūrentā manorathaṃ.
16. Yathā rakkhimsu porāṇā, surājāno tathā mayāṃ.
Saṃrakkheyyāma Sambuddha-sāsanāṃ” iti cintiya.
17. Mahāmaccehi aññehi, saṅgamehi ca mantiya.
Suppatiṭṭhāpayitvāna, **Buddhasāsana**saṅgamaṃ.
18. Mahātherānamādāya, chandaṃ idha nivāsinaṃ.
Aññesu Sīhaḷādīsu, videsesu ca vāsinaṃ.
19. Kāretvā dhammasaṅgītiṃ, sodhetvā Satthusāsanāṃ.
Saddhammānuggahatthāya, karaṃ daḷhaparakkamaṃ.
20. **Sirīmaṅgalavikhyāte**, thalasmim pavare subhe.
Cetiyaśāvidūramhi, **Kaba Aye** itisaññino.
21. Guhāvesena kāretvā, mahāsaṅgītimandiraṃ.
Āvāsādiṅca bhikkhūnaṃ, kāresi muddaṇālayaṃ.
22. Ganthasaṃsodhanaṃ dhamma-saṅgītiyā tu paṇḍitā.
Mahātheravarākaṃsu, satimantā punappunaṃ.

23. Muddāpente ca passivā, mahātherehi pañcahi.
Sodheyypattamosānam, nimmalattam supāpitam.
24. Katvā suvisadam Buddha-bhāsitam Piṭakattayam.
Yathā muddāpitam āsi, sāsanattham Mahesino.
25. Tathā Aṭṭhakathāyo ca, samsodhetvā punappunam.
Suṭṭhu muddāpitā honti, sabbalokatthasiddhiyāti.

Mūlapaṇṇāsattakathā

Paṭhamabhāga

Mātikā		Piṭṭhāṅka	
Ganthārambhakathā	1
Nidānakathā	2

1. Mūlapariyāyavagga

1. Mūlapariyāyasuttavaṇṇanā	4
Suttanikkhepavaṇṇanā	16
Pathavīvāravaṇṇanā	26
Āpovārādivaṇṇanā	31
Bhūtavārādivaṇṇanā	33
Ākāsānañcāyatanavārādivaṇṇanā	37
Diṭṭhasutavārādivaṇṇanā	38
Ekattavārādivaṇṇanā	39
Sekkhavāradutiyanayavaṇṇanā	42
Khīṇāsavavāratatīyādinayavaṇṇanā	44
Tathāgatavārasattamanayavaṇṇanā	47
Tathāgatavāra-aṭṭhamanayavaṇṇanā	55
2. Sabbāsavasuttavaṇṇanā	62
Dassanāpahātabba-āsavavaṇṇanā	69
Saṃvarāpahātabba-āsavavaṇṇanā	77
Paṭisevanāpahātabba-āsavavaṇṇanā	80
Adhivāsanāpahātabba-āsavavaṇṇanā	81
Parivajjanāpahātabba-āsavavaṇṇanā	83
Vinodanāpahātabba-āsavavaṇṇanā	84

Mātikā	Piṭṭhaṅka
Bhāvanāpahātabba-āsavaṇṇanā	85
3. Dhammadāyādasuttavaṇṇanā	91
4. Bhayabheravasuttavaṇṇanā	113
Kāyakammantavārakathā	117
Vacīkammantavārādivaṇṇanā	118
Bhayabheravasenāsanādivaṇṇanā	122
Asammohavihāravaṇṇanā	125
Pubbabhāgapāṭipadādivaṇṇanā	127
Pubbenivāsakathāvaṇṇanā	129
Dibbacakkhuññānakathāvaṇṇanā	130
Āsavakkhayaññānakathāvaṇṇanā	131
Araññāvāsakāraṇavaṇṇanā	132
Desanānumodanāvaṇṇanā	133
Pasannākāraṇavaṇṇanā	135
Saraṇagamanakathā	136
Upāsakavidhikathā	140
5. Anaṅgaṇasuttavaṇṇanā	142
Sammutiparamatthadesanākathā	142
6. Ākaṅkheyyasuttavaṇṇanā	158
7. Vatthasuttavaṇṇanā	170
8. Sallekhasuttavaṇṇanā	185
9. Sammādiṭṭhisuttavaṇṇanā	199
Akusalakammapathavaṇṇanā	201
Kusalakammapathavaṇṇanā	206
Āhāravāraṇṇanā	210
Saccavāraṇṇanā	219
Jarāmaraṇavāraṇṇanā	219
Jātivāraṇṇanā	222

Mātikā		Piṭṭhaṅka
Bhavavāraṇṇanā	223
Upādānavāraṇṇanā	223
Taṇhāvāraṇṇanā	224
Vedanāvāraṇṇanā	225
Phassavāraṇṇanā	226
Saḷāyatanavāraṇṇanā	226
Nāmarūpavāraṇṇanā	226
Viññānavāraṇṇanā	227
Saṅkhāravāraṇṇanā	227
Avijjāvāraṇṇanā	228
Āsavavāraṇṇanā	229
10. Satipaṭṭhānasuttavaṇṇanā	230
Uddesavāraṇṇanā	232
Kāyānupassanā-ānāpānāpabbavaṇṇanā	251
Iriyāpathapabbavaṇṇanā	255
Catusampajaññapabbavaṇṇanā	258
Paṭikūlamānasikārapabbavaṇṇanā	275
Dhātumanasikārapabbavaṇṇanā	275
Navasivathikapabbavaṇṇanā	277
Vedanānupassanāvaṇṇanā	279
Cittānupassanāvaṇṇanā	284
Dhammānupassanānīvaraṇapabbavaṇṇanā	285
Khandhapabbavaṇṇanā	291
Āyatanapabbavaṇṇanā	291
Bojjhaṅgapabbavaṇṇanā	293
Catusaccapabbavaṇṇanā	304

Mātikā		Piṭṭhaṅka
2. Sīhanādavagga		
1. Cūḷasīhanādasuttavaṇṇanā	307
2. Mahāsīhanādasuttavaṇṇanā	325
Vesālinagaravaṇṇanā	325
Uttarimanussadhammādivaṇṇanā	327
Dasabalaññādivaṇṇanā	331
Aṭṭhaparisaṇṇanā	339
Catuyonivaṇṇanā	341
Pañcagativaṇṇanā	341
Ñāṇappavattākāraṇṇanā	342
Āsavakkhayaṇṇanā	345
Dukkarakārikādisuddhivaṇṇanā	346
Āhārasuddhivaṇṇanā	354
Saṃsārasuddhi-ādivaṇṇanā	356
3. Mahādukkhakkhandhasuttavaṇṇanā	359
4. Cūḷadukkhakkhandhasuttavaṇṇanā	365
5. Anumānasuttavaṇṇanā	370
6. Cetokhilaṇṇanā	372
7. Vanapatthapariyāyasuttavaṇṇanā	376
8. Madhupiṇḍikasuttavaṇṇanā	377
9. Dvedhāvittakkasuttavaṇṇanā	383
10. Vitakkasaṅghānasuttavaṇṇanā	391

Mūlapaṇṇāsaṭṭhakathāya paṭhamabhāge mātikā niṭṭhitā.

Majjhimanikāya

Mūlapaṇṇāsattakathā

Namo tassa Bhagavato Arahato Sammāsambuddhassa.

Ganthārambhakathā

Karuṇāsītalahadayaṃ, paññāpajjotavihatamohatamaṃ.
Sanarāmaralokagaruṃ, vande **Sugataṃ** gativimuttaṃ.

Buddhopi Buddhabhāvaṃ, bhāvetvā ceva sacchikatvā ca.
Yaṃ upagato gatamalaṃ, vande tamanuttaraṃ **dhammaṃ**.

Sugatassa orasānaṃ, puttānaṃ mārasenamathanānaṃ.
Aṭṭhannampi samūhaṃ, sirasā vande **ariyasamghaṃ**.

Iti me pasannamatino, ratanattayavandanāmayaṃ puññaṃ.
Yaṃ suvihatantarāyo, hutvā tassānubhāvena.

Majjhimapamāṇasuttaṃ, nīkitassa idha **Majjhimāgamavarassa**.
Buddhānubuddhasamva, ṇṇitassa paravādamathanassa.

Atthappakāsanatthaṃ, **Aṭṭhakathā** ādito vasisatehi.
Pañcahi yā saṅgītā, anusaṅgītā ca pacchāpi.

Sīhaḷadīpaṃ pana ābha, tātha vasiṇā Mahāmahindena.
Ṭhapitā Sīhaḷabhāsāya, dīpavāsīnamatthāya.

Apanetvāna tatohaṃ, Sīhaḷabhāsaṃ manoramāṃ bhāsaṃ.
Tantinayānucchavikaṃ, āropento vigatadosaṃ.

Samayaṃ avilomento, therānaṃ theravaṃsadīpānaṃ¹.
Sunipuṇavinicchayānaṃ, Mahāvihāre nivāsīnaṃ².

Hitvā punappunāgata, matthaṃ atthaṃ pakāsayissāmi.
Sujanassa ca tuṭṭhatthaṃ, ciraṭṭhitatthañca dhammassa.

Sīlakathā dhutadhammā, kammaṭṭhānāni ceva sabbāni.
Ariyāvidhānasahito, jhānasamāpattivitthāro.

Sabbā ca abhiññāyo, paññāsaṅkalananicchayo ceva.
Khandhādhatāyatani, ndriyāni ariyāni ceva cattāri.

Saccāni paccayākā, radesanā suparisuddhanipuṇanayā.
Avimuttatantimaggā, vipassanābhāvanā ceva.

Iti pana sabbam yasmā, **Visuddhimagge** mayā suparisuddham.
Vuttam tasmā bhiyyo, na tam idha vicārayissāmi.

“Majjhe **Visuddhimaggo**, esa catunnampi āgamānañhi.
Ṭhatvā pakāsayissati, tattha yathābhāsitamattham”.

Iceva kato tasmā, tampi gahetvāna saddhimetāya.
Aṭṭhakathāya vijānatha, majjhimasāṅgītiyā atthanti.

Nidānakathā

1. Tattha **Majjhimasāṅgīti** nāma paṇṇāsato Mūlapaṇṇāsā
Majjhimapāṇṇāsā Uparipaṇṇāsāti paṇṇāsattayasaṅgahā. Vaggato ekekāya
paṇṇāsāya pañca pañca vagge katvā pannarasavaggasamāyogā. Suttato
diyaddhasuttasatam dve ca suttantā. Padato tevīsuttarapañcasatādhikāni
asītipadasahassāni. Tenāhu porāṇā—

“Asītipadasahassāni, bhiyyo pañcasatāni ca.
Puna tevīsati vuttā, padamevaṃ vavatthitan”ti.

1. Theravaṃsappadīpānaṃ (Syā)

2. Mahāvihārādhivāsīnaṃ (Sī) Mahāvihārāvāsīnaṃ (Syā)

Akkharato satta akkharasatasahassāni cattālīsañca saḥassāni
 tepaññāsañca akkharāni. Bhāṇavārato asīti bhāṇavārā tevīsapadādhiko ca
 upaḍḍhabhāṇavāro. Anusandhito pucchānusandhi-
 ajjhāsayānusandhiyathānusandhivasena saṅkhepato tividho anusandhi.
 Vitthārato panettha tīṇi anusandhisahassāni nava ca satāni honti. Tenāhu
 porāṇā—

“Tīṇi sandhisahassāni, tathā navasatāni ca.
 Anusandhinayā ete, majjhimassa pakāsītā”ti.

Tattha paṇṇāsāsu **Mūlapaṇṇāsā** ādi, vaggesu **Mūlapariyāyavaggo**,
 suttesu **Mūlapariyāyasuttaṃ**. Tassāpi “evaṃ me sutan”ti-ādikaṃ āyasmatā
 Ānandena paṭhamamahāsaṅgītikāle vuttaṃ nidānamādi. Sā panesā
 paṭhamamahāsaṅgīti Sumaṅgalavilāsiniyā Dīghanikāyaṭṭhakathāya ādimhi
 vitthāritā. Tasmā sā tattha vitthāritanayeneva veditabbā.

1. Mūlapariyāyavagga

1. Mūlapariyāyasuttavaṇṇanā

Yaṃ panetaṃ “evaṃ me sutan”ti-ādikaṃ nidānaṃ. Tattha evanti nipātapadaṃ. Meti-ādini nāmapadāni. Ukkatthāyaṃ viharatīti ettha vīti upasaggapadaṃ, haratīti ākhyātapadanti iminā tāva nayena padavibhāgo veditabbo.

Atthato pana evaṃsaddo tāva upamūpadesasampahaṃsanagaraḥṇavacana sampañiggahākāra nidassanā vadhāraṇādi-anekatthappabhedo. Tathāhesa “evaṃ jātena maccena, kattabbaṃ kusalaṃ bahun”ti evamādisu¹ upamāyaṃ āgato. “Evaṃ te abhikkamitabbaṃ, evaṃ te paṭikkamitabbaṃ”ti-ādīsu² upadeso. “Evametaṃ Bhagavā, evametaṃ Sugatā”ti-ādīsu³ sampahaṃsane. “Evamevaṃ panāyaṃ vasalī yasmim vā tasmim vā tassa muṇḍakassa samaṇakassa vaṇṇaṃ bhāsati”ti-ādīsu⁴ garaḥṇe. “Evaṃ bhanteti kho te bhikkhū Bhagavato paccassosun”ti-ādīsu⁵ vacanasampañiggāhe. “Evaṃ byākho ahaṃ bhante Bhagavatā dhammaṃ desitaṃ ājānāmī”ti-ādīsu⁶ ākāre. “Ehi tvaṃ māṇavaka, yena samaṇo Ānando tenupasaṅkama, upasaṅkamtivā mama vacanena samaṇaṃ Ānandaṃ appābādhaṃ appātaṅkaṃ lahuṭṭhānaṃ balaṃ phāsuvihāraṃ puccha ‘Subho māṇavo Todeyyaputto bhavantaṃ Ānandaṃ appābādhaṃ appātaṅkaṃ lahuṭṭhānaṃ balaṃ phāsuvihāraṃ pucchati’ti, evaṃca vadehi sādhu kira bhavaṃ Ānando yena Subhassa māṇavassa Todeyyaputtassa nivesanaṃ, tenupasaṅkamatu anukampaṃ upādāyā”ti-ādīsu⁷ nidassane. “Taṃ kiṃ maññatha kālāmā, ime dhammā kusalā vā akusalā vāti. Akusalā bhante. Sāvajjā vā anavajjā vāti. Sāvajjā bhante. Viññugarahitā vā viññuppasatthā vāti. Viññugarahitā bhante. Samattā samādinā ahitāya dukkhāya saṃvattanti no vā, kathaṃ vo ettha hotīti. Samattā bhante samādinā ahitāya dukkhāya saṃvattanti, evaṃ no ettha hotī”ti-ādīsu⁸ avadhāraṇe. Svāyamidha ākāranidassanāvadhāraṇesu daṭṭhabbo.

1. Khu 1. 21 piṭṭhe.

4. Saṃ 1. 162 piṭṭhe.

7. Dī 1. 188 piṭṭhe.

2. Am 1. 439 piṭṭhe.

5. Ma 1. 1 piṭṭhe.

3. Am 1. 193 piṭṭhe.

6. Ma 1. 325 piṭṭhe.

8. Am 1. 190 piṭṭhe.

Tattha ākāraṭṭhena **evaṃ**saddena etamatthaṃ dīpeti—nānāyanipuṇaṃ anekajjhāsayasamuṭṭhānaṃ atthabyañjanasampannaṃ vividhapāṭihāriyaṃ dhammatthadesanāpaṭivedhagambhīraṃ sabbasattānaṃ sakasakabhāsānurūpato sotapathamāgacchantāṃ tassa Bhagavato vacanaṃ sabbappakārena ko samattho viññātum, sabbathāmena pana sotukāmataṃ janetvāpi evaṃ me sutāṃ, mayāpi ekenākārena sutanti.

Nidassanaṭṭhena “nāhaṃ sayambhū, na mayā idaṃ sacchikatan”ti attānaṃ parimocento evaṃ me sutāṃ, mayāpi evaṃ sutanti idāni vattabbaṃ sakalaṃ suttaṃ nidasseti.

Avadhāraṇaṭṭhena “etadaggaṃ bhikkhave mama sāvakānaṃ bhikkhūnaṃ bahussutānaṃ yadidaṃ Ānando, gatimantānaṃ, satimantānaṃ, dhitimantānaṃ, upaṭṭhākānaṃ yadidaṃ Ānando”ti¹ evaṃ Bhagavatā “āyasmā Ānando atthakusalo dhammakusalo byañjanakusalo niruttikusalo pubbāparakusalo”ti² evaṃ Dhammasenāpatinā ca pasatthabhāvānurūpaṃ attano dhāraṇabalaṃ dassento sattānaṃ sotukamyataṃ janeti “evaṃ me sutāṃ, tañca kho atthato vā byañjanato vā anūnamanadhikaṃ, evameva na aññathā daṭṭhabbanti.

Mesaddo tīsu atthesu dissati. Tathā hissa “gāthābhigītaṃ me abhojaneyyan”ti-ādīsu³ mayāti attho. “Sādhu me bhante Bhagavā saṃkhittena dhammaṃ desetū”ti-ādīsu⁴ mayhanti attho. “Dhammadāyādā me bhikkhave bhavathā”ti-ādīsu⁵ mamāti attho, idha pana “mayā sutan”ti ca “mama sutan”ti ca atthadvaye yujjati.

Sutanti yaṃ sutasaddo sa-upasaggo ca anupasaggo ca gamanavissutakilinna upacitānuyoga sotaviññeyya sotadvārānusāra viññātādi-anekatthappabhedo. Tathā hissa “senāya pasuto”ti-ādīsu gacchantoti attho. “Sutadhammassa passato”ti-ādīsu⁶ vissutadhammassāti attho, “avassutā avassutassā”ti-ādīsu⁷ kilinnā kilinnassāti attho. “Tumhehi puññaṃ pasutaṃ anappakan”ti-ādīsu⁸

1. Am 1. 25 piṭṭhe.

4. Sam 2. 285 piṭṭhe.

7. Vi 2. 276 piṭṭhe.

2. Am 1. 177 piṭṭhe.

5. Ma 1. 15 piṭṭhe.

3. Khu 1. 292 piṭṭhe.

6. Khu 1. 88 piṭṭhe.

8. Khu 1. 9 piṭṭhe.

upacitanti attho. “Ye jhānapasutā dhīrā”¹ti-ādīsu¹ jhānānuyuttāti attho. “Diṭṭham sutam mutan”²ti-ādīsu² sotaviññeyyanti attho. “Sutadharo sutasannicayo”³ti-ādīsu³ sotadvārānu sāraviññātadharoti attho. Idha panassa sotadvārānusārena “upadhāritan”⁴ti vā “upadhāraṇan”⁵ti vāti attho. Mesaddassa hi mayāti atthe sati “evaṃ mayā sutam sotadvārānusārena upadhāritan”⁶ti yujjati. Mamāti atthe sati “evaṃ mama sutam sotadvārānusārena upadhāraṇan”⁷ti yujjati.

Evametesu tīsu padesu **evanti** sotaviññāṇādiviññāṇakiccanidassanam. **Meti** vuttaviññāṇasamaṅgipuggalanidassanam. **Sutanti** assavanabhāvappaṭikkhepato anūnānadhikāvīparītaggahaṇanidassanam. Tathā **evanti** tassā sotadvārānusārena pavattāya viññāṇavīthiyā nānappakārena ārammaṇe pavattibhāvappakāsanam. **Meti** attappakāsanam. **Sutanti** dhammappakāsanam. Ayañhettha saṅkhepo “nānappakārena ārammaṇe pavattāya viññāṇavīthiyā mayā na aññam kataṃ, idaṃ pana kataṃ, ayaṃ dhammo suto”⁸ti.

Tathā **evanti** niddisittabbappakāsanam. **Meti** puggalappakāsanam. **Sutanti** puggalakiccappakāsanam. Idaṃ vuttam hoti—yaṃ suttam niddisissāmi, taṃ mayā evaṃ sutanti.

Tathā **evanti** yassa cittasantānassa nānākārappavattiyā nānatthabyañjanaggahaṇam hoti, tassa nānākāraniddeso. **Evanti** hi ayaṃ ākārapaññatti. **Meti** kattuniddeso. **Sutanti** visayaniddeso. Ettāvata nānākārappavattena cittasantānena taṃsamaṅgino kattuvīsaye gahaṇasanniṭṭhānam kataṃ hoti.

Atha vā **evanti** puggalakiccaniddeso. **Sutanti** viññāṇakiccaniddeso. **Meti** ubhayakiccayuttapuggalaniddeso. Ayaṃ panettha saṅkhepo—mayā savanakiccaviññāṇasamaṅginā puggalena viññāṇavasena laddhasavanakiccavohārena sutanti.

Tattha **evanti** ca **meti** ca saccikaṭṭhaparamatthavasena avijjamānapanāññatti. Kiñhettha taṃ paramatthato atthi, yaṃ evanti vā meti vā niddesam labhetha.

1. Khu 1. 40 Dhammapade.

2. Ma 1. 189 piṭṭhe.

3. Ma 1. 277 piṭṭhe.

Sutanti vijjamānapaññatti. Yaṃ hi taṃ ettha sotena upaladdhaṃ, taṃ paramatthato vijjamānanti.

Tathā **evanti** ca **meti** ca taṃ taṃ upādāya vattabbato upādāpaññatti. **Sutanti** diṭṭhādīni upanidhāya vattabbato upanidhāpaññatti. Ettha ca **evanti** vacanena asammohaṃ dīpeti. Na hi sammūlho nānappakārapaṭivedhasamattho hoti. **Sutanti** vacanena sutassa asammosaṃ dīpeti. Yassa hi sutam̐ sammuṭṭham̐ hoti, na so kālantarena mayā sutanti paṭijānāti. Iccassa asammohena paññāsiddhi, asammosena pana satisiddhi. Tatha paññā pubbaṅgamāya satiyā byañjanāvadhāraṇasamatthatā, satipubbaṅgamāya paññāya atthapaṭivedhasamatthatā. Tadubhayasamatthatāyogena atthabyañjanasampannassa dhammakosassa anupālanasamatthato dhammabhaṇḍāgārikattasiddhi.

Aparo nayo—**evanti** vacanena yoniso manasikāraṃ dīpeti, ayoniso manasikaroto hi nānappakārapaṭivedhābhāvato. **Sutanti** vacanena avikkhepaṃ dīpeti, vikkhittacittassa savanābhāvato. Tathā hi vikkhittacitto puggalo sabbasampattiyā vuccamānopi “na mayā sutam̐, puna bhaṇathā”ti bhaṇati. Yoniso manasikārena cettha attasammāpaṇidhim̐ pubbe ca katapuññatam̐ sādheti, sammā apaṇihitattassa pubbe akatapuññassa vā tadabhāvato. Avikkhepena pana saddhammassavanaṃ sappurisūpanissayañca sādheti. Na hi vikkhittacitto sotum̐ sakkoti, na ca sappurise anupassayamānassa savanam̐ atthīti.

Aparo nayo—yasmā **evanti** yassa cittasantānassa nānākārappavattiyā nānatthabyañjanaggahaṇam̐ hoti, tassa nānākāraniddesoti vuttam̐. So ca evam̐ bhaddako ākāro na sammā appaṇihittatano pubbe akatapuññassa vā hoti, tasmā **evanti** iminā bhaddakena ākārena pacchimakakkadvayasampattim̐ attano dīpeti, **sutanti** savanayogena purimacakkadvayasampattim̐. Na hi appatirūpadese vasato sappurisūpanissayavirahitassa vā savanam̐ atthi, iccassa pacchimakakkadvayasiddhiyā āsayasuddhi siddhā hoti. Purimacakkadvayasiddhiyā payogasuddhi. Tāya ca āsayasuddhiyā adhigamabyattisiddhi, payogasuddhiyā āgamabyattisiddhi. Iti

payogāsayasuddhassa āgamādhigamasampannassa vacanaṃ aruṇaggaṃ¹ viya sūriyassa udayato yonisomanasikāro viya ca kusalakammasa arahati Bhagavato vacanassa pubbaṅgamaṃ bhavitunti t̥hāne nidānaṃ t̥hapento **evaṃ me sutanti**-ādimāha.

Aparo nayo—**evanti** iminā nānappakārapaṭivedhadīpakena vacanena attano atthapaṭibhānapaṭisambhidāsampattisabbhāvaṃ dīpeti. **Sutanti** iminā sotabbabhedapaṭivedhadīpakena dhammaniruttipaṭisambhidāsampattisabbhāvaṃ. **Evanti** ca idaṃ yonisomanasikāradīpakaṃ vacanaṃ bhāsamāno “ete mayā dhammā manasānupekkhitā diṭṭhiyā suppaṭividdhā”ti dīpeti. **Sutanti** idaṃ savanayogadīpakaṃ vacanaṃ bhāsamāno “bahū mayā dhammā sutā dhātā² vacasā paricitā”ti dīpeti. Tadubhayenapi atthabyañjanaparīpurim dīpento savane ādaraṃ janeti. Atthabyañjanaparipuṇṇaṃhi dhammaṃ ādarena assuṇanto mahatā hitā paribāhiro hotīti ādaraṃ janetvā sakkaccaṃ dhammo sotabboti.

“Evaṃ me sutan”ti iminā pana sakalena vacanena āyasmā Ānando Tathāgatappaveditaṃ dhammaṃ attano adahanto asappurisabhūmim atikkamati, sāvakattaṃ paṭijānanto sappurisabhūmim okkamati. Tathā asaddhammā cittaṃ vuṭṭhāpeti, saddhamme cittaṃ patiṭṭhāpeti. “Kevalaṃ sutamevettaṃ mayā tasseva pana Bhagavato vacanaṃ”ti dīpento attānaṃ parimoceti, Satthāraṃ apadisati, Jinavacanaṃ appeti, dhammanettaṃ patiṭṭhāpeti.

Api ca “evaṃ me sutan”ti attanā uppāditabhāvaṃ appaṭijānanto purimavacanaṃ³ vivaranto “sammukhā paṭiggahitamidaṃ mayā tassa Bhagavato Catuvesārajjavisāradassa Dasabaladharassa Āsabhaṭṭhānaṭṭhāyino⁴ Sihanādanādino Sabbasattuttamassa Dhammissarassa Dhammarājassa Dhammādhīpatino Dhammadīpassa Dhammasaraṇassa Saddhammavaracakkavattino Sammāsambuddhassa vacanaṃ, na ettha atthe vā dhamme vā pade vā byañjane vā kaṅkhā vā vimati vā kattabbā”ti sabbadevamanussānaṃ imasmim dhamme assaddhiyaṃ vināseti, saddhāsampadaṃ uppādetīti. Tenetaṃ vuccati—

1. Aruṇaggaṃ (Sī)

3. Purimasavanaṃ (Sī, Syā)

2. Dhātā (Sī, Syā)

4. Āsabhaṭṭhānaṭṭhāyino (Sī, Syā)

“Vināsayati assaddhaṃ, saddhaṃ vaḍḍheti sāsane.
Evaṃ me sutamiccevaṃ, vadaṃ Gotamasāvako”ti.

Ekanti gaṇanaparicchedaniddeso. **Samayanti** paricchinnaniddeso. **Ekam**
samayanti aniyamitaparidīpanaṃ. Tattha **samayasaddo**—

Samavāye khaṇe kāle, samūhe hetudiṭṭhisu.
Paṭilābhe pahāne ca, paṭivedhe ca dissati.

Tathā hissa “appeva nāma svepi upasaṅkameyyāma kālañca samayañca
upādāyā”ti evamādīsu¹ samavāyo attho. “Ekova kho bhikkhave khaṇo ca
samayo ca brahmacariyavāsāyā”ti-ādīsu² khaṇo. “Uṇhasamayo
parilāhasamayo”ti-ādīsu³ kālo. “Mahāsamayo pavanasmim”ti-ādīsu⁴
samūho. “Samayopi kho te Bhaddāli appaṭividdho ahoṣi, Bhagavā kho
Sāvattthiyaṃ viharati, Bhagavāpi maṃ jānissati ‘Bhaddāli nāma bhikkhu
Satthusāsane sikkhāya na paripūrakārī’ti, ayampi kho te Bhaddāli samayo
appaṭividdho ahoṣī”ti-ādīsu⁵ hetu. “Tena kho pana samayena uggāhamāno
paribbājako samaṇamuṇḍikāputto samayappavādake tindukācīre ekasālake
Mallikāya ārāme paṭivasatī”ti-ādīsu⁶ diṭṭhi.

“Diṭṭhe dhamme ca yo attho, ye cattho samparāyiko.
Atthābhisamayā dhīro, paṇḍitoti pavuccatī”ti—

Ādīsu⁷ paṭilābho. “Sammā mānābhisamayā antamakāsi dukkhassā”ti-
ādīsu⁸ pahānaṃ. “Dukkhassa pīḷanaṭṭho saṅkhataṭṭho santāpaṭṭho
vipariṇāmaṭṭho abhisamayaṭṭho”ti-ādīsu⁹ paṭivedho. Idha panassa kālo attho.
Tena saṃvacchara-
utumāsaddhamāsarattidivapubbaṇhamajjhanhikasāyanhapaṭhamamajjhimapa
cchimayāmamuhuttādīsu kālappabhedabhūtesu samayesu ekaṃ समयanti
dīpeti.

Tattha kiñcāpi etesu saṃvaccharādīsu samayesu yaṃ yaṃ suttaṃ yaṃhi
yaṃhi saṃvacchare utumhi māse pakkhe rattibhāge divasabhāge vā vuttaṃ,
sabbaṃ taṃ

1. Dī 1. 188 piṭṭhe.

2. Am 3. 61 piṭṭhe.

3. Vi 2. 155 piṭṭhe.

4. Dī 2. 201 piṭṭhe.

5. Ma 2. 102 piṭṭhe.

6. Ma 2. 214 piṭṭhe.

7. Saṃ 1. 90 piṭṭhe.

8. Ma 1. 15 piṭṭhe.

9. Khu 9. 293 Paṭisambhidāmagge.

therassa suviditaṃ suvatthāpitaṃ paññāya. Yasmā pana “evaṃ me suttaṃ asukasamvacchare asuka-utumhi asukamāse asukapakkhe asukarattibhāge asukadivasabhāge vā”ti evaṃ vutte na sakkā sukkena dhāretuṃ vā uddisituṃ vā uddisāpetuṃ vā, bahu ca vattabbaṃ hoti, tasmā ekeneva padena tamatthaṃ samodhānetvā “ekaṃ samayan”ti āha.

Ye vā ime gabbhokkantisamayo jātisamayo saṃvegasamayo abhinikkhamanasamayo dukkarakārikasamayo māravijayasamayo abhisambodhisamayo diṭṭhadhammasukhavihārasamayo desanāsamayo parinibbānasamayoti evamādayo Bhagavato devamanussesu ativiya suppakāsā¹ anekakālappabhedā eva samayā, tesu samayesu desanāsamayaśākhātāṃ ekaṃ samayanti dīpeti. Yo cāyaṃ ñāṇakarūṇākkiccasamayesu karūṇākkiccasamayo, attahitaparahitapaṭipattisamayesu parahitapaṭipattisamayo, sannipatitānaṃ karaṇīyadvayasamayesu dhammikathāsamayo, desanāpaṭipattisamayesu desanāsamayo, tesupi samayesu aññatarāṃ sandhāya “ekaṃ samayan”ti āha.

Kasmā panettha yathā Abhidhamme “yasmim̐ samaye kāmāvacaran”ti ca ito aññesu suttapadesu “yasmim̐ samaye bhikkhave bhikkhu vivicceva kāmehi”ti ca bhummavacanena niddeso kato, Vinaye ca “tena samayena Buddho Bhagavā”ti karaṇavacanena, tathā akatvā “ekaṃ samayan”ti upayogavacananiddeso katoti. Tattha tathā idha ca aññathā atthasambhavato. Tattha hi Abhidhamme ito aññesu suttapadesu ca adhikaraṇattho bhāvenabhāvalakkhaṇattho ca sambhavati. Adhikaraṇaṃhi kālattho ca samūhattho ca samayo, tattha vuttānaṃ phassādidhammānaṃ khaṇasamavāya hetusaṅkhātassa ca samayassa bhāvena tesāṃ bhāvo lakkhīyati, tasmā tadatthajotanatthaṃ tattha bhummavacananiddeso kato.

Vinaye ca hetu-attho karaṇattho ca sambhavati. Yo hi so sikkhāpadapaññattisamayo Sāriputtādīhipi dubbhāṇeyyo, tena samayena hetubhūtena karaṇabhūtena ca sikkhāpadāni paññāpayanto sikkhāpadapaññattihetuṃca apekkhamāno Bhagavā tattha tattha vihāsi, tasmā tadatthajotanatthaṃ tattha karaṇavacanena niddeso kato.

1. Pakāsā (Sī)

Idha pana aññasmiṅca evaṃjātike accantasam̐yogattho sambhavati. Yañhi samayaṃ Bhagavā imaṃ aññaṃ vā suddantaṃ desesi, accantameva taṃ samayaṃ karuṇāvihārena vihāsi, tasmā tadatthajotanaṭṭhaṃ idha upayogavacananiddeso katoti.

Tenetaṃ vuccati—

“Taṃ taṃ atthamapekkhitvā, bhummena karaṇena ca.
Aññaṭṭa samayo vutto, upayogena so idhā”ti.

Porāṇā pana vaṇṇayanti “tasmim̐ samaye”ti vā “tena samayenā”ti vā “ekaṃ samayan”ti¹ vā abhilāpamattabhedo esa, sabbattha bhummameva atthoti. Tasmā “ekaṃ samayan”ti vuttepi “ekasmim̐ samaye”ti attho veditabbo.

Bhagavāti garu. Garuñhi loke “Bhagavā”ti vadanti. Ayaṅca sabbaguṇavisiṭṭhatāya sabbasattānaṃ garu, tasmā “Bhagavā”ti veditabbo. Porāṇehipi vuttaṃ—

“Bhagavāti vacanaṃ seṭṭhaṃ, Bhagavāti vacanamuttamaṃ.
Garugāravayutto so, Bhagavā tena vuccatī”ti.

Api ca—

“Bhāgyavā bhaggavā yutto, bhagehi ca vibhattavā.
Bhattavā vantaḡamano, bhavesu Bhagavā tato”ti—

Imissā gāthāya vasenassa padassa vitthārato attho veditabbo. So ca **Visuddhimagge** Buddhānussatiniddese vuttoyeva.

Ettāvatā cettha **evaṃ me sutanti** vacanena yathāsutaṃ dhammaṃ dassento² Bhagavato dhammasarīraṃ paccakkhaṃ karoti. Tena “nayidaṃ atikkantasatthukaṃ pāvacanaṃ, ayaṃ vo Satthā”ti Satthu adassanena ukkaṇṭhitaṃ janaṃ samassāseti.

Ekaṃ samayaṃ Bhagavāti vacanena tasmim̐ samaye Bhagavato avijjamānabhāvaṃ dassento rūpakāyapariniḡbānaṃ sādheti. Tena

1. Taṃ samayanti (Syā, Ka)

2. Desento (Sī, Syā)

“evaṃvidhassa nāma ariyadhammassa desako Dasabaladharo vajjiraṅghātasamānakāyo sopi Bhagavā parinibbuto, kena aññena jīvite āsā janetabbā”ti jīvitamadammattam janam samvejeti, saddhamme cassa ussāham janeti.

Evanti ca bhaṅanto desanāsampattim niddisati. **Me sutanti** sāvakasampattim. **Ekam samayanti** kālasampattim. **Bhagavāti** desakasampattim.

Ukkaṭṭhāyam viharatīti ettha ukkāti dīpikā, tañca nagaram “maṅgaladivaso sukhaṇo sunakkhattam mā atikkamī”ti rattimpi¹ ukkāsu ṭhitāsu māpitattā ukkaṭṭhāti vuccati. Daṇḍadīpikāsu jāletvā dhāriyamānāsu māpitattāti vuttam hoti, tassam **Ukkaṭṭhāyam**. Samīpatthe cetam bhummavacanam. **Viharatīti** avisesena iriyāpathadibbrahma-ariyavihāresu aññataravihārasamaṅgiparidīpanametam. Idha pana ṭhānagamananisinnasayanappabhedesu iriyāpathesu aññatara-iriyāpathasamāyogaparidīpanam, tena ṭhitopi gacchantopi nisinnopi sayānopi Bhagavā viharaticceva veditabbo. So hi Bhagavā ekam iriyāpathabāddhanam aññena iriyāpathena vicchinditvā aparipatantam attabhāvam harati pavatteti, tasmā viharatīti vuccati.

Subhagavaneti ettha subhagattā **subhagam**, sundarasirikattā sundarakāmatā cāti vuttam hoti. Tassa hi vanassa sirisampattiyā manussā annapānādīni ādāya divasam² tattheva chaṇasamajja-ussave karontā bhogasukham anubhonti, sundarasundare cettha kāme patthenti “puttam labhāma dhītaram labhāmā”ti, tesam tam tattheva hoti, evam tam sundarasirikattā sundarakāmatā ca **subhagam**. Api ca bahujanakantatāyapi subhagam. Vanayatīti³ **vanam**, attasampadāya sattānam bhattim kāreti, attani sineham uppādetīti attho. Vanute iti vā **vanam**, nānāvidhakusumagadhasammodamattakokilādivihaṅgamābhīrutehi mandamālūtacalitarukkhāsākhāvīṭapapallavapalāsehi ca “etha mam paribhuñjathā”ti sabbapāṇino yācati viyāti attho. Subhagañca tam vanañcāti **Subhagavanam**. Tasmim **Subhagavane**. Vanañca nāma ropimam sayamjātanti duvidham, tattha

1. Rattim hi (Syā)

2. Rattindivam (Si)

3. Vanatīti (Ka)

Veḷuvanajetavanādīni ropimāni. Andhavanamahāvana-añjanavanādīni sayam jātāni. Idampi sayamjātanti veditabbaṃ.

Sālarājamūleti ettha sālarukkhopi sāloti vuccati. Yathāha “seyyathāpi bhikkhave gāmassa vā nigamassa vā avidūre mahantaṃ sālavanaṃ, tañcassa eḷaṇḍehi¹ sañchannaṃ”ti² “antarena yamakasālānaṃ”ti ca³ vanappatijeṭṭhakarukkhopi. Yathāha—

“Taveva deva vijite, tavevuyyānabhūmiyā.

Ujuvaṃsā mahāsālā, nīlobhāsā manoramā”ti⁴.

Yo koci rukkhopi. Yathāha “atha kho taṃ bhikkhave māluvabījaṃ aññatarasmim sālāmūle nipateyyā”ti⁵. Idha pana vanappatijeṭṭhakarukkhohi adhippeto. Rājasaddo panassa tameva jeṭṭhakabhāvaṃ sādheti. Yathāha “suppatiṭṭhitassa kho brāhmaṇa Dhammika nigrodharājassā”ti⁶. Tattha dvedhā samāso, sālānaṃ rājātipi **sālarājā**, sālo ca so jeṭṭhakaṭṭhena rājā ca itipi **sālarājā**. **Mūlanti** samīpaṃ. Ayaṃ hi mūlasaddo “mūlāni uddhareyya antamaso usiraṇālimattānipi”ti-ādīsu⁷ mūlamūle dissati. “Lobho akusalamūlan”ti-ādīsu⁸ asādhāraṇahetumhi. “Yāva majjhanhike kāle chāyā pharati, nivāte paṇṇāni patanti, ettāvata rūkkhamūlan”ti-ādīsu samīpe. Idha pana samīpe adhippeto, tasmā sālarājassa samīpeti evamettha attho daṭṭhabbo.

Tattha siyā—yadi tāva Bhagavā Ukkaṭṭhāyaṃ viharati, “Subhagavane sālārājamūle”ti na vattabbaṃ, atha tattha viharati, “Ukkaṭṭhāyaṃ”ti na vattabbaṃ, na hi sakkā ubhayattha ekaṃ samayaṃ viharitunti. Na kho panetaṃ evaṃ daṭṭhabbaṃ.

Nanu avocumha “samīpatthe cetam bhumavacanan”ti. Tasmā yathā Gaṅgāyamunādīnaṃ samīpe goyūthāni carantāni “Gaṅgāya caranti, Yamunāya caranti”ti vuccanti, evamidhāpi yadidaṃ Ukkaṭṭhāya samīpe Subhagavanaṃ⁹ sālārājamūlaṃ, tattha viharanto vuccati “Ukkaṭṭhāyaṃ viharati Subhagavane sālārājamūle”ti.

1. Eḷaṇḍehi (Syā, Ka)

4. Khu 6. 53 piṭṭhe.

7. Am 1. 519 piṭṭhe.

2. Ma 1. 176 piṭṭhe.

5. Ma 1. 380 piṭṭhe.

8. Dī 3. 180 piṭṭhe.

3. Dī 2. 111 piṭṭhe.

6. Am 2. 324 piṭṭhe.

9. Subhagavanā (Ka)

Gocaragāmanidassanatthañhissa ukkaṭṭhāvacaṇaṃ,
pabbajitānurūpanivāsaṭṭhānanidassanatthaṃ sesavacaṇaṃ.

Tattha Ukkaṭṭhākittanena āyasmā Ānando Bhagavato gahaṭṭhānuggahakaraṇaṃ dasseti, Subhagavanādikittanena pabbajitānuggahakaraṇaṃ. Tathā purimena paccayaggahaṇato attakilamathānuyogavivajjanaṃ, pacchimena vatthukāmappahānato kāmasukhallikānuyogavivajjanupāyadassanaṃ¹. Purimena ca dhammadesanābhīyogaṃ, pacchimena vivekādhimuttim. Purimena karuṇāya upagamaṇaṃ, pacchimena paññāya apagamaṇaṃ. Purimena sattānaṃ hitasukhanipphādanādhimuttataṃ, pacchimena parahitasukhakaṇe nirupalepanaṃ. Purimena dhammikasukhāpariccāganimittaṃ phāsuvihāraṃ, pacchimena uttarimanussadhammānuyoganimittaṃ. Purimena manussānaṃ upakārabahulataṃ, pacchimena devānaṃ. Purimena loke jātassa loke samvaḍḍhabhāvaṃ, pacchimena lokena anupalittataṃ. Purimena “ekapuggalo bhikkhave loke uppajjamāno uppajjati bahujanahitāya bahujanasukhāya lokānukampāya atthāya hitāya sukhāya devamanussānaṃ. Katamo ekapuggalo, Tathāgato Arahaṃ Sammāsambuddho”²ti vacanato yadattaṃ Bhagavā uppanno, tadatthapariniḥḥādanaṃ, pacchimena yattha uppanno, tadanurūpavihāraṃ. Bhagavā hi paṭhamaṃ Lumbinivane, dutiyaṃ Bodhimaṇḍeti lokiyalokuttarāya uppattiyā vaneveva uppanno, tenassa vaneveva vihāraṃ dasseti evamādinā nāyenettha atthayojanā veditabbā.

Tatrāti desakālaparidīpanaṃ. Tañhi yaṃ samayaṃ viharati, tatra samaye. Yasmiṃ ca sālārājamūle viharati, tatra sālārājamūleti dīpeti. Bhāsitaḥḥayutte vā desakāle dīpeti. Na hi Bhagavā ayutte dese kāle vā dhammaṃ bhāsati. “Akālo kho tāva bhāhiyā”³ ti-ādicettha sādhaḥḥam. **Khoti** padapūraṇamatte avadhāraṇe ādikālatthe vā nipāto. **Bhagavā**ti lokagarudīpanaṃ. **Bhikkhū**ti kathāsavanayuttapuggalavacaṇaṃ. Apicettha “bhikkhakoti bhikkhu, bhikkhācariyaṃ ajjhupagatoti bhikkhū”⁴ti-ādinā⁴ nāyena vacanatto veditabbo. **Āmantesī**ti ālapi abhāsi sambodhesīti ayamettha attho.

1. Kāmasukhallikānuyogavijjanaṃ (Syā)

3. Khu 1. 85 piṭṭhe.

2. Am 1. 21 piṭṭhe.

4. Vi 1. 28 piṭṭhe.

Aññatra pana ñāpanepi hoti. Yathāha “āmantayāmi vo bhikkhave, paṭivedayāmi vo bhikkhave”ti. Pakkosanepi. Yathāha “ehi tvaṃ bhikkhu mama vacanena Sāriputtaṃ āmantehī”ti¹.

Bhikkhavoti āmantanākārādīpanaṃ. Tañca bhikkhanasīlatādiguṇayogasiddhattā vuttaṃ. Bhikkhanasīlatāguṇayuttopi hi **bhikkhu** bhikkhanadhammatāguṇayuttopi. Bhikkhane sādhu-kāritāguṇayuttopīti saddavidū maññanti. Tena ca nesaṃ bhikkhanasīlatādiguṇayogasiddhena vacanena hīnādhikajanasevitaṃ vuttim pakāseno uddhata-dīnabhāvaniggahaṃ² karoti. Bhikkhavoti iminā ca gaṇuṇāvippārasomahadayanayanānīpātāpubbaṅgamena vacanena te attano mukhābhimukhe³ karoti. Teneva ca kathetukamyatādīpakena vacanena nesaṃ sotukamyataṃ janeti. Teneva ca sambodhanaṭṭhena sādhu-kāṃ savanāmanasikārepi ne niyojēti. Sādhu-kā-savanāmanasikārayattā hi sāsana-sampatti.

Aparesupi devamanussesu vijjamaṇesu kasmā bhikkhūyeva āmantesīti ce. Jeṭṭhasēṭṭhāsannasādāsannihitabhāvato. Sabbaparisa-sādharāṇā hi Bhagavato dhammadesanā. Parisāya ca jeṭṭhā bhikkhū, paṭhamaṃ uppannattā. Sēṭṭhā, anagāriyabhāvaṃ ādīm katvā Satthucariyānuvidhāyakattā sakalāsānāpaṭiggāhakattā ca. Āsannā, tattha nisīnesu Satthusantikattā. Sādāsannihitā, Satthusantikāvācarattāti. Api ca te dhammadesanāya bhājanāṃ, yathānusiṭṭhaṃ paṭipattisabbhāvato⁴. Visesato ca ekacce bhikkhūyeva sandhāya ayaṃ desanātipi te eva āmantesi.

Tattha siyā—kimatthaṃ pana Bhagavā dhammaṃ desento paṭhamaṃ bhikkhū āmantesi, na dhammeva desetīti. Satijananatthaṃ. Bhikkhū hi aññāṃ cintentāpi vikkhittacittāpi dhammaṃ paccavekkhantāpi kammatṭhānaṃ manasikarontāpi nisinnā honti, te anāmantetvā dhamme desiyamāne “ayaṃ desanā kinnidānā kimpaccayā katamāya aṭṭhuppattiyā desetā”ti sallakkhetuṃ asakkontā duggahitaṃ vā gaṇheyyuṃ, na vā gaṇheyyuṃ. Tena nesaṃ satijananatthaṃ Bhagavā paṭhamaṃ āmantetvā pacchā dhammaṃ deseti.

1. Am 3. 181 piṭṭhe.

3. Abhimukhe (Ka)

2. Uddhatalīnabhāvaniggahaṃ (Syā)

4. Paṭipattisambhāvato (Syā)

Bhadanteti gāravavacanametam, Satthuno paṭivacanaḍānam vā, apicettha bhikkhavoti vadamāno Bhagavā te bhikkhū ālapati. Bhadanteti vadamānā te Bhagavantam paccālapanti. Tathā bhikkhavoti Bhagavā ābhāsati. Bhadanteti te paccābhāsanti. Bhikkhavoti paṭivacanaḍ dāpeti, bhadanteti paṭivacanaḍ denti. **Te bhikkhūti** ye Bhagavā āmantesi. **Bhagavato paccassosunti** Bhagavato āmantanam paṭi-assosum, abhimukhā hutvā suṇimsu sampaṭicchimsu paṭiggahesunti attho. **Bhagavā etadavocāti** Bhagavā etam idāni vattabbam sakalam suttam avoca.

Ettāvata ca yam āyasmata ānandena
 kamalakavalayujjalavimalasādurasasalilāya pokkharaniyā
 sukhāvataranattam nimmalasilātalaracanavilāsasobhitaratanasopānam
 vipakinnamuttātalasadisavālikākinnapaṇḍarabhūmibhāgam tittham viya
 suvibhattabhittivicitravedikāparikkhittassa nakkhattapatham
 phusitukāmatāya viya, vijambhita¹ samussayassa pāsādarassa
 sukhārohanattam
 dantamayasaṇhamuduphalakakañcanalatāvinaddhamaṇigaṇappabhāsamuday
 ujjalasobham sopānam viya, suvaṇṇavalayānupurādisaṇ
 ghaṭṭanasaddasammissitakathitahasitamadhurassaragehajanavicaritassa
 ulāra-issariyavibhavasobhitassa mahāgharassa sukhappavesanattam
 suvaṇṇarajatamaṇimuttāpavāḷādi jutivissaravijjotitasuppatiṭṭhitavisāladvāraba
 ham mahādvāram viya ca atthabyañjanasampannassa Buddhānam
 desanāñṇagambhīrabhāvasaṇsūcakassa imassa suttassa
 sukhāvagāhanattam kāladesadesakavattuparisāpadesapaṭimaṇḍitam
 nidānam bhāsitam, tassa atthavaṇṇanā samattā.

Suttanikkhepavaṇṇanā

Idāni “sabbadhammūlapariyāyam vo”ti-ādinā nayena Bhagavatā nikkhittassa suttassa vaṇṇanāya okāso anupatto. Sā panesā suttavaṇṇanā yasmā suttanikkhepaḍ vicāretvā vuccamānā pākaṭā hoti, tasmā suttanikkhepaḍ tāva vicārayissāma. Cattāro hi suttanikkhepā attajjhāsayo parajjhāsayo pucchāvasiko aṭṭhuppattikoti.

1. Pavijumbhita (Sī)

Tattha yāni suttāni Bhagavā parehi anajjhīṭṭho kevalaṃ attano ajjhāsayeneva kathesi. Seyyathidaṃ, Ākaṅkheyyasuttaṃ Vatthasuttaṃ Mahāsatipaṭṭhānasuttaṃ Mahāsaḷāyatanavibhaṅgasuttaṃ Ariyavaṃsasuttaṃ Sammappadhānasuttantahāraḷako Iddhipāda-indriyabalabojjhaṅgamaggaṅgasuttantahāraḷakoti evamādīni. Tesāṃ attajjhāsayo nikkhepo.

Yāni pana “paripakkā kho Rāhulassa vimuttiparipācanīyā dhammā, yaṃnūnāhaṃ Rāhulaṃ uttari āsavānaṃ khaye vineyyan”¹ti evaṃ paresāṃ ajjhāsayaṃ khantiṃ manaṃ abhinīhāraṃ bujjanabhāvaṃ ca avekkhitvā parajjhāsayavasena kathitāni. Seyyathidaṃ, Cūḷarāhulovādasuttaṃ Mahārāhulovādasuttaṃ Dhammacakkappavattanaṃ Dhātuvibhaṅgasuttanti evamādīni. Tesāṃ parajjhāsayo nikkhepo.

Bhagavantaṃ pana upasaṅkamitvā catasso parisā cattāro vaṇṇā nāgā supaṇṇā gandhabbā asurā yakkhā mahārājāno Tāvatisādayo devā mahābrahmāti evamādayo “bojjhaṅgā bojjhaṅgā”²ti bhante vuccanti. “Nīvaraṇā nīvaraṇā”²ti bhante vuccanti. Ime nu kho bhante pañcu pādānakkhandhā. “Kim sūdha vittaṃ purisassa seṭṭhan”²ti-ādinā² nayena pañhaṃ pucchanti. Evaṃ puṭṭhena Bhagavatā yāni kathitāni Bojjhaṅgasāmyuttādīni. Yāni vā panaññānīpi Devatāsāmyutta Mārasāmyutta Brahasāmyutta Sakkapañha Cūḷavedalla mahāvedallasāmaññaphala-ālavakasūcilomakharalomasuttādīni. Tesāṃ pucchāvasiko nikkhepo.

Yāni panetāni uppannaṃ kāraṇaṃ paṭicca kathitāni. Seyyathidaṃ, dhammadāyādaṃ cūḷasihanādaṃ candūpamaṃ puttamaṃsūpamaṃ dārukkhandhūpamaṃ aggikkhandhūpamaṃ pheṇapiṇḍūpamaṃ pāricchattakūpamanti evamādīni. Tesāṃ aṭṭhuppattiko nikkhepo.

Evaṃimesu catūsu nikkhepesu imassa suttassa aṭṭhuppattiko nikkhepo. Aṭṭhuppattiyañhi idaṃ Bhagavatā nikkhittaṃ. Katarāya aṭṭhuppattiyā? Pariyattim nissāya uppanne māne. Pañcasatā kira brāhmaṇā tiṇṇaṃ vedānaṃ pāragū aparabhāge Bhagavato dhammadesanaṃ sutvā kāmesu ādīnavaṃ nekkhamme ca ānisaṃsaṃ sampassamānā Bhagavato santike pabbajitvā nacirasseva sabbaṃ Buddhavacanaṃ uggaṇhitvā pariyattim nissāya mānaṃ uppādesum “yaṃ yaṃ Bhagavā katheti, taṃ taṃ mayaṃ khippameva jānāma, Bhagavā hi tīṇi

1. Saṃ 2. 324 piṭṭhe.

2. Khu 1. 306 piṭṭhe Suttanipāte.

liṅgāni cattāri padāni satta vibhattiyo muñcitvā na kiñci katheti, evaṃ kathite ca ambhākaṃ gaṇṭhipadaṃ nāma natthī”ti. Te¹ Bhagavati agāravā hutvā tato paṭṭhāya Bhagavato upaṭṭhānampi dhammassavanampi abhiṇhaṃ na gacchanti. Bhagavā tesaṃ taṃ cittacāraṃ² ñatvā “abhabbā ime imaṃ mānakhilaṃ anupahacca maggaṃ vā phalaṃ vā sacchikātun”ti tesaṃ sutapariyattim̄ nissāya uppannaṃ mānaṃ aṭṭhuppattim̄ katvā desanākusalo Bhagavā mānabhañjanatthaṃ **sabbadhammamūlapariyāyanti** desanaṃ ārabhi.

Tattha **sabbadhammamūlapariyāyanti** sabbesaṃ dhammānaṃ mūlapariyāyaṃ. Sabbesanti anavasesānaṃ. Anavasesavācako hi ayaṃ sabbasaddo. So yena yena sambandhaṃ gacchati, tassa tassa anavasesataṃ dīpeti. Yathā, “sabbāṃ rūpaṃ aniccaṃ sabbā vedanā aniccā sabbasakkāyapariyāpannesu dhammesū”ti. **Dhammasaddo** panāyaṃ pariyattisaccasamādhipaññāpakatisabhāvasuññatāpuññāpattiñeyyādīsu dīssati. “Idha bhikkhu dhammaṃ pariyāpuṇāti Suttaṃ Geyyaṃ”ti-ādīsu³ hi dhammasaddo pariyattiyaṃ vattati. “Diṭṭhadhammo viditadhammo”ti-ādīsu⁴ saccesu. “Evaṃ dhammā te Bhagavanto”ti-ādīsu samādhimhi.

“Yassete caturo dhammā, vānarinda yathā tava.

Saccaṃ dhammo dhiti cāgo, diṭṭhaṃ so ativattatī”ti—

ādīsu⁵ paññāya.

“Jātidhammā jarādhammā, atho maraṇadhammino”ti-ādīsu pakatiyaṃ. “Kusalā dhammā”ti-ādīsu⁶ sabhāve. “Tasmim̄ kho pana samaye dhammā honti”ti-ādīsu⁷ suññatāyaṃ. “Dhammo suciṇṇo sukhamāvahātī”ti-ādīsu⁸ puññe. “Dve aniyatā dhammā”ti-ādīsu⁹ āpattiyaṃ. “Sabbe dhammā sabbākārena Buddhassa Bhagavato ñāṇamukhe āpāthaṃ āgacchantī”ti-ādīsu ñeyye. Idha panāyaṃ sabhāve vattati. Tatrāyaṃ vacanatto—attano lakkhaṇaṃ dhārentīti **dhammā. Mūlasaddo** vitthārīto eva. Idha panāyaṃ asādhāraṇahetumhi daṭṭhabbo.

1. Tena (Sī)

4. Dī 1. 102 piṭṭhe.

7. Abhi 1. 35 piṭṭhe.

2. Cittavāraṃ (Syā)

5. Khu 1. 14 piṭṭhe.

8. Khu 5. 215 piṭṭhe.

3. Aṃ 2. 76 piṭṭhe.

6. Abhi 1. 1 piṭṭhe.

9. Vi 1. 285 piṭṭhe.

Pariyāyasaddo “Madhupiṇḍikapariyāyoti nam dhārehi”ti-ādīsu¹ desanāyaṃ vattati. “Atthi khvesa brāhmaṇa pariyāyo, yena maṃ pariyāyena sammā vadamāno vadeyya akiriyavādo samaṇo Gotamo”ti-ādīsu² kāraṇe. “Kassa nu kho Ānanda ajja pariyāyo bhikkhuniyo ovaditun”ti-ādīsu³ vāre. Idha pana kāraṇepi desanāyampi vattati. Tasmā “sabbadhammāmūlapariyāyan”ti ettha sabbesaṃ dhammānaṃ asādhāraṇahetusaññitaṃ kāraṇanti vā sabbesaṃ dhammānaṃ kāraṇadesananti vā evaṃ attho daṭṭhabbo. Neyyatthattā cassa suttassa na catubhūmakāpi sabhāvadhammā sabbadhammāti veditabbā. Sakkāyapariyāpannā pana tebhūmakā dhammāva anavasesato veditabbā, ayamettha adhippāyoti.

Voti ayaṃ vosaddo paccatta upayoga karaṇa sampadāna sāmivacanapadapūraṇesu dissati. “Kacci pana vo Anuruddhā samaggā sammodamānā”ti-ādīsu⁴ hi paccatte dissati. “Gacchatha bhikkhave paṇāmemi vo”ti-ādīsu⁵ upayoge. “Na vo mama santike vatthabban”ti-ādīsu⁶ karaṇe. “Vanapatthapariyāyaṃ vo bhikkhave desessāmi”ti-ādīsu⁷ sampadāne. “Sabbesaṃ vo Sāriputta subhāsitan”ti-ādīsu⁸ sāmivacane. “Ye hi vo ariyā parisuddhakāyakammantā”ti-ādīsu⁹ padapūraṇamatte. Idha paṇāyaṃ sampadāne daṭṭhabbo.

Bhikkhaveti patissavena abhimukhībhūtānaṃ punālapanaṃ. **Desessāmīti** desanāpaṭijānanaṃ. Idaṃ vuttaṃ hoti, bhikkhave sabbadhammānaṃ mūlakāraṇaṃ tumhākaṃ desessāmi, dutiyena nayena kāraṇadesanaṃ tumhākaṃ desessāmīti. **Taṃ suṇāthāti** taṃ atthaṃ taṃ kāraṇaṃ taṃ desanaṃ mayā vuccamānaṃ suṇātha. **Sādhukaṃ manasi karoṭhāti** ettha pana sādhukaṃ sādhuṭi ekatthametam. Ayaṃ ca sādhu saddo āyācana sampaṭicchana sampahaṃsana sundaradaḷhikammādīsu dissati. “Sādhu me bhante Bhagavā saṃkhittena dhammaṃ desetū”ti-ādīsu¹⁰ hi āyācane dissati. “Sādhu bhanteti kho

1. Ma 1. 161 piṭṭhe.

2. Vi 1. 2 piṭṭhe.

3. Ma 3. 315 piṭṭhe.

4. Ma 1. 266 piṭṭhe.

5. Ma 2. 120 piṭṭhe.

6. Ma 2. 120 piṭṭhe.

7. Ma 1. 149 piṭṭhe.

8. Ma 1. 281 piṭṭhe.

9. Ma 1. 20 piṭṭhe.

10. Saṃ 2. 294 piṭṭhe.

so bhikkhu Bhagavato bhāsitaṃ abhinanditvā anumoditvā”ti-ādīsu¹
sampaṭicchane. “Sādhu sādhu Sāriputtā”ti-ādīsu² sampahaṃsane.

“Sādhu dhammarucī rājā, sādhu paññānavā naro.

Sādhu mittānamaddubbho, pāpassākāraṇaṃ sukhaṃ”ti—

Ādīsu³ sundare. “Tena hi brāhmaṇa sādhukaṃ suṇāhī”ti-ādīsu⁴
sādhukasaddoyeva daḥhikamme, āṇattiyantipi vuccati. Idhāpi ayaṃ ettheva
daḥhikamme ca āṇattiyāṃ ca attho veditabbo. Sundaratthepe vattati.
Daḥhikaraṇatthena hi daḥhamimaṃ dhammaṃ suṇātha suggahitaṃ gaṇhantā.
Āṇatti-atthena mama āṇattiyā suṇātha. Sundaratthena sundaramimaṃ
bhaddakaṃ dhammaṃ suṇāthāti evaṃ dīpitaṃ hoti.

Manasi karoṭhāti āvajjetha, samannāharathāti attho, avikkhittacittā
hutvā nisāmetha citte karoṭhāti adhippāyo. Idānettha **taṃ suṇāthāti**
sotindriyavikkhepavāraṇametam. Sādhukaṃ manasi karoṭhāti manasikāre
daḥhikammaniyojanena manindriyavikkhepavāraṇaṃ. Purimañcetha
byañjanavipallāsaggāhavāraṇaṃ, pacchimaṃ atthavipallāsaggāhavāraṇaṃ.
Purimena ca dhammassavane niyojeti, pacchimena sutānaṃ dhammānaṃ
dhāraṇūparikkhādīsu. Purimena ca sabyañjano ayaṃ dhammo, tasmā
savanīyoti dīpeti. Pacchimena sāttho, tasmā manasi kātabboti.
Sādhukapadaṃ vā ubhayapadehi yojetvā yasmā ayaṃ dhammo
dhammagambhīro desanāgambhīro ca, tasmā suṇātha sādhukaṃ, yasmā
atthagambhīro paṭivedhagambhīro ca, tasmā sādhukaṃ manasi karoṭhāti
evaṃ yojanā veditabbā.

Bhāsissāmīti desessāmi. “Taṃ suṇāthā”ti ettha paṭiññātaṃ desanaṃ na
saṅkhittatova desessāmi, Api ca kho vitthāratopi naṃ bhāsissāmīti vuttaṃ
hoti, saṅkhepavittāravācakāni hi etāni padāni. Yathāha Vaṅṅisatthero—

“Saṅkhittenapi deseti, vitthārenapi bhāsati.

Sālikāyiva nigghoso, paṭibhānaṃ udīrayī”ti⁵.

1. Ma 3. 66 piṭṭhe.

2. Dī 3. 226 piṭṭhe.

3. Khu 6. 45 Ummānantījātake.

4. Am 2. 197 piṭṭhe.

5. Saṃ 1. 191 piṭṭhe.

Evam vutte ussāhajātā hutvā **evam bhanteti kho te bhikkhū Bhagavato paccassosum** Satthu vacanam sampatichimsu, paṭiggahesunti vuttam hoti. Atha nesam **Bhagavā etadavoca** etam idāni vattabbam **idha bhikkhavoti-** ādikam sakalam suttam avoca. Tattha **idhāti** desāpadese nipāto. Svāyam katthaci lokam upādāya vuccati. Yathāha “idha Tathāgato loka uppajjati”¹. Katthaci sāsanam. Yathāha “idheva bhikkhave samaṇo idha dutiyo samaṇo”². Katthaci okāsam. Yathāha—

“Idheva tiṭṭhamānassa, devabhūtassa me sato.
Punarāyu ca me laddho, evam jānāhi mārīsā”³.

Katthaci padapūraṇamattameva. Yathāha “idhāham bhikkhave bhuttāvī assam pavārito”⁴. Idha pana lokam upādāya vuttoti veditabbo.

2. **Bhikkhaveti** yathāpaṭiññātam desanam desetum puna bhikkhū ālapati. Ubhayenāpi bhikkhave imasmim loketi vuttam hoti. **Assutavā puthujjanoti** ettha pana āgamādhigamābhāvā ñeyyo assutavā iti. Yassa hi khandhadhātu-āyatanasaccapaccayākārasatipaṭṭhānādīsu uggahaparipucchāvinicchayarahitattā maññanāpaṭisedhako neva āgamo, paṭipattiyā adhigantabbassa anadhigatattā neva adhigamo atthi. So āgamādhigamābhāvā ñeyyo assutavā iti. Svāyam

Puthūnam jananādīhi, kāraṇehi puthujjano.
Puthujjanantogadhattā, puthuvāyam jano iti.

So hi puthūnam nānappakārānam kilesādīnam jananādīhi kāraṇehi **puthujjano**. Yathāha—puthu kilese janentīti puthujjanā, puthu avihatasakkāyadiṭṭhikāti puthujjanā, puthu satthārānam mukhamullokikāti puthujjanā, puthu sabbagatīhi avuṭṭhitāti puthujjanā, puthu nānābhisaṅkhāre abhisaṅkharontīti puthujjanā, puthu nānā-oghehi vuyhantīti puthujjanā, puthu nānāsantāpehi santappantīti puthujjanā, puthu nānāpariḷāhehi paridayhantīti puthujjanā, puthu pañcasu kāmagaṇesu rattā giddhā

1. Dī 1. 58 piṭṭhe.

3. Dī 2. 227 piṭṭhe.

2. Am 1. 560 piṭṭhe.

4. Ma 1. 16 piṭṭhe.

gadhītā mucchītā ajjhosannā¹ laggā lagitā² palibuddhāti puthujjanā, puthu pañcahi nīvaraṇehi āvuṭā nivuṭā ovuṭā pihītā paṭicchannā paṭikujjitāti puthujjanāti³. Puthūnaṃ vā gaṇanapathamatītānaṃ ariyadhammaparammukhānaṃ nīcadhammasamācārānaṃ janānaṃ antogadhattāpi puthujjanā. Puthu vā ayaṃ, visuṃ yeva saṅkhaṃ gato, visaṃsaṭṭho sīlasutādiguṇayuttehi ariyehi janotipi puthujjano. Evametehi “assutavā puthujjano”ti dvīhipi padehi yete—

Duve puthujjanā vuttā, Buddhenādiccabandhunā.

Andho puthujjano eko, kalyāṇeko puthujjanoti—

Dve puthujjanā vuttā, tesu andhaputhujjano vutto hotīti veditabbo. **Ariyānaṃ adassāvīti**-ādīsu **ariyāti** ārakattā kilesehi, anaye na-iriyanato, aye iriyanato, sadevakena ca lokena araṇīyato Buddhā ca Paccekabuddhā ca Buddhasāvaka ca vuccanti, Buddhā eva vā idha ariyā. Yathāha “sadevake bhikkhave loke -pa- Tathāgato ariyoti vuccatī”ti⁴. **Sappurisāti** ettha pana Paccekabuddhā Tathāgatasāvaka ca “sappurisā”ti veditabbā. Te hi lokuttaraguṇayogena sobhanā purisāti **sappurisā**. Sabbeva vā ete dvedhāpi vuttā. Buddhāpi hi ariyā ca sappurisā ca, Paccekabuddhā Buddhasāvakaṃ. Yathāha—

Yo ve kataññū katavedi dhīro,

Kalyāṇamitto daḷhabhatti ca hoti.

Dukhitassa sakkacca karoti kiccaṃ,

Tathāvidhaṃ sappurisaṃ vadantīti⁵.

Kalyāṇamitto daḷhabhatti ca hotīti ettāvata hi Buddhasāvako vutto, kataññūtādīhi Paccekabuddhā Buddhāti. Idāni yo tesam ariyānaṃ adassanasīlo, na ca dassane sādhuṅkāri, so **ariyānaṃ adassāvīti** veditabbo. So ca cakkhunā adassāvī nāṇena adassāvīti duvidho, tesu nāṇena adassāvī idha adhippeto. Mamsacakkhunā hi dibbacakkhunā vā

1. Ajjhāpannā (Sī)

2. Laggitā (Ka)

3. Khu 7. 113 piṭṭhe Mahāniddece.

4. Saṃ 3. 381 piṭṭhe.

5. Khu 6. 10 Jātake.

ariyā diṭṭhāpi adiṭṭhāva honti, tesam cakkhūnam vaṇṇamattaggahaṇato, na ariyabhāvagocarato. Soṇasiṅgālādayopi ca cakkhunā ariye passanti, na ca te ariyānam dassāvino.

Tatridam vatthu—Cittalapabbatavāsino kira khīṇāsavattherassa upaṭṭhāko vuddhapabbajito ekadivasam therena saddhim piṇḍāya carivā therassa pattacīvaram gahetvā piṭṭhito āgacchanto theram pucchi, “ariyā nāma bhante kīdisā”ti. Thero āha, “idhekacco mahallako ariyānam pattacīvaram gahetvā vattapaṭipattim¹ katvā sahacarantopi neva ariye jānāti, evam dujjānā āvuso ariyā”ti. Evam vuttepi so neva aññāsi. Tasmā na cakkhunā dassanam dassanam, nāṇena dassanameva dassanam. Yathāha “kim te Vakkali iminā pūtikāyena diṭṭhena? Yo kho Vakkali dhammam passati, so mam passati”ti². Tasmā cakkhunā passantopi nāṇena ariyehi diṭṭham aniccādilakkhaṇam apassanto ariyādhigatañca dhammam anadhigacchanto ariyakaradhammānam ariyabhāvassa ca adiṭṭhattā “ariyānam adassāvī”ti veditabbo.

Ariyadhammassa akovidoti satipaṭṭhānādibhede ariyadhamme akusalo. **Ariyadhamme avinītoti** ettha pana—

Duvidho vinayo nāma, ekamekettha pañcadhā.

Abhāvato tassa ayam, “avinīto”ti vuccati.

Ayam hi saṃvaravinayo pahānavinayoti duvidho vinayo. Ettha ca duvidhepi vinaye ekameko vinayo pañcadhā bhijjati. **Saṃvaravinayopi** hi sīlasaṃvaro satisaṃvaro nāṇasaṃvaro khantisaṃvaro vīriyasaṃvaroti pañcavidho. **Pahānavinayopi** tadaṅgapahānam vikkhambhanapahānam samucchadapahānam paṭippassaddhipahānam nissaraṅgapahānanti pañcavidho.

Tattha “iminā pātimokkhasaṃvarena upeto hoti samupeto”ti³ ayam **sīlasaṃvaro**. “Rakkhati cakkhundriyam cakkhundriye saṃvaram āpajjati”ti⁴ ayam **satisaṃvaro**.

1. Vattapaṭivattam (Sī, Syā)

2. Saṃ 2. 98 piṭṭhe.

3. Abhi 2. 255 piṭṭhe.

4. Dī 1. 66; Ma 1. 238; Saṃ 2. 384; Am 1. 111 piṭṭhādīsu.

“Yāni sotāni lokasmiṃ, (Ajitāti Bhagavā)
Sati tesam nivāraṇaṃ.
Sotānaṃ saṃvaraṃ brūmi,
Paññāyete pidhīyare”¹.

Ayaṃ **ñāṇasaṃvaro**. “Khamo hoti sītassa uṇhassā”² ayaṃ **khantisāṃvaro**. “Uppannaṃ kāmavitakkaṃ nādhivāseti”³ ayaṃ **vīriyasaṃvaro**. Sabbopi cāyaṃ saṃvaro yathāsakaṃ saṃvaritabbānaṃ vinetabbānaṃ kāyaduccaritādīnaṃ saṃvaraṇato “saṃvaro” vinayanato “vinayo”⁴ ti vuccati. Evaṃ tāva saṃvaravinayo pañcadhā bhijjatīti veditabbo.

Tathā yaṃ nāmarūpaparicchedādīsu vipassanāññāṇesu paṭipakkhabhāvato dīpālokeneva tamassa, tena tena vipassanāññāṇena tassa tassa anatthassa⁴ pahānaṃ. Seyyathidaṃ, nāmarūpavavattānena sakkāyadiṭṭhiyā, paccayapariggahena ahetuvisamahetudiṭṭhīnaṃ, tasseva aparabhāgena kaṅkhāvitaraṇena kathaṃkathībhāvassa, kalāpasammasanena “ahaṃ mamā”⁵ ti gāhassa, maggāmaggavavattānena amagge maggasaññāya, udayadassanena ucchedadiṭṭhiyā, vayadassanena sassatadiṭṭhiyā, bhayadassanena sabhaye abhayasaññāya, ādīnavadassanena assādasaññāya, nibbidānupassanāya abhiritasaññāya, muccitukamyatāññāṇena amuccitukamyatāya, upekkhāññāṇena anupekkhāya, anulomena dhammaṭṭhitiyaṃ nibbāne ca paṭilomabhāvassa, gotrabhunā saṅkhāranimittaggāhassa pahānaṃ, etaṃ **tadaṅgapahānaṃ** nāma.

Yaṃ pana upacārappanābhedenā samādhinā pavattibhāvanivāraṇato ghaṭappahāreneva udakapiṭṭhe sevālassa tesam tesam nīvaraṇādidhammānaṃ pahānaṃ, etaṃ **vikkhambhanapahānaṃ** nāma.

Yaṃ catunnaṃ ariyamaggānaṃ bhāvitattā taṃtaṃmaggavato attano attano santāne “diṭṭhigatānaṃ pahānāyā”⁵ ti-ādīsu⁵ nayena vuttassa samudayapakkhikassa kilesagaṇassa accantaṃ appavattibhāvena pahānaṃ, idaṃ **samucchedapahānaṃ** nāma. Yaṃ pana phalakkhaṇe paṭippassaddhattaṃ kilesānaṃ, etaṃ

1. Khu 1. 434 piṭṭhe.

2. Ma 1. 13; Aṃ 2. 433; Aṃ 3. 341 piṭṭhesu.

3. Ma 1. 4; Aṃ 2. 432; Aṃ 3. 342 piṭṭhesu.

4. Aṅgassa (Sī, Syā)

5. Abhi 1. 72 piṭṭhe.

paṭippassaddhipahānaṃ nāma. Yaṃ sabbasaṅkhatanissaṭṭattā pahīnasabbasaṅkhatam nibbānaṃ, etaṃ **nissaraṇapahānaṃ** nāma. Sabbampi cetam pahānaṃ yasmā cāgaṭṭhena pahānaṃ vinayanatṭhena vinayo, tasmā “pahānavinayo”ti vuccati. Taṃtaṃpahānavato vā tassa tassa vinayassa sambhavatopetaṃ “pahānavinayo”ti vuccati. Evaṃ pahānavinayopi pañcadhā bhijjatīti veditabbo.

Evamayam saṅkhepato duvidho bhedato ca dasavidho vinayo bhinnasaṃvarattā pahātabbassa ca appahīnattā yasmā etassa assutavato puthujjanassa natthi, tasmā abhāvato tassa ayaṃ “avinīto”ti vuccatīti. Esa nayo **sappurisānaṃ adassāvī sappurisdhammassa akovido sappurisdhamme avinīto**ti etthapi. Ninnānākaraṇaṃhi etaṃ atthato. Yathāha, “yeva te ariyā, teva te sappurisā. Yeva te sappurisā, teva te ariyā. Yo eva so ariyānaṃ dhammo, so eva so sappurisānaṃ dhammo. Yo eva so sappurisānaṃ dhammo, so eva so ariyānaṃ dhammo. Yeva te ariyavinayā, teva te sappurisavinayā. Yeva te sappurisavinayā, teva te ariyavinayā. Ariyeti vā sappuriseti vā, ariyadhammeti vā sappurisdhammeti vā, ariyavinayeti vā sappurisavinayeti vā esese eke ekatthe same samabhāge tājāte taññevā”ti.

Kasmā pana Bhagavā “sabbadhammamūlapariyāyam vo bhikkhave desessāmī”ti vatvā taṃ adesetvāva “idha bhikkhave assutavā puthujjano ariyānaṃ adassāvī”ti evaṃ puthujjanaṃ niddisīti. Puggalādhiṭṭhānāya dhammadesanāya taṃ attham āvikātuṃ. Bhagavato hi dhammādhiṭṭhānā dhammadesanā, dhammādhiṭṭhānā puggaladesanā, puggalādhiṭṭhānā puggaladesanā, puggalādhiṭṭhānā dhammadesanāti dhammapuggalavaseneva tāva catubbidhā desanā.

Tattha “tisso imā bhikkhave vedanā. Katamā tisso, sukhā vedanā dukkhā vedanā adukkhamasukhā vedanā. Imā kho bhikkhave tisso vedanā”ti¹ evarūpī dhammādhiṭṭhānā dhammadesanā veditabbā. “Chadhāturo² ayaṃ puriso chaphassāyatano aṭṭhārassa manopavicāro caturādhiṭṭhāno”ti³ evarūpī dhammādhiṭṭhānā puggaladesanā. “Tayome bhikkhave puggalā santo

1. Saṃ 2. 407 piṭṭhe.

2. Chadhātuyo (Ka)

3. Ma 3. 282 piṭṭhe.

saṁvijjamānā lokasmim. Katame tayo, andho ekacakkhu dvicakkhu. Katamo ca bhikkhave puggalo andho”ti¹ evarūpī puggalādhiṭṭhānā puggaladesanā. “Katamañca bhikkhave duggatibhayaṃ. Idha bhikkhave ekacco iti paṭisañcikkhati, kāyaduccaritassa kho pāpako vipāko abhisamparāyaṃ -pa- suddhamattānaṃ pariharati. Idam vuccati bhikkhave duggatibhayan”ti² evarūpī puggalādhiṭṭhānā dhammadesanā.

Svāyaṃ idha yasmā puthujjano aperiññātavatthuko, aperiññāmūlikā ca idhādhippetānaṃ sabbadhammānaṃ mūlabhūtā maññanā hoti, tasmā puthujjanaṃ dassetvā puggalādhiṭṭhānāya desanāya taṃ atthaṃ āvikātum “idha bhikkhave assutavā puthujjano ariyānaṃ adassāvī”ti evaṃ puthujjanaṃ niddisīti vedītabbo.

Pathavīvāraṇṇanā

Evaṃ puthujjanaṃ niddisitvā idāni tassa pathavī-ādīsu vatthūsu sabbasakkāyadhammajanitaṃ maññanaṃ dassento **pathaviṃ pathavitoti-**ādīmāha. Tattha lakkhaṇapathavī sasambhārapathavī ārammaṇapathavī sammutipathavīti catubbidhā pathavī. Tāsu “katamā ca āvuso ajjhattikā pathavīdhātu, yaṃ ajjhattaṃ paccattaṃ kakkhaḷaṃ kharigatan”ti-ādīsu³ vuttā **lakkhaṇapathavī**. “Pathaviṃ khaṇeyya vā khaṇāpeyya vā”ti-ādīsu⁴ vuttā **sasambhārapathavī**. Ye ca kesādayo vīsati koṭṭhāsā, ayolohādayo ca bāhirā. Sā hi vaṇṇādīhi sambhārehi saddhiṃ pathavīti sasambhārapathavī. “Pathavīkasiṇameko sañjānāti”ti-ādīsu⁵ āgatā pana **ārammaṇapathavī**, nimittapathavītipi vuccati. Pathavīkasiṇajjhānalābhī devaloke nibbatto āgamanavasena pathavīdevatāti nāmaṃ labhati. Ayaṃ **sammutipathavīti** vedītabbā. Sā sabbāpi idha labbhati. Tāsu yaṃkañci pathaviṃ ayaṃ puthujjano pathavito sañjānāti, pathavīti sañjānāti, pathavībhāgena sañjānāti, lokavohāraṃ gahetvā saññāvīpallāsena sañjānāti pathavīti. Evaṃ pathavībhāgaṃ amuñcantoyeva vā etaṃ⁶ “sattoti vā sattassā”ti vā ādinā nayena sañjānāti. Kasmā evaṃ sañjānāti

1. Am 1. 126 piṭṭhe.

2. Am 1. 438 piṭṭhe.

3. Abhi 2. 84 piṭṭhe.

4. Vi 2. 49 piṭṭhe.

5. Dī 3. 257 piṭṭhe.

6. Evaṃ (Syā, Ka)

na vattabbaṃ. Ummattako viya hi puthujjano. So yaṃkiñci yena kenaci ākārena gaṇhāti. Ariyānaṃ adassāvitādibhedameva vā ettha kāraṇaṃ. Yaṃ vā parato “apariññātaṃ tassā”ti vadantena Bhagavatāva vuttaṃ.

Pathaviṃ pathavito saññatvāti so taṃ pathaviṃ evaṃ viparītasaññāya saññānitvā, “saññānidānā hi papañcasankhā”ti¹ vacanato aparabhāge thāmapattehi taṇhāmānadiṭṭhipapañcehi idha maññanānāmena vuttehi maññati kappeti vikappeti, nānappakārato aññathā gaṇhāti. Tena vuttaṃ “pathaviṃ maññati”ti. Evaṃ maññato cassa tā maññanā oḷārikanayena dassetuṃ “yā ayaṃ kesā lomā”ti-ādinā nayena vīsatiḥedā ajjhattikā pathavī vuttā, yā cāyaṃ Vibhaṅge “tatha katamā bāhirā pathavīdhātu, yaṃ bāhiraṃ kakkhaḷaṃ kharigataṃ kakkhaḷattaṃ kakkhaḷabhāvo bahiddhā anupādinnaṃ. Seyyathidaṃ, ayo lohaṃ tipu sīsāṃ sajjhaṃ muttā maṇi veḷuriyaṃ saṅkho silā pavāḷaṃ rajataṃ jātārūpaṃ lohitaṅko masāragallaṃ tiṇaṃ kaṭṭhaṃ sakkharā kaṭhalaṃ bhūmi pāsāṇo pabbato”ti² evaṃ bāhirā pathavī vuttā, yā ca ajjhattārammaṇattike nimittapathavī, taṃ gahetvā ayamatthayojanā vuccati.

Pathaviṃ maññatīti tīhi maññanāhi ahaṃ pathavīti maññati, mama pathavīti maññati, paro pathavīti maññati, parassa pathavīti maññati, atha vā ajjhattikaṃ pathaviṃ taṇhāmaññanāya maññati, mānāmaññanāya maññati, diṭṭhimaññanāya maññati. Kathaṃ? Ayañhi kesādāsu chandarāgaṃ janeti kese assādeti abhinandati abhivadati ajjhosāya tiṭṭhati. Lome, nakhe, dante, tacāṃ, aññataraṃ vā pana rajjanīyavatthuṃ. Evaṃ ajjhattikaṃ pathaviṃ taṇhāmaññanāya maññati. Iti me kesā siyuṃ anāgatamaddhānaṃ. Iti lomāti-ādinā vā pana nayena tattha nandiṃ samannāneti. “Imināhaṃ sīlena vā -pa-brahmacariyena vā evaṃ siniddhamudusukhumanīlakeso bhavissāmī”ti-ādinā vā pana nayena appaṭiladdhānaṃ paṭilābhāya cittaṃ paṇidhāti. Evampi ajjhattikaṃ pathaviṃ taṇhāmaññanāya maññati.

Tathā attano kesādānaṃ sampattiṃ vā vipattiṃ vā nissāya mānaṃ janeti, “seyyohamasmīti vā sadisohamasmīti vā hīnohamasmīti vā”ti evaṃ

1. Khu 1. 414 piṭṭhe Suttanipāte.

2. Abhi 2, Dhātuvibhaṅge 84 piṭṭhe.

ajjhattikaṃ pathaviṃ mānamaññanāya maññati. “Taṃ jīvaṃ taṃ sarīraṃ”¹ ti āgatanayena pana kesaṃ “jīvo” ti abhinivisati. Esa nayo lomādīsu. Evaṃ ajjhattikaṃ pathaviṃ diṭṭhimaññanāya maññati.

Atha vā “yā ceva kho panāvuso ajjhattikā pathavīdhātu, yā ca bāhirā pathavīdhātu, pathavīdhātūvesā, taṃ netāṃ mamā”² ti imissā pavattiyā paccanīkanayena kesādibhedāṃ pathaviṃ etaṃ mama esohamasmi eso me attāti abhinivisati. Evampi ajjhattikaṃ pathaviṃ diṭṭhimaññanāya maññati. Evaṃ tāva ajjhattikaṃ pathaviṃ tīhi maññanāhi maññati.

Yathā ca ajjhattikaṃ, evaṃ bāhirampi. Kathaṃ? Ayañhi ayalohādīsu chandarāgaṃ janeti. Ayalohādīni assādeti abhinandati abhivadati ajjhosāya tiṭṭhati. Mama ayo mama lohanti-ādinā nayena ayādīni mamāyati rakkhati gopayati, evaṃ bāhiraṃ pathaviṃ taṇhāmaññanāya maññati. Iti me ayalohādayo siyūṃ anāgatamaddhānanti vā panettha nandiṃ samannāneti, “imināhaṃ sīlena vā vatena vā tapena vā brahmacariyena vā evaṃ sampanna-ayalohādi-upakaraṇo bhavissāmī”³ ti appaṭiladdhassa paṭilābhāya cittaṃ paṇidahati. Evampi bāhiraṃ pathaviṃ taṇhāmaññanāya maññati.

Tathā attano ayalohādīnaṃ sampattiṃ vā vipattiṃ vā nissāya mānaṃ janeti “imināhaṃ seyyosmīti vā sadisosmīti vā hīnosmīti vā”³ ti evaṃ bāhiraṃ pathaviṃ mānamaññanāya maññati. Aye jīvasaññī hutvā pana ayaṃ “jīvo” ti abhinivisati. Esa nayo lohādīsu. Evaṃ bāhiraṃ pathaviṃ diṭṭhimaññanāya maññati.

Atha vā “idhekacco pathavīkasiṇaṃ attato samanupassati. Yaṃ pathavīkasiṇaṃ, so ahaṃ. Yo ahaṃ, taṃ pathavīkasiṇanti pathavīkasiṇaṃca attāṃca advayaṃ samanupassati”⁴ ti paṭisambhidāyaṃ vuttanayeneva nimittapathaviṃ “atthā” ti abhinivisati. Evaṃ bāhiraṃ pathaviṃ diṭṭhimaññanāya maññati. Evampi bāhiraṃ pathaviṃ tīhi maññanāhi maññati. Evaṃ tāva “pathaviṃ maññati” ti ettha tissopi maññanā veditabbā. Ito paraṃ saṅkhepeneva kathayissāma.

1. Ma 2. 151 piṭṭhe.

3. Abhi 2. 359 piṭṭhe.

2. Ma 1. 242 piṭṭhe.

4. Khu 9. 137 piṭṭhe.

Pathaviyā maññatīti ettha **pathaviyā**ti bhumavacanametaṃ. Tasmā ahaṃ pathaviyāti maññati, mayhaṃ kiñcanaṃ palibodho pathaviyāti maññati, paro pathaviyāti maññati, parassa kiñcanaṃ palibodho pathaviyāti maññatīti ayamettha attho.

Atha vā yvāyaṃ “kathaṃ rūpasmim attānaṃ samanupassati, idhekacco vedanaṃ, saññaṃ, saṅkhāre, viññāṇaṃ attato samanupassati, tassa evaṃ hoti, ayaṃ kho me attā, so kho pana me attā imasmim rūpeti evaṃ rūpasmim vā attānaṃ samanupassatī”¹ti¹ etassa atthanayo vutto, eteneva nayena vedanādidhamme attato gahetvā tato ajjhattikabāhirāsu pathaviṣu yaṃkañci pathaviṃ tassokāsabhāvena parikappetvā so kho pana me ayaṃ attā imissā pathaviyāti maññanto pathaviyā maññati, ayamassa diṭṭhimaññanā. Tasmim yeva panassa attani sinehaṃ tabbatthukañca mānaṃ uppādayato taṇhāmānamaññanāpi veditabbā. Yadā pana teneva nayena so kho panassa attā pathaviyāti maññati, tadā diṭṭhimaññanā eva yujjati. Itarāyopi pana icchanti.

Pathavito maññatīti ettha pana **pathavitoti** nissakkavacanaṃ. Tasmā sa-upakaraṇassa attano vā parassa vā yathāvuttappabhedato pathavito uppattim vā niggamanaṃ vā pathavito vā añño attāti maññamāno pathavito maññatīti veditabbo, ayamassa diṭṭhimaññanā. Tasmimyeva panassa diṭṭhimaññanāya maññite vatthusmim sinehaṃ mānañca uppādayato taṇhāmānamaññanāpi veditabbā. Apare āhu “pathavīkaṣiṇaṃ parittam bhāvetvā tato aññaṃ appamāṇaṃ attānaṃ gahetvā pathavito bahiddhāpi me attāti maññamāno pathavito maññatī”ti.

Pathaviṃ meti maññatīti ettha pana kevalañhi mahāpathaviṃ taṇhāvasena mamāyatīti iminā nayena pavattā ekā taṇhāmaññanā eva labbhatīti veditabbā. Sā cāyaṃ mama kesā, mama lomā, mama ayo, mama lohanti evaṃ yathāvuttappabhedāya sabbāyapi ajjhattikabāhirāya pathaviyā yojetabbāti.

1. Khu 9. 139 Paṭisambhidāmagge.

Pathaviṃ abhinandatīti vuttappakārameva pathaviṃ taṇhādīhi abhinandati, assādeti, parāmasati cāti vuttam hoti. “Pathaviṃ maññatī”ti eteneva etasmiṃ atthe siddhe kasmā etaṃ vuttanti ce. Avicāritametaṃ porāṇehi. Ayam pana attano mati, desanāvilāsato vā ādīnavadassanato vā. Yassā hi dhammadhātuyā suppaṭividdhattā nānāyavicitradesanāvilāsasampanno, ayam¹ sā Bhagavatā suppaṭividdhā. Tasmā pubbe maññanāvasena kilesuppattim dassetvā idāni abhinandanāvasena² dassento desanāvilāsato vā idamāha. Yo vā pathaviṃ maññati, pathaviyā maññati, pathavito maññati, pathaviṃ meti maññati, so yasmā na sakkoti pathavīnissitam taṇham vā diṭṭhim vā pahātuṃ, tasmā pathaviṃ abhinandatiyeva. Yo ca pathaviṃ abhinandati, dukkham so abhinandati, dukkhañca ādīnavoti ādīnavadassanatopi idamāha. Vuttam cetam Bhagavatā “yo bhikkhave pathavīdhātuṃ abhinandati, dukkham so abhinandati, yo dukkham abhinandati, aparimutto so dukkhasmāti vadāmī”ti.

Evam pathavīvatthukam maññanam abhinandanañca vatvā idāni yena kāraṇena so maññati, abhinandati ca, tam kāraṇam āvikaronto āha **tam kissa hetu, apariññātam tassāti vadāmī**ti. Tassattho, so puthujjano tam pathaviṃ kissa hetu maññati, kena kāraṇena maññati, abhinandatīti ce. Apariññātam tassāti vadāmīti, yasmā tam vatthu tassa apariññātam, tasmāti vuttam hoti. Yo hi pathaviṃ pariḷānāti, so tīhi pariññāhi pariḷānāti nātapaniññāya tīraṇapariññāya pahānapariññāyāti.

Tattha katamā nātapaniññā. Pathavīdhātuṃ pariḷānāti, ayam pathavīdhātu ajjhattikā, ayam bāhirā, idamassā lakkhaṇam, imāni rasapaccupaṭṭhānapadaṭṭhānānīti, ayam **nātapaniññā**. Katamā tīraṇapariññā. Evam nātam katvā pathavīdhātuṃ tīreti aniccato dukkhato rogatoti dvācattālīsāya ākārehi, ayam **tīraṇapariññā**. Katamā pahānapariññā. Evam tīrayitvā aggamaggena pathavīdhātuyā chandarāgam pajahati, ayam **pahānapariññā**.

1. Assa (Sī)

2. Abhinandanādivasena (Syā)

Nāmarūpavavatthānam vā nātapariññā. Kalāpasammasanādi-anulomapariyosānā tīraṇapariññā. Ariyamagge ñāṇam pahānapariññāti. Yo pathaviṃ pariṇāṇāti, so imāhi tīhi pariññāhi pariṇāṇāti, assa ca puthujjanassa tā pariññāyo natthi, tasmā aparīññātattā pathaviṃ maññati ca abhinandati cāti. Tenāha Bhagavā “idha bhikkhave assutavā puthujjano -pa- pathaviṃ maññati, pathaviyā maññati, pathavito maññati, pathaviṃ meti maññati, pathaviṃ abhinandati. Tam kissa hetu, aparīññātāṃ tassāti vadāmi”ti.

Pathavīvāro niṭṭhito.

Āpovārādivaṇṇanā

Āpam āpatoti etthāpi lakkhaṇasasambhārārammaṇasammutivasena catubbidho āpo. Tesu “tattha katamā ajjhattikā āpodhātu. Yam ajjhattam paccattam āpo āpogataṃ sineho sinehagataṃ bandhanattam rūpassa ajjhattam upādinnam”ti-ādīsu¹ vutto **lakkhaṇa-āpo**. “Āpokasiṇam uggaṇhanto āpasmim nimittam gaṇhātī”ti-ādīsu vutto **sasambhāra-āpo**. Sesam sabbam pathaviyam vuttasadisameva. Kevalam yojanānaye² pana “pittam semhan”ti-ādīnā nayena vuttā dvādasabhedā ajjhattikā āpodhātu, “tattha katamā bāhirā āpodhātu. Yam bāhiram āpo āpogataṃ sineho sinehagataṃ bandhanattam rūpassa bahiddhā anupādinnaṃ. Seyyathidaṃ, mūlaraso khandharaso tacaraso pattaraso puppharaso phalaraso khīram dadhi sappi navanītam telam madhu phāṇitam bhummaṇi vā udakāni antalikkhāni vā”ti³ evam vuttā ca bāhirā āpodhātu veditabbā, yo ca ajjhattārammaṇattike nimitta-āpo.

Tejam tejatoti imasmim tejovārepi vuttanayeneva vitthāro veditabbo. Yojanānaye panettha “yena ca santappati, yena ca jīrīyati, yena ca pariḍayhati, yena ca asitapītakhāyitasāyitam sammā pariṇāmaṃ gacchatī”ti³ evam vuttā catuppabhedā ajjhattikā tejodhātu, “tattha

1. Abhi 2. 84 piṭṭhe.

2. Yojanānaye (Syā)

3. Abhi 2. 85 piṭṭhe.

katamā bāhirā tejodhātu. Yam bāhiram tejo tejogataṃ usmā usmāgataṃ usumaṃ usumagataṃ bahiddhā anupādinnaṃ. Seyyathidaṃ, kaṭṭhaggi palālaggi tiṇaggi gomayaggi thusaggi saṅkāraggi indaggi aggisantāpo sūriyasantāpo kaṭṭhasannicayasantāpo tiṇasannicayasantāpo dhaññasannicayasantāpo bhaṇḍasannicayasantāpo”¹ evaṃ vuttā ca bāhirā tejodhātu veditabbā.

Vāyam vāyatoti imassa vāyavārassāpi yojanānaye pana “uddhaṅgamā vātā adhogamā vātā kucchisayā vātā koṭṭhāsaya vātā aṅgamaṅgānusārino vātā satthakavātā khurakavātā uppalakavātā assāso passāso”² evaṃ vuttā ajjhattikā vāyodhātu, “tatha katamā bāhirā vāyodhātu. Yam bāhiram vāyo vāyogataṃ thambhitattaṃ rūpassa bahiddhā anupādinnaṃ. Seyyathidaṃ, puratthimā vātā pacchimā vātā uttarā vātā dakkhiṇā vātā sarajā vātā arajā vātā sītā vātā uṇhā vātā parittā vātā adhimattā vātā kālavātā verambhavātā pakkhavātā supaṇṇavātā tālavaṇṭavātā vidhūpanavātā”² evaṃ vuttā ca bāhirā vāyodhātu veditabbā. Sesam vuttanayamevāti. Ettāvātā ca yvāyam—

“Vuttamhi ekadhamme, ye dhammā ekalakkhaṇā tena.

Vuttā bhavanti sabbe, iti vutto lakkhaṇo hāro”^{ti}—

Evaṃ nettiyam **lakkhaṇo** nāma hāro vutto, tassa vasena yasmā catūsu bhūtesu gahitesu upādārūpampi gahitameva bhavati, rūpalakkhaṇam anatītattā. Yañca bhūtopādārūpaṃ, so rūpakkhandho. Tasmā “assutavā puthujjano pathaviṃ āpaṃ tejaṃ vāyam maññatī”^{ti} vadantena atthato rūpaṃ attato samanupassatītipi vuttaṃ hoti. “Pathaviyā āpasmiṃ tejasmim vāyasmim maññatī”^{ti} vadantena rūpasmiṃ vā attānaṃ samanupassatītipi vuttampi hoti. “Pathavito āpato tejato vāyato maññatī”^{ti} vadantena rūpato añño attāti siddhattā rūpavantaṃ vā attānaṃ attani vā rūpaṃ samanupassatītipi vuttaṃ hoti. Evametā catasso rūpavatthukā

1. Abhi 2. 85 piṭṭhe.

2. Abhi 2. 86 piṭṭhe.

sakkāyadiṭṭhimaññanā veditabbā. Tattha ekā ucchedadiṭṭhi, tisso sassatadiṭṭhiyoti dveva diṭṭhiyo hontīti ayampi atthaviseso veditabbo.

Bhūtavārādivaṇṇanā

3. Evaṃ rūpamukhena saṅkhāravatthukam maññanam vatvā idāni ye saṅkhāre upādāya sattā paññapīyanti, tesu saṅkhāresu sattesupi yasmā puthujjano maññanam karoti, tasmā te satte niddisanto **bhūte bhūtato sañjānātī**ti-ādimāha. Tatthāyam **bhūtasaddo** pañcakkhandha amanussa dhātuvijjamāna khīṇāsava sattarukkādīsu dissati. “Bhūtamidanti bhikkhave samanupassathā”ti-ādīsu¹ hi ayam pañcakkhandhesu dissati. “Yānidha bhūtāni samāgatāni”ti² ettha amanussesu. “Cattāro kho bhikkhu mahābhūtā hetū”ti³ ettha dhātūsu. “Bhūtasmiṃ pācittiyam”ti-ādīsu⁴ vijjamāne. “Yo ca kālaghaso bhūto”ti⁵ ettha khīṇāsave. “Sabbeva nikkhipissanti, bhūtā loke samussayan”ti⁶ ettha sattesu. “Bhūtagāmapātabyatāyā”ti⁷ ettha rukkādīsu. Idha pañāyam sattesu vattati, no ca kho avisesena. Cātumahārājikānam hi heṭṭhā sattā idha bhūtāti adhippetā.

Tattha **bhūte bhūtato sañjānātī**ti-ādi vuttanayameva. **Bhūte maññātī**ti-ādīsu pana tissopi maññanā yojetabbā. Katham? Ayam hi “so passati gahapatim vā gahapatiputtam vā pañcahi kāmagaṇehi samappitam samaṅgibhūtan”ti⁸ vuttanayena bhūte subhā sukhitāti gahetvā rajjati, disvāpi ne rajjati, sutvāpi, ghāyitvāpi, sāyitvāpi, phusitvāpi, ñatvāpi. Evaṃ bhūte taṇhāmaññanāya maññati. “Aho vatāham khattiyamahāsālānam vā saḥabyatam upapajjeyyan”ti-ādīnā⁹ vā pana nayena appaṭiladdhassa paṭilābhāya cittam paṇidahati, evampi bhūte taṇhāmaññanāya maññati. Attano pana bhūtānañca sampattim vipattim nissāya attānam vā seyyam dahati. Bhūtesu ca yaṃkiñci bhūtam hīnam attānam vā hīnam, yaṃkiñci bhūtam

1. Ma 1. 326 piṭṭhe.

4. Vi 2. 37 piṭṭhe.

7. Vi 2. 52 piṭṭhe.

2. Khu 1. 312 piṭṭhe.

5. Khu 5. 68 piṭṭhe.

8. Am 2. 439 piṭṭhe.

3. Ma 3. 67 piṭṭhe.

6. Dī 2. 129 piṭṭhe.

9. Dī 3. 214 piṭṭhe.

seyyaṃ. Attānaṃ vā bhūtena, bhūtaṃ vā attanā sadisaṃ¹ dahati. Yathāha “idhekacco jātiyā vā -pa- aññataraññatarena vatthunā pubbakālaṃ parehi sadisaṃ attānaṃ dahati. Aparakālaṃ attānaṃ seyyaṃ dahati. Pare hīne dahati, yo evarūpo māno -pa- ayaṃ vuccati mānātimāno”². Evaṃ bhūte mānamaññanāya maññati.

Bhūte pana “niccā dhuvā sassatā avipariṇāmadhammā”³ti vā “sabbe sattā sabbe paṇā sabbe bhūtā sabbe jīvā avasā abalā avīriyā niyatisaṅgati bhāvapariṇatā chasvevābhijātīsu sukhadukkhaṃ paṭisaṃvedentī”³ti vā maññamāno diṭṭhimaññanāya maññati. Evaṃ bhūte tīhi maññanāhi maññati.

Kathaṃ **bhūtesu maññati?** Tesu tesu bhūtesu attano upapattim vā sukhupattim vā ākaṅkhati. Evaṃ tāva taṇhāmaññanāya bhūtesu maññati. Bhūtesu vā upapattim ākaṅkhamāno dānaṃ deti, sīlaṃ samādiyati, uposathakammaṃ karoti. Evampi bhūtesu taṇhāmaññanāya maññati. Bhūte pana samūhaggāhena gahetvā tattha ekacce bhūte seyato dahati, ekacce sadisato vā hīnato vāti. Evaṃ bhūtesu mānamaññanāya maññati. Tathā ekacce bhūte niccā dhuvāti maññati. Ekacce aniccā adhuvāti, ahampi bhūtesu aññatarosmīti vā maññati. Evaṃ bhūtesu diṭṭhimaññanāya maññati.

Bhūtato maññatīti ettha pana sa-upakaraṇassa attano vā parassa vā yato kutoci bhūtato uppattim maññamāno bhūtato maññatīti veditabbo, ayamassa diṭṭhimaññanā. Tasmimyeva panassa diṭṭhimaññanāya maññite vatthusmim sinehaṃ mānañca uppādayato taṇhāmanamaññanāpi veditabbā. **Bhūte meti maññatīti** ettha pana ekā taṇhāmaññanāva labbhati. Sā cāyaṃ “mama puttā, mama dhītā, mama ajeḷakā, kukkuṭasūkarā, hatthigavassavaḷavā”³ti evamādinā nayena mamāyato pavattatīti veditabbā. **Bhūte abhinandatīti** etaṃ vuttanayameva. **Apariññātaṃ tassāti** ettha pana ye saṅkhāre upādāya bhūtānaṃ paññatti, tesam apariññātattā bhūtā apariññātā hontīti veditabbā. Yojanā pana vuttanayeneva kātabbā.

1. Attānaṃ vā bhūtañca attanā sadisaṃ (Syā)

2. Abhi 2. 369 piṭṭhe.

3. Dī 1. 50 piṭṭhe.

Evam saṅkhepato saṅkhāravasena ca sattavasena ca maññanāvattum dassetvā idāni bhūmivisesādinā bhedenā vitthāratopi taṃ dassento **deve devatoti**-ādimāha. Tattha dibbanti pañcahi kāmagaṇehi attano vā iddhiyāti **devā**, kīḷanti jotenti cāti attho. Te tividhā sammutidevā upapattidevā visuddhidevāti. **Sammutidevā** nāma rājāno deviyo rājakumārā. **Upapattidevā** nāma Cātumahārājike deve upādāya tatuttaridevā. **Visuddhidevā** nāma arahanto khīṇāsavā. Idha pana upapattidevā daṭṭhabbā, no ca kho avisesena. Paranimmitavasavattidevaloke māraṃ sapaṇisaṃ ṭhapetvā sesā cha kāmāvacarā idha devāti adhippetā. Tattha sabbā atthavaṇṇanā bhūtavāre vuttanayeneva veditabbā.

Pajāpatinti ettha pana māro pajāpatīti veditabbo. Keci pana “tesaṃ tesaṃ devānaṃ adhipatīnaṃ mahārājādīnaṃ etaṃ adhivacanan”ti vadanti. Taṃ devaggahaṇeneva tesaṃ gahitattā ayuttanti Mahā-aṭṭhakathāyaṃ paṭikkhittaṃ, māroyeva pana sattaśaṅkhātāya pajāya adhipatibhāvena idha pajāpatīti adhippeto. So kuhiṃ vasati? Paranimmitavasavattidevaloke. Tatra hi **Vasavattirājā** rajjaṃ kāreti. **Māro** ekasmiṃ padese attano paṇisāya issariyaṃ pavattento rajjapaccante dāmarikarājaputto viya vasatīti vadanti. Māraggahaṇeneva cettha māraparisāyapi gahaṇaṃ veditabbam. Yojanānayo cettha pajāpatim vaṇṇavantaṃ dīghāyukaṃ sukhabahulaṃ disvā vā sutvā vā rajjanto taṇhāmaññanāya maññati. “Aho vatāhaṃ pajāpatino saḥabyataṃ upapajjeyyan”ti-ādinā vā pana nayena appaṭiladdhassa paṭilābhāya cittaṃ paṇidahantopi pajāpatim taṇhāmaññanāya maññati. Pajāpatibhāvaṃ pana patto samāno ahamasmi pajānamissaro adhipatīti mānaṃ janento pajāpatim mānamaññanāya maññati. “Pajāpati nicco dhuvo”ti vā “ucchiḷḷissati vinassissati”ti vā “avaso abalo avīriyo niyatisaṅgatibhāvapariṇato chasvevābhijātisu sukhadukkhaṃ paṭisaṃvedeti”ti vā maññamāno pana pajāpatim diṭṭhimaññanāya maññatīti veditabbo.

Pajāpatisminti ettha pana ekā diṭṭhimaññanāva yujjati. Tassā evaṃ pavatti veditabbā. Idhekacco “pajāpatismim ye ca dhammā samvijjanti, sabbe te niccā

dhuvā sassatā avipariṇāmadhammā”ti maññati. Atha vā “pajāpatismim natthi pāpaṃ, na tasmim pāpakāni kammāni upalabbhantī”ti¹ maññati.

Pajāpatitoti ettha tissopi maññanā labbhanti. Kathaṃ? Idhekacco sa-upakaraṇassa attano vā parassa vā pajāpatito uppattim vā niggamaṇaṃ vā maññati, ayamassa diṭṭhimaññanā. Tasmimyeva paṇassa diṭṭhimaññanāya maññite vatthusmim sinehaṃ mānañca uppādayato taṇhāmaññanāpi veditabbā. **Pajāpatim meti** ettha pana ekā taṇhāmaññanāva labbhanti. Sā cāyaṃ “pajāpati mama satthā mama sāmī”ti-ādinā nayena mamāyato pavattatīti veditabbā. Sesam vuttanayameva.

Brahmaṃ brahmatoti ettha brūhito tehi tehi guṇavisesehīti **brahmā**. Api ca brahmāti mahābrahmāpi vuccati, Tathāgatopi brāhmaṇopi mātāpitaropi seṭṭhampi. “Sahasso brahmā dvisahasso brahmā”ti-ādīsu² hi mahābrahmā brahmāti vuccati. “Brahmāti kho bhikkhave Tathāgatassetam adhivacanan”ti ettha Tathāgato.

“Tamonudo Buddho samantacakkhu,
Lokantagū sabbabhavātivatto.
Anāsavo sabbadukkhappahīno,
Saccavhaya brahme upāsito me”ti³—

Ettha brāhmaṇo.

“Brahmāti mātāpitaro, pubbācariyāti vuccare”ti⁴—

Ettha mātāpitaro. “Brahmacakkaṃ pavatteti”ti⁵ ettha seṭṭham. Idha pana paṭhamābhiniibbatto kappāyuko brahmā adhippeto. Taggahaṇeneva ca Brahmaṇapurohitabrahmapārisajjāpi gahitāti veditabbā. Atthavaṇṇanā panettha pajāpativāre vuttanayeneva veditabbā.

Ābhassaravāre daṇḍadīpikāya acci viya etesaṃ sarīrato ābhā chijjivā chijjivā⁶ patantī viya sarati visaratīti **Ābhassarā**. Tesam

1. Upalippantīti (Sī) 2. Ma 3. 142 piṭṭhe. 3. Khu 8. 206 piṭṭhe.

4. Khu 1. 269 piṭṭhe; Khu 6. 82 piṭṭhe ca. 5. Ma 1. 99 piṭṭhe; Am 2. 8 piṭṭhe ca.

6. Chijjivā (Ka)

gahaṇena sabbāpi dutiyajjhānabhūmi gahitā, ekatalavāsino eva cete sabbepi Parittābhā Appamāṇābhā Ābhassarāti veditabbā.

Subhakiṇḥavāre subhena okiṇṇā vikiṇṇā subhena sarīrapabhāvaṇṇena ekagghanā suvaṇṇamañjūsāya ṭhapitasampajjalitakañcanapiṇḍasassirikāti **Subhakiṇḥā**. Tesam gahaṇena sabbāpi tatiyajjhānabhūmi gahitā, ekatalavāsino eva cete sabbepi Parittasubhā Appamāṇasubhā Subhakiṇḥāti veditabbā.

Vehapphalavāre vipulā phalāti **Vehapphalā**. Catutthajjhānabhūmi brahmāno vuccanti. Atthanayayanā pana imesu tīsopi vāresu bhūtavāre vuttanayeneva veditabbā.

Abhibhūvāre abhibhavīti **Abhibhū**. Kim abhibhavi? Cattāro khandhe arūpino. Asaññabhavassetam adhivacanam. Asaññasattā devā Vehapphalehi saddhim ekatalāyeva ekasmim okāse yena iriyāpathena nibbattā, teneva yāvātāyukam tiṭṭhanti cittakammarūpasadisā hutvā. Te idha sabbepi abhibhūvacanena gahitā. Keci **Abhibhū** nāma sahasso brahmāti evamādinā nayena tattha tattha adhipatibrahmānam vaṇṇayanti. Brahmaggahaṇeneva pana tassa gahitattā ayuttametanti veditabbarim. Yojanānayo cettha abhibhū vaṇṇavā dīghāyukoti sutvā tattha chandarāgam uppādentō abhibhum taṇhāmaññanāya maññati. “Aho vatāham abhibhuno sahabyatam upapajjeyyan”ti-ādinā pana nayena appaṭiladdhassa paṭilābhāya cittam paṇidahantopi abhibhum taṇhāmaññanāya maññati. Attānam hīnato abhibhum seyyato dahanto pana abhibhum mānāmaññanāya maññati. “Abhibhū nicco dhuvo”ti-ādinā nayena parāmasanto abhibhum diṭṭhimaññanāya maññatīti veditabbo. Sesam pajāpativāre vuttanayameva.

Ākāsānañcāyatanavārādivaṇṇanā

4. Evam Bhagavā paṭipāṭiyā devaloke dassentopi abhibhūvacanena asaññabhavam dassetvā idāni yasmā ayam vaṭṭakathā, Suddhāvāsā ca vivaṭṭapakke ṭhitā, anāgāmikhīṇāsavā eva hi te devā. Yasmā vā

katipayakappasahassāyukā te devā, Buddhuppādakāleyeva honti. Buddhā pana asaṅkheyyepi kappe na uppajjanti, tadā suññāpi sā bhūmi hoti. Rañño khandhāvāraṭṭhānaṃ viya hi Buddhānaṃ Suddhāvāsabhavo. Te teneva ca kāraṇena viññāṇaṭṭhitisattāvāsavasenapi na gahitā, sabbakālikā pana imā maññanā. Tasmā tāsāṃ sadāvijjamānabhūmim dassento Suddhāvāse atikkamitvā **Ākāsānañcāyatananti**-ādimāha. Tattha **Ākāsānañcāyatananti** tabbhūmikā cattāro kusalavipākakiriya khandhā. Te ca tatrūpapannāyeva daṭṭhabbā bhavaparicchedakathā ayanti katvā. Esa nayo **Viññānañcāyatanā**disu. Atthayojanā pana catūsupi etesu vāresu Abhibhūvāre vuttanayeneva veditabbā. Mānamaññanā cettha pajāpativāre vuttanayenāpi yujjati.

Diṭṭhasutavārādivaṇṇanā

5. Evaṃ bhūmivisesādinā bhedena vitthāratopi maññanāvattum dassetvā idāni sabbaṃ maññanāvattubhūtaṃ sakkāyapariyāpannaṃ tebhūmakadhammabhedam diṭṭhādīhi catūhi saṅgaṇhitvā dassento **diṭṭham diṭṭhatoti**-ādimāha.

Tattha **diṭṭhanti** maṃsacakkhunāpi diṭṭham, dibbacakkhunāpi diṭṭham. Rūpāyatanassetam adhivacanam. Tattha **diṭṭham maññati**ti diṭṭham tīhi maññanāhi maññati. Katham? Rūpāyatanam subhasaññāya sukhasaññāya ca passanto tattha chandarāgam janeti, tam assādeti abhinandati. Vuttampi hetam Bhagavatā “itthirūpe bhikkhave sattā rattā gidhā gadhitā mucchitā ajjhosannā, te dīgharattam socanti itthirūpavasānugā”ti¹. Evaṃ diṭṭham taṇhāmaññanāya maññati. “Iti me rūpam siyā anāgatamaddhānanti vā panettha nandim samannāneti, rūpasampadam vā pana ākaṅkhamāno dānam deti”ti vitthāro. Evampi diṭṭham taṇhāmaññanāya maññati. Attano pana parassa ca rūpasampattim vipattim nissāya mānam janeti. “Imināham seyyosmi”ti vā “sadisosmi”ti vā “hīnosmi”ti vāti evam diṭṭham mānāmaññanāya maññati. Rūpāyatanam pana niccam dhuvaṃ sassatanti maññati, attānam attaniyanti maññati, maṅgalam amaṅgalanti maññati, evam diṭṭham diṭṭhimaññanāya maññati. Evaṃ diṭṭham tīhi maññanāhi maññati. Katham diṭṭhasmim maññati? Rūpasmim

1. Am 2. 60 piṭṭhe.

attānaṃ samanupassananayena maññanto diṭṭhasmiṃ maññati. Yathā vā dhane dhaññe¹. Evaṃ rūpasmiṃ rāgādayoti maññantopi diṭṭhasmiṃ maññati. Ayamassa diṭṭhimaññanā. Tasmiññeva panassa diṭṭhimaññanāya maññite vatthusmiṃ sinehaṃ mānañca uppādayato taṇhāmānamaññanāpi veditabbā. Evaṃ diṭṭhasmiṃ maññati. Sesāṃ pathavīvāre vuttanayeva veditabbaṃ.

Sutanti maṃsasotenapi sutāṃ, dibbasotenapi sutāṃ, saddāyatanassetāṃ adhivacanaṃ.

Mutanti mutvā munitvā ca gahitaṃ, āhacca upagantvāti attho, indriyānaṃ ārammaṇānañca aññamaññasaṃsilese viññātanti vuttaṃ hoti, gandharasaphoṭṭhabbāyatanānaṃ etaṃ adhivacanaṃ.

Viññātanti manasā viññātāṃ, sesānaṃ sattannaṃ āyatanānametaṃ adhivacanaṃ dhammārammaṇassa vā. Idha pana sakkāyapariyāpannameva labbhati. Viṭṭhāro panettha diṭṭhavāre vuttanayeva veditabbo.

Ekattavārādivaṇṇanā

6. Evaṃ sabbaṃ sakkāyabhedāṃ diṭṭhādīhi catūhi dassetvā idāni tameva samāpannakavārena ca asamāpannakavārena ca dvidhā dassento **ekattaṃ nānattanti**-ādimāha.

Ekattanti iminā hi samāpannakavāraṃ dasseti. **Nānattanti** iminā asamāpannakavāraṃ. Tesāṃ ayaṃ vacanattho, ekabhāvo **ekattaṃ**. Nānābhāvo **nānattanti**. Yojanā panettha samāpannakavāraṃ catūhi khandhehi, asamāpannakavārañca pañcahi khandhehi bhinditvā “rūpaṃ attato samanupassatī”ti-ādinā sāsananayena pathavīvārādīsu vuttena ca Aṭṭhakathānāyena yathānurūpaṃ vīmaṃsitvā veditabbā. Keci pana ekattanti ekattanayaṃ vadanti nānattanti nānattanayaṃ. Apare “ekattasaññī attā hoti arogo paraṃ maraṇā, nānattasaññī attā hoti”ti evaṃ diṭṭhābhinivesaṃ. Taṃ sabbaṃ idha nādhīppetattā ayuttameva hoti.

1. Thane thaññāṃ (Si)

Evam sabbam sakkāyam dvidhā dassetvā idāni tameva ekadhā sampiṇḍetvā dassento **sabbam sabbatoti**-ādimāha. Yojanānayo panettha sabbam assādentō sabbam taṇhāmaññanāya maññati. “Mayā ete sattā nimmitā”ti-ādinā nayena attanā nimmitam maññanto sabbam mānāmaññanāya maññati. “Sabbam pubbekatakammahetu, sabbam issaranimmānahetu, sabbam ahetu-apaccayā, sabbam atthi, sabbam natthi”ti-ādinā nayena maññanto sabbam diṭṭhimaññanāya maññatīti veditabbo. Katham sabbasmim maññati? Idhekacco evandiṭṭhiko hoti “mahā me attā”ti. So sabbalokasannivāsam tassokāsabhāvena parikappetvā so kho pana me ayam attā sabbasminti maññati, ayamassa diṭṭhimaññanā. Tasmim yeva panassa attani sineham tabbatthukañca mānam uppādayato taṇhāmānāmaññanāpi veditabbā. Sesam pathavivāre vuttanayeneva veditabbam.

Evam sabbam sakkāyam ekadhā dassetvā idāni aparenapi nayena tam ekadhā dassento **nibbānam nibbānatoti** āha. Tattha **nibbānanti** “yato kho bho ayam attā pañcahi kāmaguṇehi samappito samaṅgibhūto paricāreti. Ettāvata kho bho ayam attā paramadiṭṭhadhammanibbānam patto hoti”ti-ādinā nayena pañcadhā āgataṃ paramadiṭṭhadhammanibbānam veditabbam. Tattha nibbānam assādentō taṇhāmaññanāya maññati. Tena nibbānena “ahamasmi nibbānam patto”ti mānam janento mānāmaññanāya maññati. Anibbānamyeva samānam tam nibbānato niccādito ca gaṇhanto diṭṭhimaññanāya maññatīti veditabbā.

Nibbānato pana aññam attānam gahetvā so kho pana me ayam attā imasmim nibbāneti maññanto nibbānasmim maññati, ayamassa diṭṭhimaññanā. Tasmimyeva panassa attani sineham tabbatthukañca mānam uppādayato taṇhāmānāmaññanāpi veditabbā. Esa nayo nibbānato maññanāyapi. Tatrapi hi nibbānato aññam attānam gahetvā “idaṃ nibbānam, ayam attā, so kho pana me ayam attā ito nibbānato añño”ti maññanto nibbānato maññati, ayamassa diṭṭhimaññanā. Tasmimyeva panassa attani sineham tabbatthukañca mānam uppādayato taṇhāmānāmaññanāpi veditabbā. “Aho sukham mama nibbānan”ti maññanto pana nibbānam meti maññatīti veditabbo. Sesam vuttanayameva. Ayam panettha anugīti.

Yādiso esa sakkāyo, tathā naṃ avijānato.
 Puthujjanassa sakkāye, jāyanti sabbamaññanā.
 Jeguccho bhiduro cāyaṃ, dukkho apariṇāyako.
 Taṃ paccaṇīkato bālo, gaṇhaṃ gaṇhāti maññanaṃ.
 Subhato sukhato ceva, sakkāyaṃ anupassato.
 Salabhasseva aggimhi, hoti taṇhāya maññanā.
 Niccasaññaṃ adhiṭṭhāya, sampattiṃ tassa passato.
 Gūthādī viya¹ gūthasmiṃ, hoti mānena maññanā.
 Attā attaniyo meti, passato naṃ abuddhino.
 Ādāse viya bondhissa², diṭṭhiyā hoti maññanā.
 Maññanāti ca nāmetaṃ, sukhumaṃ mārabandhanaṃ.
 Sithilaṃ duppamuñcaṇca, yena baddho puthujjano.
 Bahuṃ vipphandamānopi, sakkāyaṃ nātivattati.
 Samussitaṃ daḷhatthambhaṃ, sāva gaddulabandhano.
 Saso sakkāyamalīno, jātiyā ca jarāya ca.
 Rogādīhi ca dukkhehi, niccaṃ haññati bālhaso³.
 Taṃ vo vadāmi bhaddante, sakkāyaṃ anupassatha.
 Asātato asubhato, bhedato ca anattato.
 Eso sabhāvo hetassa⁴, passaṃ evamimaṃ budho.
 Pahāya maññanā sabbā, sabbadukkhā pamuccatīti.

Puthujjanavasena catuvīsatisabbā⁵ paṭhamanayakathā niṭṭhitā.

1. Sāva (Sī, Syā)

2. Mandassa (Sī), bimbassa (Syā)

3. Bāliṣo (Sī, Syā)

4. So tassa (Ka)

5. Catuvīsatisabbā (Ka)

Sekkhavāradutiyanayavaṇṇanā

7. Evaṃ Bhagavā pathavī-ādīsu vatthūsu sabbasakkāyadhammāmūlabhūtaṃ puthujjanassa pavattiṃ dassetvā idāni tesveva vatthūsu sekkhassa pavattiṃ dassento **yopi so bhikkhave bhikkhu sekkhoti**-ādimāha. Tattha **yoti** uddesavacanaṃ. **Soti** niddesavacanaṃ. **Pikāro** sampiṇḍanattho ayampi dhammo aniyatoti-ādīsu viya. Tena ca ārammaṇasabhāgena puggalaṃ sampiṇḍeti, no puggalasabhāgena, heṭṭhato hi puggalā diṭṭhivipannā, idha diṭṭhisampannā, na tesaṃ sabhāgatā atthi. Ārammaṇaṃ pana heṭṭhā puggalānampi tadeva, imesampi tadevāti. Tena vuttaṃ “ārammaṇasabhāgena puggalaṃ sampiṇḍeti no puggalasabhāgena”ti. **Yopi soti** iminā pana sakalena vacanena idāni vattabbaṃ sekkhaṃ dassetīti veditabbo. **Bhikkhave bhikkhūti** idaṃ vuttanayameva.

Sekkhoti kenatṭhena sekkho? Sekkhadhammappaṭilābhato **sekkho**. Vuttañhetam “kittāvatā nu kho bhante sekkho hotīti. Idha bhikkhave bhikkhu sekkhāya sammādiṭṭhiyā samannāgato hoti -pa- sekkhena sammāsamādhinā samannāgato hoti. Ettāvatā kho bhikkhu sekkho hoti”ti¹. Api ca sikkhatītipi sekkho. Vuttaṃ hetam “sikkhatīti kho bhikkhu tasmā sekkhoti vuccati. Kiñca sikkhati, adhisīlampi sikkhati, adhicittampi sikkhati, adhipaññampi sikkhati, sikkhatīti kho bhikkhu tasmā sekkhoti vuccati”ti².

Yopi kalyāṇaputhujjano anulomapaṭipadāya paripūrakārī sīlasampanno indriyesu guttadvāro bhojane mattaññū jāgariyānuyogamanuyutto pubbarattāpararattaṃ bodhipakkhiyānaṃ dhammānaṃ bhāvanānuyogamanuyutto viharati “ajja vā sve vā aññataraṃ sāmāññaphalaṃ adhiḡamissāmī”ti, sopi vuccati sikkhatīti sekkhoti. Imasmiṃ panatthe paṭivedhappattova sekkho adhippeto, no puthujjano.

Appattaṃ mānaṃ etenāti **appattamānaso**. **Mānasanti** rāgopi cittampi arahattampi. “Antalikkhacaro pāso, yvāyaṃ carati mānaso”ti³ ettha hi

1. Saṃ 3. 12 piṭṭhe. 2. Aṃ 1. 232 piṭṭhesu. 3. Vi 3. 28; Saṃ 1. 113 piṭṭhesu.

rāgo mānasam. “Cittam mano mānasam”¹ ettha cittam. “Appattamānaso sekkho, kālam kayirā janasutā”² ettha arahattam. Idhāpi arahattameva adhippetam. Tena appattārahattoti vuttam hoti.

Anuttaranti seṭṭham, asadisanti attho. Catūhi yogehi khemam ananuyuttanti³ **yogakkhemam**, arahattameva adhippetam. **Patthayamānoti** dve patthanā taṇhāpatthanā ca, chandapatthanā ca. “Patthayamānassa hi pajjappitāni, pavedhitam vāpi pakappitesū”⁴ ettha taṇhāpatthanā.

“Chinnam pāpimato sotam, viddhastam vinalīkatam.

Pāmojjabahulā hotha, khemam pattattha bhikkhavo”⁵—

Ettha kattukamyatā kusalacchandapatthanā. Ayameva idhādhippetā. Tena **patthayamānoti** tam yogakkhemam pattukāmo adhigantukāmo tanninno tappoṇo tappabbhāroti veditabbo. **Viharatīti** aññam iriyāpathadukkham aññena iriyāpathena vicchinditvā aparipatantam kāyam harati. Atha vā “sabbe saṅkhārā aniccāti adhimuccanto saddhāya viharatī”⁶ ti-ādināpi niddesanayenettha attho daṭṭhabbo. **Pathaviṃ pathavito abhijānātīti** pathaviṃ pathaviḅbhāvena abhijānāti, na puthujjano viya sabbakāraviparītāya saññāya sañjānāti. Api ca kho abhivisiṭṭhena ñāṇena jānāti, evam pathavīti etaṃ pathaviḅbhavam adhimuccantoyeva⁶ nam aniccātipi dukkhātipi anattātipi evam abhijānātīti vuttam hoti. Evañca nam abhiññatvā pathaviṃ mā maññīti vuttam hoti. Maññātīti **maññī**. Ayam pana maññī ca na maññī ca na vattabboti. Etasmiñhi atthe idam padam nipātetvā vuttanti veditabbam. Ko panettha adhippāyoti. Vuccate, puthujjano tāva sabbamaññanānam appahīnattā maññātīti vutto. Khīṇāsavo pahīnattā na maññātīti. Sekkhassa pana diṭṭhimaññanā pahīnā, itarā pana tanubhāvam gatā, tena so maññātītipi na vattabbo puthujjano viya, na maññātītipi na vattabbo khīṇāsavo viyāti.

Pariññeyyam tassāti tassa sekkhassa tam maññanāvattu okkantaniyamattā sambodhiparāyaṇattā ca tīhi pariññāhi pariññeyyam, apariññeyyañca

1. Abhi 1. 27 piṭṭhe.

2. Sam 1. 122 piṭṭhe.

3. Anupaddutanti (Sī, Syā)

4. Khu 1. 419 piṭṭhe.

5. Ma 1. 289 piṭṭhe.

6. Amuñcantoyeva (Sī, Syā)

apariññātañca na hoti puthujjanassa viya, nopi pariññātaṃ khīṇāsavassa viya. Sesam̐ sabbattha vuttanayameva.

Sekkhavasena dutiyanayakathā niṭṭhitā.

Khīṇāsavavāratatīyādinayavaṇṇanā

8. Evaṃ pathavī-ādīsu vatthūsu sekkhassa pavattim̐ dassetvā idāni khīṇāsavassa pavattim̐ dassento **yopi so bhikkhave bhikkhu arahanti-ādimāha**. Tattha **yopī**tipisaddo sampiṇḍanattho. Tena idha ubhayasabhāgatāpi labbhatīti dasseti. Sekkho hi khīṇāsavena ariyapuggalattā sabhāgo, tena puggalasabhāgatā labbhati, ārammaṇasabhāgatā pana vuttanayā eva. **Arahanti** ārakakilesa, dūrakilesa pahīnakilesoti attho. Vuttañcetaṃ Bhagavatā “kathañca bhikkhave bhikkhu araham̐ hoti. Ārakāssa honti pāpakā akusalā dhammā saṃkilesikā ponobbhavikā sadarā dukkhavipākā āyatim̐ jātijarāmarañiyā. Evaṃ kho bhikkhave bhikkhu araham̐ hotī”¹. **Khīṇāsavoti** cattāro āsavā kāmāsavo -pa- avijjāsavo, ime cattāro āsavā arahato khīṇā pahīnā samucchinnā paṭippassaddhā, abhabbuppattikā ñāṇagginā daḍḍhā, tena vuccati khīṇāsavoti.

Vusitavāti garusaṃvāsepi ariyamaggasaṃvāsepi dasasu ariyavāsesupi vasi parivasi vuttho parivuttho, so vutthavāso ciṇṇacaraṇoti **vusitavā**. **Katakaraṇīyoti** puthujjanakalyāṇakam̐ upādāya satta sekkhā catūhi maggehi karaṇīyam̐ karonti nāma, khīṇāsavassa sabbakaraṇīyāni katāni pariyositāni, natthi tassa uttari karaṇīyam̐ dukkhakkhayādhigamāyāti katakaraṇīyo. Vuttampi hetam̐—

“Tassa sammā vimuttassa, santacittassa bhikkhuno.
Katassa paṭicayo natthi, karaṇīyam̐ na vijjatī”².

Ohitabhāroti tayo bhārā khandhabhāro kilesabhāro abhisankhārabhāroti, tassime tayo bhārā ohitā oropitā

1. Ma 1. 348 piṭṭhe.

2. Khu 2. 312 piṭṭhe.

nikkhittā pātītā, tena vuccati **ohitabhāroti**. **Anuppattasadatthoti** anuppatto sadattham, sakatthanti vuttam hoti. Kakārassāyam dakāro kato, sadatthoti ca arahattam veditabbam. Tañhi attupanibandhanaṭṭhena attānam avijahanaṭṭhena attano paramatthaṭṭhena ca attano attho sakatthoti vuccati.

Parikkhīṇabhavasāmyojanoti bhavasāmyojanānīti dasa sāmyojanāni kāmārāgasāmyojanam paṭighamānadiṭṭhivicikicchāsīlabbataparāmāsabhavarāga-issāmacchariyasāmyojanam avijjāsāmyojanam. Imāni hi satte bhavesu sāmyojenti upanibandhanti, bhavam vā bhavena sāmyojenti, tasmā “bhavasāmyojanānī”ti vuccanti. Imāni bhavasāmyojanāni arahato parikkhīṇāni pahīnāni ñāṇagginā daḍḍhāni, tena vuccati “parikkhīṇabhavasāmyojano”ti. **Sammadaññā vimuttoti** ettha **sammadaññāti** sammā aññāya. Kim vuttam hoti—khandhānam khandhaṭṭham, āyatanānam āyatanaṭṭham, dhātūnam dhātuṭṭham, dukkhassa pīḷanaṭṭham, samudayassa pabhavaṭṭham, nirodhassa santaṭṭham, maggassa dassanaṭṭham, sabbe saṅkhārā aniccāti evamādiṃ vā bhedaṃ sammā yathābhūtam aññāya jānitvā tīrayitvā tulayitvā vibhāvetvā vibhūtam katvāti.

Vimuttoti dve vimuttiyo cittassa ca vimutti nibbānañca. Arahā sabbakilesehi vimuttacittattā cittavimuttiyāpi vimutto. Nibbānam adhimuttattā nibbānēpi vimutto. Tena vuccati “sammadaññā vimutto”ti.

Pariññātam tassāti tassa arahato tam maññānāvattu tīhi pariññāhi pariññātam. Tasmā so tam vatthum na maññati, tam vā maññanam na maññatīti vuttam hoti, sesam vuttanayameva.

Nibbānavāre pana **khayā rāgassāti**-ādayo tayo vārā vuttā. Te pathavīvārādīsipi vitthāretabbā. Ayañca pariññātavāro nibbānavārepi vitthāretabbo. Vitthārentena ca pariññātam tassāti sabbapadehi yojetvā puna khayā rāgassa vītarāgattāti yojetabbam. Esa nayo itaresu. Desanā pana ekattha vuttam sabbattha vuttameva hotīti saṃkhittā.

Khayā rāgassa vītarāgattāti ettha ca yasmā bāhirako kāmesu vītarāgo, na khayā rāgassa vītarāgo. Arahā pana khayā eva, tasmā

vuttaṃ “khayā rāgassa vītarāgattā”ti. Esa nayo dosamohesupi. Yathā ca “pariññātaṃ tassāti vadāmi”ti vuttepi pariññātattā so taṃ vatthum taṃ vā maññanaṃ na maññatīti attho hoti, evamidhāpi vītarāgattā so taṃ vatthum taṃ vā maññanaṃ na maññatīti daṭṭhabbo.

Ettha ca pariññātaṃ tassāti ayaṃ vāro maggabhāvanāpāripūridassanattaṃ vutto. Itare pana phalacchikiriyāpāripūridassanattanti veditabbā. Dvīhi vā kāraṇehi arahā na maññati vatthussa ca pariññātattā akusalamūlānaṃca samucchinnattā. Tenassa pariññātavārena vatthuno vatthupariññam¹ dīpeti, itarehi akusalamūlasamucchedanti. Tattha pacchimesu tīsu vāresu ayaṃ viseso veditabbo, tīsu hi vāresu rāge ādīnavaṃ disvā dukkhānupassī viharanto appaṇihitavimokkhena vimutto khayā rāgassa vītarāgo hoti. Dose ādīnavaṃ disvā aniccānupassī viharanto animittavimokkhena vimutto khayā dosassa vītadoso hoti. Mohe ādīnavaṃ disvā anattānupassī viharanto suññatavimokkhena vimutto khayā mohassa vītamoho hotīti.

Evam sante na eko tīhi vimokkhehi vimuccatīti dve vārā na vattabbā siyunti ce, taṃ na. Kasmā? Aniyamittā. Aniyamena hi vuttaṃ “yopi so bhikkhave bhikkhu arahan”ti, na pana vuttaṃ appaṇihitavimokkhena vā vimutto, itarena vāti, tasmā yaṃ arahato yujjati, taṃ sabbaṃ vattabbamevāti.

Avisesena vā yo koci arahā samānepi² rāgādikkhaye vipariṇāmadukkhassa pariññātattā khayā rāgassa vītarāgoti vuccati, dukkhadukkhassa pariññātattā khayā dosassa vītadosoti. Saṅkhāradukkhassa pariññātattā khayā mohassa vītamohoti. Iṭṭhārammaṇassa vā pariññātattā khayā rāgassa vītarāgo. Anīṭṭhārammaṇassa pariññātattā khayā dosassa vītadoso. Majjhārammaṇassa pariññātattā khayā mohassa vītamoho. Sukhāya vā vedanāya rāgānusayassa samucchinnattā khayā rāgassa vītarāgo, itarāsu paṭiḡhamohānusayānaṃ

1. Pariññātataṃ (Ka)

2. Samānopi (Sī)

samucchinnattā vītadoso vītamoho cāti. Tasmā taṃ viśesaṃ dassento āha “khayā rāgassa vītarāgattā -pa- vītamohattā”ti.

Khīṇāsavavasena tatiyacatutthapañcamachaṭṭhanayakathā niṭṭhitā.

Tathāgatavārasattamanayavaṇṇanā

12. Evaṃ pathavī-ādīsu vatthūsu khīṇāsavassa pavattiṃ dassetvā idāni attano pavattiṃ dassento **Tathāgatopi bhikkhaveli**-ādimāha. Tattha **Tathāgatoti** aṭṭhahi kāraṇehi Bhagavā Tathāgatoti vuccati, tathā āgatoti Tathāgato, tathā gatoti Tathāgato, tathalakkhaṇaṃ āgatoti Tathāgato, tathadhamme yāthāvato abhisambuddhoti Tathāgato, tathadassitāya Tathāgato, tathāvāditāya Tathāgato, tathākāritāya Tathāgato, abhibhavanaṭṭhena Tathāgatoti.

Kathaṃ Bhagavā tathā āgatoti Tathāgato. Yathā sabbalokahitāya ussukkamāpannā purimakā Sammāsambuddhā āgatā, yathā Vipassī Bhagavā āgato, yathā Sikhī Bhagavā, yathā Vessabhū Bhagavā, yathā Kakusandho Bhagavā, yathā Koṇāgamano Bhagavā, yathā Kassapo Bhagavā āgatoti. Kim vuttaṃ hoti, yena abhinīhārena ete Bhagavanto āgatā, teneva amhākampi Bhagavā āgato.

Atha vā yathā Vipassī Bhagavā -pa- yathā Kassapo Bhagavā dānapāramiṃ pūretvā silanekkhammaṇṇāvīriyakhantisacca-adhiṭṭhānamettā-upekkhāpāramiṃ pūretvā imā dasa pāramiyo dasa upapāramiyo dasa paramatthapāramiyoti samattiṃ sapāramiyo pūretvā aṅgapariccāgaṃ nayana dhana rajja puttadārapariccāganti ime pañca mahāpariccāge pariccajitvā pubbayoga pubbacariya dhammakkhānañātathacariyādayo pūretvā buddhicariyāya koṭiṃ patvā āgato, tathā amhākampi Bhagavā āgato.

Yathā ca Vipassī Bhagavā -pa- yathā Kassapo Bhagavā cattāro satipaṭṭhāne sammappadhāne iddhipāde pañcindriyāni pañca balāni satta bojjhaṅge ariyaṃ aṭṭhaṅgikaṃ maggaṃ bhāvetvā brūhetvā āgato, tathā amhākaṃ Bhagavāpi āgatoti Tathāgato.

Yatheva lokamhi Vipassi-ādayo,
 Sabbaññubhāvaṃ munayo idhāgatā.
 Tathā ayam Sakyamunīpi āgato,
 Tathāgato vuccati tena cakkhumāti.

Evam tathā āgatoti Tathāgato. (1)

Katham tathā gatoti Tathāgato. Yathā sampatijāto Vipassī Bhagavā gato -pa- Kassapo Bhagavā gato. Katham ca so gatoti, so hi sampatijātova samehi pādehi pathaviyaṃ patiṭṭhāya uttarābhimukho sattapadavītiḥārena gato. Yathāha—sampatijāto Ānanda bodhisatto samehi pādehi pathaviyaṃ patiṭṭhahitvā uttarābhimukho sattapadavītiḥārena gacchati setamhi chatte anudhārīyamāne, sabbā ca disā anuviloketi, āsabiñca vācam bhāsati “aggohamasmi lokassa, jeṭṭhohamasmi lokassa, setṭhohamasmi lokassa, ayamantimā jāti, natthi dāni punabbhavo”¹.

Tañcassa gamanaṃ tathaṃ ahosi avitathaṃ anekesaṃ visesādhigamānaṃ pubbanimittabhāvena. Yañhi so sampatijātova samehi pādehi patiṭṭhahi, idamassa caturiddhipādapaṭilābhassa pubbanimittam. Uttarābhimukhabhāvo pana sabbalokuttarabhāvassa pubbanimittam. Sattapadavītiḥāro sattabojjhaṅgaratanapaṭilābhassa. “Suvaṇṇadaṇḍā vītipatanti cāmarā”² ettha vutto cāmarukkhepo sabbatitthiyanimmathanassa. Setacchattadhāraṇaṃ arahattavimuttivaravimalasetacchattapaṭilābhassa. Sabbadisānuvilokanaṃ sabbaññūtānāvaraṇaṇāṇapaṭilābhassa. Āsabhīvācābhāsaṇaṃ appaṭivattiyavaradhammacakkappavattanassa pubbanimittam. Tathā ayam Bhagavāpi gato. Tañcassa gamanaṃ tathaṃ ahosi avitathaṃ tesaññeva visesādhigamānaṃ pubbanimittabhāvena. Tenāhu porāṇā—

“Muhuttajātova gavaṃpatī yathā,
 Samehi pādehi phusī vasundharaṃ.
 So vikkamī satta padāni Gotamo,
 Setañca chattaṃ anudhārayuṃ marū.

1. Ma 3. 164 piṭṭhe.

2. Khu 1. 386 piṭṭhe.

Gantvāna so satta padāni Gotamo,
 Disā vilokesi samā samantato.
 Aṭṭhaṅgupetaṃ giramabbhudīrayī,
 Sīho yathā pabbatamuddhaniṭṭhito”ti.

Evam tathā gatoti Tathāgato.

Atha vā yathā Vipassī Bhagavā -pa- yathā Kassapo Bhagavā, ayampi Bhagavā tatheva nekkhammena kāmacchandaṃ pahāya gato. Abyāpādena byāpādam, ālokasaññāya thinamiddham, avikkhepena uddhaccakukkuccam, dhammavavattahānena vicikicchaṃ pahāya, ñāṇena avijjāṃ padāletvā, pāmojjena aratīṃ vinodetvā, paṭhamajjhānena nīvaraṇakavāṭaṃ ugghāṭetvā, dutiyajjhānena vitakkavicāradhūmaṃ vūpasametvā, tatiyajjhānena pīṭīṃ virājetvā, catutthajjhānena sukhadukkhaṃ pahāya, ākāsaññāyatanasamāpattiyā rūpasaññāpaṭighasaññānānattasaññāyo samatikkamitvā, viññāṇāyatanasamāpattiyā ākāsaññāyatanasaññāṃ, ākiñcaññāyatanasamāpattiyā viññāṇāyatanasaññāṃ, nevasaññānāsaññāyatanasamāpattiyā ākiñcaññāyatanasaññāṃ samatikkamitvā gato.

Aniccānupassanāya niccasaññāṃ pahāya, dukkhānupassanāya sukhasaññāṃ, anattānupassanāya attasaññāṃ, nibbidānupassanāya nandīṃ, virāgānupassanāya rāgaṃ, nirodhānupassanāya samudayaṃ, paṭinissaggānupassanāya ādānaṃ, khayānupassanāya ghanasaññāṃ, vayānupassanāya āyūhanaṃ, vipariṇāmānupassanāya dhuvasaññāṃ, animittānupassanāya nimittaṃ, appaṇihitānupassanāya paṇidhiṃ, suññatānupassanāya abhinivesaṃ, adhipaññādhammavipassanāya sārādānābhinivesaṃ, yathābhūtañāṇadassanena sammohābhinivesaṃ, ādīnavānupassanāya ālayābhinivesaṃ, paṭisañkhānupassanāya appaṭisañkhaṃ, vivaṭṭānupassanāya saṃyogābhinivesaṃ, sotāpattimaggena diṭṭhakaṭṭhe kilese bhañjitvā, sakadāgāmaggena oḷārike kilese pahāya, anāgāmaggena aṇusahagate kilese samugghāṭetvā, arahattamaggena sabbakilese samucchinditvā gato, evampi tathā gatoti Tathāgato. (2)

Katham tathalakkhaṇaṃ āgatoti Tathāgato. Pathavīdhātuyā
kakkhaḷattalakkhaṇaṃ tathaṃ avitathaṃ. Āpodhātuyā
paggharaṇalakkhaṇaṃ. Tejodhātuyā uṇhattalakkhaṇaṃ. Vāyodhātuyā
vitthambhanalakkhaṇaṃ. Ākāsadhātuyā asamphuṭṭhalakkhaṇaṃ.
Viññānadhātuyā vijānanalakkhaṇaṃ.

Rūpassa rupanalakkhaṇaṃ. Vedanāya vedayitalakkhaṇaṃ. Saññāya
sañjānanalakkhaṇaṃ. Saṅkhārānaṃ abhisāṅkhāraṇalakkhaṇaṃ. Viññāna
vijānanalakkhaṇaṃ.

Vitakkassa abhiniropanalakkhaṇaṃ. Vicārassa anumajjanalakkhaṇaṃ.
Pītiyā pharaṇalakkhaṇaṃ. Sukhassa sātālakkhaṇaṃ. Cittekaggatāya
avikkhepalakkhaṇaṃ. Phassassa phusanalakkhaṇaṃ.

Saddhindriyassa adhimokkhalakkhaṇaṃ. Vīriyindriyassa
paggahaṇalakkhaṇaṃ. Satindriyassa upaṭṭhānalakkhaṇaṃ. Samādhindriyassa
avikkhepalakkhaṇaṃ. Paññindriyassa pajānanalakkhaṇaṃ.

Saddhābalassa assaddhiye akampiyalakkhaṇaṃ. Vīriyabalassa kosajje.
Satibalassa muṭṭhasacce. Samādhibalassa uddhacce. Paññābalassa avijjāya
akampiyalakkhaṇaṃ.

Satisambojjhaṅgassa upaṭṭhānalakkhaṇaṃ.
Dhammavicayasambojjhaṅgassa pavicayalakkhaṇaṃ.
Vīriyasambojjhaṅgassa paggahaṇalakkhaṇaṃ. Pītisambojjhaṅgassa
pharaṇalakkhaṇaṃ. Passaddhisambojjhaṅgassa upasamalakkhaṇaṃ.
Samādhisambojjhaṅgassa avikkhepalakkhaṇaṃ. Upekkhāsambojjhaṅgassa
paṭisaṅkhānalakkhaṇaṃ.

Sammādiṭṭhiyā dassanalakkhaṇaṃ. Sammāsaṅkappassa
abhiniropanalakkhaṇaṃ. Sammāvācāya pariggāhalakkhaṇaṃ.
Sammākammantassa samuṭṭhānalakkhaṇaṃ. Sammā-ājīvassa
vodānalakkhaṇaṃ. Sammāvāyāmassa paggahalakkhaṇaṃ. Sammāsatiyā
upaṭṭhānalakkhaṇaṃ. Sammāsamādhissa avikkhepalakkhaṇaṃ.

Avijjāya aññānalakkhaṇaṃ. Saṅkhārānaṃ cetanālakkhaṇaṃ. Viññāna
vijānanalakkhaṇaṃ. Nāmassa namanalakkhaṇaṃ. Rūpassa
ruppanalakkhaṇaṃ. Saḷāyatanassa āyatanalakkhaṇaṃ. Phassassa
phusanalakkhaṇaṃ. Vedanāya vedayitalakkhaṇaṃ. Taṇhāya hetulakkhaṇaṃ.
Upādānaṃ gahaṇalakkhaṇaṃ. Bhavassa āyūhanalakkhaṇaṃ. Jātiyā
nibbattilakkhaṇaṃ. Jarāya jiraṇalakkhaṇaṃ. Maraṇassa cutilakkhaṇaṃ.

Dhātūnaṃ suññatālakkaṇaṃ. Āyatanānaṃ āyatanalakkaṇaṃ. Satipaṭṭhānānaṃ upaṭṭhānalakkaṇaṃ. Sammappadhānānaṃ padahanalakkaṇaṃ. Iddhipādānaṃ ijghanalakkaṇaṃ. Indriyānaṃ adhipatilakkaṇaṃ. Balānaṃ akampiyalakkaṇaṃ. Bojjhaṅgānaṃ niyyānalakkaṇaṃ. Maggassa hetulakkaṇaṃ.

Saccānaṃ tathalakkaṇaṃ. Samathassa avikkhepalakkaṇaṃ. Vipassanāya anupassanālakkaṇaṃ. Samathavipassanānaṃ ekarasalakkaṇaṃ. Yuganaddhānaṃ anativattanalakkaṇaṃ.

Sīlavisuddhiyā saṃvaralakkaṇaṃ. Cittavisuddhiyā avikkhepalakkaṇaṃ. Diṭṭhivisuddhiyā dassanalakkaṇaṃ.

Khayeñāṇassa samucchedalakkaṇaṃ. Anuppādeñāṇassa passaddhilakkaṇaṃ. Chandassa mūlalakkaṇaṃ. Manasikārassa samuṭṭhānalakkaṇaṃ. Phassassa samodhānalakkaṇaṃ. Vedanāya samosaraṇalakkaṇaṃ. Samādhissa pamukhalakkaṇaṃ. Satiyā ādhipeyyalakkaṇaṃ. Paññāya tatuttarilakkaṇaṃ. Vimuttiyā sāralakkaṇaṃ. Amatogadhassa nibbānassa pariyosānalakkaṇaṃ tathaṃ avitathaṃ. Evaṃ tathalakkaṇaṃ nāṇagatiyā āgato avirajjhivā patto anuppattoti Tathāgato, evaṃ tathalakkaṇaṃ āgatoti Tathāgato. (3)

Kathaṃ tathadhamme yāthāvato abhisambuddhoti Tathāgato. Tathadhammā nāma cattāri ariyasaccāni. Yathāha “cattārimāni bhikkhave tathāni avitathāni anaññathāni. Katamāni cattāri, idaṃ dukkhanti bhikkhave tathametaṃ avitathametaṃ anaññathametaṃ”¹ vitthāro. Tāni ca Bhagavā abhisambuddho, tasmā tathānaṃ abhisambuddhattā Tathāgatoti vuccati. Abhisambuddhattho hi ettha gatasaddo. Api ca jarāmaṇassa jātipaccayasambhūtasamudāgataṭṭho tatho avitatho anaññatho -pa-. Saṅkhārānaṃ avijjāpaccayasambhūtasamudāgataṭṭho tatho avitatho anaññatho. Tathā avijjāya saṅkhārānaṃ paccayaṭṭho. Saṅkhārānaṃ viññāṇassa paccayaṭṭho -pa-. Jātiyā jarāmaṇassa paccayaṭṭho tatho avitatho anaññatho. Taṃ sabbaṃ Bhagavā abhisambuddho, tasmāpi tathānaṃ dhammānaṃ abhisambuddhattā

1. Saṃ 3. 377 piṭṭhe.

Tathāgatoti vuccati. Evaṃ tathadhamme yāthāvato abhisambuddhoti
Tathāgato. (4)

Katham tathadassitāya Tathāgato. Bhagavā yaṃ sadevake loka -pa-
sadevamanussāya aparimāṇasu lokadhātūsu aparimāṇānaṃ sattānaṃ
cakkhudvāre āpāthaṃ āgacchantaṃ rūpārammaṇaṃ nāma atthi. Taṃ
sabbākārato jānāti passati. Evaṃ jānatā passatā ca tena taṃ
iṭṭhāniṭṭhādivasena vā diṭṭhasutamutaviññātesu labbhamānakapadavasena vā
“katamaṃ taṃ rūpaṃ rūpāyatanam, yaṃ rūpaṃ catunnaṃ mahābhūtānaṃ
upādāya vaṇṇanibhā sanidassanaṃ sappaṭighaṃ nīlaṃ pītakaṃ”¹ ādinā
nayena anekehi nāmehi terasahi vārehi dvepaññāsāya nayehi vibhajjamānaṃ
tathameva hoti, vitathaṃ natthi. Esa nayo sotadvārādīsupi
āpāthamāgacchantesu saddādīsū. Vuttaṃ cetam Bhagavatā “yaṃ bhikkhave
sadevakassa lokassa -pa- sadevamanussāya diṭṭhaṃ sutam mutaṃ viññātaṃ
pattam pariyesitaṃ anuvicaritaṃ manasā, tamahaṃ jānāmi, tamahaṃ
abhiññāsim, taṃ Tathāgatassa viditaṃ, taṃ Tathāgato na upaṭṭhāsī”².
Evaṃ tathadassitāya Tathāgato. Tattha tathadassī-atthe Tathāgatoti
padasambhavo veditabbo. (5)

Katham tathāvāditāya Tathāgato, yaṃ rattim Bhagavā Bodhimaṇḍe
Aparājitapallaṅke nisinno tiṇṇaṃ mārānaṃ matthakaṃ madditvā anuttaraṃ
sammāsambodhiṃ abhisambuddho, yañca rattim yamakasālānamantare
anupādisesāya nibbānadhātuyā parinibbāyi, etthantare
pañcaccattālisavassaparimāṇe kāle paṭhamabodhiyāpi majjhimbodhiyāpi
pacchimabodhiyāpi yaṃ Bhagavatā bhāsitaṃ Suttaṃ Geyyaṃ -pa-
Vedallaṃ, taṃ sabbaṃ atthato ca byañjanato ca anupavajjaṃ
anūnāmanadhikaṃ sabbākārāparipuṇṇaṃ rāgama
danimmadanaṃ dosamohamadanimmadanaṃ, natthi tattha vālaggamattampi
pakkhalitaṃ, sabbaṃ taṃ ekamuddikāya lañchitaṃ viya, ekanāḷiyā mitaṃ
viya, ekatulāya tulitaṃ viya ca tathameva hoti avitathaṃ. Tenāha “yañca
Cunda rattim Tathāgato anuttaraṃ sammāsambodhiṃ abhisambujjhati,
yañca rattim anupādisesāya nibbānadhātuyā parinibbāyati, yaṃ etasmim
antare bhāsati lapati niddisati, sabbaṃ taṃ tatheva hoti no aññathā. Tasmā
Tathāgatoti vuccatī”³.

1. Abhi 1. 162 piṭṭhe.

2. Am 1. 333 piṭṭhe.

3. Am 1. 332 piṭṭhe.

gada-attho hi ettha gatasaddo. Evaṃ tathāvāditāya Tathāgato. Api ca āgadanam āgado, vacananti attho. Tatho aviparīto āgado assāti dakārassa takāram katvā Tathāgatoti evametasmim atthe padasiddhi veditabbā. (6)

Katham tathākāritāya Tathāgato. Bhagavato hi vācāya kāyo anulometi, kāyassapi vācā. Tasmā yathāvādī tathākārī, yathākārī tathāvādī ca hoti. Evaṃbhūtassa cassa yathā vācā, kāyopi tathā gato pavattoti attho. Yathā ca kāyo, vācāpi tathā gatā pavattāti Tathāgato. Tenāha “yathāvādī bhikkhave Tathāgato tathākārī, yathākārī tathāvādī. Iti yathāvādī tathākārī, yathākārī tathāvādī. Tasmā Tathāgatoti vuccatī”¹. Evaṃ tathākāritāya Tathāgato. (7)

Katham abhibhavanaṭṭhena Tathāgato. Upari Bhavaggaṃ heṭṭhā Avicim pariyaṇṇam katvā tiriyaṃ aparimāṇasu lokadhātūsu sabbasatte abhibhavati sīlenapi samādhināpi paññāyapi vimuttiyāpi vimuttiñāṇadassanenapi, na tassa tulā vā pamāṇam vā atthi, atulo appameyyo anuttaro rājarājo devadevo sakkānam atisakko brahmānam atibrahmā. Tenāha “sadevake bhikkhave loke -pa- sadevamanussāya Tathāgato abhibhū anabhibhūto aññadatthu daso vasavattī. Tasmā Tathāgatoti vuccatī”¹.

Tatrevaṃ padasiddhi veditabbā, agado viya agado. Ko panesa? Desanāvilāsamayo ceva puññussayo ca. Tena hesa mahānubhāvo bhisakko dibbāgadena sappe viya sabbaparappavādino sadevakañca lokam abhibhavati, iti sabbalokābhibhavane tatho aviparīto desanāvilāsamayo ceva puññussayo ca agado assāti dakārassa takāram katvā Tathāgatoti veditabbo. Evaṃ abhibhavanaṭṭhena Tathāgato. (8)

Api ca tathāya gatotipi Tathāgato, tatham gatotipi Tathāgato. **Gatoti** avagato, aṭṭo, patto, paṭipannoti attho.

1. Am 1. 332 piṭṭhe.

tattha sakalaṃ lokam tīraṇapariññāya tathāya gato avagatoti Tathāgato.
 Lokasamudayaṃ pahānapariññāya tathāya gato atītoti Tathāgato.
 Lokanirodham sacchikiriyāya tathāya gato pattoti Tathāgato.
 Lokanirodhagāminiṃ paṭipadam tatham gato paṭipannoti Tathāgato. Tena
 yaṃ vuttam Bhagavatā “loko bhikkhave Tathāgatena abhisambuddho,
 lokasmā Tathāgato visamyutto. Lokasamudayo bhikkhave Tathāgatena
 abhisambuddho, lokasamudayo Tathāgatassa pahīno. Lokanirodho
 bhikkhave Tathāgatena abhisambuddho, lokanirodho Tathāgatassa
 sacchikato. Lokanirodhagāminī paṭipadā bhikkhave Tathāgatena
 abhisambuddhā, lokanirodhagāminī paṭipadā Tathāgatassa bhāvitā. Yaṃ
 bhikkhave sadevakassa lokassa -pa- sabbam tam Tathāgatena
 abhisambuddham, tasmā Tathāgatoti vuccatī”ti¹. Tassa evampi attho
 veditabbo. Idampi ca Tathāgatassa Tathāgatabhāvadīpane mukhamattameva.
 Sabbākārena pana Tathāgatova Tathāgatassa Tathāgatabhāvam vaṇṇeyya.

Araham Sammāsambuddhoti padadvaye pana ārakattā arīnam, arānañca
 hatattā, paccayādīnam arahattā, pāpakaraṇe rahābhāvāti imehi tāva kāraṇehi
Arahanti veditabbo.

Sammā sāmañca sabbadhammānam Buddhattā pana
Sammāsambuddhoti ayamettha saṅkhepo. Vitthārato panetaṃ padadvayaṃ
 Visuddhimagge Buddhānussatīvaṇṇanāyaṃ pakāsitaṃ.

Pariññātantaṃ Tathāgatassāti ettha pana tam maññanāvattu
 pariññātantaṃ Tathāgatassāti attho veditabbo. Pariññātantaṃ nāma
 pariññātapaṇānaṃ pariññātāvasānaṃ anavasesato pariññātanti vuttam hoti.
 Buddhānañhi sāvakehi saddhim kiñcāpi tena tena maggena kilesappahāne
 viseso natthi, pariññāya pana atthi. Sāvakā hi catunnam dhātūnam
 ekadesameva sammasitvā nibbānaṃ pāpuṇanti, Buddhānam pana
 aṇupamāṇampi saṅkhāragataṃ ṇāṇena
 adiṭṭhamatulitamatīritamasacchikataṃ natthi.

1. Am 1. 331 piṭṭhe.

Tathāgatavāra-aṭṭhamanayavaṇṇanā

13. **Nandī dukkhassa mūlanti**-ādīsu ca **nandīti** purimataṇhā. **Dukkhanti** pañcakkhandhā. **Mūlanti** ādi. **Iti viditvāti** taṃ purimabhavanandiṃ “imassa dukkhassa mūlan”ti evaṃ jānitvā. **Bhavāti** kammabhavato. **Jātīti** vipākakkhandhā. Te hi yasmā jāyanti, tasmā “jātī”ti vuttā. Jātisīsenā vā ayaṃ desanā. Etampi “iti viditvā”ti iminā yojetabbaṃ. Ayaṃ hi ettha attho “kammabhavato upapattibhavo hotīti evañca jānitvā”ti. **Bhūtassāti** sattassa. **Jarāmarañanti** jarā ca marañāṇca. Idam vuttam hoti—tena upapattibhavena bhūtassa sattassa khandhānaṃ jarāmarāṇaṃ hotīti evañca jānitvāti.

Ettāvatā yaṃ Bodhirukkhamūle Aparājitapallaṅke nisinno sammasitvā sabbaññutaṃ patto, tassa paṭiccasamuppādassa paṭivedho maññanānaṃ abhāvakāraṇaṃ dassento catusaṅkhepaṃ tisandhiṃ tiyaddhaṃ vīsataḱāraṃ tameva paṭiccasamuppādaṃ dasseti.

Kathaṃ pana ettāvatā esa sabbo dassito hotīti. Ettha hi nandīti ayameko saṅkhepo. Dukkhasāti vacanato dukkhaṃ dutiyo, bhavā jātīti vacanato bhavo tatiyo, jātijarāmarāṇaṃ catuttho. Evaṃ tāva cattāro saṅkhepā veditabbā, koṭṭhāsāti attho. Taṇhādukkhanaṃ pana antaraṃ eko sandhi, dukkhassa ca bhavassa ca antaraṃ dutiyo, bhavassa ca jātiyā ca antaraṃ tatiyo. Evaṃ catunnaṃ aṅgulīnaṃ antarasadisā catusaṅkhepantarā tayo sandhī veditabbā.

Tattha nandīti atīto addhā, jātijarāmarāṇaṃ anāgato, dukkhaṅca bhavo ca paccuppannoti evaṃ tayo addhā veditabbā. Atīte pana pañcasu ākāresu nandīvacanena taṇhā ekā āgatā, tāya anāgatāpi avijjāsaṅkhāra-upādānabhavā paccayalakkhaṇena gahitāva honti. Jātijarāmarāṇavacanena pana yesaṃ khandhānaṃ tajjātijarāmarāṇaṃ, te vuttā evāti katvā āyatim viññāṇanāmarūpasalāyatanaphassavedanā gahitāva honti.

Evamete “purimakammabhavasmim moho avijjā, āyūhanā saṅkhārā, nikanti taṇhā, upagamaṇaṃ upādānaṃ, cetanā bhavo iti ime pañca dhammā

purimakammabhavasmim idha paṭisandhiyā paccayā. Idha paṭisandhi viññāṇaṃ, okkanti nāmarūpaṃ, pasādo āyatanam, phuṭṭho phasso, vedayitam vedanā iti ime pañca dhammā idhūpapattibhavasmim purekatassa kammassa paccayā. Idha paripakkattā āyatanānaṃ moho avijjā, āyūhanaṃ saṅkhārā, nikanti taṇhā, upagamanamupādānaṃ, cetanā bhavo iti ime pañca dhammā idha kammabhavasmim āyatim paṭisandhiyā paccayā. Āyatim paṭisandhi viññāṇaṃ, okkanti nāmarūpaṃ, pasādo āyatanam, phuṭṭho phasso, vedayitam vedanā iti ime pañca dhammā āyatim upapattibhavasmim idha katassa kammassa paccayā”ti evaṃ niddiṭṭhalakkhaṇā vīsati ākārā idha veditabbā. Evaṃ “nandī dukkhassa mūlanti iti veditvā bhavā jāti, bhūtassa jarāmaraṇan”ti ettāvata esa sabbopi catusaṅkhepo tisandhi tiyaddho vīsataṅkāro paṭiccasamuppādo dassito hotīti veditabbo.

Idāni **tasmā tiha bhikkhave -pa- abhisambuddhoti vadāmīti** ettha apubbapadaavaṇṇanaṃ katvā padayojanāya atthanigamanaṃ karissāma. **Tasmā tihāti** tasmā icceva vuttam hoti. Tikārahakārā hi nipātā. **Sabbasoti** anavasesavacanametam. **Taṇhānanti** nandīti evaṃ vuttānaṃ sabbataṇhānaṃ. **Khayāti** lokuttaramaggena accantakkhayā. **Virāgādīni** khayavevacanāneva. Yā hi taṇhā khīṇā, virattāpi tā¹ bhavanti niruddhāpi cattāpi paṭinissatṭhāpi. **Khayāti** vā catumaggakiccasādhāraṇametam. Tato paṭhamamaggena **virāgā**, dutiyena **nirodhā**, tatiyena **cāgā**, catutthena **paṭinissaggāti** yojetabbaṃ. Yāhi vā taṇhāhi pathaviṃ pathavito sañjāneyya, tāsam khayā. Yāhi pathaviṃ maññeyya, tāsam virāgā. Yāhi pathaviyā maññeyya, tāsam nirodhā. Yāhi pathavito maññeyya, tāsam cāgā. Yāhi pathaviṃ meti maññeyya, tāsam paṭinissaggā. Yāhi vā pathaviṃ maññeyya, tāsam khayā -pa-. Yāhi pathaviṃ abhinandeyya, tāsam paṭinissaggāti evamettha yojanā kātabbā, na kiñci virujjhati.

Anuttaranti uttaravirahitam sabbasetṭham. **Sammāsambodhinti** sammā sāmāñca bodhim. Atha vā pasattham sundarañca bodhim. **Bodhīti** rukkhopi maggopi sabbaññutaññāṇampi nibbānampi. “Bodhirukkhamūle paṭhamābhisambuddho”ti² ca

1. Tā virattā khepitā (Ka)

2. Vi 3. 1; Khu 1. 77 piṭṭhesu.

“antarā ca bodhim antarā ca Gayan”¹ti ca āgataṭṭhāne hi rukkho bodhīti vuccati. “Catūsu maggesu nāṇan”²ti āgataṭṭhāne maggo. “Pappoti bodhim varabhūrimedhaso”³ti āgataṭṭhāne sabbaññutaññāṇaṃ. “Patvāna bodhim amataṃ asaṅkhatan”⁴ti āgataṭṭhāne nibbānaṃ. Idha pana Bhagavato arahattamaggaññāṇaṃ adhippetāṃ. Apare sabbaññutaññāṇantipi vadanti.

Sāvakanāṃ arahattamaggo anuttarā bodhi hoti na hotīti. Na hoti. Kasmā? Asabbaguṇadāyakatā. Tesañhi kassaci arahattamaggo arahattaphalameva deti, kassaci tisso vijjā, kassaci cha abhiññā, kassaci catasso paṭisambhidā, kassaci sāvakaṇāṃ paṭisambhidā. **Paccekabuddhānaṃ** paccekabodhiññāṇameva deti. **Buddhānaṃ** pana sabbaguṇasampattim deti abhiseko viya rañño sabbalokissariyabhāvaṃ. Tasmā aññassa kassacipi anuttarā bodhi na hotīti.

Abhisambuddho abhiññāsi paṭivijjhi, patto adhigatoti vuttaṃ hoti. **Iti vadāmīti** iti vadāmi ācikkhāmi desemi paññapemi paṭṭhapemi vivarāmi vibhajāmi uttānīkaromīti⁴. Tatrāyaṃ yojanā—Tathāgatopi bhikkhave -pa-pathaviṃ na maññati -pa-pathaviṃ nābhinandati. Taṃ kissa hetu, nandī dukkhassa mūlaṃ, bhavā jāti, bhūtassa jarāmarañanti iti viditvāti. Tattha **iti viditvāti itikāro** kāraṇattho. Tena imassa paṭiccasamuppādassa viditattā paṭividdhattāti vuttaṃ hoti. Kiñca bhiyyo—yasmā ca evamimaṃ paṭiccasamuppādaṃ viditvā Tathāgatassa yā nandīti vuttataṇhā sabbappakārā, sā pahīnā, tesañca Tathāgato sabbaso taṇhānaṃ khayā -pa-anuttaraṃ sammāsambodhim abhisambuddho. Tasmā pathaviṃ na maññati -pa-pathaviṃ nābhinandatīti vadāmīti evaṃ abhisambuddhattā na maññati nābhinandatīti vadāmīti vuttaṃ hoti.

Atha vā yasmā “nandī dukkhassa mūlan”⁵ti ādinā nayena paṭiccasamuppādaṃ viditvā sabbaso taṇhā khayāṃ gatā⁵, tasmā tiha bhikkhave Tathāgato sabbaso taṇhānaṃ khayā -pa-abhisambuddho vadāmi. So evaṃ

1. Vi 3. 11; Ma 1. 227 piṭṭhesu.

3. Dī 3. 129 piṭṭhe.

5. Taṇhānaṃ khayāṃ gato (Sī)

2. Khu 8. 231 Cūlaniddese.

4. Uttānīm karomīti (Ka)

abhisambuddhattā pathaviṃ na maññati -pa- nābhinandatīti. Yattha yattha hi yasmāti avatvā tasmāti vuccati, tattha tattha yasmāti ānetvā yojetabbaṃ, ayam sāsanaṃyutti. Esa nayo sabbattha.

Idamavoca Bhagavāti idam nidānāvasānato pabhuti yāva abhisambuddhoti vadāmīti sakalasuttantaṃ Bhagavā paresaṃ paññāya alabbhaṇeyyapatiṭṭhaṃ paramagambhīraṃ sabbaññutaññāṇaṃ dassento ekena puthujjanavārena ekena sekkhavārena catūhi khīṇāsavavārehi dvīhi Tathāgatavārehīti aṭṭhahi mahāvārehi ekamekasmañca vāre pathavī-ādīhi catuvīsatiyā antaravārehi paṭimaṇḍetvā dvebhāṇavāraparimāṇāya tantiyā¹ avoca.

Evam vicitranaḍesanaḍvilāsayuttaṃ panetaṃ suttaṃ karavikarudamañjunā kaṇṇasukhena paṇḍitajanahadayānaṃ amatābhisekasadisena brahmassaarena bhāsamaṇassaḍpi. **Na te bhikkhū Bhagavato bhāsitaṃ abhinanduntī** te pañcasatā bhikkhū idam Bhagavato vacanaṃ nānumodimsu. Kasmā? Aññāṇakena. Te kira imassa suttassa atthaṃ na jānimsu, tasmā nābhinandimsu. Tesañhi tasmim samaye evam vicitranaḍesanaḍvilāsayuttampi etaṃ suttaṃ ghanaputhulena dussapaṭṭena mukhe bandhaṃ² katvā purato ṭhapitamanuññabhojanaṃ viya ahoḍi. Nanu ca Bhagavā attanā desitaṃ dhammaṃ pare ñāpetum kappasatasahassādhikāni cattāri asaṅkhyeyyāni pāramaḍyo pūretvā sabbaññutaṃ patto. So kasmā yathā te na jānanti, tathā desesīti. Vuttamidaṃ imassa suttassa nikkhepavicāraṇāyaṃ eva “mānabhañjanatthaṃ sabbadhammaḍlapariyāyanti desanaṃ ārabhī”ti, tasmā na yidha puna vattabbamatthi, evam mānabhañjanatthaṃ desitañca panetaṃ suttaṃ sutvā te bhikkhū tamyeva kira pathaviṃ diṭṭhigatikopi sañjānāti, sekkhopi arahāpi Tathāgatopi sañjānāti. Kinnāmidam kathaṃ nāmidanti cintentā pubbe mayam Bhagavatā kathitaṃ yaṃkiñci khippameva jānāma, idāni panimassa mūlapariyāyassa antaṃ vā koṭim vā na jānāma na passāma, aho Buddhā nāma appameyyā atulāti uddhaṭadāṭhā viya sappā nimmadā hutvā Buddhupaṭṭhānañca dhammassavanañca sakkaccaṃ āgamaḍsu.

1. Pariyattiyā (Syā, Ka)

2. Mukhabandhanaṃ (Sī)

Tena kho pana samayena bhikkhū dhammasabhāyaṃ sannisinnā imaṃ kathāṃ samuṭṭhāpesuṃ “aho Buddhānaṃ ānubhāvo, te nāma brāhmaṇapabbajitā tathā mānamadamattā Bhagavatā mūlapariyāyadesanāya nihataṃānā katā”ti, ayañcarahi tesāṃ bhikkhūnaṃ antarākathā vippakatā. Atha Bhagavā Gandhakuṭiyā nikkhamitvā tañkhaṇānurūpena paṭihāriyena dhammasabhāyaṃ paññattavarabuddhāsane nisīditvā te bhikkhū āha “kāya nuttha bhikkhave etarahi kathāya¹ sannisinnā”ti. Te tamatthāṃ Bhagavato ārocesuṃ. Bhagavā etadavoca “na bhikkhave idāneva, pubbepi ahaṃ ime evaṃ mānapaggahitasire vicarante nihataṃāne akāsin”ti. Tato imissā aṭṭhuppattiyā idaṃ atītaṃ ānesi—

Bhūtapubbaṃ bhikkhave aññataro disāpāmokkho brāhmaṇo Bārāṇasiyaṃ paṭivasati tiṇṇaṃ vedānaṃ pāragū sanighaṇṭukeṭubhānaṃ sakkharappahedānaṃ itihāsapañcamānaṃ padako veyyākaraṇo lokāyatamahāpurisalakkhaṇesu anavayo, so pañcamattāni māṇavakasatāni mante vāceti. Paṇḍitā māṇavakā bahuñca gaṇhanti lahuñca, suṭṭhu ca upadhārenti, gahitañca tesāṃ na vinassati. Sopi brāhmaṇo ācariyamutṭhim akatvā ghaṭe udakaṃ āsiñcanto viya sabbampi sippaṃ uggaṇhāpetvā te māṇavake etadavoca “ettakamidaṃ sippaṃ diṭṭhadhammasamparāyahitaṃ”ti. Te māṇavakā “yaṃ amhākaṃ ācariyo jānāti, mayampi taṃ jānāma, mayampi dāni ācariyā evā”ti mānaṃ uppādetvā tato pabhuti ācariye agāravā nikkhattavattā vihariṃsu. Ācariyo ñatvā “karissāmi nesaṃ mānaniggahan”ti cintesi. So ekadivasāṃ upaṭṭhānaṃ āgantvā vanditvā nisinne te māṇavake āha “tātā pañhaṃ pucchissāmi, kaccittha samatthā kathetun”ti. Te “pucchatha ācariya pucchatha ācariyā”ti sahasāva āhaṃsu, yathā taṃ sutamadamattā. Ācariyo āha—

“Kālo ghasati bhūtāni, sabbāneva sahattanā.

Yo ca kālaghaso bhūto, sa bhūtapacaniṃ paci”ti”².

Vissajjetha tātā imaṃ pañhanti.

1. Antarākathāya (Sī, Syā, Ka) Pāliya samsandetabbaṃ.

2. Khu 5. 68 piṭṭhe.

Te cintentā ajānamānā tuṅhī ahesuṃ. Ācariyo āha “alam tātā gacchathajja, sve katheyyāthā”ti uyyojesi. Te dasapi vīsatiṇi sampiṇḍitā hutvā na tassa pañhassa ādim, na antamaddasaṃsu. Āgantvā ācariyassa ārocesuṃ “na imassa pañhassa attham ajānamā”ti. Ācariyo tesam nigghatthāya imam gāthamābhāsi—

“Bahūni naraśīsāni, lomasāni brahāni ca.
Gīvāsu paṭimukkāni, kocidevettha kaṇṇavā”ti¹.

Gāthāyattho—bahūni narānam śīsāni dissanti, sabbāni ca tāni lomasāni sabbāni ca mahantāni gīvāyameva ca ṭhapitāni, na tālaphalam viya hatthena gahitāni, natthi tesam imehi dhammehi nānākaraṇam. Ettha pana kocideva kaṇṇavāti attānam sandhāyāha. **Kaṇṇavāti** paññavā. Kaṇṇacchiddam pana na kassaci natthi, tam sutvā te māṇavakā maṅkubhūtā pattakkhandhā adhomukhā aṅguliya bhūmiṃ vilikhantā tuṅhī ahesuṃ.

Atha nesam sahirikabhāvam passivā ācariyo “uggaṇhatha tātā pañhan”ti pañham vissajjesi. **Kāloti** purebhattakālopi pacchābhattakālopi evamādi. **Bhūtānīti** sattādhivacanametam. Kālo hi bhūtānam na cammamamsādīni khādati, Api ca kho nesam āyuvaṇṇabalāni khepento yobbaññam maddanto ārogyam vināsento **ghasati** khādatīti vuccati. **Sabbāneva sahattanāti** evam ghasanto ca na kiñci vajjeti, sabbāneva ghasati. Na kevalaṅca bhūtāniyeva, Api ca kho sahattanā attānampi ghasati. Purebhattakālo hi pacchābhattakālam na pāpuṇāti. Esa nayo pacchābhattakālādīsu. **Yo ca kālaghaso bhūtoti** khīṇāsavassetam adhivacanam. So hi āyatim paṭisandhikālam khepetvā khāditvā ṭhitattā “kālaghaso”ti vuccati. **Sa bhūtapacaniṃ pacīti** so yāyam taṅhā apāyesu bhūte pacati, tam ṇāṇagginā paci dayhi² bhasmamakāsi, tena “bhūtapacaniṃ paci”ti vuccati. “**Pajanin**”tipi pātho. Janikam nibbattikanti³ attho.

Atha te māṇavakā dīpasahassālokena viya rattim samavisamam ācariyassa vissajjanena pañhassa attham pākātam disvā “idāni mayam yāvajivam

1. Khu 5. 68 piṭṭhe.

2. Paridayhi (Sī, Syā)

3. Janitam nibbattitanti (Ka)

garuvāsaṃ vasissāma, mahantā ete ācariyā nāma, mayañhi bahussutamānaṃ
uppādetvā catuppadikagāthāyapi atthaṃ na jānāmā”ti nihataṃānā
pubbasadisameva ācariyassa vattappaṭipattiṃ katvā saggaparāyaṇā ahesuṃ.

Ahaṃ kho bhikkhave tena samayena tesamācariyo ahoṣiṃ, ime bhikkhū
māṇavakā. Evaṃ pubbepāhaṃ ime evaṃ mānapaggahitasire vicarante
nihataṃāne akāsinti.

Imaṅca jātaṃ sutvā te bhikkhū pubbepi mayaṃ māneneva upahatāti
bhiyyosomattāya nihataṃānā hutvā attano upakārakakammaṭṭhānaparāyaṇā
ahesuṃ.

Tato Bhagavā ekaṃ samayaṃ janapadacārikaṃ caranto Vesālīṃ patvā
Gotamake cetiye viharanto imesaṃ pañcasatānaṃ bhikkhūnaṃ
ñāṇaparipākaṃ viditvā imaṃ Gotamakasuttaṃ kathesi—

“Abhiññāyāhaṃ bhikkhave dhammaṃ desemi no anabhiññāya,
sanidānātaṃ -pa- sappāṭihāriyāhaṃ bhikkhave dhammaṃ desemi no
appāṭihāriyaṃ. Tassa mayhaṃ bhikkhave abhiññāya dhammaṃ desayato
-pa- no appāṭihāriyaṃ. Karaṇīyo ovādo, karaṇīyā anusāsani. Alaṅca pana vo
bhikkhave tuṭṭhiyā alaṃ attamanatāya alaṃ somanassāya Sammāsambuddho
Bhagavā¹, svākkhāto dhammo, suppaṭipanno saṃghoti. Idamavoca Bhagavā,
imasmiṅca pana veyyākaraṇasmimṃ bhaññamāne dasasahassilokadhātu
akampitthā”ti².

Idaṅca suttaṃ sutvā te pañcasatā bhikkhū tasmimṃ yevāsane saha
paṭisambhidāhi arahattaṃ pāpuṇiṃsu, evāyaṃ desanā etasmimṃ ṭhāne
niṭṭhamagamāsīti.

Papañcasūdaniyā Majjhimanikāyaṭṭhakathāya

Mūlapariyāyasuttavaṇṇanā niṭṭhitā.

1. Sammāsambuddho vata so Bhagavā (Sī)

2. Am 1. 280 piṭṭhe.

2. Sabbāsavasuttavaṇṇanā

14. **Evam me sutam -pa- Sāvattiyanti** Sabbāsavasuttam. Tatrāyam apubbapadavaṇṇanā—**Sāvattihīti** savatthassa isino nivāsaṭṭhānabhūtā nagarī, yathā kākandī mākandī kosambīti evam tāva akkharacintakā. Aṭṭhakathācariyā pana bhaṇanti “yamkiñci manussānam upabhogaparibhogam sabbamettha atthīti Sāvattihī. Satthasamāyoge ca kim bhaṇḍamatthīti pucchite sabbamatthīti vacanamupādāya Sāvattihī.

Sabbadā sabbūpakaraṇam, Sāvattiyam samohitam.

Tasmā sabbamupādāya, Sāvattihīti pavuccati.

Kosalānam puram rammaṃ, dassaneyyam manoramaṃ.

Dasahi saddehi avivittam, annapānasamāyutam.

Vuddhim vepullatam pattam, iddham phitam manoramaṃ.

Aḷakamandāva devānam, Sāvattipuramuttaman”ti.

Tassam **Sāvattiyam. Jetavaneti** ettha attano paccatthikajanam jinātīti jeto, raññā vā attano paccatthikajane jite jātoti jeto, maṅgalakamyatāya vā tassa evaṃnāmameva katantijeto, Jetassa vanam Jetavanam. Tañhi Jetena rājakumārena ropitam samvaddhitam paripālitam, so ca tassa sāmī ahoṣi. Tasmā Jetavananti vuccati, tasmim **Jetavane. Anāthapiṇḍikassa ārāmeti** ettha Sudatto nāma so gahapati mātāpitūhi katanāmasasena. Sabbakāmasamiddhitāya pana vigatamalamaccheratāya karuṇādiguṇasamaṅgitāya ca niccakālam anāthānam piṇḍamadāsi, tena Anāthapiṇḍikoti saṅkham gato. Āramanti ettha paṇino visesena vā pabbajitāti ārāmo, tassa pupphaphalādisobhāya nātīdūranaccāsannatādīpañcavidhasenāsaṅgasampattiyā ca tato tato āgamma ramanti abhīramanti anukkaṇṭhitā hutvā nivasantīti attho. Vuttappakārāya vā sampattiyā tattha tattha gatepi attano abhantaramyeva ānetvā rametīti ārāmo. So hi Anāthapiṇḍikena gahapatīnā Jetassa rājakumārassa hatthato aṭṭhārasahi hiraññakoṭīhi koṭisantharena kīṇitvā aṭṭhārasahi hiraññakoṭīhi senāsanāni kārapetvā aṭṭhārasahi hiraññakoṭīhi vihāramaham

niṭṭhāpetvā evaṃ catupaññāsahiraññaakoṭipariccāgena Buddhappamukhassa saṃghassa niyyādito. Tasmā “Anāthapiṇḍikassa ārāmo”ti vuccati. Tasmim̄ **Anāthapiṇḍikassa ārāme.**

Ettha ca “Jetavane”ti vacanaṃ purimasāmparikittanaṃ. “Anāthapiṇḍikassa ārāme”ti pacchimasāmparikittanaṃ. Kimetesam̄ parikittane payojananti. Puññakāmānaṃ diṭṭhānugati-āpajjanaṃ. Tatra hi dvārakoṭṭhakapāsādamāpane bhūmivikkayaladdhā aṭṭhārasa hiraññaakoṭiyo anekakoṭi-agghanakā rukkhā ca jetassa pariccāgo, catupaññāsa koṭiyo Anāthapiṇḍikassa. Iti tesam̄ parikittanena evaṃ puññakāmā puññāni karontīti dassento āyasmā Ānando aññepi puññakāme tesam̄ diṭṭhānugati-āpajjane niyojēti.

Sabbāsavasam̄varapariyāyam̄ vo bhikkhaveti kasmā idaṃ suttamabhāsi. Tesam̄ bhikkhūnaṃ upakkilesavisodhanaṃ ādim̄ katvā āsavakkhayāya paṭipattidassanattham̄. Tattha **sabbāsavasam̄varapariyāyanti** sabbesam̄ āsavānaṃ sam̄varakāraṇam̄ sam̄varabhūtaṃ kāraṇam̄, yena kāraṇena te sam̄varitā pidahitā hutvā anuppādanirodha saṅkhātāṃ khayam̄ gacchanti pahīyanti nappavattanti, taṃ kāraṇanti attho. Tattha āsavantīti **āsavā**, cakkhutopi -pa- manatopi sandanti pavattantīti vuttaṃ hoti. Dhammato yāva gotrabhum̄ okāsato yāva bhavaggaṃ savantīti vā āsavā, ete dhamme etañca okāsam̄ antokarivā pavattantīti attho. Antokaraṇattho hi ayam̄ ākāro. Cirapārivāsiyaṭṭhena madirādayo āsavā, āsavā viyātipi āsavā. Lokasmiñhi cirapārivāsikā madirādayo āsavāti vuccanti. Yadi ca cirapārivāsiyaṭṭhena āsavā, eteyeva bhavitumarahanti. Vuttañhetam̄ “purimā bhikkhave koṭi na paññāyati avijjāya, ito pubbe avijjā nahosī”ti-ādi¹. Āyataṃ vā saṃsāradukkhāṃ savanti pasavantītipi āsavā. Purimāni cettha nibbacaṇāni yattha kilesā āsavāti āgacchanti, tattha yujjanti, pacchimaṃ kammepi. Na kevalañca kammakilesāyeva āsavā, Api ca kho nānappakārakā upaddavāpi. Suttasu hi “nāham̄ Cunda diṭṭhadhammikānaṃyeva āsavānaṃ sam̄varāya dhammaṃ desemi”ti² ettha vivādamaṅgalabhūtā kilesā āsavāti āgatā.

1. Am̄ 3. 346 piṭṭhe.

2. Dī 3. 107 piṭṭhe.

“Yena devūpapatyassa, gandhabbo vā vihaṅgamo.
Yakkhattaṃ yena gaccheyyaṃ, manussattaṃ ca abbaje.
Te mayhaṃ āsavā khīṇā, viddhastā vinaḷīkatā”¹—

Ettha tebhūmakāṃ ca kammaṃ avasesā ca akusalā dhammā.
“Diṭṭhadhammikānaṃ āsavānaṃ saṃvarāya samparāyikānaṃ āsavānaṃ
paṭighātāyā”² ettha parūpavādavipphaṭṭisāravadhābandhādayo ceva
apāyadukkhabhūtā ca nānappakārā upaddavā. Te panete āsavā yattha yathā
āgatā, tathā tathā veditabbā.

Ete hi vinaye tāva “diṭṭhadhammikānaṃ āsavānaṃ saṃvarāya,
samparāyikānaṃ āsavānaṃ paṭighātāyā”³ ti dvedhā āgatā. Saḷāyatane “tayome
āvuso āsavā, kāmāsavo bhavāsavo avijjāsavo”⁴ ti tidhā āgatā. Aññesu ca
suttantesu abhidhamme ca teyeva diṭṭhāsavena saha catudhā āgatā.
Nibbedhikapariyāye “atthi bhikkhave āsavā nirayagāminiyā, atthi āsavā
tiracchānayanigāminiyā, atthi āsavā pettivisayagāminiyā, atthi āsavā
manussalokagāminiyā, atthi āsavā devalokagāminiyā”⁵ ti pañcadhā āgatā.
Chakkanipāte “atthi bhikkhave āsavā saṃvarā pahātabbā”⁶ ti ādinā nayena
chadhā āgatā. Imasmim̐ pana sutte teyeva dassanāpahātabbehi saddhim̐
sattadhā āgatāti. Ayaṃ tāva āsavapade vacanattho ceva pabhedo ca.

Saṃvarapade pana saṃvarayatīti **saṃvaro**, pidahati nivāreti pavattitum̐
na detīti attho. Tathā hi “anujānāmi bhikkhave divā paṭisallīyantena dvāraṃ
saṃvaritvā paṭisallīyitun”⁷ ti⁵, “sotānaṃ saṃvaram̐ brūmi, paññāyete
pidhīyare”⁶ ti⁶ ca ādīsu pidhānaṭṭhena saṃvaramāha. Svāyaṃ saṃvaro
pañcavidho hoti sīlasaṃvaro sati ñāṇa khanti vīriyasaṃvaroti. Tattha “iminā
pātimokkhasaṃvarena upeto”⁷ ti⁷ ayaṃ sīlasaṃvaro.

1. Am̐ 1. 348 piṭṭhe.

2. Vi 1. 24 piṭṭhe.

3. Saṃ 2. 400 piṭṭhe.

4. Am̐ 2. 362 piṭṭhe.

5. Vi 1. 48 piṭṭhādīsu.

6. Khu 1. 434 piṭṭhe Suttanipāte.

7. Abhi 2. 255 piṭṭhe.

pātimokkhasīlāñhi ettha saṃvaroti vuttaṃ. “Cakkhundriye saṃvaramāpajjati”ti-ādīsu¹ satisaṃvaro. Sati hettha saṃvaroti vuttā. Sati hettha saṃvaroti vuttā. “Sotānaṃ saṃvaram brūmi, paññāyete pidhīyare”ti ayam nāṇasaṃvaro. Nāṇañhettha pidhīyareti iminā pidhānaṭṭhena saṃvaroti vuttaṃ. “Khamo hoti sītassa -pa- uppannaṃ kāmavitakkaṃ nādhivāseti”ti-ādīna² pana nayena idheva khantivīriyasaṃvarā āgatā. Tesam ca “sabbāsavaṣaṃvarapariyāyan”ti iminā uddesena saṅgahitattā saṃvarabhāvo veditabbo.

Api ca pañcavidhopi ayam saṃvaro idha āgatoyeva, tattha khantivīriyasaṃvarā tāva vuttāyeva. “So tañca anāsanam tañca agocaran”ti³ ayam panettha silasaṃvaro. “Paṭisaṅkhā yoniso cakkhundriyasaṃvarasaṃvuto”ti⁴ ayam satisaṃvaro. Sabbattha paṭisaṅkhā nāṇasaṃvaro. Aggahitaggahaṇena pana dassanaṃ paṭisevanā bhāvanā ca nāṇasaṃvaro. Pariyāyanti etena dhammāti pariyāyo, uppattiṃ nirodhaṃ vā gacchantīti vuttaṃ hoti. Ettāvata “sabbāsavaṣaṃvarapariyāyan”ti ettha yaṃ vattabbaṃ, taṃ vuttaṃ hoti.

15. Idāni **jānato ahanti**-ādīsu **jānatoti** jānantassa. **Passatoti** passantassa. Dvepi padāni ekatthāni, byañjanaṃ nānaṃ. Evaṃ santepi jānatoti nāṇalakkhaṇaṃ upādāya puggalaṃ niddisati, jānalakkhaṇāñhi nāṇaṃ. Passatoti nāṇappabhāvaṃ upādāya, passanappabhāvañhi nāṇaṃ. Nāṇasamaṅgī puggalo cakkhumā viya cakkhunā rūpāni nāṇena vivaṇe dhamme passati. Api ca yonisomanasikāraṃ uppādetuṃ jānato, ayonisomanasikāro yathā na uppajjati, evaṃ passatoti ayamettha sāro. Keci pañcariyā bahū papañce bhaṇanti, te imasmim atthe na yujjanti.

Āsavānaṃ khayanti āsavappahānaṃ āsavānaṃ accantakkhayasamuppādaṃ khīṇākāraṃ natthibhāvanti ayameva hi imasmim ca sutte “āsavānaṃ khayā anāsavaṃ cetovimuttin”ti-ādīsu⁵ ca āsavakkhayattho. Aññattha pana maggaphalanibbānāni āsavakkhayoti vuccanti. Tathā hi—

1. Dī 1. 66 piṭṭhādīsu.

2. Ma 1. 13. 14 piṭṭhesu.

3. Ma 1. 14 piṭṭhe.

4. Ma 1. 12 piṭṭhe.

5. Ma 1. 353 piṭṭhe.

“Sekhassa sikkhamānassa, ujumaggānusārino.
Khayasmiṃ paṭhamam̐ ñāṇam̐, tato aññā anantarā”¹—

Ādisu maggo āsavakkhayoti vutto, “āsavānam̐ khayā samaṇo hotī”²ti-
ādīsu² phalaṃ.

“Paravajjānupassissa, niccam̐ ujjhānasaññino.
Āsavā tassa vaḍḍhanti, ārā so āsavakkhayā”³—

Ādisu nibbānam̐ “āsavakkhayo”²ti vuttaṃ.

No ajānato no apassatoti yo pana na jānāti na passati, tassa neva vadāmīti attho. Etena ye ajānato apassatopi saṃvarādīhiyeva suddhim vadanti, te paṭikkhittā hontī. Purimena vā padadvayena upāyo vutto, iminā anupāyapaṭisedho. Saṅkhepena cettha ñāṇam̐ āsavasaṃvarapariyāyoti dassitam̐ hoti.

Idāni yaṃ jānato āsavānam̐ khayoti, taṃ dassetukāmo **kiñca bhikkhave jānatoti** puccham̐ ārabhi, tattha jānanā bahuvīdhā. Dabbajātiko eva hi koci bhikkhu chattam̐ kātum̐ jānāti, koci cīvarādīnam̐ aññataram̐, tassa īdisāni kammāni vattasīse ṭhatvā karontassa sā jānanā maggaphalānam̐ padaṭṭhānam̐ na hotīti na vattabbā. Yo pana sāsane pabbajitvā vejjakammādīni kātum̐ jānāti, tassevam̐ jānato āsavā vaḍḍhantiyeva, tasmā yaṃ jānato passato ca āsavānam̐ khayoti, tadeva dassento āha **yoniso ca manasikāram̐ ayoniso ca manasikāranti**.

Tattha **yoniso manasikāro** nāma upāyamanasikāro pathamanasikāro, aniccādīsu aniccanti-ādīnā eva nayena saccānulomikena vā cittassa āvaṭṭanā anvāvaṭṭanā ābhogo samannāhāro manasikāro, ayam̐ vuccati yoniso manasikāroti. **Ayoniso manasikāro**ti anupāyamanasikāro uppathamanasikāro, anicce niccanti dukkhe sukhanti anattani attāti asubhe subhanti ayoniso manasikāro uppathamanasikāro. Saccapaṭikulena vā cittassa āvaṭṭanā anvāvaṭṭanā

1. Khu 1. 231 piṭṭhe.

2. Ma 1. 353 piṭṭhe.

3. Khu 1. 50 Dhammapade.

ābhogo samannāhāro manasikāro, ayaṃ vuccati ayoniso manasikāroti.
Evaṃ yoniso manasikāraṃ uppādetuṃ jānato, ayoniso manasikāro ca yathā
na uppajjati, evaṃ passato āsavānaṃ khayō hoti.

Idāni imassevatthassa yuttim dassento āha **ayoniso bhikkhave -pa-
pahiyantīti**. Tena kiṃ vuttaṃ hoti, yasmā ayoniso manasikaroto āsavā
uppajjanti, yoniso manasikaroto pahiyanti, tasmā jānitabbaṃ yoniso
manasikāraṃ uppādetuṃ jānato, ayoniso manasikāro ca yathā na uppajjati,
evaṃ passato āsavānaṃ khayō hotīti, ayaṃ tāvettha saṅkhepavaṇṇanā.

Ayaṃ pana vitthāro—tatha “yoniso, ayoniso”ti imehi tāva dvīhi padehi
ābaddhaṃ hoti upari Sakalasuttaṃ. Vaṭṭavivaṭṭavasena hi upari Sakalasuttaṃ
vuttaṃ. Ayoniso manasikāramūlakaṇca vaṭṭaṃ, yoniso
manasikāramūlakaṇca vivaṭṭaṃ. Kathaṃ? Ayoniso manasikāro hi
vaḍḍhamāno dve dhamme paripūreti avijjānaṃ ca bhavataṇhaṃ ca. Avijjāya
ca sati “avijjāpacayā saṅkhārā -pa- dukkhakkhandhassa samudayo hoti.
Taṇhāya sati taṇhāpacayā upādānaṃ -pa- samudayo hoti”ti evaṃ ayaṃ
ayoniso manasikārabahulo puggalo vātavegābhighātena vippanaṭṭhanāvā
viya gaṅgāvaṭṭe patitagokulaṃ viya cakkayante yuttabalibaddo viya ca
punappunaṃ bhavayonigativinñāṇaṭṭhitisattāvāsesu āvaṭṭaparivaṭṭaṃ karoti,
evaṃ tāva ayoniso manasikāramūlakaṃ vaṭṭaṃ.

Yoniso manasikāro pana vaḍḍhamāno “yoniso
manasikārasampannassetānaṃ bhikkhave bhikkhuno pāṭikaṅkhaṃ, ariyaṃ
aṭṭhaṅgikaṃ maggaṃ bhāvēssati, ariyaṃ aṭṭhaṅgikaṃ maggaṃ
bahulīkarissatī”ti¹ vacanato sammādiṭṭhipamukhaṃ aṭṭhaṅgikaṃ maggaṃ
paripūreti. Yā ca sammādiṭṭhi, sā vijjāti tassa vijjuppādā avijjānirodho,
“avijjānirodhā saṅkhāranirodho -pa- evametassa kevalassa
dukkhakkhandhassa nirodho hoti”ti² evaṃ yoniso manasikāramūlakaṃ
vivaṭṭaṃ veditabbaṃ. Evaṃ imehi dvīhi padehi ābaddhaṃ hoti upari
Sakalasuttaṃ.

1. Saṃ 3. 24 piṭṭhe.

2. Vi 3. 1 piṭṭhe.

Evam ābaddhe cettha yasmā pubbe āsavappahānaṃ dassetvā pacchā uppatti vuccamānā na yujjati. Na hi pahīnā puna uppajjanti. Uppannānaṃ pana pahānaṃ yujjati, tasmā uddesapaṭilomatopi “ayoniso bhikkhave manasikaroto”ti-ādimāha.

Tattha **ayoniso manasikarototi** vuttappakāraṃ ayoniso manasikāraṃ uppādayato. **Anuppannā ceva āsavā uppajjantīti** ettha ye pubbe appaṭiladdhapubbaṃ cīvarādiṃ vā paccayaṃ upaṭṭhākasaddhivihārika-antevāsikānaṃ vā aññataraṃ manuññaṃ vatthum paṭilabhitvā taṃ sutam sukhanti ayoniso manusikaroto, aññataraññataraṃ vā pana ananubhūtapubbaṃ ārammaṇaṃ yathā vā tathā vā ayoniso manasikaroto āsavā uppajjanti, te anuppannā uppajjantīti veditabbā, aññathā hi anamatagge saṃsāre anuppannā nāma āsavā na santi. Anubhūtapubbepi ca vatthumhi ārammaṇe vā yassa pakatisuddhiyā vā uddesaparipucchāpariyattinavakammayonisomanasikārānaṃ vā aññataravasena pubbe anuppajjitvā pacchā tādisena paccayena sahasā uppajjanti, imepi anuppannā uppajjantīti veditabbā. Tesuyeva pana vatthārammaṇesu punappunaṃ uppajjamānā uppannā pavaḍḍhantīti vuccanti. Ito aññathā hi paṭhamuppannānaṃ vaḍḍhi nāma natthi.

Yoniso ca kho bhikkhaveli ettha pana yassa pakatisuddhiyā vā seyyathāpi āyasmato Mahākassapassa bhaddāya ca kāpilāniyā, uddesaparipucchādīhi vā kāraṇehi āsavā nuppajjanti, so ca jānāti “na kho me āsavā maggena samugghātaṃ gatā, handa nesam samugghātāya paṭipajjāmī”ti. Tato maggabhāvanāya sabbe samugghāteti. Tassa te āsavā anuppannā na uppajjantīti vuccanti. Yassa pana kārakasseva sato satisammosena sahasā āsavā uppajjanti, tato saṃvegamāpajjitvā yoniso padahanto te āsave samucchindati, tassa uppannā pahīyantīti vuccanti Maṇḍalārāmaṃvāsīmahātissabhūtattherassa viya. So kira tasmim yeva vihāre uddesaṃ gaṇhāti, athassa gāme piṇḍāya carato visabhāgārammaṇe kilesa uppajji, so taṃ vipassanāya vikkhambhetvā vihāraṃ agamāsi. Tassa supinantepi taṃ ārammaṇaṃ na upaṭṭhāsi. So “ayaṃ kilesa vaḍḍhitvā apāyasamvattaniko hotī”ti saṃvegaṃ janetvā ācariyaṃ āpucchitvā vihārā nikkhamma Mahāsaṃgharakkhitattherassa

santike rāgapaṭipakkhaṃ asubhakammaṭṭhānaṃ gahetvā gumbantaraṃ pavisitvā paṃsukūlacīvaraṃ santharitvā¹ nisajja anāgāmiṃ maggena pañcakāmaguṇikarāgaṃ chinditvā utṭhāya ācariyaṃ vanditvā punadivase uddesamaggaṃ pāpuṇi. Ye pana vattamānuppannā, tesaṃ paṭipattiyā pahānaṃ nāma natthi.

16. Idāni “uppannā ca āsavā pahīyanti”ti idameva padaṃ gahetvā ye te āsavā pahīyanti, tesaṃ nānappakāro aññampi pahānakāraṇaṃ āvikātuṃ desanaṃ vitthārento **atthi bhikkhave āsavā dassanā pahātabbāti**-ādimāha yathā taṃ desanāpabhedakusalo dhammarājā. Tattha **dassanā pahātabbāti** dassanena pahātabbā. Esa nayo sabbattha.

Dassanāpahātabba-āsavaṇṇanā

17. Idāni tāni padāni anupubbato byākātukāmo “katame ca bhikkhave āsavā dassanā pahātabbā”ti pucchāṃ katvā mūlapariyāyavaṇṇanāyaṃ vuttanayeneva “idha bhikkhave assutavā puthujjano”ti puggalādhiṭṭhānaṃ desanaṃ ārabhi. Tattha **manasikaraṇīye dhamme nappajānātīti** āvajjitabbe samannāharitabbe dhamme na pajānāti. **Amanasikaraṇīyeti** tabbiparīte. Esa nayo sesapadesupī. Yasmā pana ime dhammā manasikaraṇīyā, ime amanasikaraṇīyāti dhammato niyamo natthi, ākāro pana atthi. Yenākārena manasikariyamānā akusaluppattipadaṭṭhānā honti, tenākārena na manasikātabbā. Yena kusaluppattipadaṭṭhānā honti, tenākārena manasikātabbā. Tasmā “yassa bhikkhave dhamme manasikaroto anuppanno vā kāmāsavo”ti-ādimāha.

Tattha **yassāti** ye assa assutavato puthujjanassa. **Manasikarototi** āvajjayato samannāharantassa. **Anuppanno vā kāmāsavoti** ettha samuccayattho vāsaddo, na vikappattho. Tasmā yathā “yāvatā bhikkhave sattā apadā vā dvīpadā vā -pa- Tathāgato

1. Pattharitvā (Sī, Syā)

tesaṃ aggamakkhāyati”¹utte apadā ca dvipadā cāti attho, yathā ca “bhūtānaṃ vā sattānaṃ ṭhitiyā sambhavesīnaṃ vā anuggahāyā”²utte bhūtānaṃca sambhavesīnaṃcāti attho, yathā ca “aggito vā udakato vā mithubhedato vā”³utte aggito ca udakato ca mithubhedato cāti attho, evamidhāpi anuppanno ca kāmāsavo uppajjati, uppanno ca kāmāsavo pavaḍḍhatīti attho daṭṭhabbo. Evaṃ sesesu.

Ettha ca **kāmāsavoti** pañcakāmaguṇiko rāgo. **Bhavāsavoti** rūpārūpabhavā chandarāgo, jhānanikanti ca sassatucchedadiṭṭhisahagatā. Evaṃ diṭṭhāsavopi bhavāsavo eva samodhānaṃ gacchati. **Avijjāsavoti** catūsu saccesu aññānaṃ. Tattha kāmāguṇe assādato manasikaroto anuppanno ca kāmāsavo uppajjati, uppanno ca pavaḍḍhati. Mahaggatadhamme assādato manasikaroto anuppanno ca bhavāsavo uppajjati, uppanno ca pavaḍḍhati. Tīsu bhūmīsu dhamme catuvipallāsapadaṭṭhānabhāvena manasikaroto anuppanno ca avijjāsavo uppajjati, uppanno ca pavaḍḍhatīti veditabbo. Vuttanayapaccanīkato sukkapakkho vitthāretabbo.

Kasmā pana tayo eva āsavā idha vuttāti. Vimokkhapaṭipakkhato. Appaṇihitavimokkhapaṭipakkho hi kāmāsavo, animittasuññatavimokkhapaṭipakkhā itare. Tasmā ime tayo āsave uppādentā tiṇṇaṃ vimokkhānaṃ abhāgino honti, anuppādentā bhāgino etamatthaṃ dassentena tayo eva vuttāti veditabbā. Diṭṭhāsavopi vā ettha vuttōyevāti vaṇṇitametaṃ.

Tassa amanasikaraṇīyānaṃ dhammānaṃ manasikārāti manasikārahetu, yasmā te dhamme manasi karoti, tasmāti vuttaṃ hoti. Esa nayo dutiyapadepi. “Anuppannā āsavā uppajjanti, uppannā ca āsavā pavaḍḍhanti”^{ti} heṭṭhā vutta-āsavānaṃyeva abhedato nigamanametaṃ.

18. Ettāvataṃ yo ayaṃ puggalādhiṭṭhānāya desanāya dēssanā pahātabbe āsave niddisituṃ assutavā puthujjano vutto, so yasmā “ayoniso bhikkhave manasikaroto anuppannā āsavā uppajjanti”^{ti} evaṃ sāmāññato vuttānaṃ ayoniso manasikārapaccayānaṃ

1. Khu 1. 254 piṭṭhe.

2. Ma 1. 327 piṭṭhe.

3. Khu 1. 187 piṭṭhe Udāne.

kāmāsavādīnampi adhiṭṭhānaṃ, tasmā tepi āsave teneva puggalena dassetvā idāni dassanā pahātabbe āsave dassento **so evaṃ ayoniso manasi karoti, ahoṣiṃ nu kho ahanti**-ādimāha. Vicikicchāsīsenā cettha diṭṭhāsavampi dassetum imaṃ desanaṃ ārabhi.

Tassattho, yassa te iminā vuttanayena āsavā uppajjanti, so puthujjano, yo cāyaṃ “assutavā”ti-ādinā nayena vutto, so puthujjano evaṃ ayoniso anupāyena uppathena manasi karoti. Kathaṃ? Ahoṣiṃ nu kho -pa- so kuhiṃ gāmi bhavissatīti. Kiṃ vuttaṃ hoti, so evaṃ ayoniso manasi karoti, yathāssa “ahaṃ ahoṣiṃ nu kho”ti-ādinā nayena vuttā soḷasavidhāpi vicikicchā uppajjatīti.

Tattha **ahoṣiṃ nu kho nanu khoti** sassatākāraṇa adhiccasamuppatti-ākāraṇa nissāya atīte attano vijjamānataṃ avijjamānataṃ kaṅkhati. Kiṃ kāraṇanti na vattabbaṃ. Ummattako viya hi bālaputhujjano yathā vā tathā vā pavattati. Api ca ayoniso manasikāroyevettha kāraṇaṃ. Evaṃ ayoniso manasikāraṇa pana kiṃ kāraṇanti. Sveva puthujjanabhāvo ariyānaṃ adassanādīni vā. Nanu ca puthujjanopi yoniso manasi karotīti. Ko vā evamāha na manasi karotīti. Na pana tattha puthujjanabhāvo kāraṇaṃ, saddhammassavanakalyāṇamittādīni tattha kāraṇāni. Na hi macchamaṃsādīni attano attano pakatiyā sugandhāni, abhisāṅkhārapaccayā pana sugandhānipi honti.

Kiṃ nu kho ahoṣinti jātiliṅgūpapattiyo nissāya khattiyo nu kho ahoṣiṃ, brāhmaṇa vessa sudda gahaṭṭha pabbajite devamanussānaṃ aññataroti kaṅkhati.

Kathaṃ nu khoti saṅṭhānākāraṇa nissāya dīgho nu kho ahoṣiṃ, rassa odāta kaṅhappamāṇika-appamāṇikādīnaṃ aññataroti kaṅkhati. Keci pana issaranimmānādiṃ nissāya kena nu kho kāraṇena ahoṣinti hetuto kaṅkhatīti vadanti.

Kiṃ hutvā kiṃ ahoṣinti jāti-ādīni nissāya khattiyo hutvā nu kho brāhmaṇo ahoṣiṃ -pa- devo hutvā manussoti attano paramparaṃ kaṅkhati. Sabbattheva pana **addhānanti** kālādhivacanametam.

Bhavissāmi nu kho nanu khoti sassatākārañca ucchedākārañca nissāya anāgate attano vijjamānataṃ avijjāmānatañca kaṅkhati. Sesamettha vuttanayameva.

Etarahi vā paccuppannamaddhānanti idāni vā paṭisandhim ādim katvā cutipariyantaṃ sabbampi vattamānakālaṃ gahetvā. **Ajjhattaṃ kathaṃkathī hotīti** attano khandhesu vicikiccho¹ hoti. **Ahaṃ nu khosmīti** attano atthibhāvaṃ kaṅkhati. Yuttaṃ panetanti? Yuttaṃ ayuttanti kā ettha cintā. Apicettha idaṃ vatthumpi udāharanti. Cūḷamātāya kira putto muṇḍo mahāmātāya putto amuṇḍo, taṃ puttaṃ muṇḍesuṃ. So uṭṭhāya ahaṃ nu kho cūḷamātāya puttoti cintesi. Evaṃ ahaṃ nu khosmīti kaṅkhā hoti.

No nu khosmīti attano natthibhāvaṃ kaṅkhati. Tatrāpi idaṃ vatthu—eko kira macche gaṇhanto udake ciraṭṭhānena sītibhūtaṃ attano ūruṃ macchoti cintetvā pahari. Aparo susānapasse khettaṃ rakkhanto bhīto saṅkuṭito sayi. So paṭibujjhivā attano jaṇṇukāni dve yakkhāti cintetvā pahari. Evaṃ no nu khosmīti kaṅkhati.

Kim nu khosmīti khattiyova samāno attano khattiyabhāvaṃ kaṅkhati. Esa nayo sesesu. Devo pana samāno devabhāvaṃ ajānanto nāma natthi. Sopi pana “ahaṃ rūpī nu kho arūpī nu kho”ti-ādinā nayena kaṅkhati. Khattiyādayo kasmā na jānantīti ce. Apaccakkhā tesaṃ tattha tattha kule uppatti. Gahaṭṭhāpi ca potthalikādayo pabbajitasaññino. Pabbajitāpi “kuppaṃ nu kho me kamman”ti-ādinā nayena gahaṭṭhasaññino. Manussāpi ca rājāno viya attani devasaññino honti.

Kathaṃ nu khosmīti vuttanayameva. Kevalañcettha abbhantare jīvo nāma atthīti gahetvā tassa saṅṭhānākāraṃ nissāya dīgho nu khosmīti, rassacaturaṃsachaḷaṃsa-aṭṭhaṃsasoḷasaṃsādīnaṃ aññatarappakāroti kaṅkhanto kathaṃ nu khosmīti kaṅkhatīti veditabbo. Sarīrasaṅṭhānaṃ pana paccuppannaṃ ajānanto nāma natthi.

1. Vicikicchī (Sī, Syā)

Kuto āgato, so kuhiṃ gāmi bhavissatīti attabhāvassa āgatigatiṭṭhānaṃ kaṅkhati.

19. Evaṃ soḷasappabhedam vicikiccham dassetvā idāni yaṃ iminā vicikicchāsīsenā diṭṭhāsavaṃ dassetuṃ ayaṃ desanā āraddhā, taṃ dassento **tassa evaṃ ayoniso manasikaroto channaṃ diṭṭhīnanti**-ādimāha. Tattha tassa puggalassa yathā ayaṃ vicikicchā uppajjati, evaṃ ayoniso manasikaroto tasseva savicikicchassa ayoniso manasikarassa thāmagatattā channaṃ diṭṭhīnaṃ aññatarā diṭṭhi uppajjatīti vuttaṃ hoti. Tattha sabbapadesu vāsaddo vikappattho, evaṃ vā evaṃ vā diṭṭhi uppajjatīti vuttaṃ hoti. **Atthi me attā**ti cettha sassatadiṭṭhi sabbakālesu attano atthitaṃ gaṇhāti. **Saccato thetatoti** bhūtato ca thirato ca, “idaṃ saccan”ti bhūtato suṭṭhu daḷhabhāvenāti vuttaṃ hoti. **Natthi me attā**ti ayaṃ pana ucchedadiṭṭhi, sato sattassa tattha tattha vibhavaggahaṇato. Atha vā purimāpi tīsu kālesu atthīti gahaṇato sassatadiṭṭhi, paccuppannameva atthīti gaṇhantī ucchedadiṭṭhi. Pacchimāpi atītānāgatesu natthīti gahaṇato bhasmantā hutiyoti gahitadiṭṭhikānaṃ viya ucchedadiṭṭhi. Atīte eva natthīti gaṇhantī adhiccasaṃuppattikasēva sassatadiṭṭhi.

Attanāva attānaṃ sañjānāmīti saññākkhandhasīsenā khandhe attāti gahetvā saññāya avasesakkhandhe sañjānato iminā attanā imam attānaṃ sañjānāmīti hoti. **Attanāva anattānanti** saññākkhandhamyeva attāti gahetvā, itare cattāropi anattāti gahetvā saññāya tesam jānato evaṃ hoti. **Anattanāva attānanti** saññākkhandham anattāti, itare cattāro attāti gahetvā saññāya tesam jānato evaṃ hoti, sabbāpi sassatucchedadiṭṭhiyova.

Vado vedeyyoti-ādayo pana sassatadiṭṭhiyā eva abhinivesākārā. Tattha vadatīti **vado**, vacīkammaṃ kārakoti vuttaṃ hoti. Vedayatīti **vedeyyo**, jānāti anubhavati cāti vuttaṃ hoti. Kim vedetīti. Tatra tatra kalyāṇapāpakānaṃ kammānaṃ

vipākam paṭisaṃvedeti. **Tatra tatrāti** tesu tesu yonigatiṭṭhitinivāsanikāyesu ārammaṇesu vā. **Niccoti** uppādavayarahito. **Dhuvoti** thiro sārabhūto. **Sassatoti** sabbakāliko. **Avipariṇāmadhammoti** attano pakatibhāvaṃ avijahanadhammo, kakaṇṭako viya nānappakārataṃ nāpajjati. **Sassatisamanti** candasūriyasamuddamahāpathavīpabbatā lokavohārena sassatiyoti vuccanti. Sassatīhi samam **sassatisamam**. Yāva sassatiyo tiṭṭhanti, tāva tatheva ṭhassatīti gaṇhato evaṃdiṭṭhi hoti.

Idam vuccati bhikkhave diṭṭhigatanti-ādīsu **idanti** idāni vattabbassa paccakkhanidassanaṃ diṭṭhigatasambandhena ca idanti vuttaṃ, na diṭṭhisambandhena, ettha ca diṭṭhiyeva **diṭṭhigataṃ**, gūthagataṃ viya. Diṭṭhīsu vā gataṃ idaṃ dassanaṃ dvāsaṭṭhidiṭṭhi-antogadhattātipi diṭṭhigataṃ. Diṭṭhiyā vā gataṃ diṭṭhigataṃ. Idañhi atthi me attāti-ādi diṭṭhiyā gamanamattameva, natthettha attā vā nicco vā kocīti vuttaṃ hoti. Sā cāyaṃ diṭṭhi dunniggamaṇaṭṭhena **gahanam**. Duratikkamaṭṭhena sappaṭibhayatṭhena ca **kantāro**, dubbhikkhakantāravāḷakantārādayo viya. Sammādiṭṭhiyā vinivijjanaṭṭhena vilomaṇaṭṭhena vā **visūkam**. Kadāci sassatassa, kadāci ucchedassa gahaṇato virūpaṃ phanditanti **vipphanditam**. Bandhanaṭṭhena **saṃyojanam**. Tenāha “diṭṭhigahanaṃ -pa- diṭṭhisamyojanan”ti¹. Idānissa tameva bandhanattham dassento **diṭṭhisamyojanasamuyuttoti**-ādimāha. Tassāyaṃ saṅkhepattho, iminā diṭṭhisamyojanena samuyutto puthujjano etehi jāti-ādīhi na parimuccatīti. Kim vā bahunā, sakalavaṭṭadukkhato pi na muccatīti.

20. Evaṃ chappabhedam diṭṭhāsavaṃ dassetvā yasmā sīlabbataparāmāso kāmāsavādivacaneneva dassito hoti. Kāmasukhatthañhi bhavasukhabhavavisuddhi-atthañca avijjāya abhibhūtā ito bahiddhā samaṇabrāhmaṇā sīlabbatāni parāmasanti, tasmā taṃ adassetvā diṭṭhiggahaṇena vā tassa gahitattāpi taṃ adassetvāva idāni yo puggalo dassanā pahātabbe āsave pajahati, taṃ dassetvā tesam āsavānam pahānam

1. Abhi 1. 93 piṭṭhe.

dassetuṃ pubbe vā ayoniso manasikaroto puthujjanassa tesam upattim dassetvā idāni tabbiparītassa pahānaṃ dassetuṃ **sutavā ca kho bhikkhaveti-**ādīmāha.

Tassattho, yāva “so idaṃ dukkhan”ti āgacchati, tāva heṭṭhā vuttanayena ca vuttapaccanīkato ca veditabbo. Paccanīkato ca sabbākārena ariyadhammassa akovidāviniṭapaccanīkato ayaṃ “sutavā ariyasāvako ariyadhammassa kovido ariyadhamme suvinīto”ti veditabbo. Api ca kho sikhāpattavipassanato pabhuti yāva gotrabhu, tāva tadanurūpena atthena ayaṃ ariyasāvakoti veditabbo.

21. “So idaṃ dukkhanti yoniso manasi karoti”ti-ādīsu pana ayaṃ atthavibhāvanā, so catusaccakammaṭṭhāniko ariyasāvako taṇhāvajjā tebhūmakā khandhā **dukkham**, taṇhā **dukkhasamudayo**, ubhinnaṃ appavatti **nirodho**, nirodhasampāpako **maggoti** evaṃ pubbeva ācariyasantike uggahitacatusaccakammaṭṭhāno aparena samayena vipassanāmaggaṃ samāruḷho samāno te tebhūmake khandhe **idaṃ dukkhanti yoniso manasi karoti**, upāyena pathena samannāharati vipassati ca. Ettha hi yāva sotāpattimaggo, tāva manasikārasīseneva vipassanā vuttā. Yā panāyaṃ tasseva dukkhassa samuṭṭhāpikā sambhāvikā taṇhā, **ayaṃ samudayoti yoniso manasi karoti**. Yasmā pana dukkhañca samudayo ca idaṃ ṭhānaṃ patvā nirujjhanti nappavattanti, tasmā yadidaṃ **nibbānaṃ** nāma, **ayaṃ dukkhanirodhoti yoniso manasi karoti**. Nirodhasampāpakaṃ aṭṭhaṅgikaṃ maggaṃ **ayaṃ dukkhanirodhagāmini paṭipadāti yoniso manasi karoti**, upāyena pathena samannāharati vipassati ca.

Tatrāyaṃ upāyo, abhiniveso nāma vaṭṭe hoti, vivaṭṭe natthi. Tasmā “ayaṃ atthi imasmim kāye pathavīdhātu āpodhātū”ti-ādīnā nayena sakasantatiyaṃ cattāri bhūtāni tadanusārena upādārūpāni ca pariggahetvā ayaṃ rūpakkhandhoti vavatthapeti, taṃ vavatthāpayato uppanne tadārammaṇe cittacetāsike dhamme ime cattāro arūpakkhandhāti vavatthapeti, tato ime pañcakkhandhā dukkhanti vavatthapeti, te pana

saṅkhepato nāmañca rūpañcāti dve bhāgāyeva honti. Idañca nāmarūpaṃ sahetu sappaccayaṃ uppajjati. Tassa ayaṃ hetu ayaṃ paccayoti avijjābhavataṇhākammāhārādike hetupaccaye vavatthapeti. Tato tesāṃ paccayānañca paccayuppannadhammānañca yāthāvasarasalakkhaṇaṃ vavatthapetvā ime dhammā ahutvā hontīti aniccalakkhaṇaṃ āropeti, udayabbayapīḷitattā dukkhāti dukkhalakkhaṇaṃ āropeti, avasavattanato anattāti anattalakkhaṇaṃ āropeti. Evaṃ tīṇi lakkhaṇāni āropetvā paṭipāṭiyā vipassanaṃ pavattento sotāpattimaggaṃ pāpuṇāti.

Tasmim̐ khaṇe cattāri saccāni ekapaṭivedheneva paṭivijjhati, ekābhisamayena abhisameti. Dukkhaṃ pariññāpaṭivedhena paṭivijjhati, samudayaṃ pahānapaṭivedhena, nirodhaṃ sacchikiriyāpaṭivedhena, maggaṃ bhāvanāpaṭivedhena. Dukkhañca pariññābhisamayena abhisameti -pa-maggaṃ bhāvanābhisamayena abhisameti, no ca kho aññamaññena ñāṇena. Ekaññāneva hi esa nirodhaṃ ārammaṇato, sesāni kiccato paṭivijjhati abhisameti ca. Na hissa tasmim̐ samaye evaṃ hoti “ahaṃ dukkhaṃ pariñānāmi”ti vā -pa- “maggaṃ bhāveṃ”ti vā, api ca khvassa ārammaṇaṃ katvā paṭivedhavasena nirodhaṃ sacchikaroto evaṃ taṃ ñāṇaṃ dukkhapariññākiccampi samudayapahānakiccampi maggabhāvanākiccampi karotiyeva. Tassa evaṃ upāyena yoniso manasikaroto tīṇi saṃyojanāni pahīyanti vīsativatthukā sakkāyadiṭṭhi, aṭṭhavatthukā vicikicchā, “sīlena suddhi vatena suddhi”ti sīlabbatānaṃ parāmasanato sīlabbataparāmāsoti. Tattha catūsu āsavesu sakkāyadiṭṭhisīlabbataparāmāsā diṭṭhāsavena saṅgahitattā āsavā saṃyojanā ca. Vicikicchā saṃyojanameva, na āsavo. “Dassanā pahātabbā āsavā”ti ettha pariyāpannattā pana āsavāti.

“Ime vuccanti -pa- pahātabbā”ti ime sakkāyadiṭṭhi-ādayo dassanā pahātabbā nāma āsavāti dassento āha. Atha vā yā ayaṃ channaṃ diṭṭhīnaṃ aññatarā diṭṭhi uppajjatīti evaṃ sarūpeneva sakkāyadiṭṭhi vibhattā. Taṃ sandhāyāha “ime vuccanti bhikkhave”ti. Sā ca yasmā sahaṃjātapahānekaṭṭhehi saddhim̐ pahīyati. Diṭṭhāsave hi pahīyamāne taṃsahajāto catūsu diṭṭhisampayuttacittesu kāmāsavopi avijjāsavopi

pahīyati. Pahānekaṭṭho pana catūsu diṭṭhivippayuttesu nāgasupaṇṇādisamiddhipatthanāvasena uppajjamāno bhavāsavo. Teneva sampayutto avijjāsavopi. Dvīsu domanassacittesu pāṇātipātādinibbattako avijjāsavopi, tathā vicikicchācittasampayutto avijjāsavopīti evaṃ sabbathāpi avasesā tayopi āsavā pahīyanti. Tasmā bahuvacananiddeso katoti evamettha attho veditabbo. Esa porāṇānaṃ adhippāyo.

Dassanā pahātabbāti dassanaṃ nāma sotāpattimaggo, tena pahātabbāti attho. Kasmā Sotāpattimaggo dassanaṃ? Paṭhamānaṃ nibbānadassanato. Nanu gotrabhu paṭhamataraṃ passatīti. No na passati. Disvā katabbakiccaṃ pana na karoti saṃyojanānaṃ appahānato. Tasmā passatīti na vattabbo. Yattha katthaci rājānaṃ disvāpi paṇṇākāraṃ datvā kiccanipphattiyā adiṭṭhattā “ajjāpi rājānaṃ na passāmi”ti vadanto gāmaṃ puriso cettha nidassanaṃ.

Saṃvarāpahātabba-āsavaṇṇanā

22. Evaṃ dassanena pahātabbe āsave dassetvā idāni tadanantaruddiṭṭhe saṃvarā pahātabbe dassetuṃ **katame ca bhikkhave āsavā saṃvarā pahātabbāti** āha. Evaṃ sabbattha sambandho veditabbo. Ito parañhi atthamattameva vaṇṇayissāma.

Nanu ca dassanena bhāvanāyāti imehi dvīhi appahātabbo āsavo nāma natthi, atha kasmā visuṃ saṃvarādīhi pahātabbe dassetīti. Saṃvarādīhi pubbhāge vikkhambhitā āsavā catūhi maggehi samugghātaṃ gacchanti, tasmā tesāṃ maggānaṃ pubbhāge imehi pañcahākārehi vikkhambhanappahānaṃ dassento evamāha. Tasmā yo cāyaṃ vutto paṭhamo dassanamaggoyeva, idāni bhāvanānāmena vuccissanti¹ tayo maggā, tesāṃ sabbesampi ayaṃ pubbhāgapaṭipadāti veditabbā.

1. Bujhissanti (Ka)

Tattha **idhā**ti imasmim̄ sāsane. **Paṭisaṅkhā**ti paṭisaṅkhāya. Tatthāyaṃ saṅkhāsaddo ñāṇakoṭṭhāsapaññattigaṇaṇāsū dissati. “Saṅkhāyekaṃ paṭisevatī”ti-ādīsū¹ hi ñāṇe dissati. “Papañcasaññāsāṅkhā samudācarantī”ti-ādīsū² koṭṭhāse. “Tesaṃ tesaṃ dhammānaṃ saṅkhā samaññā”ti-ādīsū³ paññattiyaṃ. “Na sukaraṃ saṅkhātun”ti-ādīsū⁴ gaṇanāyaṃ. Idha pana ñāṇe daṭṭhabbo.

Paṭisaṅkhā yonisoti hi upāyena pathena paṭisaṅkhāya ñatvā paccavekkhitvāti attho. Ettha ca asaṃvare ādīnavapaṭisaṅkhā yoniso paṭisaṅkhāti veditabbā. Sā cāyaṃ “varaṃ bhikkhave tattāya ayosalākāya ādittāya sampajjalitāya sajotibhūtāya cakkhundriyaṃ sampalimaṭṭhaṃ, na tveva cakkhuviññeyyesu rūpesu anubyañjanaso nimittaggāho”ti-ādīnā⁵ ādittapariyāyanayena veditabbā. **Cakkhundriyasamvarasamvuto viharatī**ti ettha cakkhumeva indriyaṃ cakkhundriyaṃ, samvaraṇato samvaro, pidahanato thakanatoti vuttaṃ hoti. Satiyā etaṃ adhivacanaṃ. Cakkhundriye samvaro cakkhundriyasamvaro. Titthakāko āvāṭakacchapo vanamahimsoti-ādāyo viya.

Tattha kiñcāpi cakkhundriye samvaro vā asaṃvaro vā natthi. Na hi cakkhupasādaṃ nissāya sati vā muṭṭhasaccaṃ vā uppajjati. Api ca yadā rūpārammaṇaṃ cakkhussa āpāthaṃ āgacchati, tadā bhavaṅge dvikkhattum uppajjitvā niruddhe kiriyamanodhātu āvajjanakiccaṃ sādhayamānā uppajjitvā nirujjhati, tato cakkhuviññāṇaṃ dassanakiccaṃ, tato vipākamanodhātu sampaṭicchana-kiccaṃ, tato vipākāhetukamanoviññāṇadhātu santīraṇakiccaṃ, tato kiriyāhetukamanoviññāṇadhātu voṭṭhabbanakiccaṃ sādhayamānā uppajjitvā nirujjhati. Tadanantaraṃ javanaṃ javati.

Tatthapi neva bhavaṅgasamaye, na āvajjanādīnaṃ aññatarasamaye samvaro vā asaṃvaro vā atthi. Javanakkaṇe pana sace dussīlyaṃ vā muṭṭhasaccaṃ vā aññāṇaṃ vā akkhanti vā kosajjaṃ vā uppajjati, ayaṃ asaṃvaro hoti, evaṃ hontopi so cakkhundriye asaṃvaroti vuccati. Kasmā? Tasmim̄ hi sati dvārampi aguttaṃ hoti, bhavaṅgampi āvajjanādīni vīthiccittānīpi. Yathā

1. Ma 2. 127 piṭṭhe.

4. Saṃ 1. 389 piṭṭhe.

2. Ma 1. 156 piṭṭhe.

5. Saṃ 1. 377 piṭṭhe.

3. Abhi 1. 256 piṭṭhe.

6. Voṭṭhapanakiccaṃ (Sī)

kiṃ, yathā nagare catūsu dvāresu asaṃvutesu kiñcāpi anto gharakoṭṭhakagabbhādayo susaṃvutā, tathāpi antonagare sabbaṃ bhaṇḍaṃ arakkhitaṃ agopitameva hoti. Nagaradvārena hi pavisitvā corā yadicchanti, taṃ kareyyuṃ, evameva javane dussilyādīsu uppannesu tasmīṃ asaṃvare sati dvārampi aguttaṃ hoti, bhavaṅgampi āvajjanādīni vīthiccittānipīti.

Tasmīṃ pana sīlādīsu uppannesu dvārampi guttaṃ hoti, bhavaṅgampi āvajjanādīni vīthiccittānipi. Yathā kiṃ, yathā nagaradvāresu susaṃvutesu kiñcāpi anto gharādayo asaṃvutā, tathāpi antonagare sabbaṃ bhaṇḍaṃ surakkhitaṃ sugopitameva hoti. Nagaradvāresu hi pihitesu corānaṃ paveso natthi, evameva javane sīlādīsu uppannesu dvārampi suguttaṃ hoti, bhavaṅgampi āvajjanādīni vīthiccittānipi. Tasmā javanakkhaṇe uppajjamānopi cakkhundriye saṃvaroti vutto. Idha cāyaṃ satisaṃvaro adhippeto veditabbo. Cakkhundriyasamvarena saṃvuto **cakkhundriyasamvarasamvuto**, upetoti vuttaṃ hoti. Tathā hi pātimokkhasamvarasamvutoti imassa Vibhaṅge “iminā pātimokkhasamvarena upeto hoti -pa- samannāgato”¹ti vuttaṃ. Taṃ ekajjhaṃ katvā cakkhundriyasamvarena saṃvutoti evamattho veditabbo.

Atha vā saṃvarīti saṃvuto, thakesi pidahīti vuttaṃ hoti. Cakkhundriye saṃvarasamvuto cakkhundriyasamvarasamvuto, cakkhundriyasamvarasaññitaṃ satikavāṭaṃ cakkhudvāre gharadvāre kavāṭaṃ viya saṃvari thakesi pidahīti vuttaṃ hoti. Ayameva cettha attho sundarataro. Tathā hi “cakkhundriyasamvaram asaṃvutassa viharato saṃvutassa viharato”²ti etesu padesu ayameva attho dissati.

Viharatīti evaṃ cakkhundriyasamvarasamvuto yena kenaci iriyāpathavihārena viharati. **Yañhissāti**-ādimhi yaṃ cakkhundriyasamvaram assa bhikkhuno asaṃvutassa athaketvā apidahitvā viharantassāti evamattho veditabbo. Atha vā yekārassa **yanti** ādeso, **hikāro** ca padapūraṇo, ye assāti attho.

1. Abhi 2. 255 piṭṭhe.

Uppajjeyyunti nibbatteyyuṃ. **Āsavā vighātapariḷāhā**ti cattāro āsavā ca aññe ca vighātakarā kilesapariḷāhā vipākapariḷāhā ca. Cakkhudvāre hi iṭṭhārammaṇaṃ āpāthagataṃ kāmassādavasena assādayato abhinandato kāmāsavo uppajjati, īdisaṃ aññasmimpi sugatibhave labhissāmīti bhavapatthanāya assādayato bhavāsavo uppajjati, sattoti vā sattassāti vā gaṇhantassa diṭṭhāsavo uppajjati, sabbeheva sahaajātaṃ aññāṇaṃ avijjāsavoti cattāro āsavā uppajjanti. Tehi sampayuttā apare kilesā vighātapariḷāhā, āyatim vā tesam vipākā. Tepi hi asaṃvutasseva viharato uppajjeyyunti vuccanti.

Evamsa teti evaṃ assa te, evaṃ etena upāyena na honti, no aññathāti vuttaṃ hoti. Esa nayo **paṭisaṅkhā yoniso sotindriyasamvarasamvutoti**-ādīsu.

Ime vuccanti bhikkhave āsavā samvarā pahātabbāti ime chasu dvāresu cattāro cattāro katvā catuvīsati āsavā samvarena pahātabbāti vuccanti. Sabbattheva cettha satisamvaro eva samvaroti veditabbo.

Paṭisevanāpahātabba-āsavavaṇṇanā

23. **Paṭisaṅkhā yoniso cīvaranti**-ādīsu yaṃ vattabbaṃ, taṃ sabbaṃ Visuddhimagge Silakathāyaṃ vuttameva. **Yañhissāti** yaṃ cīvarapiṇḍapātādīsu vā aññataraṃ assa. **Appaṭisevatoti** evaṃ yoniso appaṭisevantassa. Sesam vuttanayameva. Kevalaṃ panidha aladdhaṃ cīvarādiṃ patthayato laddhaṃ vā assādayato kāmāsavassa uppatti veditabbā. Īdisaṃ aññasmimpi sampattibhave sugatibhave labhissāmīti bhavapatthanāya assādayato bhavāsavassa, ahaṃ labhāmi na labhāmīti vā mayhaṃ vā idanti attasaññaṃ adhiṭṭhahato¹ diṭṭhāsavassa uppatti veditabbā. Sabbeheva pana sahaajāto avijjāsavoti evaṃ catunnaṃ āsavānaṃ uppatti vipākapariḷāhā ca navavedanuppādanatopi veditabbā.

1. Avijahato (Sī)

Ime vuccanti bhikkhave āsavā paṭisevanā pahātabbāti ime ekamekasmim paccaye cattāro cattāro katvā soḷasa āsavā iminā ñāṇasaṃvarasaṅkhātena paccavekkhaṇapaṭisevanena pahātabbāti vuccanti.

Adhivāsanāpahātabba-āsavavaṇṇanā

24. **Paṭisaṅkhā yoniso khamo hoti sītassāti** upāyena pathena paccavekkhitvā khamo hoti sītassa sītaṃ khamati sahati, na avīrapuriso viya appamattakenapi sītena calati kampati kammaṭṭhānaṃ vijahati. Api ca kho Lomasanāgatthero viya anappakenāpi sītena phuṭṭho na calati na kampati, kammaṭṭhānameva manasi karoti. Thero kira Cetiyaṇṇabate Piyaṅguguhāyaṃ padhānaghare viharanto antaraṭṭhake himapātasamaye Lokantarikaniraye paccavekkhitvā kammaṭṭhānaṃ avijahantova abbhokāse vitināmesi. Evam **uṇhādīsupi** atthayojanā veditabbā.

Kevalaṅhi yo bhikkhu adhimattampi uṇhaṃ sahati sveva thero viya, ayaṃ “khamo uṇhassā”ti veditabbo. Thero kira gimhasamaye pacchābhattaṃ bahicaṅkame nisīdi. Kammaṭṭhānaṃ manasikaronto¹ sedāpissa kacchehi muccanti. Atha naṃ antevāsiko āha “idha bhante nisīdatha, sītalo okāso”ti. Thero “uṇhabhayenevamhi āvuso idha nisinno”ti Avīcimahānirayaṃ paccavekkhitvā nisīdiyeva. **Uṇhanti** cettha aggisantāpova veditabbo. Sūriyasantāpavasena panetaṃ vatthu vuttaṃ.

Yo ca dve tayo vāre bhattaṃ vā pāṇīyaṃ vā alabhamānopi anamatagge saṃsāre attano pettivisayūpapattiṃ paccavekkhitvā vedhento kammaṭṭhānaṃ na vijahatiyeva. Adhimattehi ḍaṃsamakasavātātapasamphassehi phuṭṭho cāpi tiracchānupapattiṃ paccavekkhitvā vedhento kammaṭṭhānaṃ na vijahatiyeva. Sarīsapasamphassena phuṭṭho cāpi anamatagge saṃsāre sīhabyagghādīmukhesu anekavāraṃ parivattitapubbabhāvaṃ paccavekkhitvā vedhento kammaṭṭhānaṃ na vijahatiyeva Padhāniyatthero viya. Ayaṃ “khamo jighacchāya -pa- sarīsapasamphassānaṃ”ti veditabbo.

1. Manasikaroto (Syā)

Theraṃ kira Khaṇḍacelavihāre¹ kaṇikārapadhāniyaghare ariyavaṃsaṃ suṇantaṃ ghoraviso sappo ḍaṃsi. Thero jānitvāpi pasannacitto nisinno dhammaṃyeva suṇāti. Visavego thaddho ahosi. Thero upasampadamaṇḍalaṃ ādiṃ katvā sīlaṃ paccavekkhitvā parisuddhasīlohamasmīti pītiṃ uppādesi. Saha pītuppādā viṣaṃ nivattitvā pathaviṃ pāvīsi. Thero tattheva cittekaggataṃ labhitvā vipassanaṃ vaḍḍhetvā arahattaṃ pāpuṇi.

Yo pana akkosavasena durutte duruttattāyeva ca durāgate api antimavatthusaññite vacanapathe sutvā khantiguṇaṃyeva paccavekkhitvā na vedhati Dīghabhāṇaka-abhayatthero viya. Ayaṃ “khamo duruttānaṃ durāgatānaṃ vacanapathānaṃ”ti veditabbo.

Thero kira paccayasantosabhāvanārāmatāya mahā-ariyavaṃsappaṭipadaṃ kathesi, sabbo mahāgāmo āgacchati. Therassa mahāsakkāro uppajjati. Taṃ aññataro mahāthero adhivāsetuṃ asakkoṃto Dīghabhāṇako ariyavaṃsaṃ kathemīti sabbarattim kolāhalaṃ karosīti-ādīhi akkosi, ubhopi ca attano attano vihāraṃ gacchantā gāvutamattaṃ ekapathena agamaṃsu. Sakalagāvutampi so taṃ akkosiyeva. Tato yattha dvinnaṃ vihārānaṃ maggo bhijjati, tattha ṭhatvā Dīghabhāṇakatthero taṃ vanditvā “esa bhante tumhākaṃ maggo”ti āha. So asuṇanto viya agamaṃsi. Theropi vihāraṃ gantvā pāde pakkhāletvā nisīdi. Tameṇaṃ antevāsiko “kim bhante sakalagāvutaṃ paribhāsantaṃ na kiñci avocutthā”ti āha. Thero “khantiyeva āvuso mayhaṃ bhāro, na akkhanti. Ekapaduddhārepi kammaṭṭhānaviyogaṃ na passāmi”ti āha. Ettha ca vacanameva **vacanapathoti** veditabbo.

Yo pana uppannā sārīrikā vedanā dukkhamanaṭṭhena² **dukkhā**, bahalaṭṭhena **tibbā**, pharusaṭṭhena **kharā**, tikhiṇaṭṭhena **kaṭukā**, assādavirahato **asātā**, manāṃ avaḍḍhanato **amanāpā**, pāṇaharaṇasamatthāyā **pāṇaharā** adhivāsetiyeva, na vedhati. Evaṃ sabhāvo hoti Cittalapabbate Padhāniyatthero viya. Ayaṃ “uppannānaṃ -pa-adhivāsanajātiko”ti veditabbo.

1. Khaṇḍe Cetiavivihāre (Ka)

2. Dukkhā vahanaṭṭhena (Syā), dukkhāpanaṭṭhena (Ka)

Therassa kira rattim padhānena vītināmetvā t̥hitassa udaravāto uppajji. So taṃ adhvāsetum asakkonto āvattati parivattati. Tamenam caṅkamapasse t̥hito Piṇḍapātiyatthero āha “āvuso pabbajito nāma adhvāsanasiḷo hoti”ti. So sādhu bhanteti adhvāsetvā niccalo sayi. Vāto nābhito yāva hadayaṃ phāleti. Thero vedanam vikkhambhetvā vipassanto muhuttena anāgāmī hutvā parinibbāyīti.

Yañhissāti sītādīsu yaṅkiñci ekadhammampi assa. **Anadhivāsayatoti** anadhivāsentassa akkhamantassa. Sesam vuttanayameva. Āsavuppatti panettha evam veditabbā. Sītena phuṭṭhassa uṇham patthayantassa kāmāsavo uppajjati, evam sabbattha. Natthi no sampattibhave sugatibhave sītam vā uṇham vāti bhavam patthayantassa bhavāsavo. Mayham sītam uṇhanti gāho diṭṭhāsavo. Sabbeheva sampayutto avijjāsavoti.

“**Ime vuccanti -pa- adhvāsanā pahātabbā**”ti ime sītādīsu ekamekassa vasena cattāro cattāro katvā aneke āsavā imāya khantisamvarasaṅkhātāya adhvāsanāya pahātabbāti vuccantīti attho. Ettha ca yasmā ayam khanti sītādidhamme adhvāseti, attano upari āropetvā vāsetiyeva. Na asahamānā hutvā nirassati¹, tasmā “adhvāsanā”ti vuccatīti veditabbā.

Parivajjanāpahātabba-āsavavaṇṇanā

25. **Paṭisaṅkhā yoniso caṇḍam hatthim parivajjetīti** aham samaṇoti caṇḍassa hatthissa āsanne na t̥hātabbam. Tatonidānañhi maraṇampi siyā maraṇamattampi dukkhanti evam upāyena pathena paccayena paccavekkhitvā caṇḍam hatthim parivajjeti paṭikkamati. Esa nayo sabbattha. **Caṇḍanti** ca duṭṭham, vāḷanti vuttam hoti. **Khāṇunti** khadirakhāṇu-ādim. **Kaṇṭakaṭṭhānanti** kaṇṭakānam t̥hānam, yattha kaṇṭakā vijjanti, tam okāsanti vuttam hoti. **Sobbhanti** sabbato paricchinnataṭam. **Papātanti** ekato chinnataṭam. **Candanikanti** ucchiṭṭhodakagabbhamalādīnam chaḍḍanaṭṭhānam. **Oḷigallanti**

1. Nidassati (Ka)

tesaṃyeva sakaddamādīnaṃ sandanokāsaṃ. Taṃ jaṇṇumattampi asucibharitaṃ hoti, dvepi cetāni ṭhānāni amanussaduṭṭhāni honti. Tasmā tāni vajjettabbāni. **Anāsaneti** ettha pana ayuttaṃ āsanaṃ **anāsanam**, taṃ atthato aniyatavattukam rahopaṭicchannāsananti veditabbam. **Agocareti** etthapi ca ayutto gocaro **agocaro**, so vesiyādibhedato pañcavidho. **Pāpake mitteti** lāmake dussīle mittapatirūpake, amitte vā. **Bhajantanti** sevamānaṃ. **Vīññū sabrahmacārīti** paṇḍitā buddhisampannā sabrahmacārayo, bhikkhūnametaṃ adhivacanaṃ. Te hi ekakammaṃ ekuddeso samasikkhatāti imaṃ brahmaṃ samānaṃ caranti, tasmā **sabrahmacārīti** vuccanti. **Pāpakesu ṭhānesūti** lāmakesu ṭhānesu. **Okappeyyunti** saddaheyyuṃ, adhimucceyyuṃ “addhā ayamāyasmā akāsi vā karissati vā”ti.

Yañhissāti hatthi-ādīsu yaṃkiñci ekampi assa. Sesam vuttanayameva. Āsavuppatti panettha evaṃ veditabbā. Hatthi-ādinidānena dukkhena phuṭṭhassa sukham patthayato kāmāsavo uppajjati. Natthi no sampattibhave sugatibhave idisaṃ dukkhanti bhavaṃ patthentassa bhavāsavo. Maṃ hatthi maddati, maṃ assoti gāho diṭṭhāsavo. Sabbeheva sampayutto avijjāsavoti.

Ime vuccanti -pa- parivajjanā pahātabbāti ime hatthi-ādīsu ekekassa vasena cattāro cattāro katvā aneke āsavā iminā sīlasaṃvarasaṅkhātena parivajjanena pahātabbāti vuccantīti veditabbā.

Vinodanāpahātabba-āsavavaṇṇanā

26. **Paṭisaṅkhā yoniso uppannaṃ kāmavitakkaṃ nādhivāsetīti** “iti pāyaṃ vitakko akusalo, itipi sāvajjo, itipi dukkhavipāko. So ca kho attabyābādhāya saṃvattatī”ti-ādinā nayena yoniso kāmavitakke ādīnaṃ paccavekkhitvā tasmim tasmim ārammaṇe uppannaṃ jātamabhinibbattaṃ kāmavitakkaṃ nādhivāseti, cittaṃ āropetvā na vāseti, abbhantare vā na vāsetītipi attho.

Anadhivāseto kim karotīti? **Pajahati** chaḍḍeti.

Kim kacavaraṃ viya piṭakenāti? Na hi, Api ca kho naṃ **vinodeti** tudati vijjhati nīharati.

Kim balibaddam viya patodenāti? Na hi, atha kho nam **byantikaroti** vigatantam karoti. Yathassa antopi nāvasissati antamaso bhaṅgamattampi, tathānam karoti.

Katham pana nam tathā karotīti? **Anabhāvaṃ gametīti** anu anu abhāvaṃ gameti, vikkhambhanappahānena yathā suvikkhambhito hoti, tathā karotīti vuttam hoti. Esa nayo **byāpādavihimsāvitakkesu**.

Ettha ca **kānavitakkoti** “yo kāmapaṭisaṃyutto takko vitakko micchāsankappo”ti Vibhaṅge¹ vutto. Esa nayo itaresu. **Uppannuppanneti** uppanne uppanne, uppannamatteyevāti vuttam hoti. Sakim vā uppanne vinodetvā dutiyavāre ajjupekkhitā na hoti, satakkhattumpi uppanne uppanne vinodetiyeva. **Pāpake akusaleti** lāmakatṭhena pāpake, akosallatāya² akusale. **Dhammeti** teyeva kānavitakkādayo sabbepi vā nava mahāvitakke. Tattha tayo vuttā eva. Avasesā “ñātivitakko janapadavitakko amaravitakko parānuddayatāpaṭisaṃyutto vitakko lābhasakkāra siloka paṭisaṃyutto vitakko anavaññattipaṭisaṃyutto vitakko”ti³ ime cha.

Yañhissāti etesu vitakkesu yaṃkiñci assa, sesam vuttanayameva. Kānavitakko panettha kāmasavo eva. Tabbiseso bhavāsavo. Taṃsampayutto diṭṭhāsavo. Sabbavitakkesu avijjāsavoti evam āsavuppattipi veditabbā.

Ime vuccanti -pa- vinodanā pahātabbāti ime kānavitakkādivasena vuttapakārā āsavā iminā tasmim tasmim vitakke ādīnavapaccavekkhaṇasahitena vīriyasamvarasankhātena vinodanena pahātabbāti vuccantīti veditabbā.

Bhāvanāpahātabba-āsavavaṇṇanā

27. **Paṭisaṅkhā yoniso satisambojjhaṅgam bhāvetīti** abhāvanāya ādīnavam, bhāvanāya ca ānisamsam upāyena pathena paccavekkhitvā

1. Abhi 2. 377 piṭṭhe.

2. Akosallatāya paṭipakkhatāya (Ka)

3. Khu 7. 402 Mahāniddese.

satisambojjhaṅgaṃ bhāveti, esa nayo sabbattha. Ettha ca kiñcāpi ime uparimaggattayasamayāsambhūtā lokuttarabojjhaṅgā eva adhippetā, tathāpi ādikammikānaṃ bojjhaṅgesu asammohatthaṃ lokiyalokuttaramissakena nesamā nayena atthavaṇṇanamā karissāmi. Idha pana lokiyānayaṃ pahāya lokuttaranayo eva gahetabbo. Tattha satisambojjhaṅgānti-ādinā nayena vuttānaṃ sattannaṃ ādipadānaṃyeva tāva—

Atthato lakkhaṇādīhi, kamato ca vinicchayo.

Anūnādhikato, viññātabbo vibhāvinā.

Tattha satisambojjhaṅge tāva saraṇaṭṭhena **sati**. Sā panesā upaṭṭhānalakkhaṇā, apilāpanalakkhaṇā vā. Vuttampi hetamā “yathā mahārāja rañño bhaṇḍāgāriko rañño sāpateyyaṃ apilāpeti, ettakaṃ mahārāja hiraññaṃ, ettakaṃ suvaṇṇaṃ, ettakaṃ sāpateyyanti, evameva kho mahārāja sati uppajjamānā kusalākusala sāvajjānavajja hīnapaṇīta kaṇhasukkasappaṭibhāge dhamme apilāpeti. Ime cattāro satipaṭṭhānā”¹ti¹ vitthāro. Apilāpanarasā. Kiccavaseneva hissa etaṃ lakkhaṇaṃ therena vuttaṃ. Asammosarasā vā. Gocarābhimukhabhāvapaccupaṭṭhānā. Sati eva sambojjhaṅgo **satisambojjhaṅgo**. Tattha bodhiyā, bodhissa vā aṅgoti bojjhaṅgo.

Kim vuttaṃ hoti, yā hi ayaṃ dhammasāmaggī, yāya lokiyalokuttaramaggakkhaṇe uppajjamānāya līnuddhaccapatiṭṭhānāyūhanakāmasukhattakilamathānuyoga-ucchedasassatābhinivesādīnaṃ anekesaṃ upaddavānaṃ paṭipakkhabhūtāya sati dhammavicaya vīriya pīti passaddhi samādhi upekkhāsāṅkhātāya dhammasāmaggiyā ariyasāvako bujjhatīti katvā “bodhī”ti vuccati, **bujjhatīti** kilesasantānaniddāya uṭṭhahati, cattāri vā ariyasaccāni paṭivijjhati, nibbānameva vā sacchikarotīti vuttaṃ hoti. Yathāha “satta bojjhaṅge bhāvetvā anuttaraṃ sammāsambodhiṃ abhisambuddho”ti. Tassā dhammasāmaggisāṅkhātāya bodhiyā aṅgotipi bojjhaṅgo, jhānaṅgamaggaṅgādayo viya.

1. Khu 11. 36 Milindapañhe.

Yopesa yathāvuttappakārāya etāya dhammasāmaggiyā bujḥatīti katvā ariyasāvako “bodhi”ti vuccati, tassa bodhissa aṅgotipi bujḥaṅgo, senaṅgarathāṅgādayo viya. Tenāhu Aṭṭhakathācariyā “bujḥanakassa puggalassa aṅgāti vā bujḥaṅgā”ti. Api ca “bujḥaṅgāti kenaṭṭhena bujḥaṅgā, bodhāya saṁvattantīti bujḥaṅgā, bujḥantīti bujḥaṅgā, anubujḥantīti bujḥaṅgā, paṭibujḥantīti bujḥaṅgā, sambujḥantīti bujḥaṅgā”ti-ādinā¹ paṭisambhidānāyenaṅpi attho veditabbo. Passattho sundaro vā bujḥaṅgoti sambojḥaṅgo. Evaṁ sati eva sambojḥaṅgo satisambojḥaṅgo. Taṁ **satisambojḥaṅgaṁ**. Evaṁ tāva ekassa ādipadassa atthato lakkhaṇādīhi ca vinicchayo viññātabbo.

Dutiyādīsu pana catusaccadhamme vicinātīti **dhammavicayo**. So pana vicayalakkhaṇo, obhāsanaraso, asammohapaccupaṭṭhāno. Vīrabhāvato vidhinā irayitabbato ca **vīriyaṁ**. Taṁ paggahalakkhaṇaṁ, upatthambhanarasaṁ, anosīdanapaccupaṭṭhānaṁ. Pīṇayatīti **pīti**. Sā pharaṇalakkhaṇā, tuṭṭhilakkhaṇā vā, kāyacittānaṁ pīṇanarasaṁ, tesāmyeva odagyapaccupaṭṭhānā. Kāyacittadarathapassambhanato **passaddhi**. Sā upasamalakkhaṇā, kāyacittadarathanimmaddanarasaṁ, kāyacittānaṁ aparipphandanabhūtasītibhāvapaccupaṭṭhānā. Samādhānato **samādhī**. So avikkhepalakkhaṇo, avisāralakkhaṇo vā, cittacetāsikānaṁ sampiṇḍanaraso, cittaṭṭhitipaccupaṭṭhāno. Ajjupekkhanato **upekkhā**. Sā paṭisaṅkhānalakkhaṇā, samavāhitalakkhaṇā vā, ūnādhikatānivāraṇarasaṁ, pakkhapātupacchedarasaṁ vā, majjhatabhāvapaccupaṭṭhānā. Sesāṁ vuttanayameva. Evaṁ sesapadānampi atthato lakkhaṇādīhi ca vinicchayo viññātabbo.

Kamatoti ettha ca “satiṅca khvāhaṁ bhikkhave sabbatthikaṁ vadāmi”ti² vacanato sabbesaṁ sesabojḥaṅgānaṁ upakārakattā satisambojḥaṅgova paṭhamaṁ vutto. Tato paraṁ “so tathā sato viharanto taṁ dhammaṁ paññāya pavicinati”ti-ādinā³ nayena sesabojḥaṅgānaṁ pubbāpariyavacane payojanaṁ sutteyeva vuttaṁ. Evamettha kamatopi vinicchayo viññātabbo.

Anūnādhikatoti kasmā pana Bhagavatā satteva bujḥaṅgā vuttā anūnā anadhikāti. Līnuddhaccaṭṭipakkhato sabbatthikato ca. Ettha hi

1. Khu 9. 302 piṭṭhe.

2. Saṁ 3. 100 piṭṭhe.

3. Abhi 2. 236 piṭṭhe.

tayo bojjhaṅgā līnassa paṭipakkhā. Yathāha “yasmim̄ ca kho bhikkhave samaye līnaṃ cittaṃ hoti, kālo tasmim̄ samaye dhammavicayasambojjhaṅgassa bhāvanāya, kālo vīriyasambojjhaṅgassa bhāvanāya, kālo pītisambojjhaṅgassa bhāvanāyā”¹. Tayo uddhaccassa paṭipakkhā. Yathāha “yasmim̄ ca kho bhikkhave samaye uddhataṃ cittaṃ hoti, kālo tasmim̄ samaye passaddhisambojjhaṅgassa bhāvanāya, kālo samādhisambojjhaṅgassa bhāvanāya, kālo upekkhāsambojjhaṅgassa bhāvanāyā”². Eko panettha sabbatthiko. Yathāha “satiṅca khvāhaṃ bhikkhave sabbatthikaṃ vadāmi”². “Sabbatthakan”²tipi pāṭho, dvinnampi sabbattha icchitabbanti attho. Evaṃ līnuddhaccapaṭipakkhato sabbatthikato ca satteva bojjhaṅgā vuttā anūnā anadhikāti, evamettha anūnādhikatopi vinicchayo viññātabbo.

Evaṃ tāva “satisambojjhaṅgan”²ti-ādinā nayena vuttānaṃ sattannaṃ ādīpadānaṃyeva atthavaṇṇanaṃ ṇātvā idāni **bhāveti vivekanissitanti**-ādīsu evaṃ ṇātabbā. **Bhāvetī**ti vadḍheti, attano cittasantāne punappunaṃ janeti abhinibbattetīti attho. **Vivekanissitanti** viveke nissitaṃ. **Vivekoti** vivittatā. Svāyaṃ tadaṅgaviveko vikkhambhanasamucchedapaṭippassaddhi nissaraṇavivekoti pañcavidho. Tassa nānattaṃ “ariyadhamme avinīto”²ti ettha vuttanayeneva veditabbaṃ. Ayameva hi tattha vinayoti vutto. Evametasmim̄ pañcavidhe viveke.

Vivekanissitanti tadaṅgavivekanissitaṃ samucchedavivekanissitaṃ nissaraṇavivekanissitaṃca satisambojjhaṅgaṃ bhāvetīti ayamattho veditabbo. Tathā hi ayaṃ bojjhaṅgabhāvanānuyutto yogī vipassanākkhaṇe kiccato tadaṅgavivekanissitaṃ, ajjhāsayato nissaraṇavivekanissitaṃ, maggakāle pana kiccato samucchedavivekanissitaṃ, ārammaṇato nissaraṇavivekanissitaṃ satisambojjhaṅgaṃ bhāveti. Pañcavidhavivekanissitantipi eke, te hi na kevalaṃ balavavipassanāmaggaphalakkhaṇesu eva bojjhaṅge uddharanti, vipassanāpāḍakakasiṇajjhāna-ānāpānāsubhabrahmavihārajjhānesupi uddharanti. Na ca paṭisiddhā Aṭṭhakathācariyehi. Tasmā tesam̄ matena etesam̄ jhānānaṃ pavattikkhaṇe kiccato eva vikkhambhanavivekanissitaṃ.

1. Saṃ 3. 99 piṭṭhe.

2. Saṃ 3. 100 piṭṭhe.

Yathā ca “vipassanākkhaṇe ajjhāsayato nissaraṇavivekanissitan”ti vuttaṃ, evaṃ paṭippassaddhivivekanissitampi bhāvetīti vattum vaṭṭati. Esa nayo **virāganissitā**dīsu. Vivekaṭṭhā eva hi virāgādayo.

Kevalañhettha **vossaggo** duvidho pariccāgavossaggo ca pakkhandanavossaggo cāti. Tattha **pariccāgavossaggoti** vipassanākkhaṇe ca tadaṅgavasena, maggakkhaṇe ca samucchadavasena kilesappahānaṃ. **Pakkhandanavossaggoti** vipassanākkhaṇe tanninnabhāvena, maggakkhaṇe pana ārammaṇakaraṇena nibbānapakkhandanaṃ. Tadubhayampi imasmiṃ lokiyalokuttaramissake atthavaṇṇanānaye vaṭṭati. Tathā hi ayaṃ satisambojjhaṅgo yathāvuttena pakārena kilese pariccajati, nibbānañca pakkhandati. **Vossaggapariṇāminti** iminā pana sakalena vacanena vossaggattaṃ pariṇamantaṃ pariṇatañca paripaccantaṃ paripakkañcāti. Idaṃ vuttaṃ hoti “ayañhi bojjhaṅgabhāvanānuyutto bhikkhu yathā satisambojjhaṅgo kilesapariccāgavossaggattaṃ nibbānapakkhandanavossaggattañca paripaccati, yathā ca paripakko hoti, tathā naṃ bhāvetī”ti. Esa nayo sesambojjhaṅgesu.

Idha pana nibbānaṃyeva sabbasaṅkhatehi vivittatā **viveko**, sabbesaṃ virāgabhāvato **virāgo**, nirodhabhāvato **nirodhoti** vuttaṃ. Maggo eva ca vossaggapariṇāmī, tasmā satisambojjhaṅgaṃ bhāveti vivekaṃ ārammaṇaṃ katvā pavattiyā vivekanissitaṃ. Tathā **virāganissitaṃ nirodhanissitaṃ**. Tañca kho ariyamaggakkhaṇuppattiyā kilesānaṃ samucchadato pariccāgabhāvena ca nibbānapakkhandanabhāvena ca pariṇataṃ paripakkanti ayameva attho daṭṭhabbo. Esa nayo sesambojjhaṅgesu.

Yañhissāti etesu bojjhaṅgesu yaṃkiñci assa. Sesam vuttanayameva. Āsavuppattiyam panettha imesam uparimaggattayasampayuttānaṃ bojjhaṅgānaṃ abhāvitattā ye uppajjeyyum kāmāsavo bhavāsavo avijjāsavoti tayo āsavā, bhāvayato evaṃsa te āsavā na hontīti ayaṃ nayo veditabbo.

Ime vuccanti -pa- bhāvanā pahātabbāti ime tayo āsavā imāya maggattayasampayuttāya bojjhaṅgabhāvanāya pahātabbāti vuccantīti veditabbā.

28. Idāni imehi sattahākārehi pahīnāsavaṃ bhikkhuṃ thomento āsavappahāne cassa ānisaṃsaṃ dassento eteheva ca kāraṇehi āsavappahāne sattānaṃ ussukkaṃ janento **yato kho bhikkhave -pa- antamakāsi dukkhassāti** āha. Tattha **yato khoti** sāmivacane tokāro, yassa khoti vuttaṃ hoti. Porāṇā pana yasmaṃ kāleti vaṇṇayanti. **Ye āsavā dassanā pahātābbāti** ye āsavā dassanena pahātābbā, te dassaneneva pahīnā honti, na appahīnesuyeva pahīnasaññī hoti. Evaṃ sabbattha vitthāro.

Sabbāsavasamvarasamvutoti sabbehi āsavapidhānehi pihito, sabbesaṃ vā āsavānaṃ pidhānehi pihito. **Acchecchi taṇhanti** sabbampi taṇhaṃ chindi saṃchindi samucchindi. **Vivattayi saṃyojananti** dasavidhampi saṃyojanaṃ parivattayi nimmalamakāsi. **Sammāti** hetunā kāraṇena. **Mānābhisamayāti** mānassa dassanābhisamayā pahānābhisamayā ca. Arahattamaggo hi kiccavasena mānaṃ passati, ayamassa dassanābhisamayo. Tena diṭṭho pana so tāvadeva pahīyati diṭṭhavisena diṭṭhasattānaṃ¹ jīvitaṃ viya. Ayamassa pahānābhisamayo.

Antamakāsi dukkhassāti evaṃ arahattamaggena sammā mānassa diṭṭhattā pahīnattā ca ye ime “kāyabandhanassa anto jīrati². Haritantam vā”³ evaṃ vutta-antimamariyādanto ca, “antamidaṃ bhikkhave jīvikānaṃ”⁴ evaṃ vuttalāmakanto ca, “sakkāyo eko anto”⁵ evaṃ vuttakoṭṭhāsanto ca, “esevanto dukkhassa sabbapaccayasāṅkhayā”⁶ evaṃ vuttakoṭanto cāti evaṃ cattāro antā, tesu sabbasseva vaṭṭadukkhassa antaṃ catutthakoṭisaṅkhātāṃ antimakoṭisaṅkhātāṃ antamakāsi paricchedaṃ parivaṭumaṃ akāsi, antimasamussayamattāvasesaṃ dukkhamakāsīti vuttaṃ hoti.

Attamanā te bhikkhūti sakamanā tuṭṭhamanā, pītisomanassehi vā sampayuttamanā hutvā. **Bhagavato bhāsitaṃ abhinandunti** idaṃ dukkhassa

1. Dāṭhavisena daṭṭhasattānaṃ (Syā) 2. Vi 4. 277 piṭṭhe. 3. Ma 1. 246 piṭṭhe.

4. Khu 1. 255; Saṃ 2. 76 piṭṭhe. 5. Am 2. 351 piṭṭhe. 6. Saṃ 1. 311 piṭṭhe.

antakiriyāpariyosānaṃ Bhagavato bhāsitaṃ sukathitaṃ sulapitaṃ,
evametaṃ Bhagavā evametaṃ Sugatāti matthakena sampaṭicchantā
abbhanumodimsūti.

Sesametha yaṃ na vuttaṃ, taṃ pubbe vuttatā suviññeyyattā ca na
vuttaṃ. Tasmā sabbaṃ vuttānusārena anupadaso paccavekkhitabbaṃ.

Papañcasūdaniyā Majjhimanikāyaṭṭhakathāya

Sabbāsavasuttavaṇṇanā niṭṭhitā.

3. Dhammadāyādasuttavaṇṇanā

29. **Evam me sutanti** Dhammadāyādasuttaṃ. Yasmā panassa
aṭṭhuppattiko nikkhepo, tasmā taṃ dassetvāvassa apubbapadavaṇṇanaṃ
karissāma. Katarāya ca pana idam aṭṭhuppattiyā nikkhittanti. Lābhasakkāre.
Bhagavato kira mahālābhasakkāro uppajji. Yathā taṃ cattāro asaṅkhyeyye
pūritadānapāramisañcayassa sabbadisāsu yamakamahāmegho vuṭṭhahitvā
mahoghaṃ viya sabbapāramiyo ekasmiṃ attabhāve vipākaṃ dassāmāti
sampiṇḍitā viya lābhasakkāramahoghaṃ nibbattayimsu. Tato tato
annapānayānavatthamālāgandhavilepanādihatthā khattiyabrāhmaṇādayo
āgantvā “kahaṃ Buddho kahaṃ Bhagavā kahaṃ devadevo narāsabho
purisasīho”ti Bhagavantam pariyesanti. Sakaṭasatehipi paccaye āharitvā
okāsaṃ alabhamānā samantā gāvutappamāṇampi sakaṭadhurena
sakaṭadhuramāhaccatiṭṭhanti ceva anubandhanti ca
andhakavindabrāhmaṇādayo viya. Sabbaṃ Khandhake tesu tesu suttesu ca
āgatanayeneva veditabbaṃ. Yathā ca Bhagavato, evam bhikkhusaṃghassāpi.

Vuttampi cetam “tena kho pana samayena Bhagavā sakkato hoti
garukato mānito pūjito apacito lābhī cīvarapiṇḍapātasenāsana-
gilānapaccayabhesajjaparikkhārānaṃ, Bhikkhusaṃghopi kho sakkato
hoti -pa- parikkhārānaṃ”ti¹. Tathā

1. Khu 1. 89 piṭṭhe.

“yāvatā kho Cunda etarahi saṅgho vā gaṇo vā loke uppanno, nāhaṃ
Cunda aññaṃ ekasaṅghampi samanupassāmi, evaṃ
lābhaggayasaggapattāṃ, yathariva Cunda bhikkhusaṅgho”¹.

Svāyaṃ Bhagavato ca bhikkhusaṅghassa ca uppanno lābhasakkāro
ekato hutvā dvinnāṃ mahānadīnaṃ udakamiva appameyyo ahoṣi. Kamena
bhikkhū paccayagarukā paccayabāhulikā ahesuṃ. Pacchābhattampi
telamadhuphāṇitādīsū āhaṭesu gaṇḍim̐ yeva paharivā “amhākaṃ ācariyassa
detha, upajjhāyassa dethā”²ti uccāsaddamahāsaddaṃ karonti. Sā ca nesaṃ
pavatti Bhagavatopi pākaṭā ahoṣi. Tato Bhagavā ananucchavikanti
dhammasaṃvegaṃ uppādetvā cintesi—

“Paccayā akappiyāti na sakkā sikkhāpadaṃ paññāpetuṃ.
Paccayapaṭibaddhā hi kulaputtānaṃ samaṇadhammavutti. Handāhaṃ
dhammadāyādapaṭipadaṃ desemi. Sā sikkhākāmānaṃ kulaputtānaṃ
sikkhāpadaṃ paññāti viya bhavissati nagaradvāre ṭhapitasabbakāyika-ādāso
viya ca, yathā hi nagaradvāre ṭhapite sabbakāyike ādāse cattāro vaṇṇā attano
chāyaṃ disvā vajjaṃ pahāya niddosā honti, evameva sikkhākāmā kulaputtā
payogamaṇḍanena² attānaṃ maṇḍetukāmā imaṃ sabbakāyikādāsūpamaṃ
desanaṃ āvajjitvā āmisadāyādapaṭipadaṃ vajjetvā dhammadāyādapaṭipadaṃ
pūrentā khippameva jātijarāmarañassa antaṃ karissantī”²ti. Imissā
aṭṭhuppattiyā idaṃ suttaṃ abhāsi.

Tattha **dhammadāyādā me bhikkhave bhavatha, mā āmisadāyādāti**
dhammassa me dāyādā bhikkhave bhavatha, mā āmisassa. Yo mayhaṃ
dhammo, tassa paṭiggāhakā bhavatha. Yañca kho mayhaṃ āmisaṃ, tassa mā
paṭiggāhakā bhavathāti vuttaṃ hoti. Tattha dhammopi duvidho
nippariyāyadhammo pariyāyadhammoti. Āmisampi duvidhaṃ
nippariyāyāmisam̐ pariyāyāmisanti. Kathaṃ? Maggaphalanibbānabhedo hi
navavidhopi lokuttaradhammo **nippariyāyadhammo** nibbattitadhammo, na
yena kenaci pariyāyena kāraṇena vā lesena vā dhammo. Yaṃ panidaṃ
vivaṭṭūpanissitaṃ kusalaṃ, seyyathidaṃ,

1. Dī 3. 104 piṭṭhe.

2. Sikkhāyogamaṇḍanena (Sī)

idhekacco vivaṭṭaṃ patthento dānaṃ deti, sīlaṃ samādiyati,
 uposathakammaṃ karoti, gandhamālādīhi vatthupūjaṃ karoti, dhammaṃ
 suṇāti deseti jhānasamāpattiyo nibbatteti, evaṃ karonto anupubbena
 nippariyāyadhammaṃ amataṃ nibbānaṃ paṭilabhati, ayaṃ
pariyāyadhammo. Tathā cīvarādayo cattāro paccayā **nippariyāyāmisameva**,
 na aññena pariyāyena kāraṇena vā lesena vā āmisam. Yaṃ panidaṃ
 vaṭṭagāmikusalaṃ, seyyathidaṃ, idhekacco vaṭṭaṃ patthento
 sampattibhavaṃ icchamāno dānaṃ deti -pa- samāpattiyo nibbatteti, evaṃ
 karonto anupubbena devamanussasampattiṃ paṭilabhati, idaṃ
pariyāyāmisam nāma.

Tattha nippariyāyadhammopi Bhagavatoyeva santako. Bhagavatā hi
 kathitattā bhikkhū maggaphalanibbānāni adhigacchanti. Vuttampi cetam “so
 hi brāhmaṇa Bhagavā anuppanassa maggassa uppādetā, asaṅjātassa
 maggassa saṅjanetā, anakkhātassa maggassa akkhātā, maggaññū maggavidū
 maggakovidō. Maggānugā ca pana etarahi sāvakā viharanti pacchā
 samannāgatā”¹ ca, “so hāvuso Bhagavā jānaṃ jānāti, passaṃ passati
 cakkhubhūto ñāṇabhūto dhammabhūto brahmabhūto vattā pavattā atthassa
 ninnetā amatassa dātā dhammassāmī Tathāgato”² ca.

Pariyāyadhammopi Bhagavatoyeva santako. Bhagavatā hi kathitattā
 evaṃ jānanti “vivaṭṭaṃ patthetvā dānaṃ dento -pa- samāpattiyo nibbattento
 anukkamena amataṃ nibbānaṃ paṭilabhatī”³ti. Nippariyāyāmisampi ca
 Bhagavatoyeva santakaṃ. Bhagavatā hi anuññātattāyeva bhikkhūhi
 Jīvakavatthum ādiṃ katvā paṇītacīvaraṃ laddham. Yathāha “anujānāmi
 bhikkhave gahapaticīvaraṃ. Yo icchati, paṃsukūliko hotu. Yo icchati,
 gahapaticīvaraṃ sādīyatu. Itarītarenapāhaṃ bhikkhave santuṭṭhimyeva
 vaṇṇemī”³ti.

Pubbe ca bhikkhū paṇītapīṇḍapātāṃ nālatthum.
 Sapadānapīṇḍiyālopabhojanā evāhesum. Tehi Rājagahe viharantena
 Bhagavatā “anujānāmi bhikkhave saṃghabhattaṃ uddesabhattaṃ
 nimantaṇaṃ salākabhattaṃ

1. Ma 3. 59 piṭṭhe.

2. Ma 1. 157 piṭṭhe.

3. Vi 3. 392 piṭṭhe.

pakkhikaṃ uposathikaṃ paṭipadikaṃ”¹ evaṃ anuññātattāyeva paṇītabhojanaṃ laddhaṃ. Tathā senāsanāṃ. Pubbe hi akatapabbhārarukkhamūlādisenāsanāyeva bhikkhū ahesuṃ. Te “anujānāmi bhikkhave pañca leṇānī”² evaṃ Bhagavatā anuññātattāyeva vihāro aḍḍhayogo pāsādo hammiyaṃ guhāti imāni senāsanāni labhiṃsu. Pubbe ca muttahaṛītakeneva bhesajjaṃ akaṃsu. Te Bhagavatāyeva “anujānāmi bhikkhave pañca bhesajjāni, seyyathidaṃ, sappi, navaṇītaṃ, telaṃ, madhu, phāṇitaṃ”³ evamādinā nayena anuññātattā nānābhesajjāni labhiṃsu.

Pariyāyāmisampi Bhagavatoyeva santakaṃ. Bhagavatā hi kathitattā yeva jānanti “sampattibhavaṃ patthento dānaṃ datvā sīlaṃ -pa- samāpattiyo nibbattetvā anukkamena pariyāyāmisāṃ dibbasampattiṃ manussasampattiṃ paṭilabhatī”⁴ti. Tadeva, yasmā nippariyāyadhammopi pariyāyadhammopi nippariyāyāmisampi pariyāyāmisampi Bhagavatoyeva santakaṃ, tasmā tattha attano sāmibhāvaṃ dassento āha “dhammadāyādā me bhikkhave bhavatha, mā āmisadāyādā”⁵ti.

Yo mayhaṃ santako duvidhopi dhammo, tassa dāyādā bhavatha. Yaṃ ca kho etaṃ mayhameva santakaṃ āmisāṃ, tassa dāyādā mā bhavatha. Dhammakotṭhāsasseva sāmīno bhavatha, mā āmisakotṭhāsassa. Yo hi Jinasāsane pabbajitvā paccayaparamo viharati catūsu taṇhuppādesu sandissamāno nikkhattadhuro dhammānudhammapaṭipattiyaṃ, ayaṃ **āmisadāyādo** nāma. Tādisā mā bhavatha. Yo pana anuññātapaccayesu appicchatādīni nissāya paṭisaṅkhā sevamāno paṭipattiparamo viharati catūsu ariyavaṃsesu sandissamāno, ayaṃ **dhammadāyādo** nāma. Tādisā bhavathāti vuttaṃ hoti.

Idāni yesaṃ tattha etadahosi, bhavissati vā anāgatamaddhānaṃ “kiṃ nu kho Bhagavā sāvakaṇāṃ alābhatthiko evamāhā”⁶ti tesaṃ atipaṇītalābhatthiko ahaṃ evaṃ vadāmīti dassetuṃ āha **atthi me tumhesu -pa- no āmisadāyādāti**.

1. Vi 4. 329 piṭṭhe.

2. Vi 4. 290 piṭṭhe.

3. Vi 3. 290 piṭṭhe.

Tassāyamattho, atthi me tumhesu anukampā anuddayā hitesitā, kena nu kho kāraṇena kena upāyena sāvaka dhammadāyādā assu dhammakotṭhāsasāmino, no āmisadāyādāti. Ayaṃ pana adhippāyo, passati kira Bhagavā āmisagarukānaṃ āmise upakkhalitānaṃ atītakāle tāva Kapilassa bhikkhuno, “saṅghāṭipi ādittā hotī”¹ti¹ ādinā nayena āgatapāpabhikkhubhikkhunīsikkhamānādīnaṃ ca anekasatānaṃ apāyaparipūraṇattaṃ attano sāsane pabbajitānaṃca Devadattādīnaṃ. Dhammagarukānaṃ pana Sāriputtamoggallānamahākassapādīnaṃ abhiññāpaṭisambhidādiguṇappaṭilābhaṃ. Tasmā tesāṃ apāyā parimuttim sabbaguṇasampattiṃca icchanto āha “atthi me tumhesu anukampā kinti me sāvaka dhammadāyādā bhaveyyuṃ, no āmisadāyādā”ti. Paccayagaruko ca catuparisantare kūṭakahāpaṇo viya nibbutaṅgāro viya ca nittejo nippabho hoti. Tato vivattitacitto dhammagaruko tejavā sīhova abhibhuyyacārī, tasmāpi evamāha “atthi me -pa- no āmisadāyādā”ti.

Evam “dhammadāyādā me bhikkhave bhavatha, mā āmisadāyādā”ti idaṃ anukampāya paṇītataṃ lābhaṃ icchantena vuttaṃ, no alābhatthikenāti sāvetvā idāni imassa ovādassa akaraṇe ādīnavaṃ dassento āha “tumhe ca me bhikkhave -pa- no dhammadāyādā”ti. Tattha **tumhepi tena ādiyā² bhaveyyāthāti** tumhepi tena āmisadāyādabhāvena no dhammadāyādabhāvena ādiyā² bhaveyyātha apadisitabbā³ visuṃ kātābbā vavatthapetabbā, viññūhi gārayhā bhaveyyāthāti vuttaṃ hoti. Kinti? Āmisadāyādā Satthusāvaka viharanti, no dhammadāyādāti.

Ahampi tena ādiyo bhaveyyanti ahampi tena tumhākaṃ āmisadāyādabhāvena no dhammadāyādabhāvena gārayho bhaveyyaṃ. Kinti? Āmisa -pa- dāyādāti. Idaṃ Bhagavā tesāṃ atīva mudukaraṇatthaṃ āha. Ayañhi ettha adhippāyo, sace bhikkhave tumhe āmisalolā carissatha, tattha viññū maṃ garahissanti “kathañhi nāma sabbaññū samāno attano

1. Vi 1. 148 piṭṭhe, Saṃ 1. 451 piṭṭhe ca.

2. Ādissā (Sī, Syā)

3. Avadisitabbā (Sī, Syā)

sāvake dhammadāyāde no āmisadāyāde kātuṃ na sakkotī”ti. Seyyathāpi nāma anākappasampanne bhikkhū disvā ācariyupajjhāye garahanti “kassime saddhivihārikā, kassantevāsikā”ti, seyyathā vā pana kulakumārake vā kulakumārikāyo vā dussīle pāpadhamme disvā mātāpitaro garahanti “kassime puttā, kassa dhītarō”ti, evameva maṃ viññū garahissanti “kathañhi nāma sabbaññū samāno attano sāvake dhammadāyāde no āmisadāyāde kātuṃ na sakkotī”ti.

Evam imassa ovādassa akaraṇe ādīnavaṃ dassetvā karaṇe ānisaṃsaṃ dassento **tumhe ca meti-ādīmāha**. Tattha **ahampi tena na ādiyo bhaveyyanti** seyyathāpi nāma vattaparipūrake daharabhikkhū uddesaparipucchāsampanne Vassasatikatthere viya ākappasampanne disvā, kassa saddhivihārikā, kassantevāsikāti, asukassāti, “patirūpaṃ therassa, paṭibalo vata ovadituṃ anusāsituṃ”ti ācariyupajjhāyā na ādiyā na gārayhā bhavanti, evameva ahampi tena tumhākaṃ dhammadāyādabhāvena no āmisadāyādabhāvena kassa sāvakā nālakaṭṭhapaṭipadaṃ tuvaṭṭakapaṭipadaṃ candūpamaṭṭhapaṭipadaṃ rathavinīṭhapaṭipadaṃ mahāgosīṅgasālapaṭipadaṃ mahāsuññatapaṭipadaṃ paṭipannā catupaccayasantosabhāvanārāma-ariyavaṃsesu sakkhibhūtā paccayagedhato vivattamānasā abbhā muttacandasamā viharantīti, “samaṇassa Gotamassā”ti vutte “sabbaññū vata Bhagavā, asakkhi vata sāvake āmisadāyādapaṭipadaṃ chaḍḍāpetvā dhammadāyādapaṭipattipūrake kātuṃ”ti viññūnaṃ na ādiyo na gārayho bhaveyyanti. Evamimasmimṃ pade adhippāyaṃ ṇatvā sesaṃ kaṇhapakkhe vuttanayapaccanīkena veditabbaṃ. Evam imassa ovādassa karaṇe ānisaṃsaṃ dassetvā idāni taṃ ovādaṃ niyyātento¹ āha “tasmātiha me bhikkhave -pa- no āmisadāyādā”ti.

30. Evamimaṃ ovādaṃ niyyātetvā idāni tassā dhammadāyādapaṭipattiyā paripūrakāriṃ thometuṃ **idhāhaṃ bhikkhavi-** ādīmāha. Bhagavato hi thomaṇaṃ sutvāpi hontiyeva tadatthāya² paṭipajjitāro.

1. Niyyādentō (Ka)

2. Tathattāya (Sī, Syā)

Tattha **idhāti** nipātapadametaṃ. **Bhuttāvī**ti bhuttavā, katabhattakiccoti vuttaṃ hoti. **Pavāritoti** yāvadatthapavāraṇāya pavārito, yāvadatthaṃ bhuñjitvā paṭikkhittabhojano tittovāti vuttaṃ hoti. Catubbidhā hi pavāraṇā vassaṃvuṭṭhapavāraṇā paccayapavāraṇā anatirittapavāraṇā yāvadatthapavāraṇāti. Tattha “anujānāmi bhikkhave vassaṃvuṭṭhānaṃ bhikkhūnaṃ tīhi ṭhānehi pavāretun”¹ti ayam **vassaṃvuṭṭhapavāraṇā**. “Icchāmaham bhante saṃghaṃ catumāsam bhesajjena pavāretun”²ti ca “aññatra punapavāraṇāya aññatra niccapavāraṇāya”³ti ayam **paccayapavāraṇā**. “Pavārito nāma asanaṃ paññāyati, bhojanaṃ paññāyati, hatthapāse ṭhito abhiharati, paṭikkhepo paññāyati. eso pavārito nāma”⁴ti ayam **anatirittapavāraṇā**. “Pañitena khādanīyena bhojanīyena sahatthā santappesi sampavāresi”⁵ti ayam **yāvadatthapavāraṇā**. Ayamidha adhippetā. Tena vuttaṃ “pavāritoti yāvadatthapavāraṇāya pavārito”ti.

Paripuṇṇoti bhojanena paripuṇṇo. **Pariyositoti** pariyositabhojano, uttarapadalopo daṭṭhabbo. Yāvatakaṃ bhuñjitabbaṃ, tāvatakaṃ bhuttaṃ hoti, avasitā me bhojanakiriyāti attho. **Suhitoti** dhāto, jighacchādukkābhāvena vā sukhitoti vuttaṃ hoti. **Yāvadatthoti** yāvatako me bhojanena attho, so sabbo pattoti. Ettha ca purimānaṃ tiṇṇaṃ pacchimāni sādhakāni. Yo hi pariyosito, so bhuttāvī hoti. Yo ca suhito, so yāvadatthapavāraṇāya pavārito. Yo yāvadattho, so paripuṇṇoti. Purimāni vā pacchimānaṃ. Yasmā hi bhuttāvī, tasmā pariyosito. Yasmā pavārito, tasmā suhito. Yasmā paripuṇṇo, tasmā yāvadatthoti. Sabbaṃ cetam parikappetvā vuttanti veditabbaṃ.

Siyāti ekamse ca vikappane ca. “Pathavīdhātu siyā ajjhakkā, siyā bāhirā”⁶ti ekamse. “Siyā aññatarassa bhikkhuno āpatti vitikkamo”⁷ti vikappane. Idha ubhayampi vaṭṭati. Atirekova **atirekadhammo**. Tathā **chaḍḍanīyadhammo**. Adhiko ca chaḍḍetabbo ca, na aññaṃ kiñci

1. Vi 3. 223 piṭṭhe.

2. Vi 2. 135 piṭṭhe.

3. Vi 2. 137 piṭṭhe.

4. Vi 2. 111 piṭṭhe.

5. Dī 1. 102. 142 piṭṭhādīsu.

6. Ma 3. 283 piṭṭhe.

7. Ma 3. 29 piṭṭhe.

kātabboti attho. **Athā**ti tamhi kāle. **Jighacchādubbalyaparetā**ti jighacchāya ca dubbalyena ca paretā phuṭṭhā anugatā ca aṭṭhapi dasapi divasāni. Tattha keci jighacchitāpi na dubbalā honti, sakkonti jighaccham sahitum. Ime pana na tādisāti dassatum ubhayamāha. **Tyāhanti** te aham. **Sace ākaṅkhathā**ti yadi icchatha.

Appahariteti apparuḥharite, yasmim ṭhāne piṇḍapātajjhottharaṇena vinassanadhammāni tiṇāni natthi, tasminti attho. Tena nittiṇaṃ ca mahātiṇagahaṇaṃ ca, yattha sakatenapi chaḍḍite piṇḍapāte tiṇāni na vinassanti, taṃ ca ṭhānaṃ pariggahitaṃ hoti. Bhūtagāmasikkhāpadassa hi avikopanatthametaṃ vuttaṃ.

Appāṇaketi nippāṇake piṇḍapātajjhottharaṇena maritabbapāṇakarāhite vā mahā-udakakkhandhe. Parittodake eva hi bhattapakkehena ālulite sukhumapāṇakā maranti, na mahātaḷākādīsūti. Pāṇakānurakkhaṇatthaṅhi etaṃ vuttaṃ. **Opilāpessāmī**ti nimujjāpessāmi.

Tatrekassāti tesu dvīsu ekassa. Yo imaṃ dhammadesanaṃ suṭṭhu sutavā punappunaṃ āvajjeti ca, taṃ sandhāyāha **vuttaṃ kho panetanti**. Ayaṃ **vuttasaddo** kesohāraṇepi dissati “kāpaṭiko māṇavo daharo vuttasiro”ti-ādīsū¹. Ropitepi “yathā sārādikāṃ bījaṃ, khetto vuttaṃ virūhati”ti-ādīsū². Kathitepi “vuttamidaṃ Bhagavatā, vuttamidaṃ arahatā”ti-ādīsū. Idha pana kathite daṭṭhabbo. Kathitaṃ kho panetanti ayaṅhissa attho. **Āmisaññataranti** catunnaṃ paccayāmisānaṃ aññataraṃ, ekanti attho. **Yadidanti** nipāto, sabbaliṅgavibhattivacanesu tādisova tattha tattha atthato pariṇāmetabbo. Idha paṇāssa yo esoti attho. Yo eso piṇḍapāto nāma. Idaṃ āmisaññataranti vuttaṃ hoti. **Yarīnūnāhanti** sādhu vatāhaṃ. **Evanti** yathā idāni imaṃ khaṇaṃ vītināmemi, evameva rattindivaṃ. **Vītināmeyyanti** khepeyyaṃ ativattāpeyyaṃ.

So taṃ piṇḍapātanti so taṃ sadevakena lokena sirasā sampaṭicchitabarūpaṃ Sugatātirittampi piṇḍapātaṃ abhuñjitvā dhammadāyādabhāvaṃ

1. Ma 2. 380 piṭṭhe.

2. Khu 5. 75 piṭṭhe.

ākaṅkhamāno ādittasīsūpamaṃ paccavekkhitvā teneva jighacchādubbalyena evaṃ taṃ rattindivaṃ vītināmeyya.

Atha dutiyassāti imasmim̐ pana vāre esa saṅkhepo, sace so bhikkhu yaṃnūnāhaṃ -pa- vītināmeyyanti cintento evampi cinteyya, pabbajitena kho vālamigākule araṅṅe bhesajjaṃ viya pañcakāmaguṇavālākule gāme piṇḍapātopi dukkhaṃ pariyesitūṃ. Ayaṃ pana piṇḍapāto itipariyesanādīnavavimutto ca Sugatātiritto cāti ubhato sujātakhattiyakumāro viya hoti, yehi ca pañcahi kāraṇehi piṇḍapāto na paribhuñjitabbo hoti. Seyyathidaṃ, puggalaṃ garahitvā na paribhuñjitabbo hoti “alajjipuggalassa santako”ti. Aparisuddha-uppattitāya na paribhuñjitabbo hoti “bhikkhuniparipācana-asantasambhāvanuppanno”ti. Sāmikānukampāya na paribhuñjitabbo hoti “piṇḍapātasāmiko bhikkhu jighacchito”ti. So dhāto tasseva antevāsikādīsū anukampāya na paribhuñjitabbo hoti “antevāsikā aṅṅe vā tappaṭibaddhā jighacchitā”ti, tepi dhātā suhitā, Api ca kho assaddhatāya na paribhuñjitabbo hoti “piṇḍapātasāmiko bhikkhu assaddho”ti. Tehi ca kāraṇehi ayaṃ vimutto. Bhagavā hi lajjīnaṃ aggo, parisuddhuppattiko piṇḍapāto, Bhagavā ca dhāto suhito, paccāsīsakopi aṅṅo puggalo natthi, ye loke saddhā, Bhagavā tesam̐ aggoti evaṃ cintetvā ca so taṃ piṇḍapātaṃ bhuñjitvā -pa- vītināmeyya. Ettāvataṃ yopi abhuñjitvā samaṇadhammaṃ karoti, sopi bhuñjitabbameva piṇḍapātaṃ na bhutto hoti, yopi bhuñjitvā samaṇadhammaṃ karoti, sopi bhuñjitabbameva bhutto hoti. Natthi piṇḍapāte viseso. Puggale pana atthi viseso. Tasmā taṃ dassento **kiñcāpi** soti-ādimāha.

Tattha **kiñcāpī**ti anujānanappasamsanatto nipāto. Kim̐ anujānāti? Tassa bhikkhuno taṃ anavajjaparibhogaṃ. Kim̐ pasamsati? Bhutvā samaṇadhammakaraṇaṃ. Idaṃ vuttaṃ hoti, yadipi so bhikkhu evaṃ bhuñjitabbameva bhuñjitvā kātabbameva kareyya. **Atha kho asuyeva me purimo bhikkhū**ti yo purimo bhikkhu tampi piṇḍapātaṃ paṭikkhipitvā samaṇadhammaṃ karoti, soyeva mama dvīsū sūresu sūratāro viya dvīsū paṇḍitesu paṇḍitataro viya ca

pujjataro ca pāsāmsataro ca, dutiyabhikkhuto atirekena pūjanīyo ca pasāmsanīyo cāti vuttaṃ hoti.

Idāni tamatthaṃ kāraṇena sādiento **taṃ kissa hetūti-ādimāha.** Tassattho, tatha siyā tumhākaṃ, kasmā so bhikkhu Bhagavato pujjataro ca pāsāmsataro cāti, **tañhi tassāti** yasmā taṃ piṇḍapātaṭṭhapanāṃ tassa bhikkhuno dīgharattaṃ appicchatāya -pa- vīriyārambhāya saṃvattissati. Kathaṃ? Tassa hi sace aparena samayena paccayesu atricchatā vā pāpicchatā vā mahicchatā vā uppajjissati. Tato naṃ iminā piṇḍapātaṭṭhapanākusena nivāressati “are tvaṃ Sugatātirittampi piṇḍapātaṃ ṭṭhapanākusena nivāressati”ti evaṃ paccavekkhamāno. Esa nayo asantuṭṭhiyā asallekhassa cuppannassa nivāraṇe. Evaṃ tāvassa appicchatāya santuṭṭhiyā saṃlekhāya saṃvattissati.

Subharatāyāti ettha ayaṃ saṃvaṇṇanā, idhekacco attanopi upaṭṭhākānampi dubbharo hoti dupposo. Ekacco attanopi upaṭṭhākānampi subharo hoti suposo. Kathaṃ? Yo hi ambilādīni laddhā anambilādīni pariyesati, aññassa ghare laddhaṃ aññassa ghare chaḍḍento sabbaṃ gāmaṃ vicarivā rittapattova vihāraṃ pavisitvā nipajjati, ayaṃ attano dubbharo. Yo pana sālīmaṃsodanādīnaṃ patte pūretvā dinnepi dummukhabhāvaṃ anattamanabhāvameva ca dasseti, tesāṃ vā sammukhāva taṃ piṇḍapātaṃ “kiṃ tumhehi dinnan”ti apasādentō sāmaṇeragahaṭṭhādīnampi deti, ayaṃ upaṭṭhākānaṃ dubbharo. Etaṃ disvā manussā dūrato parivajjanti “dubbharo bhikkhu na sakkā positun”ti. Yo pana yaṃkiñci lūkhaṃ vā paṇītaṃ vā laddhā tuṭṭhacittova bhuñjitvā vihāraṃ gantvā attano kammaṃ karoti, ayaṃ attano subharo. Yo ca paresampi appaṃ vā bahū vā lūkhaṃ vā paṇītaṃ vā dānaṃ ahīletvā attamano vippasannamukho hutvā tesāṃ sammukhāva paribhuñjitvā yāti, ayaṃ upaṭṭhākānaṃ subharo. Etaṃ disvā manussā ativiya vissatthā honti, “amhākaṃ bhadanto subharo thokenapi tussati, mayameva naṃ posissāmā”ti paṭiññaṃ katvā posenti.

Tatha sace aparena samayena assa attano vā upaṭṭhākānaṃ vā dubbharatānayaena cittaṃ uppajjissati. Tato naṃ iminā piṇḍapātaṭṭhapanākusena nivāressati “are tvaṃ Sugatātirittampi piṇḍapātaṃ ṭṭhapanākusena nivāressati”ti evaṃ paccavekkhamāno. Esa nayo asantuṭṭhiyā asallekhassa cuppannassa nivāraṇe. Evaṃ tāvassa appicchatāya santuṭṭhiyā saṃlekhāya saṃvattissati.

īdisaṃ cittaṃ uppādesī”ti evaṃ paccavekkhamāno, evamassa subharatāya saṃvattissati. Sace paṇassa kosajjaṃ uppajjissati, tampi etenevaṅkusena nivāressati “are tvaṃ nāma tadā Sugatātirittampi piṇḍapātaṃ paṭikkhipitvā tathā jighacchādubbalyaparetopi samaṇadhammaṃ katvā ajja kosajjamanuyuñjasi”ti evaṃ paccavekkhamāno, evamassa vīriyārambhāya saṃvattissati. Evamassa idaṃ piṇḍapātapaṭikkhipanaṃ dīgharattaṃ appicchatāya -pa- vīriyārambhāya saṃvattissati. Evamassime pañca guṇā paripūrā dasa kathāvatthūni paripūressanti.

Kathaṃ? Atra hi Pāḷiyaṃyeva appicchatāsantuṭṭhitāvīriyārambhavasena tīṇi āgatāni, sesāni sallekhena saṅgahitāni, idaṃ hi sabbakathāvatthūnaṃ nāmameva, yadidaṃ sallekho. Yathāha “yā ca kho ayaṃ Ānanda kathā abhisallekhikā cetovinīvaraṇasappāyā¹ ekantanibbidāya virāgāya nirodhāya upasamāya abhiññāya sambodhāya nibbānāya saṃvattati. Seyyathidaṃ, appicchakathā”ti² vitthāro. Evaṃ ime pañca guṇā paripūrā dasa kathāvatthūni paripūressanti. Dasa kathāvatthūni paripūrāni tisso sikkhā paripūressanti.

Kathaṃ? Etesu hi appicchakathā santosakathā asaṃsaggakathā sīlakathāti imā catasso kathā adhisīlasikkhāsaṅgahitāyeva. Pavivekakathā vīriyārambhakathā samādhikathāti imā tisso adhiccitasikkhāsaṅgahitā. Paññākathā vimuttikathā vimuttiñāṇadassanakathāti imā tisso adhipaññāsikkhāsaṅgahitāti. Evaṃ dasa kathāvatthūni paripūrāni tisso sikkhā paripūressanti. Tisso sikkhā paripūrā pañca asekkhadhammakhandhe paripūressanti.

Kathaṃ? Paripūrā hi adhisīlasikkhā asekkho sīlakkhandhoyeva hoti, adhiccitasikkhā asekkho samādhikkhandho, adhipaññāsikkhā asekkhā paññāvimuttivimuttiñāṇadassanakhandhā evāti evaṃ tisso sikkhā paripūrā pañca asekkhadhammakhandhe paripūressanti. Pañca dhammakhandhā paripūrā amataṃ nibbānaṃ paripūressanti. Seyyathāpi uparipabbate pāvussako mahāmegho

1. Cetovivaraṇasappāyā (Ka)

2. Ma 3. 155. 157 piṭṭhesu.

abhivuṭṭho pabbatakandarasarasākhā paripūreti. Tā paripūrā kusobbhe, kusobbhā mahāsobbhe, mahāsobbhā kunnadiyo, kunnadiyo mahānadiyo, mahānadiyo mahāsamuddasāgaram paripūrenti, evameva tassa bhikkhuno ime pañca guṇā paripūrā dasa kathāvatthūni ādim katvā yāva amatam nibbānam paripūressanti. Evamayam bhikkhu dhammadāyādapaṭipadam paṭipanno paramadhammadāyādam labhatīti etamattham sampassamāno Bhagavā “tam kissa hetu, tañhi tassa bhikkhave bhikkhuno”ti-ādimāha.

Evam tassa bhikkhuno pujjatarapāsamsatarabhāvam kāraṇena sādhetvā idāni te bhikkhū tathattāya sanniyojento **tasmātiha me bhikkhaveli**-ādimāha. Kim vuttam hoti, yasmā yo tam piṇḍapātam bhuñjivā samaṇadhammam kareyya, so imehi pañcahi mūlaguṇehi paribāhiro. Yo pana abhuñjivā kareyya, so imesam bhāgī hoti “tasmātiha me bhikkhave -pa- no āmisadāyādā”ti.

Idamavoca Bhagavāti idam nidānapariyosānato pabhuti yāva no āmisadāyādāti suttappadesam Bhagavā avoca. **Idam vatvāna Sugatoti** idaṇca suttappadesam vatvāva² sobhanāya paṭipadāya gatattā **Sugatoti** saṅkham pattoyeva Bhagavā. **Uṭṭhāyāsanā vihāram pāvisīti** paññattavarabuddhāsanato uṭṭahitvā vihāram attano Mahāgandhakuṭim pāvisi asambhinnāya eva parisāya, kasmā? Dhammathomanattham.

Buddhā kira apariniṭṭhitāya desanāya vihāram pavisantā dvīhi kāraṇehi pavisanti puggalathomanattham vā dhammathomanattham vā. Puggalathomanattham pavisanto evam cintesi “imam mayā saṅkhittena uddesam uddiṭṭham, vitthārena avibhattam, dhammapaṭiggāhakā bhikkhū uggahetvā Ānandam vā Kaccānam vā upasaṅkamitvā pucchissanti, te mayham nāṇena saṁsandetvā kathessanti³, tato dhammapaṭiggāhakā puna mam pucchissanti, tesam aham sukathitam bhikkhave Ānandena, sukathitam Kaccānena, mam cepi tumhe etamattham puccheyyātha, ahampi nam evameva byākareyyanti evam te puggale thomessāmi, tato tesu gāravam janetvā bhikkhū upasaṅkamissanti, tepi bhikkhū atthe ca dhamme

1. Pabbatakandarapadarasākhā (Sī, Syā) 2. Vatvā ca (Ka) 3. Vissajjessanti (Sī)

ca niyojessanti, te tehi niyojitā tisso sikkhā paripūrentā dukkhassantaṃ karissanti”ti.

Dhammathomanatthaṃ pavisanto evaṃ cintesi, yathā idheva cintesi “mayi vihāraṃ pavitṭhe tameva āmisadāyādaṃ garahanto dhammadāyādaṃ ca thomento imissaṃyeva parisati nisinno Sāriputto dhammaṃ desessati, evaṃ dvinnampi amhākaṃ ekajjhāsayaṃ matiyā desitā ayaṃ desanā aggā ca garukā ca bhavissati pāsāṇacchattasadisā. Caturghanittharaṇaṭṭhena titthe ṭhapitā nāvā viya maggagamanaṭṭhena catuyutta-ājaññaratho viya ca bhavissati. Yathā ca ‘evaṃ karontassa ayaṃ daṇḍo’ti parisati āṇaṃ ṭhapetvā uṭṭhāyāsanaṃ pāsādaṃ āruḷhe rājini tattheva nisinno senāpati taṃ raññā ṭhapitaṃ āṇaṃ pavatteti, evampi mayā ṭhapitaṃ desanaṃ imissaṃyeva parisati nisinno Sāriputto thometvā desessati, evaṃ dvinnampi amhākaṃ matiyā desitā ayaṃ desanā balavatarā majjhanhikasūriyo viya pajjalissati”ti, evaṃ idha dhammathomanatthaṃ uṭṭhāyāsanaṃ vihāraṃ pāvisi.

Īdisesu ca ṭhānesu Bhagavā nisinnāsaneyeva antarahito cittaḡatiyā vihāraṃ pavisatīti veditabbo. Yadi hi kāyagatiyā gaccheyya, sabbā parisā Bhagavantaṃ parivāretvā gaccheyya, sā ekavāraṃ bhinnā puna dussannipātā bhavēyyāti Bhagavā cittaḡatiyā eva pāvisi.

31. Evaṃ pavitṭhe pana Bhagavati Bhagavato adhippāyānurūpaṃ taṃ dhammaṃ thometukāmo **tatra kho āyasmā Sāriputto -pa- etadavoca.** Tattha **āyasmāti** piyavacanametam. **Sāriputtoti** tassa therassa nāmaṃ, tañca kho mātito, na pitito. Rūpasāriyā hi brāhmaṇiyā so putto, tasmā Sāriputtoti vuccati. **Acirapakkantassāti** pakkantassa sato nacirena. **Āvuso bhikkhaveti** ettha pana Buddhā Bhagavanto sāvake ālapantā bhikkhaveti ālapanti. Sāvakā pana Buddhehi sadisā mā homāti āvusoti paṭhamaṃ vatvā pacchā bhikkhaveti bhaṇanti. Buddhehi ca ālapito bhikkhusaṃgho bhadanteti paṭivacanaṃ deti, sāvakehi āvusoti.

Kittāvatā nu kho āvusoti ettha **kittāvatā**ti paricchedavacanam, kittakenāti vuttam hoti. **Nukāro** pucchāyam. **Khokāro** nipātamattam. **Satthu pavivittassa viharatoti** tīhi vivekehi kāyacitta-upadhivivekehi Satthuno viharantassa. **Vivekam nānusikkhantī**ti tiṇṇam vivekānam aññatarampi nānusikkhanti, āmisadāyādāva hontīti imamattham āyasmā Sāriputto bhikkhū pucchi. Esa nayo sukkapakkhepi.

Evam vutte tamattham sotukāmā bhikkhū **duratopi khoti**-ādimāhamso. Tattha **dūratopī**ti tiroraṭṭhatopi tirojanapadatopi anekayojanagaṇanatopīti vuttam hoti. **Santiketi** samīpe. **Aññātunti** jānitum bujjhitum. **Āyasmantaṃyeva Sāriputtam paṭibhātū**ti āyasmatoyeva Sāriputtassa bhāgo hotu, āyasmā pana Sāriputto attano bhāgam katvā vibhajatūti vuttam hoti. Āyasmato hi bhāgo yadidam atthakkhānam, amhākam pana savanam bhāgoti ayamettha adhippāyo, evam saddalakkhaṇena sameti. Keci pana bhaṇanti “paṭibhātūti dissatū”ti. Apare “upaṭṭhātū”ti. **Dhāressantī**ti uggahessanti pariyāpuṇissanti. Tato nesam kathetukāmo thero **tena hīti**-ādimāha. Tattha **tenā**ti kāraṇavacanam. **Hikāro** nipāto. Yasmā sotukāmāttha, yasmā ca mayham bhāram āropayittha, tasmā suṇāthāti vuttam hoti. Tepi bhikkhū therassa vacanam sampañcchimsu, tenāha “evamāvusoti -pa-paccassosun”ti.

Atha nesam āmisadāyādānam garahantena Bhagavatā “tumhepi tena ādiyā bhaveyyāthā”ti ekenevākārena vuttamattham tīhi ākārehi dassento āyasmā Sāriputto etadavoca “idhāvuso Satthu pavivittassa viharato -pa-. Ettāvatā kho āvuso Satthu pavivittassa viharato sāvakā vivekam nānusikkhantī”ti.

Ettāvatā yañca Bhagavā āmisadāyādapaṭipadam garahanto “tumhepi tena ādiyā bhaveyyāthā”ti āha, yañca attanā puccham pucchi “kittāvatā nu kho -pa- nānusikkhantī”ti, tassa vitthārato attho suvibhatto hoti. So ca kho Bhagavato ādiyabhāvam anāmasitvāva. Bhagavatoyeva hi yuttam sāvake anuggaṇhantassa

“ahampi tena ādiyo bhavissāmī”ti vattum, na sāvakānaṃ. Esa nayo sukkapakkehi, ayaṃ tāvettha anusandhikkamayojanā.

Ayaṃ panatthavaṇṇanā. **Idhāti** imasmim̄ sāsane, **Satthu pavivittassāti** Satthuno tīhi vivekehi accantapavivittassa. **Vivekaṃ nānusikkhantīti** kāyavivekaṃ nānusikkhanti, na paripūrentīti vuttaṃ hoti. Yadi pana tividhaṃ vivekaṃ sandhāya vadeyya, pucchāya aviseso siyā, byākaraṇapakkho hi ayaṃ. Tasmā iminā padena kāyavivekaṃ, “yesañca dhammānaṃ”ti-ādinā cittavivekaṃ, “bāhulikā”ti-ādinā upadhivivekañca dassesīti evamettha saṅkhepato attho veditabbo.

Yesañca dhammānanti lobhādayo sandhāyāha, ye parato “tatrāvuso lobho ca pāpako”ti-ādinā nayena vakkhati. **Nappajahantīti** na pariccajanti, cittavivekaṃ na paripūrentīti vuttaṃ hoti. **Bāhulikāti** cīvarādibāhullāya paṭipannā. Sāsanaṃ sithilaṃ gaṇhantīti **sāthalikā**. **Okkamane pubbaṅgamāti** ettha **okkamaṇaṃ** vuccanti avagamaṇaṭṭhena pañca nīvaraṇāni, tena pañcanīvaraṇapubbaṅgamāti vuttaṃ hoti. **Paviveketi** upadhiviveke nibbāne. **Nikkhattadhurāti** oropitadhurā, tadadhigamāya ārambhampi akurumānāti, ettāvataṃ upadhivivekaṃ na paripūrentīti vuttaṃ hoti.

Ettāvataṃ aniyameneva vatvā idāni desanaṃ niyamento “tatrāvuso”ti-ādimāha. Kasmā? Sāvakā “tīhi ṭhānehī”ti evañhi aniyametvāva vuccamāne “kampi maññe¹ bhaṇati, na amhe”ti udāsīnāpi honti. “Therā navā majjhimā”ti evaṃ pana niyametvā vuccamāne amhe bhaṇatīti ādaraṃ karonti. Yathā rañña² “amaccehi nagaravīthiyo sodhetabbā”ti vuttepi “kena nu kho sodhetabbā”ti maññamānā na sodhenti, attano attano gharadvāraṃ sodhetabbanti pana bheriyā nikkhantāya sabbe muhuttana sodhenti ca alaṅkaronti ca, evaṃsampadamidaṃ veditabbaṃ.

Tattha **tatrāti** tesu sāvakesu. **Therāti** dasa vasse upādāya vuccanti. **Tīhi ṭhānehīti** tīhi kāraṇehi. Ayañhi ṭhānasaddo issariyaṭṭhitikhaṇakāraṇesu dissati. “Kim paṇāyasmā Devānamindo kammaṃ

1. Tampi aññe (Ka)

2. Rañño (Ka Sī)

katvā imaṃ ṭhānaṃ patto”ti-ādīsu hi issariye dissati. “Ṭhānakusalo hoti akkhaṇavedhī”ti-ādīsu ṭhitiyaṃ. “Ṭhānasovetaṃ Tathāgataṃ paṭibhātī”ti-ādīsu¹ khaṇe. “Ṭhānañca ṭhānato aṭṭhānañca aṭṭhānato”ti-ādīsu² kāraṇe. Idha pana kāraṇeyeva. Kāraṇaṃhi yasmā tattha phalaṃ tiṭṭhati tadāyattavuttibhāvena, tasmā ṭhānanti vuccati.

Iminā paṭhamena ṭhānena therā bhikkhū gārayhāti ettha gārayhāti garahitabbā. **Therā** nāma samānā araṇṇavanapatthāni pantāni senāsanāni na upenti, gāmantasenāsanānaṃ na muñcanti, saṅgaṇikārāmataṃ vaḍḍhentā viharanti, kāyavivekampi na paripūrenti, navamajjhimakāle kīdisā ahesunti evaṃ ninditabbā honti, imaṃ nindaṃ āvuso labhantīti dasseti. **Dutiyena ṭhānenāti** etthāpi ime nāma āvuso therāpi samānā yesaṃ dhammānaṃ Satthā pahānamāha, te lobhādiddhamme na jahanti, accharāsaṅghātamatampī ekamantaṃ nisīditvā cittekaggataṃ na labhanti, navamajjhimakāle kīdisā ahesunti evaṃ ninditabbā honti, imaṃ nindaṃ āvuso labhantīti dassetīti evaṃ yojanā kātabbā. **Tatīyena ṭhānenāti** etthāpi ime nāma āvuso therāpi samānā itarītarena na yāpenti, cīvara patta senāsana pūtikāyamaṇḍanānuyogamanuyuttā viharanti upadhivivekaṃ apūrayamānā, navamajjhimakāle kīdisā ahesunti evaṃ ninditabbā honti, imaṃ nindaṃ āvuso labhantīti dassetīti evaṃ yojanā veditabbā. Esa nayo majjhimanavavāresu.

Ayaṃ pana viseso. **Majjhimāti** pañca vasse upādāya yāva nava vassā vuccanti. **Navāti** ūnapañcavassā vuccanti. Yathā ca tattha navamajjhimakāle kīdisā ahesunti vuttaṃ, evamidha navakāle kīdisā ahesuṃ, therakāle kīdisā bhavissanti, majjhimatherakāle kīdisā bhavissantīti vatvā yojetabbā.

32. Imasmim ca kaṇhapakkhe vuttapaccanīkanayena sukkapakkhe attho veditabbo. Ayaṃ panettha saṅkhepo, ime vata therāpi samānā yojanaparamparāya araṇṇavanapatthāni pantāni senāsanāni sevanti, gāmantasenāsanānaṃ upagantuṃ yuttakālepi na upagacchanti, evaṃ jīṇṇasarīrāpi

1. Ma 2. 58 piṭṭhe.

2. Abhi 2. 348 piṭṭhe; Ma 1. 99 piṭṭhe ca.

āraddhavīriyā paccayadāyakānaṃ pasādaṃ janenti, navamajjhimakāle kīdisā ahesunti iminā paṭhamena ṭhānena therā pāsamsā bhavanti, pasamsaṃ labhanti. Lobhādayo pahāya cittavivekaṃ pūrenti, ayampi mahāthero saddhivihārika-antevāsikaparivārīto hutvā nisīdituṃ yuttakālepi īdisepi vaye vattamāne bhattakiccaṃ katvā pavīṭṭho sāyaṃ nikkhamati, sāyaṃ pavīṭṭho pāto nikkhamati, kasiṇaparikkammaṃ karoti, samāpattiyo nibbatteti, maggaphalāni adhigacchati, sabbathāpi cittavivekaṃ pūretīti iminā dutiyena ṭhānena therā bhikkhū pāsamsā bhavanti, pasamsaṃ labhanti. Yasmiṃ kāle therassa paṭṭadukūlakoseyyādīni¹ sukhasamphassāni lahucīvarādīni yuttāni, tasmimpi nāma kāle ayaṃ mahāthero paṃsukūlāni dhāreti, asithilaṃ sāsanaṃ gahetvā vigatanīvaraṇo phalasaṃpattim appetvā upadhivivekaṃ paripūrayamāno viharati, navamajjhimakāle kīdiso ahoṣīti iminā tatiyena ṭhānena therā pāsamsā bhavanti, pasamsaṃ labhantīti. Esa nayo majjhimanavavāresu.

33. **Tatrāvusoti** ko anusandhi, evaṃ navahākārehi āmisadāyādapaṭipadaṃ garahanto, navahi dhammadāyādapaṭipadaṃ thomento, aṭṭhārasahākārehi desanaṃ niṭṭhāpetvā, ye te “yesaṃ ca dhammānaṃ Satthā pahānaṃ āha, te ca dhamme na pajahantī”ti evaṃ pahātabbadhammā vuttā, te sarūpato “ime te”ti dassetuṃ idaṃ “tatrāvuso lobho cā”ti-ādīmāha, ayaṃ anusandhi.

Api ca heṭṭhā pariyāyeneva dhammo kathito. Āmisaṃ pana pariyāyenapi nipariyāyenapi kathitaṃ. Idāni nipariyāyadhammaṃ lokuttaramaggaṃ kathetuṃ idamāha. Ayampettha anusandhi.

Tattha **tatrāti** atītadesanānidassanaṃ, “Satthu pavivittassa viharato sāvakā vivekaṃ nānusikkhantī”ti-ādīnā nayena vuttadesanāyanti vuttaṃ hoti. **Lobho ca pāpako doso ca pāpakoti** ime dve dhammā pāpakā lāmakā, ime pahātabbāti dasseti. Tattha lubbhanalakkhaṇo **lobho**. Dussanalakkhaṇo **doso**. Tesu lobho āmisadāyādassa paccayānaṃ lābhe hoti, doso alābhe.

1. Paṭṭunnadukūlakoseyyādīni (Ka)

lobhena aladdhaṃ pattheti, dosena alabhanto vighātavā hoti. Lobho ca deyyadhamme hoti, doso adāyake vā amanuññadāyake vā. Lobhena navataṅhāmūlake dhamme paripūreti, dosena pañca macchariyāni.

Idāni nesaṃ pahānupāyaṃ dassento **lobhassa ca pahānāyā**ti-ādimāha. Tassattho, tassa pana pāpakassa lobhassa ca dosassa ca pahānāya. **Atthi majjhimā paṭipadā**ti maggaṃ sandhāya idaṃ vuttaṃ. Maggo hi lobho eko anto, doso eko antoti ete dve ante na upeti na upagacchati, vimutto etehi antehi, tasmā “majjhimā paṭipadā”ti vuccati. Etesaṃ majjhe bhavattā **majjhimā**, paṭipajjitabbato ca **paṭipadā**ti. Tathā kāmasukhallikānuyogo eko anto, attakilamathānuyogo eko anto, sassataṃ eko anto, ucchedo eko antoti purimanayeneva vitthāretabbaṃ.

Cakkhukaraṇīti-ādīhi pana tameva paṭipadaṃ thometi. Sāhi saccānaṃ dassanāya saṃvattati dassanapariṇāyakaṭṭhenāti **cakkhukaraṇī**. Saccānaṃ ñāṇāya saṃvattati viditakaraṇaṭṭhenāti **ñāṇakaraṇī**. Rāgādīnaṃ ca vūpasamanato **upasamāya saṃvattati**¹. Catunnampi saccānaṃ abhiññeyyabhāvadassanato **abhiññāya saṃvattati**. **Sambodhoti** maggo, tassatthāya saṃvattanato **sambodhāya saṃvattati**. Maggoyeva hi maggatthāya saṃvattati maggena kātabbakiccakaraṇato. ²**Nibbānaṃ** nāma appaccayaṃ, tassa² pana sacchikiriyāya paccakkhakammāya saṃvattanato **nibbānāya saṃvattati**ti vuccati, ayamettha sāro. Ito aññathā vaṇṇanā papañcā.

Idāni taṃ majjhimapāṭipadaṃ sarūpato dassetukāmo “katamā ca sā”ti pucchitvā “ayamevā”ti-ādinā nayena vissajjeti.

Tattha **ayamevā**ti avadhāraṇavacanāṃ, aññamaggappaṭisedhanatthaṃ, Buddhapaccekabuddhabuddhasāvakanāṃ sādharmaṇabhāvadassanatthaṃ ca. Vuttaṃ cetāṃ “eseva maggo natthañño, dassanassa visuddhiyā”ti³. Svāyaṃ kilesānaṃ ārakattāpi **ariyo**. Aripahānāya saṃvattatītipi ariyena desitotipi ariyabhāvappaṭilābhāya saṃvattatītipi ariyo. Aṭṭhahi aṅgehi

1. Saṃvattati nāma (Syā, Ka) 2-2. Nibbānāmatassa (Sī) 3. Khu 1. 52 piṭṭhe.

upetattā **aṭṭhaṅgiko**, na ca aṅgavinimutto pañcaṅgikatūriyādīni viya, kilese mārento gacchati, maggati vā nibbānaṃ, maggīyati vā nibbānatthikehi, gammati vā tehi paṭipajjīyatīti **maggo**. **Seyyathidanti** nipāto, tassa katamo so iti ceti attho, katamāni vā tāni aṭṭhaṅgānīti. Ekamekañhi aṅgaṃ maggoyeva. Yathāha “sammādiṭṭhi maggo ceva hetu cā”¹. Porāṇāpi bhaṇanti “dassanamaggo sammādiṭṭhi, abhiniropanamaggo sammāsaṅkappo -pa-avikkhepamaggo sammāsamādhī”²ti.

Sammādiṭṭhādīsu cetesu sammā dassanalakkhaṇā **sammādiṭṭhi**. Sammā abhiniropanalakkhaṇo **sammāsaṅkappo**. Sammā pariggahalakkhaṇā **sammāvācā**. Sammā samuṭṭhānalakkhaṇo **sammākammanto**. Sammā vodānalakkhaṇo **sammā-ājīvo**. Sammā paggahalakkhaṇo **sammāvāyāmo**. Sammā upaṭṭhānalakkhaṇā **sammāsaṭi**. Sammā samādhānalakkhaṇo **sammāsamādhī**. Nibbacanampi nesaṃ sammā passatīti **sammādiṭṭhī**ti eteneva nayena veditabbaṃ.

Tattha sammādiṭṭhi uppajjamānā micchādiṭṭhiṃ tappaccanīyakilese² ca avijjaṃ ca pajahati, nibbānañca ārammaṇaṃ karoti, sampayuttadhamme ca passati, te ca kho asammohato, no ārammaṇato, tasmā “sammādiṭṭhī”²ti vuccati.

Sammāsaṅkappo micchāsaṅkappaṃ tappaccanīyakilese ca pajahati, nibbānañca ārammaṇaṃ karoti, sampayuttadhamme ca sammā abhiniropeti, tasmā “sammāsaṅkappo”²ti vuccati.

Sammāvācā micchāvācaṃ tappaccanīyakilese ca pajahati, nibbānañca ārammaṇaṃ karoti, sampayuttadhamme ca sammā pariggaṇhāti, tasmā “sammāvācā”²ti vuccati.

Sammākammanto micchākammantaṃ tappaccanīyakilese ca pajahati, nibbānañca ārammaṇaṃ karoti, sampayuttadhamme ca sammā samuṭṭhāpeti, tasmā “sammākammanto”²ti vuccati.

1. Abhi 1. 212 piṭṭhe.

2. Tappaccanīkakilese (Syā)

Sammā-ājīvo micchā-ājīvaṃ tappaccanīyakilese ca pajahati, nibbānañca ārammaṇaṃ karoti, sampayuttadhamme ca sammā vodāpeti, tasmā “sammā-ājīvo”ti vuccati.

Sammāvāyāmo micchāvāyāmaṃ tappaccanīyakilese ca kosajjaṃ ca pajahati, nibbānañca ārammaṇaṃ karoti, sampayuttadhamme ca sammā paggaṇhāti, tasmā “sammāvāyāmo”ti vuccati.

Sammāsati micchāsatiṃ tappaccanīyakilese ca pajahati, nibbānañca ārammaṇaṃ karoti, sampayuttadhamme ca sammā upaṭṭhāpeti, tasmā “sammāsati”ti vuccati.

Sammāsamādhi micchāsamādhiṃ tappaccanīyakilese ca uddhaccaṃ ca pajahati, nibbānañca ārammaṇaṃ karoti, sampayuttadhamme ca sammā samādhiyati, tasmā “sammāsamādhi”ti vuccati.

Idāni **ayaṃ kho sā āvusoti** tameva paṭipadaṃ nigamento āha. Tassattho, yvāyaṃ cattāropi lokuttaramagge ekato katvā kathito aṭṭhaṅgiko maggo, ayaṃ kho sā āvuso -pa- nibbānāya saṃvattatīti.

Evaṃ pahātabbadhammesu lobhadose tappahānupāyaṃ ca dassetvā idāni aññepi pahātabbadhamme tesāṃ pahānupāyaṃ ca dassento **tatrāvuso kodho cāti-ādimāha**. Tattha kujjhanalakkhaṇo **kodho**, caṇḍikkalakkhaṇo vā, āghātakaraṇaraso, dussanapaccupaṭṭhāno. Upanandhanalakkhaṇo **upanāho**, vera-appaṭinissajjanaraso, koddhānupabandhabhāvapaccupaṭṭhāno. Vuttaṃ cetāṃ “pubbakāle kodho, aparakāle upanāho”ti-ādi¹.

Paraguṇamakkhanalakkhaṇo **makkho**, tesāṃ vināsanaraso, tadavacchādanapaccupaṭṭhāno. Yugaggāhalakkhaṇo **paḷāso**, paragūṇehi attano guṇānaṃ samīkaraṇaraso, paresāṃ guṇappamaṇena upaṭṭhānapaccupaṭṭhāno.

Parasampattikhīyanalakkhaṇā **issā**, tassā akkhamanalakkhaṇā vā, tattha anabhiratirasā, tato vimukhabhāvapaccupaṭṭhānā. Attano

1. Abhi 2. 371 piṭṭhe.

sampattinigūhanalakkhaṇaṃ **maccheraṃ**, attano sampattiyā parehi sādharmaṇabhāva-asukhāyanarasaṃ, saṅkocanapaccupaṭṭhānaṃ.

Katapāpapaṭicchādanalakkhaṇā **māyā**, tassa nigūhanarasaṃ, tadāvaraṇapaccupaṭṭhānā. Attano avijjamānaguṇapakāsanalakkhaṇaṃ **sāṭheyyaṃ**, tesāṃ samudāharaṇarasaṃ, sarīrākārehipi tesāṃ vibhūtakaraṇapaccupaṭṭhānaṃ.

Cittassa uddhumātabhāvalakkhaṇo **thambho**, appatissayavuttiraso, amaddavatāpaccupaṭṭhāno. Karaṇuttariyalakkhaṇo **sārambho**, vipaccanikatāraso, agāravapaccupaṭṭhāno.

Uṇṇatilakkhaṇo **māno**, ahaṃkāraso, uddhumātabhāvapaccupaṭṭhāno. Abbhūṇṇatilakkhaṇo **atimāno**, ativiya ahaṃkāraso accuddhumātabhāvapaccupaṭṭhāno.

Mattabhāvalakkhaṇo **mado**, madaggāhaṇaraso, ummādapaccupaṭṭhāno. Pañcasu kāmaguṇesu cittavossaggalakkhaṇo **pamādo**, vossaggānuppadānaraso, sativippavāsapaccupaṭṭhānoti evaṃ imesaṃ dhammānaṃ lakkhaṇādīni veditabbāni. Ayamettha saṅkhepo, vitthāro pana “tattha katamo kodho”ti-ādinā Vibhaṅge¹ vuttanayeneva veditabbo.

Visesato cettha āmisadāyādo attanā alabhanto aññassa lābhino kujjhati, tassa sakim uppanno kodho **kodhoyeva**, tatuttari **upanāho**. So evaṃ kuddho upanayhanto ca santepi aññassa lābhino guṇe makkheti, ahampi tādisoti ca yugaggāhaṃ gaṇhāti, ayamassa makkho ca paḷāso ca, evaṃ makkhī paḷāsī tassa lābhasakkārādīsu kim imassa imināti issati padussati, ayamassa **issā**. Sace panassa kāci sampatti hoti, tassā tena sādharmaṇabhāvaṃ na sahati, idamassa **maccheraṃ**. Lābhahetu kho pana attano santepi dose paṭicchādeti, ayamassa **māyā**. Asantepi guṇe pakāseti, idamassa **sāṭheyyaṃ**. So evaṃ paṭipanno sace yathādhippāyaṃ lābhaṃ labhati, tena thaddho hoti amuducitto, nayidaṃ evaṃ kātābbanti ovadituṃ asakkuṇeyyo, ayamassa **thambho**. Sace pana naṃ koci kiñci vadati “nayidaṃ evaṃkātābban”ti, tena sāraddhacitto hoti bhākuṭīkamukho “ko

1. Abhi 2. 371 piṭṭhe.

me tvaṇ”ti pasayha bāṇī, ayamassa **sārambho**. Tato thambhena “ahameva seyyo”ti attānaṃ maññanto mānī hoti. Sārambhena “ke ime”ti pare atimaññanto atimānī, ayamassa **māno** ca **atimāno** ca. So tehi mānātimānehi jātimadādi-anekarūpaṃ madam janeti, matto samāno kāmaguṇādibhedesu vatthūsu pamajjati, ayamassa **mado** ca **pamādo** cāti.

Evam āmisadāyādo aparimutto hoti imehi pāpakehi dhammehi aññehi ca evarūpehi. Evam tāvattha pahātabbadhammā veditabbā. Pahānupāyo pāṭhato ca atthato ca sabbattha nibbisesoyeva.

Ñānaparicayapāṭavattam panettha ayaṃ bhedo ca kamo ca bhāvanānayo ca veditabbo. Tattha **bhedo** tāva, ayañhi majjhimā paṭipadā kadāci ariyo aṭṭhaṅgiko maggo hoti, kadāci sattaṅgiko. Ayañhi lokuttarapaṭhamajjhānavasena uppajjamāno aṭṭhaṅgiko maggo hoti, avasesajjhānavasena sattaṅgiko. Ukkaṭṭhaniddesato panidha aṭṭhaṅgikoti vutto. Ito parañhi maggaṅgaṃ natthi. Evam tāvettha bhedo veditabbo.

Yasmā pana sabbakusalānaṃ sammādiṭṭhi seṭṭhā, yathāha “paññā hi seṭṭhā kusalā vadantī”ti¹. Kusalavāre ca pubbaṅgamā, yathāha “kathaṇca bhikkhave sammādiṭṭhi pubbaṅgamā hoti, sammādiṭṭhiṃ sammādiṭṭhīti pajānāti, micchādiṭṭhiṃ micchādiṭṭhīti pajānāti”ti² vitthāro. Yathā cāha “vijjā ca kho bhikkhave pubbaṅgamā kusalānaṃ dhammānaṃ samāpattiyā”ti. Tappabhavābhinibbattāni sesaṅgāni, yathāha “sammādiṭṭhissa sammāsaṅkappo pahoti -pa- sammāsatisa sammāsamādhi pahoti”ti³. Tasmā iminā kamena etāni aṅgāni vuttānīti evamettha **kamo** veditabbo.

Bhāvanānayoti koci samathapubbaṅgaṃ vipassanaṃ bhāveti, koci vipassanāpubbaṅgaṃ samathaṃ. Kathaṃ? Idhekacco paṭhamam upacārasamādhiṃ vā appanāsamādhiṃ vā uppādeti, ayaṃ samatho, so tañca taṃsampayutte ca dhamme aniccādīhi vipassati, ayaṃ vipassanā. Iti paṭhamam samatho, pacchā vipassanā. Tena vuccati “samathapubbaṅgaṃ vipassanaṃ bhāveti”ti. Tassa samathapubbaṅgaṃ vipassanaṃ bhāvayato maggo sañjāyati, so taṃ maggaṃ

1. Khu 6. 10 piṭṭhe.

2. Ma 3. 116 piṭṭhe.

3. Ma 3. 120 piṭṭhe.

āsevati bhāveti bahulīkaroti, tassa taṃ maggaṃ āsevato bhāvayato bahulīkaroto saṃyojanāni pahīyanti, anusayā byantīhonti¹, evaṃ samathapubbaṅgamaṃ vipassanaṃ bhāveti.

Idha panekacco vuttappakāraṃ samathaṃ anuppādetvāva pañcupādānakkhandhe aniccādihi vipassati, ayaṃ vipassanā. Tassa vipassanāpāriyā tatha jātānaṃ dhammānaṃ vossaggārammaṇato uppajjati cittassa ekaggatā, ayaṃ samatho. Iti paṭhamaṃ vipassanā, pacchā samatho. Tena vuccati “vipassanāpubbaṅgamaṃ samathaṃ bhāveti”ti. Tassa vipassanāpubbaṅgamaṃ samathaṃ bhāvayato maggo sañjāyati, so taṃ maggaṃ āsevati -pa- bahulīkaroti, tassa taṃ maggaṃ āsevato -pa- anusayā byantīhonti¹, evaṃ vipassanāpubbaṅgamaṃ samathaṃ bhāveti.

Samathapubbaṅgamaṃ pana vipassanaṃ bhāvayatopi vipassanāpubbaṅgamaṃ samathaṃ bhāvayatopi lokuttaramaggakkaṇe samathavipassanā yuganaddhāva honti. Evamettha bhāvanānayo veditabboti.

Papañcasūdaniyā Majjhimanikāyaṭṭhakathāya

Dhammadāyādasuttavaṇṇanā niṭṭhitā.

4. Bhayabheravasuttavaṇṇanā

34. **Evaṃ me sutanti** Bhayabheravasuttaṃ. Tatrāyaṃ apubbapadavaṇṇanā—**athāti** avicchedanatthe nipāto. **Khoti** avadhāraṇatthe, Bhagavato Sāvatthiyaṃ vihāre avicchinneyevāti vuttaṃ hoti. **Jāṇussoṇīti** netam tassa mātāpitūhi katanāmaṃ, api ca kho ṭhānantarapaṭilābhaladdhaṃ. Jāṇussoṇīṭṭhānaṃ kira nāmetaṃ purohitaṭṭhānaṃ, taṃ tassa raññā dinnam, tasmā “Jāṇussoṇī”ti vuccati. Brahmaṃ aṇāṭīti **brāhmaṇo**, mante sajjhāyatīti attho, idameva hi jātibrahmaṇānaṃ niruttivacanaṃ. Ariyā pana bāhitapāpattā **brāhmaṇāti** vuccanti.

1. Am 1. 475; Khu 9. 282 piṭṭhesu tannissayapāji.

Yena Bhagavā tenupasaṅkamīti yenāti bhummatthe karaṇavacanāṃ, tasmā yattha Bhagavā, tattha upasaṅkamīti evamettha attho daṭṭhabbo. Yena vā kāraṇena Bhagavā devamanussehi upasaṅkamitabbo, tena kāraṇena upasaṅkamīti evamettha attho daṭṭhabbo. Kena ca kāraṇena Bhagavā upasaṅkamitabbo? Nānappakāraguṇavisesādhigamādhippāyena, sādupalūpabhogādhippāyena dijagaṇehi niccaphalitamahārukkho viya.

Upasaṅkamīti ca gatoti vuttaṃ hoti. **Upasaṅkamitvāti** upasaṅkamanapariyosānadīpanāṃ. Atha vā evaṃ gato tato āsannataraṃ ṭhānaṃ Bhagavato samīpasaṅkhātāṃ gantvātipi vuttaṃ hoti. **Bhagavatā saddhiṃ sammodīti** yathā khamanīyādīni pucchanto Bhagavā tena, evaṃ sopi Bhagavatā saddhiṃ samappavattamodo ahosi, sītodakaṃ viya uṇhodakena sammoditaṃ ekībhāvaṃ agamāsi. Yāya ca “kacci te bho Gotama khamanīyaṃ, kacci yāpanīyaṃ, kacci bhoto Gotamassa Gotamasāvakaṇāṃ ca appābādhaṃ appātākaṃ lahuṭṭhānaṃ balaṃ phāsuvihāro”ti-ādikāya kathāya sammodi, taṃ pītipāmojjasaṅkhātasammodajananato sammodituṃ yuttabhāvato ca **sammodanīyaṃ**, atthabyañjanamadhuratāya sucirampi kālaṃ sāretuṃ nīrantaraṃ pavattetuṃ araharūpato saritabba bhāvato ca **sāraṇīyaṃ**. Suyyamānasukhato ca sammodanīyaṃ, anussariyamānasukhato ca sāraṇīyaṃ. Tathā byañjanaparisuddhatāya sammodanīyaṃ, atthaparisuddhatāya sāraṇīyanti evaṃ anekehi pariyāyehi sammodanīyaṃ kathaṃ sāraṇīyaṃ vītisāretvā pariyosāpetvā niṭṭhāpetvā yenatthena āgato, taṃ pucchitukāmo ekamantaṃ nisīdi.

Ekamantanti bhāvanapuṃsakaniddeso, “visamaṃ candimasūriyā parivattantī”ti-ādīsu¹ viya. Tasmā yathā nisinno ekamantaṃ nisinno hoti, tathā nisīdīti evamettha attho daṭṭhabbo. Bhummatthe vā etaṃ upayogavacanāṃ. **Nisīdīti** upāvisi. Paṇḍitā hi purisā garuṭṭhānīyaṃ upasaṅkamitvā āsanakusalatāya ekamantaṃ nisīdanti, ayaṅca nesaṃ aññataro, tasmā ekamantaṃ nisīdi.

Kathaṃ nisinno pana ekamantaṃ nisinno hotīti. Cha nisajjadose vajjetvā. Seyyathidaṃ, atidūraṃ accāsannaṃ uparivātaṃ unnatapadesaṃ atisammukhaṃ atipacchāti. Atidūre nisinno hi sace kathetukāmo hoti,

1. Am 1. 386 piṭṭhe.

uccāsaddena kathetabbaṃ hoti. Accāsanne nisinno saṃghaṭṭanaṃ karoti. Uparivāte nisinno sarīragandhena bādhati. Unnatappadese nisinno agāraṃ pakāseti. Atisammukhā nisinno sace daṭṭhukāmo hoti, cakkhunā cakkhum āhacca daṭṭhabbaṃ hoti. Atipacchā nisinno sace daṭṭhukāmo hoti, gīvaṃ pasāretvā daṭṭhabbaṃ hoti. Tasmā ayampi ete cha nisajjadose vajjetvā nisīdi, tena vuttaṃ “ekamantaṃ nisīdi”ti.

Yemeti ye ime. **Kulaputtā**ti duvidhā kulaputtā jātikulaputtā ācāraikulaputtā. Tattha “tena kho pana samayena Raṭṭhapālo nāma kulaputto tasmimyeva Thullakoṭṭhike aggakulassa¹ putto”ti² evaṃ āgatā uccākulappasutā **jātikulaputtā** nāma. “Ye te kulaputtā saddhā agārasmā anagāriyaṃ pabbajitā”ti³ evaṃ āgatā pana yattha katthaci kule pasutāpi ācārasampannā **ācāraikulaputtā** nāma. Idha pana dvīhipi kāraṇehi kulaputtāyeva.

Saddhāti saddhāya. **Agārasmāti** agārato. **Anagāriyanti** pabbajjāṃ bhikkhubhāvaṃ ca. Pabbajjāpi hi natthettha agāriyanti **anagāriyā**, agārassa hitaṃ kasigorakkhādikammaṃ ettha natthīti attho. Bhikkhupi natthetassa agāranti anagāro, anagārassa bhāvo anagāriyaṃ. **Pabbajitāti** upagatā, evaṃ sabbathāpi anagāriyasāṅkhātāṃ pabbajjāṃ bhikkhubhāvaṃ vā upagatāti vuttaṃ hoti. **Pubbaṅgamoti** purato gāmi nāyako. **Bahukāro**ti hitakiriyaṃ bahūpakāro. **Bhavaṃ tesāṃ Gotamo samādapetāti** te kulaputte bhavaṃ Gotamo adhisilādīni gāhetā sikkhāpetā. **Sā janatāti** so janasamūho. **Diṭṭhānugatim āpajjati**ti dassanānugatim paṭipajjati, yandiṭṭhiko bhavaṃ Gotamo yaṃkhanṭiko yaṃruciko, tepi tandiṭṭhikā honti taṃkhanṭikā taṃrucikāti attho.

Kasmā panāyaṃ evamāhāti, esa kira pubbe aneke kulaputte agāramajjhe vasante devaputte viya pañcahi kāmaguṇehi paricārayamāne anto ca bahi ca susaṃvihitārakkhe disvā te aparena samayena Bhagavato madhurasāṃ dhammadesanaṃ⁴ sutvā saddhāya gharā nikkhamma pabbajitvā

1. Aggakulikassa (Sī, Syā, Ka)

2. Ma 2. 245 piṭṭhe.

3. Ma 3. 57 piṭṭhe.

4. Madhurasāṃ dhammadesanaṃ (Sī), madhurasaddhammadesanaṃ (Syā)

ghāsacchādanaparamatāya santuṭṭhe āraññakesu senāsanesu kenaci arakkhiyamānepi anussañkitāparisaṅkīte haṭṭhapahaṭṭhe udaggudagge addasa, disvā ca imesaṃ kulaputtānaṃ “ayaṃ phāsuvihāro kaṃ nissāya uppanno”ti cintento “samaṇaṃ Gotamaṃ”ti Bhagavati pasādaṃ alattha. So taṃ pasādaṃ nivedetuṃ Bhagavato santikaṃ āgato, tasmā evamāha.

Athassa Bhagavā taṃ vacanaṃ sampaṭicchanto abbhanumodanto ca **evametaṃ brāhmaṇā**ti-ādimāha. Vacanasampaṭicchanaṇumodanattahoyeva hi ettha ayaṃ **evanti** nipāto. **Mamaṃ uddissā**ti maṃ uddissa. **Saddhā**ti saddhāyeva. Na iṇaṭṭā na bhayaṭṭāti-ādīni sandhāyāha. Īdisānaṃyeva hi Bhagavā pubbaṅgamo, na itaresaṃ. **Durabhisambhavāni hī**ti sambhavituṃ dukkhāni dussahāni, na sakkā appesakkhehi ajjhogāhitunti vuttaṃ hoti. **Araññavanapatthānī**ti araññāni ca vanapatthāni ca. Tattha kiñcāpi abhidhamme nipariyāyena “nikkhamitvā bahi indakhilā sabbametaṃ araññaṃ”ti¹ vuttaṃ, tathāpi yantaṃ “pañcadhanusatikaṃ pacchimaṃ”ti araññikaṅganipphādakaṃ senāsanaṃ vuttaṃ, tadeva adhippetanti veditabbaṃ.

Vanapatthanti gāmetaṃ atikkamitvā manussānaṃ anupacāraṭṭhānaṃ, yattha na kasīyati na vapīyati. Vuttampi cetāṃ “vanapatthanti dūrānametaṃ senāsanaṃ adhivacanaṃ, vanapatthanti vanasaṅḍānametaṃ senāsanaṃ, vanapatthanti bhīmsanakānametaṃ, vanapatthanti salomahaṃsānametaṃ, vanapatthanti pariyaṅtānametaṃ, vanapatthanti na manussūpacārānametaṃ senāsanaṃ adhivacanaṃ”ti¹. Ettha ca **pariyaṅtānanti** imamekaṃ pariyaṅgaṃ ṭhapetvā sesapariyaṅgehi vanapatthāni veditabbāni. **Pantānī**ti pariyaṅgāni atidūrāni. **Dukkaraṃ pavivekanti** kāyavivekaṃ dukkaraṃ. **Durabhiramanti** abhiramituṃ na sukhaṃ. **Ekatteti** ekībhāve. Kim dasseti? Kāyaviveke katepi tattha cittaṃ abhiramāpetuṃ dukkaraṃ. Dvayaṃdvayārāmo hi ayaṃ lokoti. **Haranti maññeti** haranti viya ghasanti viya. **Manoti** manaṃ. **Samādhiṃ alabhamānassā**ti upacārasamādhiṃ vā appanāsamādhiṃ vā alabhantassa. Kim dasseti? Īdisassa bhikkhuno tiṇapaṇṇamiḡādisaddehi vividhehi ca bhīmsanakehi vanāni cittaṃ vikkhipanti maññeti, sabbaṃ brāhmaṇo saddhāpabbajitānaṃ kulaputtānaṃ araññavāse² vimhito āha.

1. Abhi 2. 260 piṭṭhe.

2. Araññavāsena (Sī, Syā)

Kāyakammantavārakathā

35. Athassa Bhagavā purimanayeneva “evametaṃ brāhmaṇā”ti-ādīhi taṃ taṃ vacanaṃ sampaṭicchitvā abbhanumoditvā ca yasmā soḷasasu ṭhānesu ārammaṇapariggaharahitānamyeva tādisāni senāsanāni durabhisambhavāni, na tesu ārammaṇapariggāhayuttānaṃ, attanā ca bodhisatto samāno tādiso ahosi, tasmā attano tādisānaṃ senāsanānaṃ durabhisambhavataṃ dassetuṃ **mayhampi khoti**-ādimāha.

Tattha **pubbeva sambodhā**ti sambodhato pubbeva, ariyamaggappattito aparabhāgeyevāti vuttaṃ hoti. **Anabhisambuddhassā**ti appaṭividdhacatusaccassa. **Bodhisattasseva satoti** bujjanakasattasseva sammāsambodhiṃ adhigantuṃ arahasattasseva sato, bodhiyā vā sattasseva laggasseva sato. Dīpaṅkarassa hi Bhagavato pādamūle aṭṭhadhammasamodhānena abhinīhārasamiddhito pabhuti Tathāgato bodhiyā satto laggo “pattabbā mayā esā”ti tadadhigamāya parakkamaṃ amuñcantoyeva āgato, tasmā **bodhisattoti** vuccati. **Tassa mayhanti** tassa evaṃ bodhisattasseva sato mayhaṃ. **Ye kho keci samaṇā vā brāhmaṇā vā**ti ye keci pabbajjūpagatā vā bhovādino vā.

Aparisuddhakāyakammantāti aparisuddhena paṇātipātādinaṃ kāyakammantena samannāgatā. **Aparisuddhakāyakammantasandosahetū**ti aparisuddhassa kāyakammantaṅkhātassa attano dosassa hetu, aparisuddhakāyakammantakāraṇāti vuttaṃ hoti. **Haveti** ekaṃsavacane nipāto. **Akusalanti** sāvajjaṃ akkhemāṃ ca. **Bhayabheravanti** bhayaṃ ca bheravaṃ ca. Cittutrāsassa ca bhayānakārammaṇassa cetāṃ adhivacanaṃ. Tatra **bhayaṃ** sāvajjaṭṭhena akusalaṃ, **bheravaṃ** akkhemāṭṭhenāti veditabbaṃ. **Avhāyantī**ti pakkosanti. Kathaṃ? Te hi paṇātipātādīni katvā “mayā ayuttamakamhā, sace no te jāneyyūṃ, yesaṃ aparajjhimhā, idāni anubandhitvā anayabyasanaṃ āpādeyyun”ti araṇṇānaṃ pavisitvā gacchantare vā gumbantare vā nisīdanti. Te “appamattakampi tiṇasaddaṃ vā paññasaddaṃ vā sutvā idānimhā naṭṭhā”ti tasanti vittasanti, āgantvā parehi parivāritā viya baddhā vadhitā viya ca honti. Evaṃ taṃ bhayabheravaṃ attani samāropanaṭṭhena avhāyanti pakkosanti.

Na kho panāhaṃ -pa- paṭisevāmīti ahaṃ kho pana aparisuddhakāyakammanto hutvā araṇṇavanapatthāni pantāni senāsanāni na paṭisevāmi. **Ye hi voti** ettha **voti** nipātamattaṃ. **Ariyā** vuccanti Buddhā ca Buddhasāvaka ca. **Parisuddhakāyakammantā**ti īdisā hutvā. **Tesamahaṃ aññataroti** tesaṃ ahampi eko aññataro. Bodhisatto hi gahaṭṭhopi pabbajitopi parisuddhakāyakammantova hoti. **Bhiyyoti** atirekatthe nipāto. **Pallomanti** pannalomataṃ, khemaṃ sotthibhāvanti attho. **Āpādiṃti** āpajjiṃ, atirekaṃ sotthibhāvaṃ atirekena vā sotthibhāvamāpajjinti vuttaṃ hoti. **Araṇṇe vihārāyā**ti araṇṇe vihāratthāya.

Kāyakammantavārakathā niṭṭhitā.

Vacīkammantavārādivaṇṇanā

36. Esa nayo sabbattha. Ayaṃ pana viseso, vacīkammantavāre tāva **aparisuddhavacīkammantā**ti aparisuddhena musāvādādinā vacīkammantena samannāgatā. Te kathaṃ bhayabheravaṃ avhāyanti? Te musāvādena parassa atthaṃ bhaññitvā piṣuṇavācāya mittabhedāṃ katvā pharusavācāya paresaṃ parisamajjhe mammāni tuditvā¹ niratthakavācāya parasattānaṃ² kammante nāsetvā “mayaṃ ayuttamakamhā, sace no te jāneyyūṃ, yesaṃ aparajjhimhā, idāni anubandhitvā anayabyasanaṃ pāpeyyun”ti araṇṇaṃ pavisitvā gacchantare vā gumbantare vā nisīdanti. Te “appamattakampi tiṇasaddaṃ vā paṇṇasaddaṃ vā sutvā idānimhā naṭṭhā”ti tasanti vittasanti, āgantvā parehi parivāritā viya baddhā vadhitā viya ca honti. Evaṃ taṃ bhayabheravaṃ attani samāropanaṭṭhena avhāyanti pakkosanti.

Manokammantavāre **aparisuddhamanokammantā**ti aparisuddhena abhiijjhādinā manokammantena samannāgatā. Te kathaṃ bhayabheravaṃ avhāyanti? Te paresaṃ rakkhitagopitesu bhaṇḍesu abhiijjhāvisamalobhaṃ uppādetvā parassa kujjhitvā parasatthe³ micchādassanaṃ gāhāpetvā mayaṃ ayuttamakamhā -pa- attani samāropanaṭṭhena avhāyanti pakkosanti.

1. Mammāni bhinditvā tuditvā (Sī)

2. Paraputtānaṃ (Ka)

3. Paraputte (Ka)

Ājīvavāre **aparissuddhājīvā**ti aparissuddhena vejjakammadūtakammavaḍḍhipayogādinā ekavīsati-anesanabhedena ājīvena samannāgatā. Te kathaṃ bhayabheravaṃ avhāyanti? Te evaṃ jīvikam kappetvā suṇanti “sāsanasodhakā kira Tepiṭakā bhikkhū sāsanam sodhetum nikkhantā, aḷḷa vā sve vā idhāgamissanti”ti araṇṇam pavisitvā gacchantare vā -pa- tasanti vittasanti. Te hi āgantvā parivāretvā gahitā viya odātavatthanivāsitā viya ca hontīti. Sesam tādisameva.

37. Ito param **abhijjhālū**ti-ādīsu kiñcāpi abhijjhābyāpādā manokammantena saṅgahitā, tathāpi nīvaraṇavasena puna vuttāti veditabbā. Tattha **abhijjhālū**ti parabhaṇḍādi-abhijjhāyanasīlā. **Kāmesu tibbasārāgā**ti vatthukāmesu bahalakilesarāgā, te kathaṃ bhayabheravaṃ avhāyanti? Te avavatthitārammaṇā honti, tesam avavatthitārammaṇānam araṇṇe viharantānam divā diṭṭham rattim bhayabheravaṃ hutvā upaṭṭhāti “te ākulacittā appamattakenapi tasanti vittasanti, rajjum vā latam vā disvā sappasaṇṇino honti, khāṇum disvā yakkhasaṇṇino, thalam vā pabbatam vā disvā hatthisaṇṇino sappādīhi anayabyasanam āpādītā viya hontī”ti. Sesam tādisameva.

38. **Byāpannacittā**ti pakatibhāvavijahanena vipannacittā. Kilesānugataṇhi cittaṃ pakatibhāvaṃ vijahati, purāṇabhattabyañjanam viya pūtikam hoti. **Paduṭṭhamanasānkappā**ti paduṭṭhacittasānkappā, abhadrakena paresam anattajanakena cittasānkappena samannāgatāti vuttam hoti. Te kathaṃ bhayabheravaṃ avhāyanti? Bhayabheravāvahāyanam ito pabhuti abhijjhālūvāre vuttanayeneva veditabbam. Yattha pana viseso bhavissati, tattha vakkhāma. **Na kho panāham byāpannacittoti** ettha pana mettacitto aham hitacittoti dasseti, īdisā hi bodhisattā honti. Evam sabbattha vuttadosapaṭipakkhavasena bodhisattassa guṇā vaṇṇetabbā.

39. **Thinamiddhapariyuṭṭhitā**ti cittagelaṇṇabhūtena thinena sesanāmakāyagelaṇṇabhūtena middhena ca pariyuṭṭhitā, abhibhūtā gahitāti vuttam hoti. Te niddābahulā honti.

40. **Uddhatā**ti uddhaccapakatikā vipphandamānacittā, uddhaccena hi ekārammaṇe cittaṃ vipphandati dhajayaṭṭhiyaṃ vātena paṭākā viya. **Avūpasantacittā**ti anibbutacittā, idha kukkucçaṃ gahetuṃ vaṭṭati.

41. **Kaṅkhī vicikicchī**ti ettha ekamevidaṃ pañcamaṃ nīvaraṇaṃ. Kiṃ nu kho idanti ārammaṇaṃ kaṅkhanato kaṅkhā, idamevidanti nicchetuṃ asamatthabhāvato vicikicchāti vuccati, tena samannāgatā samaṇabrāhmaṇā “kaṅkhī vicikicchī”ti vuttā.

42. **Attukkaṃsanakā paravambhī**ti ye attānaṃ ukkaṃsenti ukkhipanti, uccē ṭhāne ṭhapenti, parañca vambhenti garahanti nindanti, nīce ṭhāne ṭhapenti, tesametaṃ adhivacanaṃ. Te kathaṃ bhayabheravaṃ avhāyanti? Te parehi “asuko ca kira asuko ca attānaṃ ukkaṃsenti, amhe garahanti, dāse viya karonti, gaṇhatha ne”ti anubaddhā palāyivā araṇṇaṃ pavisitvā gacchantare vā gumbantare vāti kāyakammantasadisāṃ vitthāretabbaṃ.

43. **Chambhī**ti kāyathambhanalomahaṃsanakarena thambhena samannāgatā. **Bhīrukaḷātikā**ti bhīrukapakatikā, gāmadārakā viya bhayabahulā asūrā kātarāti vuttaṃ hoti.

44. **Lābhasakkārasilokanti** ettha labbhatīti **lābho**, catunnaṃ paccayānametaṃ adhivacanaṃ. **Sakkāro**ti sundarakāro, paccayā eva hi paṇītapāṇītaṃ sundarasundarā ca abhisankharitvā katā sakkārāti vuccanti. Yā ca parehi attano gāravakiriyā pupphādīhi vā pūjā. **Silokoti** vaṇṇabhaṇanaṃ etaṃ, lābhañca sakkārañca silokañca **lābhasakkārasilokaṃ**. **Nikāmayamānā**ti patthayamānā. Bhayabheravāvahāyanaṃ abhijjhāluvārasadisameva. Tadatthadīpakāṃ panettha Piyagāmikavatthūṃ kathenti—

Eko kira Piyagāmiko nāma bhikkhu samādinnaḍḍhutaṅgānaṃ bhikkhūnaṃ lābhaṃ disvā “ahampi dhutaṅgaṃ samādiyivā lābhaṃ uppādemī”ti cintevā sosānikaṅgaṃ samādāya susāne vasati. Athesadivasāṃ ekokammamutto jaraggavo divā gocare caritvā rattim tasmim susāne pupphagumbe sīsaṃ katvā romanthayamāno¹ aṭṭhāsi. Piyagāmiko rattim caṅkamaṇā

1. Romatthayamāno (Syā, Ka)

nikkhanto tassa hanusaddam sutvā cintesi “addhā maṃ lābhagiddho esa susāne vasatīti ñatvā devarājā viheḥhetum āgato”ti, so jaraggavassa purato añjalim paggahetvā “sappurisa devarāja ajja me ekarattim khama, sve paṭṭhāya na evaṃ karissāmi”ti namassamāno sabbarattim yācanto aṭṭhāsi. Tato sūriye uṭṭhite tam disvā kattarayaṭṭhiyā paharitva palāpesi “sabbarattim maṃ bhimsāpesi”ti.

45. **Kusītā**ti kosajjānugatā. **Hīnavīriyā**ti hīnā vīriyena virahitā viyuttā, nibbīriyāti vuttam hoti. Tattha kusītā kāyikavīriyārambhavirahitā honti, hīnavīriyā cetasikavīriyārambhavirahitā. Te ārammaṇavavattānamattampi kātum na sakkonti. Tesam avavattitārammaṇānanti sabbam pubbasadisameva.

46. **Muṭṭhassatī**ti natṭhassatī. **Asampajānā**ti paññārahitā, imassa ca paṭipakkhe “upaṭṭhitassatīhamasmī”ti vacanato satibhājanīyamevetam. Paññā panettha satidubbalyadīpanattham vuttā. Duvidhā hi sati paññāsampayuttā paññāvippayuttā ca. Tattha paññāsampayuttā balavatī, vippayuttā dubbalā, tasmā yadāpi tesam sati hoti, tadāpi asampajānantā muṭṭhassatīyeva te, dubbalāya satiyā satikiccābhavatoti etamattham dīpetum “asampajānā”ti vuttam. Te evaṃ muṭṭhassatī asampajānā ārammaṇavavattānamattampi kātum na sakkontīti sabbam pubbasadisameva.

47. **Asamāhitā**ti upacārappanāsamādhivirahitā. **Vibbhantacittā**ti ubbhantacittā. Samādhivirahena laddhokāsenā uddhaccena tesam samādhivirahānam cittam nānārammaṇesu paribbhamati, vanamakkaṭo viya vanasākhāsu uddhaccena ekārammaṇe vipphandati. Pubbe vuttanayeneva te evaṃ asamāhitā vibbhantacittā ārammaṇavavattānamattampi kātum na sakkontīti sabbam pubbasadisameva.

48. **Duppaññā**ti nippaññānametaṃ adhivacanam. Paññā pana duṭṭhā nāma natthi. **Elamūgā**ti elamukhā, khakārassa gākāro kato. Lālamukhāti vuttam hoti. Duppaññānañhi kathentānam lālā mukhato galati, lālā ca

elāti vuccati. Yathāha “passelamūgaṃ uragaṃ dujjivhan”ti. Tasmā te “eḷamūgā”ti vuccanti. “Elamukhā”tipi pāṭho. “Elamugā”ti keci paṭhanti, apare “elamukā”tipi, sabbattha “elamukhā”ti attho. Te katham bhayabheravaṃ avhāyanti? Te duppaññā eḷamūgā ārammaṇavavatthānamattampi kātuṃ na sakkonti. Tesam avavatthitārammaṇānaṃ araññe viharantānaṃ divā diṭṭhaṃ rattim bhayabheravaṃ hutvā upaṭṭhāti “te ākulacittā appamattakenapi tasanti vittasanti, rajjuṃ vā lataṃ vā disvā sappasaññino honti, khāṇuṃ disvā yakkhasaññino, thalaṃ vā pabbataṃ vā disvā hatthisaññino sappādīhi anayabyasanaṃ āpādītā viya honti”ti. Evaṃ taṃ bhayabheravaṃ atthani samāropanatthena avhāyanti pakkosanti. **Paññāsampannohamasmīti** ettha **paññāsampannoti** paññāya sampanno samannāgato, no ca kho vipassanāpaññāya, na maggapaññāya, Api ca kho pana imesu soḷasasu ṭhānesu ārammaṇavavatthānapaññāyāti attho. Sesam sabbattha vuttanayamevāti.

Soḷasaṭṭhānārammaṇapariggaho niṭṭhito.

Bhayabheravasenaśanādivaṇṇanā

49. **Tassa mayhanti** ko anusandhi? Bodhisatto kira imāni soḷasārammaṇāni pariggaṇhanto ca bhayabheravaṃ adisvā bhayabheravaṃ nāma evarūpāsu rattīsu evarūpe senāsane ca paññāyati, handa naṃ tatthāpi gavesissāmīti¹ bhayabheravagavesanaṃ akāsi, etamatthaṃ Bhagavā idāni brāhmaṇassa dassento **tassa mayhanti**-ādimāha.

Tattha **yā tāti** ubhayametaṃ rattīnaṃyeva uddesaniddesavacanaṃ. **Abhiññātāti** ettha **abhīti** lakkhaṇatthe upasaggo. Tasmā abhiññātāti candapāripūriyā candaparikkhayenāti evamādīhi lakkhaṇehi ñātāti veditabbā. **Abhilakkhitāti** ettha upasaggamattameva, tasmā abhilakkhitāti lakkhaṇīyā icceva attho, uposathasamādānadhammassavanapūjāsakkārādikaraṇatthaṃ lakkhetabbā sallakkhetabbā upalakkhetabbāti vuttaṃ hoti.

1. Gavesāmīti (Sī, Syā)

Cātuddasī pakkhassa paṭhamadivasato pabhuti catuddasannaṃ pūraṇī ekā ratti. Evaṃ **pañcadasī aṭṭhamī** ca. **Pakkhassā**ti sukkapakkhassa kaṇhapakkhassa ca. Etā tisso tisso katvā cha rattiyo, tasmā sabbattha pakkhavacanaṃ yojetabbaṃ “pakkhassa cātuddasī pakkhassa pañcadasī pakkhassa aṭṭhamī”ti. Atha pañcamī kasmā na gahitāti. Asabbakālikattā. Buddhe kira Bhagavati anuppannepi uppajjitvā aparinibbutepi pañcamī anabhilakkhitāyeva, parinibbute pana dhammasaṅgāhakattherā cintesum “dhammassavanaṃ cirena hoti”ti. Tato sammannitvā pañcamīti dhammassavanadivasam ṭhapesum, tato pabhuti sā abhilakkhitā jātā, evaṃ asabbakālikattā ettha na gahitāti.

Tathārūpāsūti tathāvidhāsu. **Ārāmacetiyanī**ti pupphārāmaphalārāmādayo ārāmā eva ārāmacetiyanī. Cittikataṭṭhena hi **cetiyanī**ti vuccanti, pūjanīyaṭṭhenāti vuttam hoti. **Vanacetiyanī**ti baliharaṇavanasaṇḍa subhagavana devasālvanaḍīni vanāniyeva vanacetiyanī. **Rukkhacetiyanī**ti gāmanigamādidvāresu pūjanīyarukkhāyeva rukkhacetiyanī. Lokiyā hi dibbādhivattāti vā maññamānā tesuyeva vā dibbasaññino hutvā ārāmavanarukkhe cittikaronti pūjenti, tena te sabbepi **cetiyanī**ti vuccanti. **Bhimsanakānī**ti bhayajanakāni, passatopi suṇatopi bhayaṃ janenti. **Salomahaṃsānī**ti saheva lomahaṃsena vattanti, pavisamānasseva lomahaṃsajanato. **Appeva nāma passeyyanti** api nāma taṃ bhayabheravaṃ passeyyameva. **Aparena samayenāti** “etadahosi yaṃnūnāhan”ti evaṃ cintitakālato paṭṭhāya aññena kālena.

Tattha ca me brāhmaṇa viharatoti tathārūpesu senāsanesu yaṃ yaṃ manussānaṃ āyācana-upahāraṇārahamaṃ yakkhaṭṭhānaṃ pupphadhūpamaṃsaruhiravasāmedapihakapapphāsasurāmerayādīhi okiṇṇakilinnadharaṇi talaṃ ekanipātaṃ viya yakkharakkhasapisācānaṃ, yaṃ divāpi passantānaṃ hadayaṃ maññe phalati, taṃ ṭhānaṃ sandhāyāha “tattha ca me brāhmaṇa viharato”ti. **Mago vā āgacchatī**ti siṅgāni vā khurāni vā koṭṭento gokaṇṇakhaggadīpivarāhādibhedo mago vā āgacchati, sabbacatuppadānaṃhi idha **magoti** nāmaṃ. Katthaci pana kāḷasiṅgālopi vuccati. Yathāha—

“Usabhasseva te khandho, sīhasseva vijambhitam.
Magarāja namo tyatthu, api kiñci labhāmase”¹.

Moro vā kaṭṭham pātetī moro vā sukkhakaṭṭham rukkhatto cāletvā pātetī. Moraggahaṇena ca idha sabbapakkhiggahaṇam adhippetam, tena yo koci pakkhīti vuttam hoti. Atha vā moro vāti vāsaddena añño vā koci pakkhīti. Esa nayo purime magaggahaṇepi. **Vāto vā paṇṇakasaṭam eretīti** vāto vā paṇṇakacavaram ghaṭṭeti. **Etam nūna tam bhayabheravam āgacchatīti** yam etam āgacchati, tam bhayabheravam nūnāti. Ito pabhuti ca ārammaṇameva bhayabheravanti veditabbam. Parittassa ca adhimattassa ca bhayassa ārammaṇattā sukhārammaṇam rūpam sukhamiva. **Kim nu kho aham aññadatthu bhayapaṭīkaṅkhī viharāmīti** aham kho kim kāraṇam ekamseneva bhayam ākaṅkhamāno icchamāno hutvā viharāmi.

Yathābhūtam yathābhūtassāti yena yena iriyāpathena bhūtassa bhavitassa sato vattamānassa samaṅgībhūtassa vā. **Meti** mama santike. **Tathābhūtam tathābhūto vāti** tena teneva iriyāpathena bhūto bhavito santo vattamāno samaṅgībhūto vāti attho. **So kho aham -pa- paṭivinemīti** bodhisattassa kira caṅkamantassa tasmim magasiṅgakhurasaddādibhede bhayabheravārammaṇe āgate neva mahāsatto tiṭṭhati, na nisīdati na sayati, atha kho caṅkamantova parivīmaṁsanto parivicinanto bhayabheravam na passati, magasiṅgakhurasaddādimattameva cetam hoti, so tam ṇatvā idam nāmetam, na bhayabheravanti tato tiṭṭhati vā nisīdati vā sayati vā. Etamattham dassento “so kho aham”^{ti}-ādimāha. Esa nayo sabbapeyyālesu. Ito param ca iriyāpathapaṭipāṭiyā avatvā āsannaapaṭipāṭiyā iriyāpathā vuttāti veditabbā, caṅkamantassa hi bhayabherave āgate na ṭhito na nisinno na nipanno ṭhitassāpi āgate na caṅkamīti evam tassa āsannaapaṭipāṭiyā vuttāti.

1. Khu 5. 89 piṭṭhe.

Asammohavīhāraṇṇanā

50. Evaṃ bhīmsanakesupī ṭhānesu attano bhayabheravābhāvaṃ dassetvā idāni jhāyīnaṃ sammohaṭṭhānesu attano asammohavīhāraṃ dassetuṃ **santi kho pana brāhmaṇāti-ādimāha.**

Tattha **santīti** atthi samvijjanti upalabbhanti. **Rattimyeva samānanti** rattimyeva santam. **Divāti sañjānantīti** “divaso ayan”ti sañjānanti. **Divāyeva samānanti** divasamyeva santam. **Rattīti sañjānantīti** “ratti ayan”ti sañjānanti. Kasmā panete evamsaññino hontīti. Vuṭṭhānakosallābhāvato vā sakuṇarutato vā. Kathaṃ? Idhekacco odātakasiṇalābhī divā parikkammaṃ katvā divā samāpanno divāyeva vuṭṭhahāmīti manasikāraṃ uppādeti, no ca kho addhānaparicchede kusalo hoti. So divasaṃ atikkamitvā rattibhāge vuṭṭhāti. Odātakasiṇapharaṇavasena cassa visadaṃ hoti vibhūtaṃ suvibhūtaṃ. So divā vuṭṭhahāmīti uppāditamanasikāratāya odātakasiṇapharaṇavisadavibhūtatāya ca rattimyeva samānaṃ divāti sañjānāti. Idha panekacco nīlakasiṇalābhī rattim parikkammaṃ katvā rattim samāpanno rattimyeva vuṭṭhahāmīti manasikāraṃ uppādeti, no ca kho addhānaparicchede kusalo hoti. So rattim atikkamitvā divasabhāge vuṭṭhāti. Nīlakasiṇapharaṇavasena cassa avisadaṃ hoti avibhūtaṃ. So rattim vuṭṭhahāmīti uppāditamanasikāratāya nīlakasiṇapharaṇavisadāvibhūtatāya ca divāyeva samānaṃ rattīti sañjānāti. Evaṃ tāva vuṭṭhānakosallābhāvato evamsaññino hontīti.

Sakuṇarutato pana idhekacco antosenāsane nisinno hoti. Atha divā ravanakasakuṇā kākādayo candālokena divāti maññamānā rattim ravanti, aññehi vā kāraṇehi. So tesam saddaṃ sutvā rattimyeva samānaṃ divāti sañjānāti. Idha panekacco pabbatantare gambhīrāya ghanavanappaṭicchannāya giriguhāya sattāhavaddalikāya vattamānāya antarahitasūriyāloke kāle nisinno hoti. Atha rattim ravanakasakuṇā ulūkādayo majjhanhikasamayepi tattha tattha samandhakāre nilīnā rattisaññāya vā aññehi vā kāraṇehi ravanti. So tesam saddaṃ sutvā divāyeva samānaṃ rattīti sañjānāti. Evaṃ sakuṇarutato evamsaññino hontīti.

Idamahanti idaṃ ahaṃ evaṃ

sañjānanam. **Sammohavihārasmiṃ vadāmīti** sammohavihārapariyāpannam antogadham, sammohavihārānam aññataram vadāmīti vuttam hoti.

Aham kho pana brāhmaṇa -pa- sañjānāmīti pākaṭo bodhisattassa rattindivaparicchedo. Sattāhavaddalepi candimasūriyesu adissamānesupi jānātiyeva “ettakam purebhattakālo gato, ettakam pacchābhattakālo, ettakam paṭhamayāmo, ettakam majjhimayāmo, ettakam pacchimayāmoti, tasmā evamāha. Anacchariyam cetam, yam pūritapāramī bodhisatto evam jānāti. Padesañāṇe ṭhitānam sāvakānampi hi rattindivaparicchedo pākaṭo hoti.

Kalyāṇiyamahāvihāre kira Godattatthero dvaṅgulakāle bhattam gahetvā aṅgulakāle bhuñjati. Sūriye adissamānepi pātoyeva senāsanam pavisitvā tāya velāya nikkhamati. Ekadivasam āramikā “sve therassa nikkhamanakāle passāmā”ti bhattam sampādetvā kālatthambhamūle nisīdimsu. Thero dvaṅgulakāleyeva nikkhamati¹. Tato pabhuti kira sūriye adissamānepi therassa nikkhamanasaññāya eva bherim ākoṭenti.

Ajagaravihārepi Kāḷadevatthero antovasse yāmagandikam paharati, āciṇṇametaṃ therassa. Na ca yāmayantanālikam payojeti, aññe bhikkhū payojenti. Atha nikkhante paṭhame yāme there muggaram gahetvā ṭhitamatteyeva ekaṃ dve vāre paharanteyeva vā yāmayantaṃ patati, evam tīsu yāmesu samaṇadhammaṃ katvā thero pātoyeva gāmaṃ pavisitvā piṇḍapātam ādāya vihāram āgantvā bhojanavelāya² pattam gahetvā divā vihāraṭṭhānam gantvā samaṇadhammaṃ karoti. Bhikkhū kālatthambham dīsvā therassa adīsvā āgamanatthāya pesenti. So bhikkhu theram divā vihāraṭṭhānā nikkhamantameva vā antarāmagge vā passati. Evam padesañāṇe ṭhitānam sāvakānampi rattindivaparicchedo pākaṭo hoti, kimaṅgam pana bodhisattānanti.

Yam kho tam brāhmaṇa -pa- vadeyyāti ettha pana “yam kho tam brāhmaṇa asammodhadhammo satto loke uppanno -pa- sukhāya devamanussānan”ti

1. Nikkhami (Sī)

2. Bhojanasālāya (Sī, Syā)

vacanaṃ vadamāno koci sammā vadeyya, sammā vadamāno siyā, na vitathavādī assa. Mameva taṃ vacanaṃ vadamāno sammā vadeyya, sammā vadamāno siyā, na vitathavādī assāti evaṃ padasambandho veditabbo.

Tattha **asammohadhammoti** asammohasabhāvo. **Loketi** manussaloke. **Bahujanahitāyāti** bahujanassa hitatthāya, paññāsampattiyā dīṭṭhadhammikasamparāyikahitūpadesakoti. **Bahujanasukhāyāti** bahujanassa sukhatthāya, cāgasampattiyā upakaraṇasukhassa dāyakoti¹. **Lokānukampāyāti** lokassa anukampatthāya, mettākaraṇāsampattiyā mātāpitaro viya lokassa rakkhitā gopayitāti². **Atthāya hitāya sukhāya devamanussānanti** idha devamanussaggaḥaṇena ca bhābbapuggalaveneyyasattheyeva gahevā tesāṃ nibbānamaggaphalādhiḡamāya attano uppattim dassētīti veditabbo. **Atthāyāti** hi vutte paramatthatthāya nibbānāyāti vuttaṃ hoti. **Hitāyāti** vutte taṃ sampāpakamaggatthāyāti vuttaṃ hoti, nibbānasampāpakamaggato hi uttari hitaṃ nāma natthi. **Sukhāyāti** vutte phalasaṃpattisukhatthāyāti vuttaṃ hoti, tato uttari sukhābhāvato. Vuttaṃ cetāṃ “ayaṃ samādhi paccuppannasukho ceva āyatiṅca sukhavipāko”ti³.

Pubbabhāgapāṭipadādivaṇṇanā

51. Evaṃ Bhagavā Buddhagūṇapaṭilābhāvasānaṃ attano asammohavihāraṃ brāhmaṇassa dassetvā idāni yāya paṭipadāya taṃ koṭippattaṃ asammohavihāraṃ adhigato, taṃ pubbabhāgato pabhuti dassetuṃ **āraddhaṃ kho pana me brāhmaṇāti**-ādimāha.

Keci panāhu “imaṃ asammohavihāraṃ sutvā brāhmaṇassa cittamevaṃ uppannaṃ ‘kāya nu kho paṭipadāya imaṃ patto’ti, tassa cittamaññāya imāyāhaṃ paṭipadāya imaṃ uttamaṃ asammohavihāraṃ pattoti dassento evamāhā”ti.

1. Upakaraṇasukhasampadāyakoti (Sī), upakaraṇasukhasampattidāyakoti (Syā)

2. Gopāyitāti (Syā), gopāpayitāti (Ka)

3. Dī 3. 234; Aṃ 2. 20; Abhi 2. 347 piṭṭhesu.

Tattha **āraddham kho pana me brāhmaṇa vīriyam ahoṣī**ti brāhmaṇa na mayā ayam uttamo asammohavihāro kusītena muṭṭhassatinā sāraddhakāyena vikkhattacittena vā adhigato, Api ca kho tadadhigamāya āraddham kho pana me vīriyam ahoṣi, Bodhimaṇḍe nisinnena mayā caturāṅgavīriyam āraddham ahoṣi, paggahitaṃ asithilappavattitanti vuttaṃ hoti. Āraddhattāyeva ca metaṃ **asallīnaṃ** ahoṣi.

Upaṭṭhitā sati asammuṭṭhāti na kevalañca vīriyameva, satipi me ārammaṇābhimukhībhāvena upaṭṭhitā ahoṣi. Upaṭṭhitattāyeva ca asammuṭṭhā. **Passaddho kāyoti** kāyacittappassaddhisambhavana kāyopi me passaddho ahoṣi. Tattha yasmā nāmakāye passaddhe rūpakāyopi passaddhoyeva hoti, tasmā nāmakāyo rūpakāyoti avisesetvāva passaddho kāyoti vuttaṃ. **Asāraddhoti** so ca kho passaddhattāyeva asāraddho, vigatadarathoti vuttaṃ hoti. **Samāhitaṃ cittaṃ ekagganti** cittampi me sammā āhitaṃ suṭṭhu ṭhapitaṃ appitaṃ viya ahoṣi. Samāhitattā eva ca ekaggam acalaṃ nipphandaṇanti, ettāvataṃ jhānassa pubbabhāgapāṭipadā kathitā hoti.

Idāni imāya paṭipadāya adhigataṃ paṭhamaṃ jhānaṃ ādim katvā vijjāttayapariyosānaṃ visesaṃ dassento **so kho ahanti**-ādimāha. Tattha **viviceva kāmehi -pa- catuttham jhānaṃ upasampajja vihāsinti** ettha tāva yaṃ vattabbaṃ siyā, taṃ sabbaṃ Visuddhimagge pathavīkasiṇakathāyaṃ vuttaṃ. Kevalañhi tattha “upasampajja viharatī”ti āgataṃ, idha “vihāsin”ti, ayameva viseso. Kim katvā pana Bhagavā imāni jhānāni upasampajja vihāsīti, kammaṭṭhānaṃ bhāvetvā. Kataraṃ? Ānāpānassatikammaṭṭhānaṃ.

Imāni ca pana cattāri jhānāni kesañci cittekaggatthāni honti, kesañci vipassanāpādakāni, kesañci abhiññāpādakāni, kesañci nirodhapādakāni, kesañci bhavokkamanatthāni. Tattha khīṇāsavānaṃ cittekaggatthāni honti. Te hi samāpajjitvā ekaggacittā sukhaṃ divasaṃ viharissāmāti iccevaṃ kasiṇaparikkammaṃ katvā aṭṭha samāpattiyo nibbattenti. Sekkhaputhujjanānaṃ samāpattito vuṭṭhāya samāhitena cittaṃ vipassissāmāti nibbattentānaṃ vipassanāpādakāni honti. Ye pana aṭṭha samāpattiyo nibbattetvā abhiññāpādakajjhānaṃ samāpajjitvā samāpattito vuṭṭhāya

“ekopi hutvā bahudhā hotī”¹ti¹ vuttanayā abhiññāyo patthentā nibbattenti, tesam abhiññāpādakāni honti. Ye pana aṭṭha samāpattiyo nibbattetvā nirodhasamāpattim samāpajjitvā sattāham acittā hutvā diṭṭheva dhamme nirodham nibbānam patvā sukham viharissāmāti nibbattenti, tesam nirodhapādakāni honti. Ye pana aṭṭha samāpattiyo nibbattetvā aparihīnajjhānā brahmaloke uppajjissāmāti nibbattenti, tesam bhavokkamanatthāni honti.

Bhagavatā panidam catutthajjhānam Bodhirukkhamūle nibbattitam, tam tassa vipassanāpādakañceva ahosi abhiññāpādakañca sabbakiccasādhakañca, sabbalokiyalokuttaraguṇadāyakanti veditabbam.

Pubbenivāsakathāvaṇṇanā

52. Yesañca guṇānam dāyakam ahosi, tesam ekadesam dassento **so evam samāhite citteti**-ādimāha. Tattha dvinnam vijjānam anupadavaṇṇanā ceva bhāvanānayo ca Visuddhimagge vitthārito. Kevalañhi tattha “so evam samāhite citte -pa- abhininnāmetī”ti vuttam, idha “abhininnāmesin”ti. **Ayam kho me brāhmaṇāti** ayam ca appanāvāro tattha anāgatoti ayameva viseso. Tattha **soti** so aham. **Abhininnāmesinti** abhinīharim. Abhininnāmesinti ca vacanato **soti** ettha so ahanti evamattho veditabbo.

Yasmā cidam Bhagavato vasena pubbenivāsānussatiññānam āgataṃ, tasmā “so tato cuto idhūpapanno”ti ettha evam yojanā veditabbā. Ettha hi **so tato cutoti** paṭinivattantassa paccavekkhaṇam. Tasmā **idhūpapannoti** imissā idhūpapattiyā anantaram. **Amutra udapādinti** Tusitabhavanam sandhāyāhāti veditabbo. **Tatrāpāsīm evamnamoti** tatrāpi Tusitabhavane Setaketu nāma devaputto ahosiṃ. **Evam gottoti** tāhi devatāhi saddhim ekagotto. **Evamvaṇṇoti** suvaṇṇavaṇṇo. **Evamāhāroti** dibbasudhāhāro. **Evamsukhadukkappaṭisaṃvedīti** evam dibbasukhappaṭisaṃvedī. Dukkham pana saṅkhāradukkhamattameva. **Evamāyupariyantoti** evam satta paññāsa vassa koṭi saṭṭhivassa sata saḥassā yupariyanto.

1. Dī 1. 73; Khu 9. 107 piṭṭhādīsu.

So tato cutoti so ahaṃ tato Tusitabhavanato cuto. **Idhūpapannoti** idha Mahāmāyāya deviyā kucchimhi nibbatto.

Ayaṃ kho me brāhmaṇāti-ādīsu meti mayā. **Vijjāti** viditakaraṇaṭṭhena vijjā. Kim viditaṃ karoti? Pubbenivāsaṃ. **Avijjāti** tasseva pubbenivāsassa aviditakaraṇaṭṭhena tappāṭicchādako moho vuccati. **Tamoti** sveva moho paṭicchādakaṭṭhena “tamo”ti vuccati. **Ālokoti** sāyeva vijjā obhāsakaraṇaṭṭhena “āloko”ti vuccati. Ettha ca vijjā adhigatāti ayaṃ attho, sesaṃ pasaṃsāvacaṇaṃ. Yojanā panettha ayaṃ kho me vijjā adhigatā, tassa me adhigatavijjassa avijjā vihatā, vinaṭṭhāti attho. Kasmā? Yasmā vijjā uppannā. Esa nayo itarasmimpi padadvaye.

Yathā tanti ettha **yathāti** opamme. **Tanti** nipāto. Satiyā avippavāsena **appamattassa**. Vīriyātāpena **ātāpino**. Kāye ca jīvite ca anapekkhatāya **pahitattassa**, pesitattassāti attho. Idaṃ vuttaṃ hoti “yathā appamattassa ātāpino pahitattassa viharato avijjā vihaññeyya, vijjā uppajjeyya. Tamo vihaññeyya, āloko uppajjeyya. Evameva mama avijjā vihatā, vijjā uppannā. Tamo vihato, āloko uppanno. Etassa me padhānānuyogassa anurūpameva phalaṃ laddhaṃ”ti.

Pubbenivāsakathā niṭṭhitā.

Dibbacakkhuñṇāṇakathāvaṇṇanā

53. Cutūpapātakathāyaṃ yasmā idha Bhagavato vasena Pāḷi āgatā, tasmā “passāmi pajānāmī”ti vuttaṃ, ayaṃ viseso. Sesaṃ Vsuddhimagge vuttasadisameva.

Ettha pana **vijjāti** dibbacakkhuñṇāṇavijjā. **Avijjāti** sattānaṃ cutipaṭisandhipaṭicchādikā avijjā. Sesaṃ vuttanayamevāti. Yasmā ca pūritapāramīnaṃ mahāsattānaṃ parikkammakiccaṃ nāma natthi. Te hi citte abhininnāmitamatteyeva

anekavihitam pubbenivāsam anussaranti, dibbena cakkhunā satte passanti. Tasmā yo tattha parikammaṃ ādim katvā bhāvanānayo vutto, na tena idha atthoti.

Āsavakkhayaññakathāvaṇṇanā

54. Tatiyavijjāya **so evaṃ samāhite citteti** vipassanāpādakaṃ catutthajjhānacittam veditabbaṃ. **Āsavānaṃ khayaññāyati** arahattamaggaññatthāya, arahattamaggo hi āsavavināsanato āsavānaṃ khayoti vuccati, tatra cetam ñāṇam, tappariyāpannattāti. **Cittam abhininnāmesinti** vipassanācittam abhinīharim. **So idaṃ dukkhanti** evamādīsu “ettakaṃ dukkhaṃ, na ito bhiyyo”ti sabbampi dukkhasaccaṃ sarasalakkhaṇapaṭivedhena yathābhūtaṃ abbhaññāsim jānim paṭivijjhim. Tassa ca dukkhassa nibbattikaṃ taṇhaṃ **ayaṃ dukkhasamudayoti**. Tadubhayampi yaṃ ṭhānaṃ patvā nirujjhati, taṃ tesam appavattim nibbānaṃ **ayaṃ dukkhanirodhoti**. Tassa sampāpakaṃ ariyamaggaṃ **ayaṃ dukkhanirodhagāminī paṭipadāti** sarasalakkhaṇapaṭivedhena yathābhūtaṃ abbhaññāsim jānim paṭivijjhinti evamattho veditabbo.

Evaṃ sarūpato saccāni dassetvā idāni kilesavasena pariyāyato dassento **ime āsavāti**-ādimāha. **Tassa me evaṃ jānato evaṃ passatoti** tassa mayhaṃ evaṃ jānantassa evaṃ passantassa. Saha vipassanāya koṭippattaṃ maggaṃ katheti. **Kāmāsavāti** kāmāsavato. **Vimuccitthāti** iminā phalakkhaṇaṃ dasseti, maggakkhaṇe hi cittaṃ vimuccati, phalakkhaṇe vimuttaṃ hoti. **Vimuttasmim vimuttamitiññanti** iminā paccavekkhaṇaṇāṇaṃ dasseti. **Khīṇā jātī**-ādīhi tassa bhūmim, tena hi ñāṇena Bhagavā paccavekkhanto “khīṇā jātī”ti-ādīni abbhaññāsi. Katamā pana Bhagavato jāti khīṇā, kathaṃ ca naṃ abbhaññāsīti. Na tāvassa atītā jāti khīṇā, pubbeva khīṇattā, na anāgatā, anāgate vāyāmābhāvato, na paccuppannā, vijjamānattā. Yā pana maggassa abhāvitattā uppajjeyya ekacatupañcavokārabhavesu ekacatupañcakkhandhabhedā jāti, sā maggassa bhāvitattā anuppādadammatam āpajjanena khīṇā, taṃ somagga bhāvanāya pahīnakilese paccavekkhitvā “kilesābhāve vijjamānampi kammaṃ āyatim appaṭisandhikaṃ hotī”ti jānanto abbhaññāsi.

Vusitanti vuttam parivuttham, katham caritam nitthitanti attho.

Brahmacariyanti maggabrahmacariyam, puthujjanakalyāṇakena hi saddhim sattasekkhā brahmacariyavāsam vasanti nāma, khīṇāsavo vutthavāso. Tasmā Bhagavā attano brahmacariyavāsam paccavekkhanto “vusitam brahmacariyan”ti abbhaññāsi. **Katham kariṇiyanti** catūsu saccesu catūhi maggehi pariññāpahānasacchikiriyābhāvanāvasena soḷasavidhampi kiccam nitthāpitanti attho. Puthujjanakalyāṇakādayo hi tam kiccam karonti, khīṇāsavo katakaraṇīyo. Tasmā Bhagavā attano karaṇīyam paccavekkhanto “katham karaṇīyan”ti abbhaññāsi.

Nāparam itthattāyāti idāni puna itthabhāvāya evaṃsoḷasakiccabhāvāya, kilesakkhakāya vā maggabhāvanākiccam me natthīti abbhaññāsi. Atha vā **itthattāyāti** itthabhāvato imasmā evaṃpakārā idāni vattamānakkhandhasantānā aparam khandhasantānam mayham natthi. Ime pana pañcakkhandhā pariññātā tiṭṭhanti chinnamūlakā rukkḥā viya. Te carimakaviññāṇanirodhena anupādāno viya jātavedo nibbāyissantīti abbhaññāsi.

Idāni evam paccavekkhaṇaṇāṇapariggahitam āsavānam khayaṇāṇādhigamaṃ brāhmaṇassa dassento **ayam kho me brāhmaṇāti-ādimāha**. Tattha **vijjāti** arahattamaggaṇāṇavijjā. **Avijjāti** catusaccapaṭicchādikā avijjā. Sesam vuttanayameva. Ettāvatā ca pubbenivāsaṇāṇena atītaṃsaṇāṇam, dibbacakkhunā paccuppannānāgataṃsaṇāṇam, āsavakkhayena sakalalokiyalokuttaraguṇanti evam tīhi vijjāhi sabbepi sabbaññuḡuṇe saṅgahetvā pakāsento attano asammoḥavihāram brāhmaṇassa dassesi.

Araññavāsakāraṇavaṇṇanā

55. Evam vutte kira brāhmaṇo cintesi “samaṇo Gotamo sabbaññutam paṭijānāti, ajjāpi ca araññavāsam na vijahati, atthi nu khvassa aññampi kiñci karaṇīyan”ti. Athassa Bhagavā ajjhāsayaṃ viditvā iminā ajjhāsayaṇusandhinā **siyā kho pana teti-ādimāha**. Tattha **siyā kho pana te brāhmaṇa evamassāti** brāhmaṇa kadāci tuyham evam bhaveyya. **Na kho panetaṃ brāhmaṇa evam datṭhabbanti** etaṃ kho pana brāhmaṇa tayā mayham

pantasenāsanapaṭisevanam avītarāgāditāyāti evam na daṭṭhabbam. Evam pantasenāsanapaṭisevane akāraṇam paṭikkhipitvā kāraṇam dassento **dve kho ahanti-ādimāha**. Tattha atthoyeva atthavaso. Tasmā **dve kho aham brāhmaṇa atthavaseti** aham kho brāhmaṇa dve atthe dve kāraṇāni sampassamānoti vuttam hoti. **Attano ca diṭṭhadhammasukhavihāranti** ettha **diṭṭhadhammo** nāma ayam paccakkho attabhāvo. **Sukhavihāro** nāma catunnampi iriyāpathavihārānam phāsutā, ekakassa hi araṇṇe antamaso uccārapassāvakkiccam upādāya sabbeva iriyāpathā phāsukā honti, tasmā diṭṭhadhammassa sukhavihāranti¹ ayamattho veditabbo. **Pacchimañca janataṃ anukampamānoti** katham araṇṇavāsena pacchimā janatā anukampitā hoti? Saddhāpabbajitā hi kulaputtā Bhagavato araṇṇavāsam disvā Bhagavāpi nāma araṇṇasenāsanāni na muñcati, yassa nevatthi pariṇṇātabbam na pahātabbam na bhāvetabbam na sacchikātabbam, kimaṅgam pana mayanti cintetvā tattha vasitabbameva maññissanti. Evam khippameva dukkhassantakarā bhavissanti. Evam pacchimā janatā anukampitā hoti, etamattham dassento āha “pacchimañca janataṃ anukampamāno”ti.

Desanānumodanāvaṇṇanā

56. Tam sutvā attamano brāhmaṇo **anukampitarūpāti-ādimāha**. Tattha **anukampitarūpāti** anukampitajātikā anukampitasabhāvā. **Janatāti** janasamūho. **Yathā taṃ Arahatā Sammāsambuddhenāti** yathā Araham Sammāsambuddho anukampeyya, tattheva anukampitarūpāti.

Evañca pana vatvā puna tam Bhagavato dhammadesanam abbhanumodamāno Bhagavantam etadavoca **abhikkantaṃ bho Gotama abhikkantaṃ bho Gotamāti**. Tatthāyam abhikkantasaddo khayasundarābhirūpa-abbhanumodanesu dissati. “Abhikkantā bhante ratti, nikkhanto paṭhamo yāmo, ciranisinno bhikkhusaṅgho”ti-ādīsu² hi khaye dissati. “Ayam imesam catunnam puggalānam abhikkantataro ca paṇītataro cā”ti-ādīsu³ sundare.

1. Diṭṭhadhammassa sukhavihāram diṭṭhadhammasukhavihāranti (Sī, Syā)

2. Vi 4. 418; Am 3. 44 piṭṭhesu.

3. Am 1. 414 piṭṭhe.

“Ko me vandati pādāni, iddhiyā yasasā jalāni.
Abhikkantena vaṇṇena, sabbā obhāsayaṃ disā”ti—

Ādīsu¹ abhirūpe. “Abhikkantaṃ bhante”ti-ādīsu² abbhanumodane.
Idhāpi abbhanumodaneyeva. Yasmā ca abbhanumodane, tasmā sādhu sādhu
bho Gotamāti vuttaṃ hotīti veditabbaṃ.

“Bhaye kodhe pasāmsāyaṃ, turite kotūhalacchare.
Hāse soke pasāde ca, kare āmeḍitaṃ budho”ti—

Iminā ca lakkhaṇena idha pasādavasena pasāmsāvasena cāyaṃ
dvikkhattuṃ vuttoti veditabbo. Atha vā **abhikkantanti** abhikantaṃ³ ati-
iṭṭhaṃ atimanāpaṃ, atisundaranti vuttaṃ hoti.

Tattha ekena abhikkantasaddena desanaṃ thometi, ekena attano
pasādaṃ. Ayañhettha adhippāyo—abhikkantaṃ bho Gotama yadidaṃ bho
Gotamassa dhammadesanā, abhikkantaṃ yadidaṃ bho Gotamassa
dhammadesanaṃ āgamma mama pasādoti. Bhagavatoyeva vā vacanaṃ dve
dve atthe sandhāya thometi—bho Gotamassa vacanaṃ abhikkantaṃ
dosanāsanato, abhikkantaṃ guṇādhighamanato, tathā saddhājananato,
paññājananato, sātthato, sabyañjanato, uttānapadato, gambhīratthato,
kaṇṇasukhato, hadayaṅgamato, anattukkaṃsanato, aparavambhanato,
karuṇāsītalato, paññāvadātato, āpātharamaṇīyato, vimaddakkhamato,
suyyamānasukhato, vīmaṃsīyamānahitatoti evamādīhi
yojetabbaṃ.

Tato parampi catūhi upamāhi desanaṃyeva thometi. Tattha **nikkujjanti**
adho mukhaṭhapitaṃ, heṭṭhāmukhajātaṃ vā. **Ukkujjeyyāti** upari mukhaṃ
kareyya, **paṭicchannanti** tiṇapaṇṇādicchāditaṃ. **Vivareyyāti** ugghāṭeyya.
Mūlhassāti disāmūlhassa. **Maggam ācikkheyyāti** hatthe gahetvā “esa
maggo”ti vadeyya. **Andhakāreti** kāḷapakkhacātuddasī-
aḍḍharattaghanavanasañḍameghapaṭalehi caturaṅge tame, ayaṃ tāva
anuttānapadattho.

Ayaṃ pana adhippāyayojanā—yathā koci nikkujjitaṃ ukkujjeyya, evaṃ
saddhammavimukhaṃ asaddhamme patitaṃ maṃ asaddhammā
vuṭṭhāpentena, yathā paṭicchannaṃ

1. Khu 2. 73 piṭṭhe.

2. Dī 1. 80; Vi 1. 7 piṭṭhādīsu.

3. Atikantaṃ (Sī)

vivareyya. Evaṃ Kassapassa Bhagavato sāsananantaradhānato pabhuti micchādittigahanapaṭicchannaṃ sāsanaṃ vivarantena, yathā mūlhasa maggaṃ ācikkheyya, evaṃ kummaggamicchāmaggaṃ appaṭipannaṃ me saggamokkhamaggaṃ ācikkhantena¹, yathā andhakāre telapajjotaṃ dhāreyya, evaṃ mohandhakāre nimuggassa me Buddhādiratanarūpāni apassato tappaṭicchādakamohandhakāraviddhamsakadesanāpajjotadhāraṇena mayhaṃ bhotā Gotamena etehi pariyāyehi pakāsitattā anekapariyāyena dhammo pakāsitoti.

Pasannākāraṇaṇā

Evaṃ desanaṃ thometvā imāya desanāya ratanattayapasannacitto pasannākāraṃ karonto **esāhanti**-ādimāha. Tattha **esāhanti** eso ahaṃ. **Bhavantaṃ Gotamaṃ saraṇaṃ gacchāmi**ti bhavaṃ me Gotamo saraṇaṃ parāyaṇaṃ aghassa tātā² hitassa ca vidhātāti iminā adhippāyena bhavantaṃ Gotamaṃ gacchāmi bhajāmi sevāmi payirupāsāmi, evaṃ vā jānāmi bujjhāmi. Yesaṃhi dhātūnaṃ gati-attho, buddhipi tesaṃ attho. Tasmā gacchāmi imassa jānāmi bujjhāmi ayamattho vutto. **Dhammañca bhikkhusaṃghaṃcā**ti ettha pana adhigatamagge sacchikatanirodhe yathānusiṭṭhaṃ paṭipajjamāne ca apāyesu apatamāne dhāretīti **dhammo**, so atthato ariyamaggo ceva nibbānañca. Vuttañhetā “yāvataṃ bhikkhave dhammā saṅkhatā, ariyo aṭṭhaṅgiko maggo tesaṃ aggamakkhāyati”³ vitthāro. Na kevalaṃ ariyamaggo ceva nibbānañca, Api ca kho ariyaphalehi saddhim pariyattidhammopi. Vuttañhetā chattamāṇavakavimāne—

“Rāgavirāgamanemasokaṃ,
Dhammasaṅkhatamappaṭikūlaṃ.
Madhuramimaṃ paṇaṃ suvibhattaṃ,
Dhammamimaṃ araṇatthamupehī”⁴.

Ettha **rāgavirāgoti** maggo kathito. **Anejasokanti** phalaṃ. **Dhammasaṅkhatanti** nibbānaṃ. **Appaṭikūlaṃ madhuramimaṃ paṇaṃ suvibhattanti** piṭakattayena vibhattā sabbadhammakhandhāti. Diṭṭhisīlasaṅghātena saṃhatoti **saṅgho**, so atthato aṭṭha-ariyapuggalasamūho. Vuttañhetā tasmimyeva vimāne.

1. Āvikarontena (Sī, Syā)

3. Am 1. 343 piṭṭhe.

2. Hantā (Sī, Syā)

4. Khu 2. 76 piṭṭhe.

“Yattha ca dinnamahapphalamāhu, catūsu sucīsu purisayugesu.
Aṭṭha ca puggala dhammasā te, saṅghamimaṃ saraṇatthamupehī”ti¹.

Bhikkhūnaṃ saṅgho **bhikkhusaṅgho**. Ettāvataṃ brāhmaṇo tīṇi
saraṇagamanāni paṭivedesi.

Saraṇagamanakathā

Idāni tesu saraṇagamanesu kosallatthaṃ saraṇaṃ, saraṇagamanāṃ, yo
ca saraṇaṃ gacchati, saraṇagamanappabhedo, saraṇagamanassa phalaṃ,
saṃkilesa, bhedoti ayaṃ vidhi veditabbo. Seyyathidaṃ—padatthato tāva
himsatīti **saraṇaṃ**, saraṇagataṇaṃ teneva saraṇagamanena bhayaṃ santāsaṃ
dukkhaṃ duggatiparikilesaṃ hanati vināsetīti attho, ratanattayassevetaṃ
adhivacanaṃ.

Atha vā hite pavattanena ahitā ca nivattanena sattānaṃ bhayaṃ himsati²
Buddho. Bhavakantārā uttāraṇena assāsādānena ca dhammo. Appakānampi
kāraṇaṃ vipulaphalapaṭilābhakaraṇena saṅgho. Tasmā imināpi pariyāyena
ratanattayaṃ saraṇaṃ. Tappasādataggarutāhi vihatakilesa
tapparāyaṇatākārappavatto cittuppādo saraṇagamanāṃ. Tamsamaṅgisatto
saraṇaṃ gacchati, vuttappakārena cittuppādena etāni me tīṇi saraṇāni
saraṇaṃ, etāni parāyaṇanti evaṃ upetīti attho. Evaṃ tāva **saraṇaṃ**
saraṇagamanāṃ yo ca saraṇaṃ gacchatīti idaṃ tayaṃ veditabbaṃ.

Saraṇagamanappabhede pana duvidhaṃ saraṇagamanāṃ lokuttaraṃ
lokiyaṃca. Tattha lokuttaraṃ diṭṭhasaccānaṃ maggakkhaṇe
saraṇagamanupakkilesasamucchedena ārammaṇato nibbānārammaṇaṃ
hutvā kiccatto sakalepi ratanattaye ijjhati. Lokiyaṃ puthujjanānaṃ
saraṇagamanupakkilesavikkhambhanaṃ ārammaṇato
Buddhādiguṇārammaṇaṃ hutvā ijjhati, taṃ atthato Buddhādīsu vatthūsu
saddhāpaṭilābho, saddhāmūlikā ca sammādiṭṭhi dasasu puññakiriyavatthūsu
diṭṭhijukammanti vuccati.

Tayidaṃ catudhā pavattati attasanniyyātanena tapparāyaṇatāya
sissabhāvūpagamanaṃ paṇipātenāti³. Tattha **attasanniyyātaṇaṃ** nāma

1. Khu 2. 76 piṭṭhe.

2. Himsatīti (Sī, Syā)

3. Pāṇipātenāti (Syā, Ka)

“ajja ādim katvā ahaṃ attānaṃ Buddhassa niyyātemi, dhammassa, saṅghassā”ti evaṃ Buddhādīnaṃ attapariccajanaṃ. **Tapparāyaṇatā** nāma “ajja ādim katvā ahaṃ Buddhaparāyaṇo, dhammaparāyaṇo, saṅghaparāyaṇo iti maṃ dhārethā”ti evaṃ tapparāyaṇabhāvo.

Sissabhāvūpagamaṇaṃ nāma “ajja ādim katvā ahaṃ Buddhassa antevāsiko, dhammassa, saṅghassāti maṃ dhārethā”ti evaṃ sissabhāvūpagamo.

Paṇipāto nāma “ajja ādim katvā ahaṃ abhivādanapaccuṭṭhāna-añjalikammasāmīcikammaṃ Buddhādīnaṃyeva tiṇṇaṃ vatthūnaṃ karomi, iti maṃ dhārethā”ti evaṃ Buddhādīsu paramanipaccakāro. Imesañhi catunnaṃ ākārānaṃ aññatarampi karontena gahitaṃyeva hoti saraṇagamaṇaṃ.

Api ca Bhagavato attānaṃ pariccajāmi, dhammassa, saṅghassa attānaṃ pariccajāmi. Jīvitaṃ pariccajāmi, pariccattoyeva me attā, pariccattaṃyeva me jīvitaṃ, jīvitapariyantikaṃ Buddhaṃ saraṇaṃ gacchāmi, Buddho me saraṇaṃ leṇaṃ tāṇanti evampi attasanniyyātanaṃ veditabbaṃ. “Satthārañca vatāhaṃ passeyyaṃ Bhagavantameva passeyyaṃ, Sugatañca vatāhaṃ passeyyaṃ Bhagavantameva passeyyaṃ, Sammāsambuddhañca vatāhaṃ passeyyaṃ Bhagavantameva passeyyaṃ”ti¹ evampi Mahākassapassa saraṇagamaṇaṃ² viya sissabhāvūpagamaṇaṃ daṭṭhabbaṃ.

“So ahaṃ vicarissāmi, gāmaṃ gāmaṃ purā purāṃ.

Namassamaṇo Sambuddhaṃ, dhammassa ca sudhammatan”ti³—

Evampi Āḷavakādīnaṃ saraṇagamaṇaṃ viya tapparāyaṇatā veditabbā. “Atha kho Brāhmāyu brāhmaṇo uṭṭhāyāsanaṃ ekaṃsaṃ uttarāsaṅgaṃ karitvā Bhagavato pādesu sirasā nipatitvā Bhagavato pādāni mukhena ca paricumbati, paṇīhi ca parisambāhati, nāmañca sāveti Brahmāyu ahaṃ bho Gotama brāhmaṇo, Brahmāyu ahaṃ bho Gotama brāhmaṇo”ti⁴ evampi paṇipāto daṭṭhabbo.

So panesa ñātibhayācariyadakkhiṇeyyavasena catubbidho hoti. Tattha dakkhiṇeyyapaṇipātena saraṇagamaṇaṃ hoti, na itarehi. Seṭṭhavaseneva hi saraṇaṃ gayhati, seṭṭhavasena bhijjati, tasmā yo

1. Saṃ 1. 419 piṭṭhe.

3. Khu 1. 307; Saṃ 1. 217 piṭṭesu.

2. Saraṇagamaṇe (Sī, Syā)

4. Ma 1. 345 piṭṭhe.

sākiyo vā koliyo vā “Buddho amhākaṃ ñātako”ti vandati, aggahitameva hoti saraṇaṃ. Yo vā “samaṇo Gotamo rājapūjito mahānubhāvo, avandiyamāno anattampi kareyyā”ti bhayena vandati, aggahitameva hoti saraṇaṃ. Yo vā bodhisattakāle Bhagavato santike kiñci uggahitaṃ saramāno Buddhakāle vā—

“Ekena bhoge bhuñjeyya, dvīhi kammaṃ payojaye.
Catutthaṃ ca nidhāpeyya, āpadāsu bhavissatī”ti¹—

Evarūpaṃ anusāsaniṃ uggahetvā “ācariyo me”ti vandati, aggahitameva hoti saraṇaṃ. Yo pana “ayaṃ loke aggadakkhiṇeyyo”ti vandati, teneva gahitaṃ hoti saraṇaṃ.

Evam gahitasaraṇassa ca upāsakassa vā upāsikāya vā aññatitthiyesu pabbajitampi ñātiṃ “ñātako me ayan”ti vandato saraṇagamanam na bhijjati, pageva apabbajitaṃ. Tathā rājanaṃ bhayavasena vandato, so hi raṭṭhapūjitattā avandiyamāno anattampi kareyyāti. Tathā yaṃkiñci sippaṃ sikkhāpakaṃ titthiyaṃ “ācariyo me ayan”ti vandatopi na bhijjatīti evaṃ saraṇagamanappabhedo veditabbo.

Ettha ca lokuttarassa saraṇagamanassa cattāri sāmāññaphalāni vipākaphalaṃ, sabbadukkhakkhayo ānisaṃsaphalaṃ. Vuttañhetam—

“Yo ca Buddhañca dhammañca, saṃghañca saraṇaṃ gato.
Cattāri ariyasaccāni, sammappaññāya passati,

Dukkhaṃ dukkhasamuppādaṃ, dukkhassa ca atikkamaṃ.
Ariyaṃ caṭṭhaṅgikaṃ maggaṃ, dukkhūpasamagāminaṃ.

Etaṃ kho saraṇaṃ khemaṃ, etaṃ saraṇamuttamaṃ.
Etaṃ saraṇamāgama, sabbadukkhā pamuccatī”ti².

Api ca niccato anupagamanādivasenapetassa ānisaṃsaphalaṃ veditabbaṃ. Vuttañhetam, “aṭṭhānametaṃ bhikkhave anavakāso, yaṃ diṭṭhisampanno puggalo kañci saṅkhāraṃ niccato upagaccheyya, sukhato upagaccheyya, kañci dhammaṃ attato upagaccheyya, mātaraṃ jīvītā voropeyya, pitaraṃ,

1. Dī 3. 153 piṭṭhe.

2. Khu 1. 42 Dhammapade.

arahantaṃ jīvitaṃ voropeyya, duṭṭhacitto Tathāgatassa lohitaṃ uppādeyya, saṃghaṃ bhindeyya, aññaṃ Saṭṭhāraṃ uddiseyya, netaṃ ṭhānaṃ vijjati”¹.

Lokiyassa pana saraṇagamanassa bhavasampadāpi bhogasampadāpi phalameva. Vuttañhetam—

“Yekeci Buddhaṃ saraṇaṃ gatāse,
Na te gamissanti apāyabhūmiṃ.
Pahāya mānusaṃ dehaṃ,
Devakāyaṃ paripūressanti”².

Aparampi vuttaṃ “atha kho Sakko Devānamindo asītiyā devatāsahashehi saddhiṃ yenāyasmā Mahāmoggallāno, tenupasaṅkamaṃ -pa-ekamantaṃ ṭhitaṃ kho Sakkaṃ Devānamindaṃ āyasmā Mahāmoggallāno etadavoca ‘sādhu kho Devānaminda Buddhaṃ saraṇagamaṇaṃ hoti, Buddhaṃ saraṇagamaṇaṃ hetuṃ kho Devānaminda evamidhekacce satta kāyassa bhedaṃ paraṃ maraṇā sugatiṃ saggam lokam upapajjanti”³. Te aññe deve dasahi ṭhānehi adhigaṇhanti dibbena āyunā dibbena vaṇṇena sukkena yasena ādhipateyyena dibbehi rūpehi saddehi gandhehi rashehi phoṭṭhabbehi”³. Esa nayo dhamme saṃghe ca. Api ca Velāmasuttādivasena⁴ saraṇagamaṇassa phalaviseso veditabbo. Evaṃ saraṇagamaṇaphalaṃ veditabbaṃ.

Tattha lokiyasaraṇagamaṇaṃ tisu vatthūsu aññāṇasaṃsayamicchāññādīhi saṃkilissati, na mahājutikaṃ hoti na mahāvipphāraṃ. Lokuttarassa natthi saṃkilesa. Lokiyassa ca saraṇagamaṇassa duvidho bhedo sāvajjo anavajjo ca. Tattha sāvajjo aññasatthārādīsu attasanniyyātanādīhi hoti, so anīṭṭhaphalo. Anavajjo kālaṃ kiriyāya, so avipākattā aphalo. Lokuttarassa pana nevatti bhedo. Bhavantarepi hi ariyasāvako aññaṃ Saṭṭhāraṃ na uddisati evaṃ saraṇagamaṇassa saṃkilesa ca bhedo ca veditabboti. **Upāsakaṃ maṃ bhavaṃ Gotamo dhāretūti** maṃ bhavaṃ Gotamo “upāsako ayan”⁴ti evaṃ dhāretu, jānātūti attho.

1. Ma 3. 110 piṭṭhe; Aṃ 1. 29 piṭṭhe ca.

3. Saṃ 2. 463. 467 piṭṭhādīsu.

2. Saṃ 1. 25 piṭṭhe.

4. Aṃ 3. 195 piṭṭhe.

Upāsakavidhikathā

Upāsakavidhikosallatthaṃ panettha ko upāsako, kasmā upāsakoti vuccati, kimassa sīlaṃ, ko ājīvo, kā vipatti, kā sampattīti idaṃ pakiṇṇakaṃ veditabbaṃ.

Tattha **ko upāsakoti** yo koci tisaraṇagato gahaṭṭho, vuttañhetāṃ “yato kho Mahānāma upāsako Buddhaṃ saraṇaṃ gato hoti, dhammaṃ saraṇaṃ gato hoti, saṅghaṃ saraṇaṃ gato hoti. Ettāvatā kho Mahānāma upāsako hoti”¹.

Kasmā upāsakoti ratanattayassa upāsanato. So hi Buddhaṃ upāsātīti upāsako. dhammaṃ, saṅghaṃ upāsātīti upāsako.

Kimassa sīlanti pañca veramaṇiyo. Yathāha “yato kho Mahānāma upāsako paṇātipātā paṭivirato hoti adinnādānā, kāmesumicchācārā, musāvādā, surāmerayamajjappamādaṭṭhānā paṭivirato hoti. Ettāvatā kho Mahānāma upāsako sīlavā hoti”².

Ko ājīvoti pañca micchāvaṇijjā pahāya dhammena samena jīvitakappanaṃ. Vuttañhetāṃ “pañcimā bhikkhave vaṇijjā upāsakena akaraṇīyā. Katamā pañca. Sathavaṇijjā, sattavaṇijjā, maṃsavaṇijjā, majjavaṇijjā, visavaṇijjā. Imā kho bhikkhave pañca vaṇijjā upāsakena akaraṇīyā”³.

Kā vipattīti yā tasseva sīlassa ca ājīvassa ca vipatti, ayamassa vipatti. Api ca yāya esa caṇḍālo ceva hoti malañca patikuṭṭho⁴ ca. Sāpissa vipattīti veditabbā. Te ca atthato assaddhiyādayo pañca dhammā honti. Yathāha “pañcahi bhikkhave dhammehi samannāgato upāsako upāsakacaṇḍālo ca hoti upāsakamalañca upāsakapatikuṭṭho ca. Katamehi pañcahi. Assaddho hoti, dussīlo hoti, kotūhalamaṅgaliko hoti, maṅgalaṃ pacceti, no kammaṃ, ito ca bahiddhā dakkhiṇeyyaṃ pariyesati, tattha ca pubbakāraṃ karotī”⁵.

1. Saṃ 3. 344 piṭṭhe.

2. Saṃ 3. 145 piṭṭhe.

3. Aṃ 2. 183 piṭṭhe.

4. Patikiṭṭho (Sī)

5. Aṃ 2. 181 piṭṭhe.

Kā sampattīti yā cassa silasampadā ca ājīvasampadā ca, sā sampatti. Ye cassa ratanabhāvādīkarā saddhādayo pañca dhammā. Yathāha “pañcahi bhikkhave dhammehi samannāgato upāsako upāsakaratanāñca hoti upāsakapadumañca upāsakapuṇḍarīkañca¹. Katamehi pañcahi. Saddho hoti, sīlavā hoti, na kotūhalaṅgaliko hoti, kammaṃ pacceti, no maṅgalaṃ, na ito bahiddhā dakkhiṇeyyaṃ gavesati, idha ca pubbakāraṃ karoti”ti².

Ajjataggeti ettha ayaṃ **aggasaddo** ādikoṭikoṭṭhāsaseṭṭhesu dissati. “Ajjatagge samma dovārika āvarāmi dvāraṃ nigaṇṭhānaṃ nigaṇṭhīnaṃ”ti-ādīsu³ hi ādimhi dissati. “Teneva aṅgulaggena taṃ aṅgulaggaṃ parāmaseyya⁴, ucchaggaṃ veḷaggaṃ”ti-ādīsu koṭīyaṃ. “Ambilaggaṃ vā madhuraggaṃ vā tittakaggaṃ vā⁵, anujānāmi bhikkhave viharaggena vā pariveṇaggena vā bhājetun”ti-ādīsu⁶ koṭṭhāse. “Yāvata bhikkhave sattā apadā vā -pa- Tathāgato tesāṃ aggamakkhāyatī”ti-ādīsu⁷ seṭṭhe. Idha panāyaṃ ādimhi daṭṭhabbo. Tasmā **ajjataggeti** ajjataṃ ādim katvā, evamettha attho veditabbo. **Ajjatanti** ajjabhāvaṃ. Ajjadaggeti vā pāṭho, dakāro padasandhikaro, ajja aggaṃ katvāti attho.

Pāṇupetanti pāṇehi upetaṃ, yāva me jīvitaṃ pavattati, tāva upetaṃ. Anaññasatthukaṃ tīhi saraṇagamaṇehi saraṇaṃ gataṃ upāsakaṃ kappiyakāraṃ maṃ bhavaṃ Gotamo dhāretu jānātu. Ahañhi sacepi me tikkhiṇena asinā sīsaṃ chindeyya, neva Buddhaṃ “na Buddha”ti vā dhammaṃ “na dhammo”ti vā saṃghaṃ “na saṃgho”ti vā vadeyyanti. Evaṃ attasanniyyātanena saraṇaṃ gantvā catūhi ca paccayehi pavāretvā uṭṭhāyāsanaṃ Bhagavantaṃ abhivādetvā tikkhattuṃ padakkhiṇaṃ katvā pakkāmīti.

Papañcasūdaniyā Majjhimanikāyaṭṭhakathāya

Bhayabheravasuttavaṇṇanā niṭṭhitā.

1. Upāsakapuṇḍarīko ca (Sī, Syā, Ka)

2. Am 2. 181 piṭṭhe.

3. Ma 2. 43 piṭṭhe.

4. Abhi 4. 237 piṭṭhe.

5. Saṃ 3. 130 piṭṭhe.

6. Vi 4. 317 piṭṭhe.

7. Am 1. 343 piṭṭhe.

5. Anaṅgaṇasuttavaṇṇanā

57. **Evaṃ me sutam -pa- āyasmā Sāriputtoti** Anaṅgaṇasuttam. Tatrāyaṃ anuttānapadavaṇṇanā—yathā cettha, evaṃ sabbasuttesu. Tasmā ito paramṃ ettakampi avatvā apubbapadavaṇṇanamyeva karissāma.

Cattāroti gaṇanaparicchedo. **Puggalāti** sattā narā posā. Ettāvata ca puggalavādī mahātheroti na gahetabbaṃ, ayañhi āyasmā Buddhaputtānaṃ seṭṭho, so Buddhassa Bhagavato desanaṃ avilomentoyeva deseti.

Sammutiparamatthadesanākathā

Buddhassa Bhagavato duvidhā desanā sammutidesanā paramatthadesanā cāti. Tattha puggalo satto itthī puriso khattiyo brāhmaṇo devo māroti evarūpā **sammutidesanā**. Aniccaṃ dukkhaṃ anattā, khandhā dhātū āyatanāni satipaṭṭhānāti evarūpā **paramatthadesanā**.

Tattha Bhagavā ye sammutivasena desanaṃ sutvā atthaṃ paṭivijjhivā mohaṃ pahāya visesamadhigantuṃ samatthā, tesam sammutidesanaṃ deseti. Ye pana paramatthavasena desanaṃ sutvā atthaṃ paṭivijjhivā mohaṃ pahāya visesamadhigantuṃ samatthā, tesam paramatthadesanaṃ deseti. Tatthāyaṃ upamā, yathā hi desabhāsākusalo tiṇṇaṃ vedānaṃ atthasamvaṇṇanaṃ ācariyo ye dāmaḷabhāsāya vutte atthaṃ jānanti, tesam dāmaḷabhāsāya ācikkhati. Ye andhakabhāsādīsu aññatarāya, tesam tāya tāya bhāsāya. Evaṃ te māṇavakā chekaṃ byattaṃ ācariyamāgama khippameva sippaṃ uggaṇhanti. Tattha ācariyo viya Buddho Bhagavā. Tayo vedā viya kathetabbabhāvena ṭhitāni tīṇi piṭakāni. Desabhāsākosallamiva sammutiparamatthakosallaṃ. Nānādesabhāsā māṇavakā viya sammutiparamatthadesanāpaṭivijjhanasamatthā veneyyasattā. Ācariyassa dāmaḷabhāsādi-ācikkhanaṃ viya Bhagavato sammutiparamatthavasena desanā veditabbā. Āha cettha—

“Duve saccāni akkhāsi, Sambuddho vadataṃ varo.
Sammutiṃ paramatthañca, tatiyaṃ nūpalabbhati.

Saṅketavacanaṃ saccaṃ, lokasammutikāraṇā.
 Paramatthavacanaṃ saccaṃ, dhammānaṃ bhūtakāraṇā.
 Tasmā vohārakusalassa, Lokanāthassa Satthuno.
 Sammutiṃ voharantassa, musāvādo na jāyati”ti.

Api ca aṭṭhahi kāraṇehi Bhagavā puggalakathaṃ katheti
 hirottappadīpanatthaṃ, kammassakatādīpanatthaṃ,
 paccattapurisakāradīpanatthaṃ, ānantariyadīpanatthaṃ,
 brahmavihāradīpanatthaṃ, pubbenivāsadīpanatthaṃ,
 dakkhiṇāvisuddhidīpanatthaṃ, lokasammutiyā appahānatthaṃ cāti.
 “Khandhadhātu-āyatanāni hiriyanti ottappanti”ti hi vutte mahājano na jānāti,
 sammohamāpajjati, paṭisattu hoti “kimidaṃ khandhadhātu-āyatanāni
 hiriyanti ottappanti nāmā”ti. “Ithi hiriyati ottappati puriso khattiyō
 brāhmaṇo devo māro”ti vutte pana jānāti, na sammohamāpajjati, na
 paṭisattu hoti. Tasmā Bhagavā **hirottappadīpanatthaṃ** puggalakathaṃ
 katheti.

“Khandhā kammassakā dhātuyo āyatanāni”ti vuttepi eseva nayo. Tasmā
 Bhagavā **kammassakatādīpanatthaṃ** puggalakathaṃ katheti.

“Veḷuvanādayo Mahāvihārā khandhehi kārapitā dhātuhi āyatanehi”ti
 vuttepi eseva nayo. Tasmā Bhagavā **paccattapurisakāradīpanatthaṃ**
 puggalakathaṃ katheti.

“Khandhā mātaraṃ jīvitā voropenti pitaraṃ arahantaṃ
 ruhiruppādakammaṃ karonti, saṅghabhedakammaṃ karonti, dhātuyo
 āyatanāni”ti vuttepi eseva nayo. Tasmā Bhagavā **ānantariyadīpanatthaṃ**
 puggalakathaṃ katheti. “Khandhā mettāyanti dhātuyo āyatanāni”ti vuttepi
 eseva naso. Tasmā Bhagavā **brahmavihāradīpanatthaṃ** puggalakathaṃ
 katheti.

“Khandhā pubbenivāsamanussaranti dhātuyo āyatanāni”ti vuttepi eseva
 nayo. Tasmā Bhagavā **pubbenivāsadīpanatthaṃ** puggalakathaṃ katheti.
 “Khandhā dānaṃ paṭiggaṇhanti dhātuyo āyatanāni”ti vuttepi mahājano na
 jānāti, sammohamāpajjati, paṭisattu hoti “kimidaṃ khandhadhātu-āyatanāni
 paṭiggaṇhanti nāmā”ti. “Puggalā paṭiggaṇhanti sīlavanto kalyāṇadhammā”ti
 vutte pana jānāti, na sammohamāpajjati, na paṭisattu hoti. Tasmā Bhagavā
dakkhiṇāvisuddhidīpanatthaṃ puggalakathaṃ katheti.

Lokasammutim ca Buddhā Bhagavanto nappajahanti, lokasamaññāya lokaniruttīyam lokābhilāpe ʃhitāyeva dhammaṃ desenti. Tasmā Bhagavā **lokasammutiyā appahānatthampi** puggalakathaṃ katheti. Tasmā ayampi āyasmā lokavohārakusalatāya Buddhassa Bhagavato desanaṃ avilomento lokasammutiyam ʃhatvāva **cattārome āvuso puggalāti** āha. Tasmā ettha paramatthavasena aggahetvā sammutivaseneva puggalo veditabbo.

Santo sarivijjānāti lokasaṅketavasena atthi upalabbhamānā. **Lokasminti** sattaloke. **Sāṅgaṇova samānoti**-ādīsu pana **aṅgaṇanti** katthaci kilesā vuccanti. Yathāha “tattha katamāni tīṇi aṅgaṇāni, rāgo aṅgaṇaṃ, doso aṅgaṇaṃ, moho aṅgaṇaṃ”ti¹. Katthaci yaṃkiñci malaṃ vā paṅko vā, yathāha “tasseva rajassa vā aṅgaṇassa vā pahānāya vāyamati”ti. Katthaci tathārūpo bhūmibhāgo, so bodhiyaṅgaṇaṃ cetiyaṅgaṇanti-ādīnaṃ vasena veditabbo. Idha pana nānappakārā tibbakilesā “aṅgaṇaṃ”ti adhippetā. Tathā hi vakkhati “pāpakānaṃ kho etaṃ āvuso akusalānaṃ icchāvacaṇānaṃ adhivacaṇaṃ, yadidaṃ aṅgaṇaṃ”ti². Saha aṅgaṇena **sāṅgaṇo**.

Sāṅgaṇova samānoti sakilesoyeva santo. **Atthi me ajjhataṃ aṅgaṇanti yathābhūtaṃ nappajānāti**ti mayhaṃ attano cittasantāne kilesa atthītipi na jānāti. “Ime kilesā nāma kakkhaḷā vāḷā jahitabbā na gahitabbā visaduṭṭhasallasadisā”ti evaṃ yāthāvasarasatopi na jānāti. Yo atthīti ca jānāti, evaṃca jānāti. So “atthi me ajjhataṃ aṅgaṇanti yathābhūtaṃ pajānāti”ti vuccati. Yassa pana na ca maggena samūhatā kilesā, na ca uppajjanti yena vā tena vā vāritattā, ayamidha anaṅgaṇoti adhippeto. **Natthi me ajjhataṃ aṅgaṇanti yathābhūtaṃ nappajānāti**ti “mayhaṃ kilesā yena vā tena vā vāritattā natthi, na maggena samūhatattā”ti na jānāti, “te uppajjamānā mahā-anatthaṃ karissanti kakkhaḷā vāḷā visaduṭṭhasallasadisā”ti evaṃ yāthāvasarasatopi na jānāti. Yo pana “iminā kāraṇena natthī”ti ca jānāti, evaṃca jānāti, so “natthi me ajjhataṃ aṅgaṇanti yathābhūtaṃ pajānāti”ti

1. Abhi 2. 382 piṭṭhe.

2. Ma 1. 32 piṭṭhe.

vuccati. **Tatrāti** tesu catūsu puggalesu, tesu vā dvīsu sāṅgaṇesu, **yvāyanti** yo ayam, yāyantipi pāṭho.

58. **Ko nu kho āvuso Sāriputta hetu ko paccayoti** ubhayenāpi kāraṇameva pucchati. **Yenimesanti** yena hetunā yena paccayena imesaṃ dvinnaṃ eko seṭṭhapuriso eko hīnapuriso akkhāyati, so ko hetu ko paccayoti evamettha sambandho veditabbo. Tattha kiñcāpi “nappajānāti pajānāti”ti evaṃ vuttaṃ, pajānanā nappajānanāti idameva ubhayaṃ hetu ceva paccayo ca.

59. Thero pana attano vicitrapaṭibhānatāya taṃ pākaṭataraṃ katvā dassetuṃ puna **tatrāvusoti**-ādimāha. Tattha **tassetam pāṭikaṅkhanti** tassa puggalassa etaṃ pāṭikaṅkhitabbaṃ. Idameva esa pāpuṇissati, na aññanti icchitabbaṃ, avassaṃ bhāvīti vuttaṃ hoti. “Na chandaṃ janessatī”ti-ādinā nayena vuttaṃ achandajananādiṃ sandhāyāha.

Tattha ca **na chandaṃ janessatīti** appajānanto tassa aṅgaṇassa pahānatthaṃ kattukamyatāchandaṃ na janessati. **Na vāyamissatīti** tato balavataraṃ vāyamaṃ na karissati, **na vīriyaṃ ārabhissatīti** thāmagatavīriyaṃ pana neva ārabhissati, na pavattessatīti vuttaṃ hoti. **Sāṅgaṇoti** imehi rāgādīhi aṅgaṇehi sāṅgaṇo. **Samkiliṭṭhacittoti** tehiyeva suṭṭhuturaṃ kiliṭṭhacitto malīnacitto vibādhitacitto upatāpitacitto ca hutvā. **Kālaṃ karissatīti** marissati.

Seyyathāpīti yathā nāma. **Kāmsapātīti** kāmsalohabhājanaṃ. **Ābhatīti** ānītā. **Āpaṇā vā kammārakulā vāti** āpaṇato vā kāmsapātikārakānaṃ kammārānaṃ gharato vā. **Rajenāti** āgantukarajena paṃsu-ādinā. **Malenāti** tattheva uṭṭhitena lohamalena. **Pariyonaddhāti** sañchannā. **Na ceva paribhuñjeyyunti** udakakhādanīyapakkhipanādīhi paribhogaṃ na kareyyuṃ. **Na ca pariyo dapeyyunti** dhovanaghaṃsanādīhi na parisuddhaṃ kārāpeyyuṃ. **Rajāpatheti** rajapathe, ayameva vā pāṭho, rajassa āgamanatṭhāne vuṭṭhānuṭṭhāne vā heṭṭhāmañce vā thusakoṭṭhake vā bhājanantare vā, yattha rajena okiriyatīti attho. **Samkiliṭṭhatarā assa malaggahitāti** ettha rajāpathe nikkhipanena samkiliṭṭhatarā,

aparibhogāpariyodapanehi malaggahitatarāti vuttam̐ hoti,
 paṭipucchāvacaṇam̐ cetam̐. Tenassa evamattho veditabbo, āvuso sā
 kamsapāti evam̐ karīyamānā aparena kālena saṁkiliṭṭhatarā ca
 malaggahitatarā ca mattikapātīti vā kamsapātīti vā itipi dujjānā bhaveyya nu
 kho noti, thero tam̐ paṭijānanto āha “evamāvuso”ti. Puna Dhammasenāpati
 opammaṁ sampaṭipādento **evameva khoti**-ādimāha. Tatthevaṁ
 opammasaṁsandanaṁ veditabbā—kiliṭṭhakamsapātisadisō sāṅgaṇo puggalo.
 Saṁkiliṭṭhakamsapātiyā napaṭibhuñjanamādīṁ katvā rajāpathanikkhepo viya
 tassa puggalassa pabbajjāṁ labhamānassa vejjakammādīsu
 pasutapuggalasantike pabbajjāpaṭilābho. Saṁkiliṭṭhakamsapātiyā puna
 saṁkiliṭṭhatarabhāvo viya tassa puggalassa anukkamena ācariyupajjhāyānam̐
 anusikkhato vejjakammādikaraṇam̐, ettha ṭhitassa sāṅgaṇakālakiriyā. Atha
 vā anukkamena dukkaṭadubbhāsītavītikkamaṇam̐, ettha ṭhitassa
 sāṅgaṇakālakiriyā. Atha vā anukkamena pācittiyathullaccayavītikkamaṇam̐,
 saṁghādisesavītikkamaṇam̐, pārājikavītikkamaṇam̐, mātughātādi-
 ānantariyakaraṇam̐, ettha ṭhitassa sāṅgaṇakālakiriyāti.

Saṁkiliṭṭhacitto kālam̐ karissatīti ettha ca akusalacittena kālam̐
 karissatīti na evam̐ attho daṭṭhabbo. Sabbasattā hi pakaticittena
 bhavaṅgacitteneva kālam̐ karonti. Ayam̐ pana avisodhetvā cittasantānam̐
 kālam̐ karissatīti etamattham̐ sandhāya evam̐ vuttoti veditabbo.

Dutiyavāre **pariyodapeyyunti**
 dhovanaghaṁsanasaṅhachārikāparimajjanādīhi parisuddham̐
 ādāsamaṅḍalasadisaṁ kareyyuṁ. **Na ca nam̐ rajāpatheti** pubbe vuttapakāre
 ṭhāne anikkhipitvā karaṅḍamañjūsādīsu vā ṭhapeyyuṁ, paliveṭhetvā vā
 nāgadante lageyyuṁ. Sesam̐ vuttanayānusāreneva gahetabbaṁ.

Upamāsaṁsandanaṁ cettha evam̐ veditabbā—kiliṭṭhakamsapātisadisō
 sāṅgaṇo bhābbapuggalo. Kiliṭṭhakamsapātiyā paṭibhuñjanamādīṁ katvā
 suddhaṭṭhāne ṭhapanam̐ viya tassa puggalassa pabbajjāṁ labhamānassa
 pesalabhikkhūnam̐ santike pabbajjāpaṭilābho. Ye ovadanti anusāsanti
 appamattakampi pamādam̐ disvā daṅḍakammaṁ katvā punappunam̐
 sikkhāpenti, saṁkiliṭṭhakamsapātiyā

aparakāle parisuddhapariyodātabhāvo viya tassa puggalassa ācariyupajjhāyānam anusikkhato anukkamena sammāvattapaṭipatti, ettha ṭhitassa anaṅgaṇakālakiriyā. Atha vā anukkamena parisuddhe sīle paṭiṭṭhāya attano anurūpaṃ Buddhavacanaṃ uggaṇhitvā dhutaṅgāni samādāya attano anukūlakammaṭṭhānaṃ gahetvā gāmantasenāsanavāsaṃ muñcitvā pantasenāsanavāso, ettha ṭhitassa anaṅgaṇakālakiriyā. Atha vā anukkamena kasiṇaparikkammaṃ katvā aṭṭhasamāpattinibbattanena kilesavikkhambhanaṃ, vipassanāpādakajjhānā vuṭṭhāya vipassanāya kilesānaṃ tadaṅganivāraṇaṃ, sotāpattiṭṭhāyānaṃ -pa- arahattasacchikiriyāti ettha ṭhitassa accantaṃ anaṅgaṇakālakiriyā eva.

Tatīyavāre **subhanimittanti** rāgaṭṭhāniyaṃ iṭṭhārammaṇaṃ. **Manasi karissatīti** tasmim vipannassati taṃ nimittaṃ āvajjissati. **Tassa subhanimittassa manasikārāti** tassa puggalassa subhanimittamanasikārakāraṇā. **Anuddhamssessatīti** hiṃsissati adhibhavissati. Rāgo hi uppajjanto kusalavāraṃ pacchinditvā sayameva akusalajavanaṃ hutvā tiṭṭhanto kusalacittaṃ anuddhamsetīti veditabbo. Sesāṃ vuttanayānusāreṇeva gahetabbaṃ.

Opammasāmsandaṇā panettha evaṃ veditabbā—
parisuddhakāmsapātisadiso pakatīyā appakilesa anaṅgaṇapuggalo.
Parisuddhakāmsapātīyā napaṭibhuñjanaṃ ādiṃ katvā rajāpathe nikkhepo viya tassa puggalassa pabbajjāṃ labhamānassāti ito paraṃ sabbaṃ paṭhamavārasadisameva.

Catutthavāre **subhanimittam na manasi karissatīti** tasmim sativirahābhāvato taṃ nimittaṃ nāvajjissati, sesāṃ dutiyavārānusāreṇa veditabbaṃ. “Ayaṃ kho āvuso”ti-ādi “ko nu kho āvuso”ti-ādimhi vuttanayameva.

60. Idāni taṃ aṅgaṇaṃ nānappaṅkārato pākaṭaṃ kārapetukāmenāyasmaṭā Mahāmoggallānena “aṅgaṇaṃ aṅgaṇaṃ”ti-ādinā nayena puṭṭho taṃ byākāronto **pāpakānaṃ kho etaṃ āvusoti-ādimāha**. Tattha **icchāvacarānanti** icchāya avacarānaṃ, icchāvasena otiṇṇānaṃ pavattānaṃ nānappaṅkārānaṃ kopa-appaccayānanti attho. **Yaṃ idhekaccassāti** yena idhekaccassa evaṃ icchā uppajjeyya, taṃ ṭhānaṃ taṃ kāraṇaṃ vijjati atthi,

upalabbhatīti vuttaṃ hoti. **Āpanno assanti** āpanno bhaveyyaṃ. **Na ca maṃ bhikkhū jāneyyunti** bhikkhū ca maṃ na jāneyyuntī. Kiṃ panettha ṭhānaṃ, lābhatthikatā. Lābhatthiko hi bhikkhu pakatīyāpi ca katapuñño manussehi sakkato garukato evaṃ cinteti “āpattīṃ āpannaṃ bhikkhuṃ therā ñatvā majjhimānaṃ ārocenti, te navakānaṃ, navakā vihāre vighāsādāṇaṃ, te ovādaṃ āgatānaṃ bhikkhunīnaṃ, evaṃ kamena catasso parisā jānanti. Evamassa lābhantarāyo hoti. Aho vatāhaṃ āpattīṃ ca vata āpanno assaṃ, na ca maṃ bhikkhū jāneyyuntī”ti.

Yaṃ taṃ bhikkhuṃ bhikkhū jāneyyunti yena kāraṇena taṃ bhikkhuṃ aññe bhikkhū jāneyyuntī, taṃ kāraṇaṃ vijjati kho pana atthiyeva, no natthi. Therā hi ñatvā majjhimānaṃ ārocenti. Evaṃ so pubbe vuttanayena catūsu parisāsu pākaṭo hoti. Evaṃ pākaṭo ca ayasābhībhūto gāmasatampi pavisitvā ummārasatesu ṭhānesu uñchitvā¹ yathādhotena pattena nikkhamati. Tato **jānanti maṃ bhikkhū āpattīṃ āpannoti** tehi camhi evaṃ nāsītoti cintetvā, **iti so kupito hoti appatīto** so iminā kāraṇena kupito ceva hoti kodhābhībhūto appatīto ca domanassābhībhūto.

Yo ceva kho āvuso kopo yo ca appaccayo ubhayametaṃ aṅgaṇanti āvuso yo cāyaṃ saṅkhārakkhandhasaṅgahito kopo, yo ca vedanākkhandhasaṅgahito appaccayo, etaṃ ubhayaṃ aṅgaṇanti evamettha attho daṭṭhabbo. Idañca tādisānaṃ puggalānaṃ vasena vuttaṃ. Lobho pana imassa aṅgaṇassa pubbabhāgavasena, moho sampayogavasenāpi gahitoyeva hoti.

Anuraho manti purimasadisameva bhikkhuṃ gahetvā vihārapaccante senāsaṇaṃ pavesetvā dvāraṃ thaketvā codente icchati. **Ṭhānaṃ kho panetanti** etaṃ kāraṇaṃ vijjati, yaṃ taṃ bhikkhuṃ catuparisamajjhe ānetvā byattā vinītā “tayā asukamhi nāma ṭhāne vejjakammaṃ katan”ti-ādinā nayena codeyyuntī. So catūsu parisāsu pākaṭo hoti. Evaṃ pākaṭo ca ayasābhībhūtoti sabbaṃ purimasadisameva.

1. Pāde puñchitvā (Sī, Syā)

Sappaṭipuggaloti samāno puggalo. **Samānoti** sāpattiko. **Paṭipuggaloti** codako. Ayaṃ sāpattikeneva codanaṃ icchati, tvampi imañcīmañca āpattim āpanno, taṃ tāva paṭikarohi pacchā maṃ codessasīti vuttuṃ sakkāti maññamāno. Api ca jāti-ādīhipi samāno puggalo sappaṭipuggalo. Ayañhi attano jātiyā kulena bāhusaccena byattatāya dhutaṅgenāti evamādīhipi samāneneva codanaṃ icchati, tādīsena vuttaṃ nātidukkhaṃ hotīti maññamāno. **Appaṭipuggaloti** ettha ayutto paṭipuggalo appaṭipuggalo. Imehi āpattādīhi asadisattā paṭisattu paṭisallo¹, codako bhavituṃ ayuttoti vuttaṃ hoti. **Iti so kupitoti** iti so imāya appaṭipuggalacodanāya evaṃ kupito hoti.

Catutthavāre **aho vatāti** “aho vata re amhākaṃ paṇḍitakā, aho vata re amhākaṃ bahussutakā tevijjakā”ti² garahāyaṃ dissati. “Aho vata maṃ daharaṃyeva samānaṃ rajje abhisīnceyyun”ti³ patthanāyaṃ. Idha patthanāyameva. **Paṭipucchitvā paṭipucchitvāti** punappunaṃ pucchitvā. Ayaṃ bhikkhu lābhatthiko Bhagavato attānaṃ paṭipucchitabbaṃ icchati, taṃ ca kho anumatipucchāya, no maggaṃ vā phalaṃ vā vipassanaṃ vā antaraṃ katvā. Ayañhi passati Bhagavantaṃ Sāriputtādayo mahāthere “taṃ kiṃ maññasi Sāriputta, Moggallāna, Kassapa, Rāhula cakkhuṃ niccaṃ vā aniccaṃ vā”ti evaṃ parisamajjhe paṭipucchitvā paṭipucchitvā dhammaṃ desentaṃ, manusse ca “tesaṃ paṇḍitā therā Satthu cittaṃ ārādhenti”ti vaṇṇaṃ bhaṇante, lābhasakkāraṃca upaharante. Tasmā taṃ lābhasakkāraṃ icchanto evaṃ cintetvā nikhaṇitvā ṭhapitakhāṇu viya Bhagavato puratova hoti.

Iti so kupitoti atha Bhagavā taṃ amanasikarivāva aññaṃ therāṃ paṭipucchitvā dhammaṃ deseti, tena so kupito hoti Bhagavato ca therassa ca. Kathaṃ Bhagavato kuppatti? “Ahaṃ pabbajitakālato pabhuti Gandhakuṭipariveṇato bahinikkhamaṇaṃ na jānāmi, sabbakālaṃ chāyāva na vijahāmi, maṃ nāma pucchitvā dhammadesanāmattampi natthi. Taṃmuhuttaṃ diṭṭhamattakameva therāṃ pucchitvā dhammaṃ deseti”ti evaṃ Bhagavato kuppatti. Kathaṃ therassa kuppatti? “Ayaṃ mahallakatthero Bhagavato purato

1. Paṭimallo (Sī, Syā)

2. Dī 1. 100 piṭṭhe.

3. Vi 3. 47 piṭṭhe.

khāṇu viya nisīdati, kadā nu kho imaṃ dhammakammikā abhabbaṭṭhānaṃ pāpetvā nīharissanti, ayañhi yadi imasmim̐ vihāre na bhaveyya, avassaṃ Bhagavā mayā saddhim̐ sallapeyyā”ti evaṃ therassa kuppati.

Purakkhatvā purakkhatvāti purato purato katvā, samparivāretvāti vuttam̐ hoti. Ayampi lābhatthikoyeva, ayañhi passati bahussute bhikkhū mahāparivārena gāmaṃ pavisante, cetiyam̐ vandante, tesañca taṃ sampattim̐ disvā upāsake pasanne pasannākāraṃ karonte. Tasmā evaṃ icchati. **Kupitoti** ayampi dvīsu ṭhānesu kuppati bhikkhūnaṃ therassa ca. Kathaṃ bhikkhūnaṃ? “Ime yadeva mayhaṃ uppajjati cīvaraṃ vā piṇḍapāto vā, taṃ gahetvā paribhuñjanti, mayhaṃ pana pattacīvaraṃ gahetvā piṭṭhito āgacchantopi natthī”ti evaṃ bhikkhūnaṃ kuppati. Kathaṃ therassa? “Eso mahallakatthero tesu tesu ṭhānesu sayameva paññāyati, kudāssu nāma naṃ dhammakammikā nikkadḍhissanti, imasmim̐ asati avassaṃ mañyeva parivāressanti”ti.

Bhattaggeti bhojanaṭṭhāne. **Aggāsananti** saṃghattherāsaṇaṃ. **Aggodakanti** dakkhiṇodakaṃ. **Aggapinḍanti** saṃghattherapiṇḍaṃ. Sabbattha vā **agganti** paṇitādhivacanametam̐. Tattha **ahameva labheyyanti** icchā nātimahāsavajjā. **Na añño bhikkhu labheyyāti** pana atimahāsavajjā. Ayampi lābhatthiko pāsādiko hoti cīvaradhāraṇādīhi, kadāci pabbajati, kadāci vibbhamati, tena so pubbe laddhapubbaṃ āsanādim̐ pacchā alabhanto evaṃ cintesi. **Na so bhikkhu labheyyāti** na so bhikkhu therānaṃ aggāsanādīsu¹ tadanusārena majjhimānaṃ aññesañca navānaṃ kadāci yaṃ vā taṃ vā sabbanihīnaṃ āsanādim̐ labhati. **Kupitoti** ayampi dvīsu ṭhānesu kuppati manussānaṃ ca therānaṃ ca. Kathaṃ manussānaṃ? “Ime maṅgalādīsu maṃ nissāya bhikkhū labhanti, ete ‘bhante ettake bhikkhū gahetvā amhākaṃ anukampaṃ karoṭhā’ti vadanti, idāni taṃmuhuttaṃdiṭṭhamattakaṃ mahallakattheraṃ gahetvā gatā, hotu idāni, nesam̐ kicce uppanne jānissāmī”ti evaṃ manussānaṃ kuppati. Kathaṃ therānaṃ? “Ime nāma yadi na bhaveyyuṃ, mañyeva manussā nimanteyyun”ti evaṃ therānaṃ kuppati.

1. Aggāsanādīsu pattersu (Sī, Syā)

Anumodeyyanti anumodanaṃ kareyyaṃ. Ayampi lābhatthiko yaṃ vā taṃ vā khaṇḍānumodanaṃ jānāti, “so anumodanaṭṭhāne bahū mātugāmā āgacchanti, tā maṃ sañjānitvā tato pabhuti thālakabhikkhaṃ dassanti”ti patthento evaṃ cintesi. **Ṭhānanti** bahussutānaṃ anumodanā bhāro, tena bahussuto anumodeyyāti vuttaṃ hoti. **Kupitoti** ayampi tīsu ṭhānesu kuppāti manussānaṃ therassa dhammakathikassa ca. Kathaṃ manussānaṃ? “Ime pubbe maṃyeva upasaṅkamitvā yācanti ‘amhākaṃ Nāgatthero amhākaṃ Sumanatthero anumodātū’ti, ajja pana nāvocun”ti evaṃ manussānaṃ kuppāti. Kathaṃ therassa? “Ayaṃ saṃghatthero ‘tumahākaṃ kulupakaṃ Nāgattheraṃ Sumanattheraṃ upasaṅkamatha, ayaṃ anumodissati’ti na bhaṇāti”ti evaṃ therassa kuppāti. Kathaṃ dhammakathikassa? “Therena vuttamatteyyeva pahāraṃ laddhakukkuṭo viya turitaturitaṃ vassati, imaṃ nāma nikkadḍhantā natthi, imasmiñhi asati ahameva anumodeyyan”ti evaṃ dhammakathikassa kuppāti.

Ārāmagatānanti vihāre sannipatitānaṃ. Ayampi lābhatthiko yaṃ vā taṃ khaṇḍadhammakathaṃ jānāti, so passati tādīsesu ṭhānesu dviyojanatiyojanato sannipatitvā bhikkhū sabbarattikāni dhammassavaṇāni¹ suṇante, tuṭṭhacitte ca dahare vā sāmaṇere vā sādhu sādhuṭi mahāsaddena sādhuḥkāraṃ dente, tato dutiyadivase antogāmagate bhikkhū upāsakā pucchanti “ke bhante dhammaṃ kathesun”ti. Te bhaṇanti “asuko ca asuko cā”ti. Taṃ sutvā pasannā manussā dhammakathikānaṃ mahāsakkāraṃ karonti. So taṃ icchamāno evaṃ cintesi. **Ṭhānanti** bahussutānaṃ vinicchayakusalānaṃ dhammadesanā bhāro, tena bahussuto deseyyāti vuttaṃ hoti. **Kupitoti** catuppadikaṃ gāthampi vattuṃ okāsaṃ alabhamāno kupito hoti attano mandabhāvassa “ahañhi mando duppañño kuto labhissāmi desetun”ti.

Bhikkhunīnanti ovādatthaṃ vā uddesatthaṃ vā paripucchatthaṃ vā pūjākaraṇatthaṃ vā ārāmaṃ āgantvā sannipatitabhikkhunīnaṃ. Ayampi lābhatthiko, tassevaṃ hoti imā mahākulā pabbajitā bhikkhuniyo, tāsū kulesu pavisetvā nisinnāsu manussā pucchissanti “kassa santike ovādaṃ vā uddesaṃ vā paripucchāṃ vā gaṇhathā”ti. Tato vakkhanti “asuko nāma

1. Sabbarattikaniccadhammassavaṇāni (Sī, Syā)

ayyo bahussuto, tassa detha karoṭhā”ti, tenassa evaṃ icchā uppajjati.

Ṭhānanti ovādādayo nāma bahussutānaṃ bhāro, tena bahussuto deseyyāti vuttam hoti. **Kupitoti** ayampi dvīsu ṭhānesu kuppatti, tāsāṅca bhikkhunīnaṃ “imā pubbe maṃ nissāya uposathappavāraṇādīni labhanti, tā idāni taṃmuhuttaṃ diṭṭhamattakamahallakattherassa santikaṃ gatā”ti, dhammakathikassa ca “esa imāsaṃ sahasā ovādaṃ adāsiyevā”ti.

Upāsakānanti āramagatānaṃ upāsakānaṃ. Nissaṭṭhakammantā nāma mahā-upāsakā honti, te puttabhātukānaṃ kammaṃ niyyātetvā dhammaṃ suṇantā vicaranti, ayaṃ tesaṃ desetum icchati, kiṃ kāraṇā? Ime pasīditvā upāsikānampi āroccanti, tato saddhim upāsikāhi mayhameva lābhasakkāraṃ upaharissanti. Ṭhānaṃ bahussuteneva yojetabbaṃ. **Kupitoti** ayampi dvīsu ṭhānesu kuppatti, upāsakānaṅca “ime aññattha suṇanti, amhākaṃ kulupakassa santike suṇāmāti nāgacchanti, hotu idāni, tesaṃ uppanne kicce jānissāmi”ti, dhammakathikassa ca “ayametesam desetī”ti.

Upāsikānanti āramagatānaṃ. **Upāsikā** nāma āsanapūjadikaraṇatthaṃ vā uposathadivase vā dhammassavanatthaṃ sannipatitā. Sesaṃ upāsakavāre vuttanayameva.

Sakkareyyunti sakkaccaṃ ca kareyyum, sundaraṃ ca kareyyum. Iminā attani kāraṃ karīyamānaṃ sakkaccaṃ kataṃ ca sundaraṃ ca pattheti. **Garum kareyyunti** bhāriyaṃ kareyyum, iminā bhikkhūhi attānaṃ garuṭṭhāne ṭhapīyamānaṃ pattheti. **Māneyyunti** piyāyeyyum. **Pūjeyyunti** evaṃ sakkarontā garum karontā mānentā paccayehi pūjeyyunti paccayapūjaṃ pattheti. **Ṭhānanti** “piyo garu bhāvaniyo”ti vuttappakāro bahussuto ca sīlavā ca etaṃ vidhim arahati, tena bhikkhū evarūpaṃ evaṃ kareyyunti vuttam hoti. **Kupitoti** ayampi dvīsu ṭhānesu kuppatti, bhikkhūnaṃ ca “ime etaṃ sakkarontī”ti, therassa ca “imasmiṃ asati maṃyeva sakkareyyun”ti. Esa nayo ito paresu tīsu vāresu.

Paṇītānaṃ cīvarānanti paṭṭadukūlapaṭṭuṇṇakoseyyādīnaṃ mahagghasukhumasukhasamphassānaṃ cīvarānaṃ. Idhāpi **ahameva lābhī assanti** icchā nātimahāsāvajjā. **Na añño bhikkhu lābhī assāti** pana mahāsāvajjā.

Paṇītānaṃ piṇḍapātānanti sappitelamadhusakkarādipūritānaṃ¹ seṭṭhapiṇḍapātānaṃ. **Paṇītānaṃ senāsanānanti** anekasatasahassagghanakānaṃ mañcapīṭhādīnaṃ paṇītānaṃ. **Gilānappaccayabhesajjaparikkhārānanti** sappitelamadhuphāṇitādīnaṃ uttamabhesajjānaṃ. Sabbatthāpi ṭhānaṃ bahussutehi puññavantehi ca yojetabbaṃ. **Kupitoti** sabbatthāpi dvīsu ṭhānesu kuppāti, manussānaṃ ca “imesaṃ nāma paricitabhāvopi natthi, dīgharattaṃ ekato vasantassa paṃsukūlatthāya vā piṇḍapātattthāya vā sappitelādikāraṇā vā gharapaṭipāṭiyā carantassāpi me ekadivasampi kiñci paṇītaṃ paccayaṃ na denti. Āgantukaṃ mahallakaṃ pana disvāva yaṃ icchati, taṃ denti”ti, therassa ca “ayampi mahallako imesaṃ attānaṃ dassentoyeva carati, kudāssu nāma naṃ dhammakammikā nikkaddheyyuṃ, evaṃ imasmiṃ asati ahameva lābhī assan”ti.

Imesaṃ kho etaṃ āvusoti imesaṃ heṭṭhā ekūnavīsativārehi vuttānaṃ icchāvacarānaṃ.

61. **Dissanti sūyanti cāti** na icchāvacarā cakkhunā dissanti, na sotena sūyanti, manoviññāṇavisayattā. Appahīna-icchāvacarassa pana puggalassa icchāvacaravasena pavattakāyakammaṃ disvā diṭṭhā viya vacīkammaṃ sutvā sutā viya ca honti, tena vuttaṃ “dissanti sūyanti cā”ti. Paccakkhakāle dissanti, “asuko kira bhikkhu īdiso”ti tirokkhakāle² sūyanti. **Kiñcāpīti** anuggahagarahavacanaṃ. Tena āraññikattaṃ anuggaṇhāti, icchāvacarānaṃ appahānaṃ garahati.

Tatrāyaṃ yojanā, kiñcāpi so bhikkhu gāmantasenāsaṇaṃ paṭikkhipitvā āraññiko hoti, ante paṇāsaṇasane vasati, ime cassa ettakā icchāvacarā appahīnā. Kiñcāpi so atirekalābhaṃ paṭikkhipitvā

1. Sappitelamaṃsasakkarādipūritānaṃ (Ka), sappitelamaṃsarasādipūritānaṃ (Syā)

2. Parokkhakāle (Syā)

piṇḍapātiko hoti. Kiñcāpi so loluppacāraṃ vajjetvā sapadānacārī hoti. Kiñcāpi so gahapaticivaraṃ paṭikkhipitvā paṃsukūliko hoti.

Lūkhacīvaradhāroti ettha pana **lūkhanti** satthalūkhaṃ suttalūkhaṃ rajanalūkhanti tīhi kāraṇehi lūkhaṃ veditabbaṃ. Tattha satthena khaṇḍākhaṇḍikaṃ chinnaṃ **satthalūkhaṃ** nāma, taṃ agghena parihāyati, thūladīghasuttakena sibbitaṃ **suttalūkhaṃ** nāma, taṃ phassena parihāyati kharasamphassaṃ hoti. Rajanena rattaṃ **rajanalūkhaṃ** nāma, taṃ vaṇṇena parihāyati dubbaṇṇaṃ hoti. Kiñcāpi so bhikkhu evaṃ satthalūkhasuttalūkharajanalūkhacīvaradhāro hoti, ime cassa ettakā icchāvacaṛā appahīnā dissanti ceva sūyanti ca, atha kho naṃ viññū sabrahmacāri neva sakkaronti -pa- na pūjentīti. **Taṃ kissa hetūti** ettha **tanti** nipātamattaṃ, **kissa hetūti** kiṃ kāraṇā. **Te hi tassa -pa- sūyanti ca** yasmā tassa te pāpakā sūyanti cāti vuttaṃ hoti. Imesaṃ icchāvacaṛānaṃ appahīnattāti ayamettha adhippāyo.

Idāni tamatthaṃ upamāya pākataṃ karonto **seyyathāpīti**-ādimāha. Tattha **kuṇapanti** matakaḷevaraṃ. Ahissa kuṇapaṃ **ahikuṇapaṃ**. Evaṃ itarāni. Atipaṭikūlajigucchanīyabhāvato cettha imāneva tīṇi vuttānīti veditabbāni. Aññesañhi sasasūkarādīnaṃ¹ kuṇapaṃ manussā kaṭukabhaṇḍādīhi abhisankharitvā paribhuñjantipi. Imesaṃ pana kuṇapaṃ abhinavampi jigucchantiyeva, ko pana vādo kālātikkamena pūtibhūte. **Racayitvāti** vadḍhetvā, paripūretvāti attho, kuṇapaṃ gahetvā kamsapātiyaṃ pakkhipitvāti vuttaṃ hoti. **Aññissāti** aparāya. **Paṭikujjhivāti** pidahitvā. **Antarāpaṇanti** āpaṇānamantare mahājanasamkiṇṇaṃ racchāmukhaṃ. **Paṭipajjeyyunti** gaccheyyūṃ. **Jañña jaññaṃ viyāti** cokkhacokkhaṃ² viya manāpamanāpaṃ viya. Api ca vadhukāpaṇṇākāraṃ viyāti vuttaṃ hoti. **Vadhukāti** janetti vuccati, tassā nīyamānaṃ paṇṇākāraṃ jaññaṃ, ubhayatthāpi ādaravasena vā pasamsāvasena vā punaruttaṃ. “Jañña jaññaṃ byā”tipi pātho.

Apāpuritvāti vivaritvā. **Tassa saha dassanena amanāpatā ca saṅṭhaheyyāti** tassa kuṇapassa dassanena saheva tassa janassa

1. Pāsūsūkarādīnaṃ (Syā)

2. Mokkhamokkhaṃ (Syā)

amanāpatā tiṭṭheyya. **Amanāpatā**ti ca “amanāpaṃ idan”ti uppannacittacetasi kānametaṃ adhivacaṇaṃ. Esa nayo **paṭikulyajegucchatāsu. Jighacchitānampī**ti chātānampi. **Na bhottukamyatā assā**ti bhuñjitukāmatā na bhaveyya. **Pageva suhitānanti** dhātānaṃ¹ pana paṭhamatarameva bhuñjitukāmatā na bhaveyyāti vuttaṃ hoti.

Tatrāyaṃ upamāsaṃsandanā—parisuddhakaṃsapātisaḍisaṃ imassa pabbajjālīṅgaṃ, kuṇaparacanaṃ viya icchāvacaṇānaṃ appahānaṃ, aparakaṃsapātiyā paṭikujjanaṃ viya āraññikaṅgādīhi icchāvacaṇappaṭicchādanaṃ, kaṃsapātiṃ vivarivā kuṇapadassanena janassa amanāpatā viya āraññikaṅgādīni anādiyivā icchāvacaṇadassanena sabrahmacārīnaṃ asakkāraṇādītāti.

62. Sukkapakkhe pana **kiñcāpī**ti anuggahapaṃsāvacaṇaṃ, tena āraññikattaṃ anuggaṇhāti, icchāvacaṇappaṭicchānaṃ paṃsaṃsati. **Nemantanikoti** nimantanapaṭiggāhako. **Vicitakālakanti** vicinivā apanītakālakāṃ. **Anekaśūpaṃ anekabyañjananti** ettha **sūpo** nāma hatthahāriyo vuccati, **byañjananti** uttaribhaṅgaṃ, tena macchamaṃsamuggasūpādīhi anekasūpaṃ, nānappaṭicchānaṃsādībyañjanehi anekabyañjananti vuttaṃ hoti. Sesam vuttanayena vedītabbā.

Upamāsaṃsandane ca sālivarabhattaracanaṃ viya icchāvacaṇappaṭicchānaṃ, aparakaṃsapātiyā paṭikujjanaṃ viya appicchatāsamuṭṭhānehi gāmantavihārādīhi icchāvacaṇappaṭicchādakaṃ, kaṃsapātiṃ vivarivā sālivarabhattadassanena janassa manāpatā viya gāmantavihārādīni anādiyivā icchāvacaṇappaṭicchānaḍassanena sabrahmacārīnaṃ sakkāraṇādītā vedītabbā.

63. **Upamā maṃ āvuso Sāriputta paṭibhātī**ti mayhaṃ āvuso Sāriputta upamā upaṭṭhāti, ekaṃ upamaṃ vatthukāmo ahanti adhippāyo. **Paṭibhātu tanti** tuyhaṃ paṭibhātu upaṭṭhātu, vada tvanti adhippāyo. **Ekamidāhanti** ettha **idāti** nipātamattaṃ, ekasmiṃ samaye ahanti vuttaṃ hoti, bhummatthe upayogavacaṇaṃ. **Rājagahe viharāmi Giribajeti Rājagahanti** tassa nagarassa nāmaṃ. Samantato pana giriparikkhepena vajo viya saṅghitattā **Giribajanti** vuccati. Tasmīṃ nagare viharāmi, taṃ nissāya

1. Achātānaṃ (Ka), chātānaṃ (Syā)

ahaṃ viharāmīti vuttaṃ hoti. **Atha khvāhanti** atha kho ahaṃ. Ettha ca **athāti** aññādhikāravacanārambhe nipāto. **Khoti** padapūraṇamatte.

Pubbaṇhasamayanti divasassa pubbabhāgasamayāṃ, pubbaṇhasamayeti attho, pubbaṇhe vā samayaṃ pubbaṇhasamayaṃ, pubbaṇhe ekaṃ khaṇanti vuttaṃ hoti, evaṃ accantasamyoge upayogavacanāṃ labbhati. **Nivāsetvāti** paridahitvā, vihāranivāsanaparivattanavasenetāṃ veditabbaṃ. Gāmapavesanattāya vā saṅghapetvā nivāsanavasena, na hi so tato pubbe anivattho ahosi.

Pattacīvaramādāyāti pattaṃ hatthena cīvaraṃ kāyena ādiyitvā. **Piṇḍāyāti** piṇḍapātattāya. **Samīti** tassa nāmaṃ. **Yānakāraputtoti** rathakāraputto. **Paṇḍuputtoti** paṇḍussa putto. **Ājīvakoti** naggasamaṇako. **Purāṇayānakāraputtoti** porāṇayānakārakulassa putto. **Paccupaṭṭhitoti** upagantvā ṭhito. **Vaṅkaṃ** nāma ekato kuṭilaṃ. **Jimhaṃ** nāma sappagatamaggasadiṣaṃ. **Dosanti** phegguvisamagaṅghikādīṃ. **Yathā yathāti** kālatthe nipāto, yadā yadā yasmim yasmim kāleti vuttaṃ hoti. **Tathā tathāti** ayampi kālatthoyeva, tasmim tasmim kāleti vuttaṃ hoti. So attano suttānulomena cintesi, itaro tena cintitakkhaṇe cintitaṭṭhānameva tacchati. **Attamanoti** sakamano tuṭṭhamano pītisomanassehi gahitamano. **Attamanavācaṃ nicchāresīti** attamanatāya vācaṃ, attamanabhāvassa vā yuttaṃ vācaṃ nicchāresi udīrayi, pabyaharīti vuttaṃ hoti. **Hadayā hadayaṃ maññe aññāyāti** cittena cittaṃ jānitvā viya.

Assaddhāti Buddhadhammasaṃghesu saddhāviraḥitā. **Jīvikatthāti** iṇabhayādīhi pīlītā bahi jīvitum asakkontā idha jīvikatthikā hutvā. **Na saddhāti** na saddhāya. **Saṭṭhā māyāvīnoti** māyāsāṭṭheyyehi yuttā. **Ketabinoti**¹ sikkhitakerāṭikā, nipphannathāmagatasāṭṭheyyāti vuttaṃ hoti. Sāṭṭheyyaṅhi abhūtaguṇadassanato abhūtabhaṇḍaguṇadassanasamaṃ katvā “kerāṭiyan”ti vuccati. **Unnaḷāti** uggatanaḷā, uṭṭhitatucchamānāti vuttaṃ

1. Keṭubhinoti (bahūsu)

hoti. **Capalāti** pattacīvaramaṇḍanādinā cāpallena yuttā. **Mukharāti** mukhakharā, kharavacanāti vuttaṃ hoti, **vikinṇavācāti** asaṃyatavacanā, divasampi niratthakavacanappalāpino. **Indriyesu aguttadvārāti** chasu indriyesu asaṃvutakammadvārā. **Bhojane amattaññunoti** bhojane yā mattā jānitabbā pariyesanapaṭiggahaṇaparibhogesu yuttatā, tassā ajānanakā. **Jāgariyaṃ ananuyuttāti** jāgare ananuyuttā. **Sāmaññe anapekkhavantoti** samaṇadhamme nirapekkhā, dhammānudhammappaṭipattirahitāti attho. **Sikkhāya na tibbagāravāti** sikkhāpadesu bahulagāravā na honti, āpattivītkkamabahulā vā. **Bāhulikāti**-ādi dhammadāyāde vuttaṃ, **kusītāti**-ādi bhayaabherave. **Dhammapariyāyenāti** dhammadesanāya.

Saddhā agārasmāti pakatīyāpi saddhā, pabbajitāpi saddhāya agārasmā anagāriyaṃ pabbajitā. **Pivanti maññe ghasanti maññeti** pivanti viya ghasanti¹ viya. Attamanavācaṃ nicchārentā vacasā pivanti viya, abbhānumodantā manasā ghasanti viya. **Sādhu vatāti** sundaraṃ vata. **Sabrahmacārīti** rassampi vaṭṭati dīghampi. Rasse sati Sāriputtassa upari hoti, dīghe sati sabrahmacārīnaṃ. Yadā Sāriputtassa upari hoti, tadā sabrahmacāri Sāriputto amhe akusalā vuṭṭhāpetvāti attho. Yadā sabrahmacārīnaṃ, tadā sabrahmacārayo akusalā vuṭṭhāpetvāti attho. **Daharoti** taruṇo. **Yuvāti** yobbanabhāve ṭhito. **Maṇḍanakajātikoti** alaṅkarakasabhāvo, tattha koci taruṇopi yuvā na hoti yathā atitaruṇo, koci yuvāpi maṇḍanakajātiko na hoti yathā upasantasabhāvo, ālasiyabyasanādīhi vā abhibhūto, idha pana daharo ceva yuvā ca maṇḍanakajātiko ca adhippeto, tasmā evamāha. **Uppalādīni** lokasammatattā vuttāni. **Itiha teti** evaṃ te. **Ubho mahānāgāti** dvepi mahānāgā, dvepi hi ete aggasāvaka “mahānāgā”ti vuccanti. Tatrāyaṃ vacanattho, chandādīhi na gacchantīti **nāgā**, tena tena maggena pahīne kilese na āgacchantīti **nāgā**, nānappakāraḥkaṃ āgum na karontīti **nāgā**, ayamettha saṅkhepo, vitthāro pana Mahānidde² vuttanayeneva vedītabbo. Api ca—

1. Gilanti (Sī, Syā)

2. Khu 7. 155 piṭṭhe.

“Āguṃ na karoti kiñci loke,
Sabbasaṃyoge visajja bandhanāni.
Sabbattha na sajjatī vimutto,
Nāgo tādi pavuccate tathattā”ti¹—

Evamettha attho veditabbo. Mahantā nāgā **mahānāgā**, aññehi khīṇāsavanāgehi pujjatarā ca pāsamsatarā cāti attho. **Aññamaññassā**ti añño aññassa. **Samanumodimsū**ti samaṃ anumodimsu. Tattha imāya upamāya Mahāmoggallāno anumodi, paṭibhātu taṃ āvusoti Dhammasenāpati. Tena vuttaṃ “aññamaññassa subhāsitaṃ samanumodimsū”ti.

Papañcasūdaniyā Majjhimanikāyaṭṭhakathāya

Anaṅgaṇasuttavaṇṇanā niṭṭhitā.

6. Ākaṅkheyyasuttavaṇṇanā

64. **Evam me sutanti** Ākaṅkheyyasuttaṃ. Tattha **sampannasīlā**ti tividhaṃ sampannaṃ paripuṇṇasamaṅgimadhuravasena. Tattha—

“Sampannaṃ sālakedāraṃ, suvā bhuñjanti kosiya.
Paṭivedemi te brahme, na naṃ vāretumussahe”ti²—

Idaṃ **paripuṇṇasampannaṃ** nāma. “Iminā pātimokkhasaṃvarena upeto hoti samupeto upāgato samupāgato upapanno sampanno samannāgato”ti³ idaṃ **samaṅgisampannaṃ** nāma. “Imissā bhante mahāpathaviyā heṭṭhimatalaṃ sampannaṃ, seyyathāpi khuddamadhuṃ aneḷakaṃ, evamassādan”ti⁴ idaṃ **madhurasampannaṃ** nāma. Idha pana paripuṇṇasampannampi samaṅgisampannampi vaṭṭati. Tasmā sampannasīlāti paripuṇṇasīlā hutvātipi sīlasamaṅgino hutvātipi evamettha attho veditabbo. **Sīlanti** kenatṭhena sīlaṃ. Sīlanatṭhena **sīlaṃ**? Tassa vitthārakathā Visuddhimagge vuttā.

1. Khu 1. 359 piṭṭhe.

3. Abhi 2. 255 piṭṭhe.

2. Khu 5. 276 piṭṭhe.

4. Vi 1. 8 piṭṭhe.

Tattha “paripuṇṇasīlā”ti iminā atthena khettadosavigamena khettapāripūrī viya sīladosavigamena sīlapāripūrī vuttā hoti. Yathā hi khettaṃ bījakhaṇḍaṃ vappakhaṇḍaṃ udakakhaṇḍaṃ ūsakhaṇḍanti¹ catudosasamannāgataṃ aparipūraṃ hoti.

Tattha **bījakhaṇḍaṃ** nāma yattha antarantarā bījāni khaṇḍāni vā pūtīni vā honti, tāni yattha pavanti, tattha sassam na uṭṭheti, khettaṃ khaṇḍaṃ hoti. **Vappakhaṇḍaṃ** nāma yattha akusalo bījāni vapanto antarantarā nipātetī. Evañhi sabbattha sassam na uṭṭheti, khettaṃ khaṇḍaṃ hoti. **Udakakhaṇḍaṃ** nāma yattha katthaci udakaṃ atibahu vā na vā hoti, tatrāpi hi sassāni na uṭṭhenti, khettaṃ khaṇḍaṃ hoti. **Ūsakhaṇḍaṃ** nāma yattha kassako kismiñci padese naṅgalena bhūmiṃ cattāro pañca vāre kasanto atigambhīraṃ karoti, tato ūsaṃ uppajjati, tatrāpi hi sassam na uṭṭheti, khettaṃ khaṇḍaṃ hoti, tādisaṃ ca khettaṃ na mahapphalaṃ hoti na mahānisamsaṃ, tatrāpi hi bahumpi vapitvā appaṃ labhati. Imesaṃ pana catunnaṃ dosānaṃ vigamā khettaṃ paripuṇṇaṃ hoti. Tādisaṃ ca khettaṃ mahapphalaṃ hoti mahānisamsaṃ. Evameva khaṇḍaṃ chiddaṃ sabalaṃ kammāsanti catudosasamannāgataṃ sīlaṃ aparipūraṃ hoti. Tādisaṃ ca sīlaṃ na mahapphalaṃ hoti na mahānisamsaṃ. Imesaṃ pana catunnaṃ dosānaṃ vigamā sīlakhettaṃ paripuṇṇaṃ hoti, tādisaṃ ca sīlaṃ mahapphalaṃ hoti mahānisamsaṃ.

“Sīlasamaṅgino”ti iminā panatthena sīlena samaṅgibhūtā samodhānaṃ gatā samannāgatā hutvā viharathāti idameva vuttaṃ hoti. Tattha dvīhi kāraṇehi sampannasīlatā hoti sīlavipattiyā ca ādīnavadassanena sīlasampattiyā ca ānisamsadassanena. Tadubhayampi Visuddhimagge vitthāritaṃ.

Tattha “samppannasīlā”ti ettāvataṃ kira Bhagavā catupārisuddhisīlaṃ uddisitvā “pātimokkhasamvarasamvutā”ti iminā tattha jeṭṭhakasīlaṃ vitthāretvā dassesīti Dīpavīhāravāsī Sumatthero āha. Antevāsiko panassa Tepīṭakacūlanāgatthero āha—ubhayatthāpi pātimokkhasamvarō Bhagavatā vutto, pātimokkhasamvaroyeva hi sīlaṃ. Itarāni pana tīṇi sīlanti vuttaṭṭhānaṃ nāma atthīti ananujānanto vatvā

1. Usakhaṇḍanti (Ka)

āha—“indriyaśaṃvaro nāma chadvārarakkhāmattakameva, ājīvapārisuddhi dhammena samena paccayuppattimattakaṃ, paccayanissitaṃ paṭiladdhapaccaye idamatthanti paccavekkhitvā paribhuñjanamattakaṃ. Nippariyāyena pātimokkhasaṃvarova sīlaṃ. Yassa so bhinno, ayaṃ chinnasīso viya puriso hatthapāde sesāni rakkhissatīti na vattabbo. Yassa pana so arogo, ayaṃ acchinnasīso viya puriso jīvitaṃ sesāni puna pākatikāni katvā rakkhituṃ sakkoti. Tasmā ‘sampannasīlā’ti iminā pātimokkhasaṃvaram uddisitvā ‘sampannapātimokkhā’ti tasseva vevacanaṃ vatvā taṃ vitthāretvā dassento ‘pātimokkhasaṃvarasaṃvutā’ti-ādīmāhā”ti.

Tattha **pātimokkhasaṃvarasaṃvutā**ti pātimokkhasaṃvarena samannāgatā. **Ācāragocarasaṃpannā**ti ācārena ca gocarena ca sampannā. **Aṇumattesū**ti appamattakesu. **Vajjesū**ti akusaladhammesu. **Bhayadassāvī**ti bhayadassino. **Samādāyā**ti sammā ādiyivā. **Sikkhatha sikkhāpadesū**ti sikkhāpadesu taṃ taṃ sikkhāpadaṃ samādiyivā sikkhatha. Api ca **samādāya sikkhatha sikkhāpadesū**ti yaṃkiñci sikkhākoṭṭhāsesu sikkhitabbaṃ kāyikaṃ vācasikañca, taṃ sabbaṃ samādāya sikkhathāti ayamettha saṅkhepo, vitthārato pana sabbānetāni pātimokkhasaṃvarādīni padāni Visuddhimagge vuttāni.

65. **Ākañkheyya ceti** idaṃ kasmā āradhamaṃ? Sīlānisamsadassanattamaṃ. Sacepi acirapabbajitānaṃ vā duppaññānaṃ vā evamassa “Bhagavā sīlaṃ pūrethāti vadati, ko nu kho sīlapūraṇe ānisaṃso, ko viseso, kā vaḍḍhī”ti. Tesāṃ sattarasa ānisaṃse dassetuṃ evamāha. Appeva nāma etaṃ¹ sabrahmacārīnaṃ piyamaṇāpatādi-āsavakkhayapariyosānaṃ ānisaṃsaṃ sutvāpi sīlaṃ paripūreyyunti visakaṇṭakavāṇiyo viya. **Visakaṇṭakavāṇiyo** nāma guḷavāṇiyo vuccati.

So kira guḷaphāṇitakhaṇḍasakkharādīni sakaṭeṇādāya paccantagāmaṃ gantvā “visakaṇṭakaṃ gaṇhatha visakaṇṭakaṃ gaṇhathā”ti ugghosesi. Taṃ sutvā gāmikā “visaṃ nāma kakkhaḷaṃ, yo naṃ khādati, so marati, kaṇṭakampi vijjhivā māreti, ubhopete kakkhaḷā, ko ettha ānisaṃso”ti gehadvārāni thakesuṃ, dārake ca palāpesuṃ. Taṃ disvā vāṇiyo

1. Evaṃ (Sī)

“avohārakusalā ime gāmikā, handa ne upāyena gaṇhāpemi”ti “atimadhuraṃ gaṇhatha, atisāduṃ gaṇhatha, guḷaṃ phāṇitaṃ sakkharaṃ samagghaṃ labbhati, kūṭamāsakakūṭakahāpaṇādīhipi labbhati”ti ugghosesi. Taṃ sutvā gāmikā haṭṭhatuṭṭhā āgantvā bahumpi mūlaṃ datvā gahesuṃ. Tattha vāṇijassa “visakaṇṭakaṃ gaṇhathā”ti ugghosanaṃ viya Bhagavato “sampannasīlā bhikkhave viharatha -pa- samādāya sikkhatha sikkhāpadesū”ti vacanaṃ. “Ubhopete kakkhaḷā, ko ettha ānisaṃso”ti gāmikānaṃ cintanaṃ viya Bhagavā “sampannasīlā viharathā”ti āha, “sīlaṃ ca nāmetaṃ kakkhaḷaṃ pharusāṃ khiḍḍādipaccanīkaṃ, ko nu kho sampannasīlānaṃ ānisaṃso”ti bhikkhūnaṃ cintanaṃ. Atha tassa vāṇijassa “atimadhuraṃ gaṇhathā”ti-ādivacanaṃ viya Bhagavato piyamanāpatādi-āsavakkhayapariyosānaṃ sattarasa-ānisaṃsappakāsanatthaṃ “ākāṅkheyya ce”ti-ādivacanaṃ veditabbaṃ.

Tattha **ākāṅkheyya ceti** yadi ākāṅkheyya yadi iccheyya. **Piyo ca assanti** piyacakkhūhi sampassitabbo, sinehuppattiyā padaṭṭhānabhūto bhaveyyanti vuttaṃ hoti. **Manāpoti** tesāṃ manavaḍḍhanako, tesāṃ vā manena pattabbo, mettacittena pharitabboti vuttaṃ hoti. **Garūti** tesāṃ garuṭṭhāniyo pāsāṇacchattasadiṣo. **Bhāvanīyoti** “addhā ayamāyasmā jānaṃ jānāti passaṃ passati”ti evaṃ sambhāvanīyo. **Sīlesvevassa paripūrakārīti** catupārisuddhisīlesuyeva paripūrakārī assa, anūnena paripūritākārena samannāgato bhaveyyāti vuttaṃ hoti. **Ajjhattaṃ cetosamathamanuyuttoti** attano cittasamathe yutto, ettha hi ajjhattanti vā attanoti vā ekaṃ ekatthaṃ, byañjanaṃ nānaṃ. Bhummatthe panetaṃ samathanti upayogavacanaṃ. Anūti iminā upasaggena yoge siddhaṃ. **Anirākatajjhānoti** bahi anīhaṭṭajjhāno, avināsitajjhāno vā, nīharaṇavināsatthañhi idam nirākaraṇaṃ nāma. Thambhaṃ niraṅkatvā¹ nivātavuttīti-ādīsu cassa payogo daṭṭhabbo.

Vipassanāya samannāgatoti sattavidhāya anupassanāya yutto, sattavidhā **anupassanā** nāma aniccānupassanā dukkhānupassanā anattānupassanā nibbidānupassanā virāgānupassanā nirodhānupassanā paṭinissaggānupassanāti. Tā Visuddhimagge vitthāritā. **Brūhetā suññāgārānanti**

1. Nirākatvā (?)

vaḍḍhetā suññāgārānaṃ, ettha ca samathavipassanāvasena kammaṭṭhānaṃ gahetvā rattindivam suññāgāraṃ pavisitvā nisīdamāno bhikkhu “brūhetā suññāgārānaṃ”ti veditabbo. Ekabhūmakādipāsāde kurumānopi pana neva suññāgārānaṃ brūhetāti daṭṭhabboti.

Ettāvatā ca yathā taṇhāvicaritadesanā paṭhamam taṇhāvasena āradhāpi taṇhāpadaṭṭhānattā mānadiṭṭhīnaṃ mānadiṭṭhiyo osarivā kamena papañcattayadesanā jātā, evamayam desanā paṭhamam adhisīlasikkhāvasena āradhāpi sīlapadaṭṭhānattā samathavipassanānaṃ samathavipassanāyo osarivā kamena sikkhattayadesanā jātāti veditabbā.

Ettha¹ hi “sīlesvevassa paripūrakārī”ti ettāvatā adhisīlasikkhā vuttā. “Ajjhattam cetosamathamanyutto anirākatajjhāno”ti ettāvatā adhicitasikkhā, “vipassanāya samannāgato”ti ettāvatā adhipaññāsikkhā, “brūhetā suññāgārānaṃ”ti iminā pana samathavasena suññāgāraḍḍhane adhicitasikkhā, vipassanāvasena adhipaññāsikkhāti evam dvepi sikkhā saṅgahetvā vuttā. Ettha ca “ajjhattam cetosamathamanyutto anirākatajjhāno”ti imihi padehi sīlānurakkhikā eva cittekaggatā kathitā. “Vipassanāyā”ti iminā padena sīlānurakkhiko saṅkhārapariggaho.

Katham cittekaggatā sīlamanurakkhati? Yassa hi cittekaggatā natthi, so byādhimhi uppanne vihaññati, so byādhivihato vikkhittacitto sīlam vināsetvāpi byādhivūpasamaṃ kattā hoti. Yassa pana cittekaggatā atthi, so tam byādhidukkham vikkhambhetvā samāpattim samāpajjati, samāpanakkhane dukkham durāpakataṃ hoti, balavatasukhamuppajjati. Evam cittekaggatā sīlamanurakkhati.

Katham saṅkhārapariggaho sīlamanurakkhati? Yassa hi saṅkhārapariggaho natthi, tassa “mama rūpaṃ mama viññānaṃ”ti attabhāve balavamamattam hoti, so tathārūpesu dubbhikkhabyādhibhayādīsu sampattesu sīlam vināsetvāpi attabhāvam posetā hoti. Yassa pana saṅkhārapariggaho atthi, tassa attabhāve balavamamattam vā sineho vā na hoti, so tathārūpesu dubbhikkhabyādhibhayādīsu sampattesu sacepissa antāni bahi nikkhamanti²,

1. Tattha (Syā, Ka)

2. Antam bahi nikkhamati (Sī, Syā)

sacepi ussussati visussati, khaṇḍākhaṇḍiko vā hoti satadhāpi saḥassadhāpi, neva sīlaṃ vināsetvā attabhāvaṃ posetā hoti. Evaṃ saṅkhārapariggaho sīlamanurakkhati. “Brūhetā suññāgārānan”ti iminā pana tasseva ubhayassa brūhanā vaḍḍhanā sātaccakiriyā dassitā.

Evaṃ Bhagavā yasmā “sabrahmacārīnaṃ piyo cassaṃ manāpo ca garu ca bhāvanīyo cā”ti ime cattāro dhamme ākaṅkhanṭena natthaññaṃ kiñci kātabbaṃ, aññadatthu sīlādiguṇasamannāgatena bhavitabbaṃ. Īdiso hi sabrahmacārīnaṃ piyo hoti manāpo garu bhāvanīyo. Vuttampi hetam—

“Sīladassanasampannaṃ, dhammaṭṭhaṃ saccavādinam.
Attano kamma kubbānaṃ, taṃ jano kurute piyaṃ”ti¹.

Tasmā “ākaṅkheyya ce bhikkhave bhikkhu sabrahmacārīnaṃ piyo cassaṃ manāpo ca garu ca bhāvanīyo cāti sīlesvevassa paripūrakārī -pa-suññāgārānan”ti vatvā idāni yasmā paccaya-lābhādīm² patthayantenāpi idameva karaṇīyaṃ, na aññaṃ kiñci, tasmā “ākaṅkheyya ce bhikkhave bhikkhu lābhī assan”ti-ādīmāha. Na cettha Bhagavā lābhanimittaṃ sīlādiparipūraṇaṃ kathetīti veditabbo. Bhagavā hi ghāsesanaṃ chinnakatho na vācam payuttaṃ bhaṇeti, evaṃ sāvake ovadati, so kathaṃ lābhanimittaṃ sīlādiparipūraṇaṃ kathessati, puggalajjhāsaya vasena panetaṃ vuttaṃ. Yesañhi evaṃ ajjhāsayo bhaveyya “sace mayaṃ catūhi paccayehi na kilameyyāma, sīlādīm pūretuṃ sakkuṇeyyāmā”ti, tesam ajjhāsaya vasena Bhagavā evamāha. Api ca rasānisamsa esa sīlassa, yadidaṃ cattāro paccayā nāma. Tathā hi paṇḍitamanussā koṭṭhādīsu ṭhapitaṃ nīharitvā puttādīnampi adatvā attanāpi aparibhuñjitvā sīlavantānaṃ dentīti sīlassa sarasānisamsadassanattampetaṃ vuttaṃ.

Tatīyavāre **yesāhanti** yesaṃ ahaṃ. **Tesaṃ te kārāti** tesaṃ devānaṃ vā manussānaṃ vā te mayi katā paccaya-dānakārā. Devāpi hi sīlādiguṇayuttānaṃ paccaye denti, na kevalaṃ manussāyeva, Sakko viya āyasmato Mahākassapassa. **Mahapphalā mahānisamsāti** ubhayametaṃ atthato ekaṃ, byañjanaṃ nānaṃ. Mahantaṃ vā lokiyasukhaṃ phalantīti

1. Khu 1. 45 piṭṭhe.

2. Paccaya-lābhādītaṃ (Sī), paccaya-lābhādīnaṃ (Syā)

mahapphalā. Mahato lokuttarasukhassa ca paccayā hontīti **mahānisaṁsā.** Sīlādiguṇayuttassa hi kaṭacchubhikkhāpi pañcaratanaṁattāya bhūmiyā paṇṇasālāpi katvā dinnā anekāni kappasahassāni duggativinipātato rakkhati, pariyoṣāne ca amatāya parinibbānadhātuyā paccayo hoti. “Khīrodanaṁ ahamadāsin”ti-ādīni cettha vatthūni, sakalameva vā Petavatthu Vimānavatthu ca sādhaṁ. Tasmā paccayadāyakehi attani katānaṁ kārānaṁ mahapphalataṁ icchantenāpi sīlādiguṇayutteneva bhavitabbanti dasseti.

Catutthavāre **ñātīti** sassusasurapakkhikā. **Sālohitāti** ekalohitasambaddhā pitipitāmahādayo. **Petāti** peccabhāvaṁ gatā. **Kālaṅkatāti** matā. **Tesaṁ tanti** tesaṁ taṁ mayi pasannacittataṁ vā pasannena cittena anussaraṇaṁ vā. Yassa hi bhikkhuno kālaṅkato pitā vā mātā vā “amhākaṁ ñātako thero sīlavā kalyāṇadhammo”ti pasannacitto hutvā taṁ bhikkhuṁ anussarati, tassa so cittappasādopi taṁ anussaraṇamattampi mahapphalaṁ mahānisaṁsameva hoti, anekāni kappasatasahassāni duggatito vāretuṁ² ante ca amataṁ pāpetuṁ samatthameva hoti. Vuttañhetāṁ Bhagavatā “ye te bhikkhave bhikkhū sīlasampannā samādhisampannā paññā, vimutti, vimuttiñāṇadassanasampannā, dassanaṁpāhaṁ bhikkhave tesaṁ bhikkhūnaṁ bahukāraṁ vadāmi. Savanaṁ, anussatiṁ, anupabbajjaṁ, upasaṅkamaṇaṁ, payirupāsaṇaṁpāhaṁ bhikkhave tesaṁ bhikkhūnaṁ bahukāraṁ vadāmi”ti³. Tasmā ñātisālohitānaṁ attani cittappasādassa anussatiyā ca mahapphalataṁ icchantenāpi sīlādiguṇayutteneva bhavitabbanti dasseti.

66. Pañcamavāre **aratiratisaho assanti** aratiyā ratiyā ca saho abhibhavitā ajjhottharitā bhaveyyaṁ. Ettha ca **aratīti** adhikusalesu dhammesu pantasenāsanesu ca ukkaṅṭhā. **Ratīti** pañcakāmaguṇarati. **Na ca maṁ arati saheyyāti** maṁ ca arati na abhibhaveyya na maddeyya na ajjhotthareyya. **Uppannanti** jātaṁ nibbattaṁ. Sīlādiguṇayutto hi aratiṁ ca ratiṁ ca sahati ajjhottharati madditvā tiṭṭhati. Tasmā īdisamattānaṁ icchantenāpi sīlādiguṇayutteneva bhavitabbanti dasseti.

1. Khu 2. 44 piṭṭhe.

2. Taretuṁ (Syā)

3. Khu 1. 267 piṭṭhe.

Chaṭṭhavāre **bhayaṃ** cittutrāsopi ārammaṇampi. **Bheravaṃ** ārammaṇameva. Sesam pañcamavāre vuttanayameva. Sīlādiguṇayutto hi bhayabheravaṃ sahati ajjhottharati madditvā tiṭṭhati Ariyakoṭiyavāsī Mahādattatthero¹ viya.

Thero kira maggaṃ paṭipanno aññataram pāsādikaṃ araññaṃ disvā “idhevajja samaṇadhammaṃ katvā gamissāmi”ti maggā okkamma aññatarasmim rukkhamūle saṅghāṭim paññapetvā pallaṅkaṃ ābhujitvā nisīdi, rukkhadevatāya dārakā therassa sīlatejena sakabhāvena saṅṭhātum² asakkontā vissaramakaṃsu. Devatāpi rukkham cālesi. Thero acalova nisīdi. Sā devatā dhūmayi pajjali, neva sakkhi theram cāletum, tato upāsakavaṇṇenāgantvā vanditvā aṭṭhāsi. “Ko eso”ti vuttā “aham bhante etasmim rukkhe adhivatthā devatā”ti avoca. Tvaṃ ete vikāre akāsīti. Āma bhanteti. Kasmāti ca vuttā āha “tumhākaṃ bhante sīlatejena dārakā sakabhāvena saṅṭhātum asakkontā vissaramakaṃsu, sāham tumhe palāpetum evamakāsin”ti. Thero āha “atha kasmā idha bhante mā vasatha, mayham aphāsūti paṭikacceva nāvacaśi³. Idāni pana mā kiñci avaca, Ariyakoṭiyamahādatto amanussabhayena gatoti vacanato lajjāmi, tenāham idheva vasissam, tvaṃ pana ajjekadivasam yattha katthaci vasāhī”ti. Evaṃ sīlādiguṇayutto bhayabheravasaho hoti. Tasmā īdisamattānaṃ icchantenāpi sīlādiguṇayutteneva bhavitabbanti dasseti.

Sattamavāre **abhicetasikānanti abhicetoti** abhikkantaṃ visuddhacittaṃ vuccati, adhicitam vā, abhicetasi jātāni abhicetasikāni, abhiceto sannissitānīti vā abhicetasikāni. **Diṭṭhadhammasukhavihārānanti** diṭṭhadhamme sukhavihārānaṃ. **Diṭṭhadhammoti** paccakkho attabhāvo vuccati, tattha sukhavihārabhūtānanti attho rūpāvacarajjhānānametaṃ adhivacanaṃ. Tāni hi appetvā nisinnā jhāyino imasmim yeva attabhāve asaṃkiliṭṭhaṃ nekkhammasukhaṃ vindanti, tasmā “diṭṭhadhammasukhavihārāni”ti vuccanti. **Nikāmalābhīti** nikāmena lābhī attano icchāvasena lābhī,

1. Pāṭiyakoṭiyavāsī Mahādattatthero (Ka)

2. Sandhāretum (Ka)

3. Nāvocāti (Si), nāvocase (Syā)

icchiticchitakkhaṇe samāpajjituṃ samatthoti vuttaṃ hoti. **Akicchalābhīti** sukheneva paccanīkadhamme vikkhambhetvā samāpajjituṃ samatthoti vuttaṃ hoti. **Akasiralābhīti** akasirānaṃ vipulānaṃ lābhī, yathāparicchedeveyeva vuṭṭhātuṃ samatthoti vuttaṃ hoti. Ekacco hi lābhīyeva hoti, na pana sakkoti icchiticchitakkhaṇe samāpajjituṃ. Ekacco sakkoti tathā samāpajjituṃ, pāribandhike¹ pana kicchena vikkhambheti. Ekacco tathā samāpajjati, pāribandhike¹ ca akiccheneva vikkhambheti, na sakkoti nālikāyantaṃ viya yathāparicchedeveyeva ca vuṭṭhātuṃ. Yo pana imaṃ tividhampi sampadaṃ icchati, sopi sīlesvevassa paripūrakārīti.

Evam abhiññāpādake jhāne vutte kiñcāpi abhiññānaṃ vāro āgato, atha kho naṃ Bhagavā aggahetvāva yasmā na kevalaṃ abhiññāpādakajjhānāni ca abhiññāyoyeva ca sīlānaṃ ānisaṃso, Api ca kho cattāri āruppajhānānipi tayo ca heṭṭhimā ariyamaggā, tasmā taṃ sabbaṃ pariyādiyivā dassetuṃ **ākañkheyya ce -pa- Ye te santāti** evamādimāha.

Tattha **santāti** aṅgasantatāya ceva ārammaṇasantatāya ca. **Vimokkhāti** paccanīkadhammehi vimuttattā² ārammaṇe ca adhimuttattā³. **Atikkamma rūpeti** rūpāvacarajjhāne atikkamitvā, ye te vimokkhā atikkamma rūpe santāti padasambandho, itarathā hi atikkamma rūpe kiṃ karotīti na paññāyeyyūṃ. **Āruppāti** ārammaṇato ca vipākato ca rūpavirahitā. **Kāyena phusitvāti** nāmakāyena phusitvā pāpuṇitvā, adhigantvā vuttaṃ hoti. Sesam uttānameva. Idaṃ vuttaṃ hoti “yopi bhikkhu ime vimokkhe phusitvā viharitukāmo, sopi sīlesvevassa paripūrakārī”ti.

67. Navamavāre **tiṇṇaṃ saṃyojanānanti**

sakkāyadiṭṭhivicikicchāsīlabbataparāmāsasaṅkhātānaṃ tiṇṇaṃ bandhanānaṃ. Tāni hi saṃyojenti khandhagatibhavādīhi khandhagatibhavādayo, kammaṃ vā phalena⁴, tasmā **saṃyojanānīti** vuccanti, bandhanānīti attho. **Parikkhayāti** parikkhayena. **Sotāpannoti**

1. Pāripanthike (Sī, Syā)

2. Vimuttā (Sī)

3. Adhimuttā (Sī)

4. Kammaphalena saṃyojenti yasmā (Ka)

sotaṃ āpanno. Sototi ca maggasettaṃ adhivacanaṃ. **Sotāpannoti** taṃsamaṅgipuggalassa¹. Yathāha “soto sototi hidamaṃ Sāriputta vuccati. Katamo nu kho Sāriputta sototi. Ayameva hi bhante ariyo aṭṭhaṅgiko maggo. Seyyathidamaṃ, sammādiṭṭhi -pa- sammāsamaṃdhīti. Sotāpanno sotāpannoti hidamaṃ Sāriputta vuccati. Katamo nu kho Sāriputta sotāpannoti. Yo hi bhante iminā aṭṭhaṅgikena maggena samannāgato, ayaṃ vuccati sotāpanno, yoyaṃ āyasmā evaṃnāmo evaṃgotto”². Idha pana maggena phalassa nāmaṃ dinnamaṃ, tasmā phalaṭṭho “sotāpanno”^{ti} veditabbo. **Avinipātadhammoti** vinipāteṭi vinipāto, nāssa vinipāto dhammoti avinipātadhammo, na attānaṃ apāye vinipātasabhāvoti vuttaṃ hoti. Kasmā? Ye dhammā apāyagamaniyā, tesamaṃ pahīnattā. Sambodhi paramaṃ ayaṃ gati assāti **sambodhiparāyaṇo**, uparimaggattayaṃ avassaṃ sampāpakoti attho. Kasmā? Paṭiladdhapaṭhamamaggattā. **Sīlesvevāti** īdiso hotukāropi sīlesvevassa paripūrakārīti.

Dasamavāre paṭhamamaggena parikkhīṇānīpi tīṇi saṃyojanāni sakadāgāmiṃmagassa vaṇṇabhaṇanattamaṃ vuttāni. **Rāgadosamohānaṃ tanuttāti** etesamaṃ tanubhāvena, tanuttakaraṇeṇāti vuttaṃ hoti. Tattha dvīhi kāraṇehi tanuttaṃ veditabbaṃ adhiccuppattiyā ca pariyaṭṭhānamandatāya ca. Sakadāgāmiṃssa hi vaṭṭānusārimahājanasseva kilesā abhiṇṇamaṃ na uppajjanti, kadāci karahaci uppajjanti viraḷākārā hutvā, viraḷavāpīte khetto aṅkurā viya. Uppajjamānāpi ca vaṭṭānusārimahājanasseva maddantā pharantā chādentā andhakāraṃ karontā na uppajjanti, mandamandā uppajjanti tanukākārā hutvā, abbhapaṭalamiva makkhikāpattamiva ca.

Tattha keci therā bhaṇanti “sakadāgāmiṃssa kilesā kiñcāpi cirena uppajjanti, bahalāva uppajjanti, tathā hissa puttā ca dhītarō ca dissantī”^{ti}, etaṃ pana appamāṇamaṃ. Puttadhītarō hi aṅgapaccāṅgaparāmasanamattenapi hontīti. Dvīhiyeva kāraṇehiṃssa kilesānaṃ tanuttaṃ veditabbaṃ adhiccuppattiyā ca pariyaṭṭhānamandatāya cāti.

1. Taṅkhaṇe puggalassa (Sī, Ka)

2. Saṃ 3. 302 piṭṭhe.

Sakadāgāmīti sakim āgamanadhammo. **Sakideva imam lokam āgantvā**ti ekavāramyeva imam manussalokam paṭisandhivasena āgantvā. Yopi hi idha sakadāgāmimaggam bhāvetvā idheva parinibbāti, sopi idha na gahito. Yopi idha maggam bhāvetvā devesu upapajjitvā tattheva parinibbāti. Yopi devaloke maggam bhāvetvā tattheva parinibbāti. Yopi devaloke maggam bhāvetvā idheva manussaloke nibbattitvā parinibbāti. ()¹ yo pana idha maggam bhāvetvā devaloke nibbatto, tattha yāvatāyukam ṭhatvā puna idheva upapajjitvā parinibbāti, ayamidha gahitoti veditabbo. **Dukkhasantam kareyyanti** vaṭṭadukkhassa paricchedam kareyyam. **Sīlesvevāti** īdiso hotukāmopi sīlesvevassa paripūrakārīti.

Ekādasamavāre **pañcannanti** gaṇanaparicchedo. **Orambhāgiyānanti** oram vuccati heṭṭhā, heṭṭhābhāgiyānanti attho, kāmāvacaraloke uppattipaccayānanti adhippāyo. **Samyojanānanti** bandhanānam, tāni kāmāragabyāpādasamyojanehi saddhim pubbe vuttasamyojanāneva veditabbāni. Yassa hi etāni appahīnāni, so kiñcāpi bhavagge uppanno hoti, atha kho āyuparikkhayā kāmāvacare nibbattatiyeva, gilītabalisamacchūpamo svāyam² puggalo dīghasuttakena pāde baddhavihaṅgūpamo cāti veditabbo. Pubbe vuttānampi cettha vacanam vaṇṇabhaṇanatthamevāti veditabbam. **Opapātikoti** sesayonipaṭikkhepavacanametam. **Tattha parinibbāyīti** tattheva brahmaloke parinibbāyī. **Anāvattidhammo tasmā lokāti** tato brahmalokā paṭisandhivasena puna anāvattisabhāvo. **Sīlesvevāti** īdiso hotukāmopi sīlesvevassa paripūrakārīti.

68. Evaṃ anāgāmimagge vutte kiñcāpi catutthamaggassa vāro āgato, atha kho nam Bhagavā aggahetvāva yasmā na kevalā āsavakkhayābhiññā eva silānam ānisaṃso, Api ca kho lokiyapañcābhiññāyopi, tasmā tāpi dassetuṃ, yasmā ca āsavakkhaye kathite desanā niṭṭhitā hoti, evaṃ ca sati imesaṃ guṇānam akathitattā ayam kathā muṇḍābhiññākathā nāma bhavēyya, tasmā ca abhiññāpāripūriṃ katvā dassetumpi, yasmā ca anāgāmimagge ṭhitassa sukhena

1. (Sopi idha na gahito.) (?)

2. Hayam (Sī)

iddhivikuppanā ijjhati, samādhiparibandhānam kāmārāgabyāpādānam samūhatattā, anāgāmī hi sīlesu ca samādhimhi ca paripūrakārī, tasmā yuttaṭṭhāneyeva lokiyābhiññāyo dassetumpi “ākaṅkheyya ce -pa- anekavihitan”ti evamādimāhāti ayamanusandhi.

Tattha “anekavihitaṃ iddhividhan”ti-ādinā nayena āgatānam pañcannampi lokiyābhiññānam Pāḷivaṇṇanā saddhim bhāvanāyena Visuddhimagge vuttā.

69. Chaṭṭhābhiññāya **āsavānam khayāti** arahattamaggena sabbakilesānam khayā. **Anāsavanti** āsavavirahitaṃ. **Cetovimuttiṃ paññāvimuttinti** ettha cetovacanaena arahattaphalasampayuttova samādhī, paññāvacaena taṃsampayuttā paññāva vuttā. Tattha ca samādhī rāgato vimuttattā **cetovimutti**, paññā avijjāya vimuttattā **paññāvimutti**ti veditabbā. Vuttaṃ cetam Bhagavatā “yo hissa bhikkhave samādhī, tadassa samādhindriyam. Yā hissa bhikkhave paññā, tadassa paññindriyam. Iti kho bhikkhave rāgavirāgā cetovimutti, avijjāvirāgā paññāvimutti”ti, apicettha samathaphalam **cetovimutti**, vipassanāphalam **paññāvimutti**ti veditabbā.

Diṭṭheva dhammeti imasmimyeva attabhāve. **Sayam abhiññā sacchikatvāti** attanoyeva paññāya paccakkham katvā, aparapaccayena ñatvāti attho. **Upasampajja vihareyyanti** pāpuṇitvā sampādetvā vihareyyam. **Sīlesvevāti** evam sabbāsava niddhunitvā cetovimuttiṃ paññāvimuttiṃ adhigantukāmopi sīlesvevassa paripūrakārīti.

Evam Bhagavā sīlānisamsakatham yāva arahattā kathetvā idāni sabbampi taṃ sīlānisamsam sampiṇḍetvā dassento nigamanam āha “sampannasīlā bhikkhave -pa- idametaṃ paṭicca vuttan”ti. Tassāyam saṅkhepattho, “sampannasīlā bhikkhave viharatha -pa- samādāya sikkhatha sikkhāpadesū”ti iti yaṃ taṃ mayā pubbe evam vuttaṃ, idaṃ sabbampi sampannasīlo bhikkhu sabrahmacārīnam piyo hoti manāpo, garu bhāvanīyo paccayānam lābhī, paccayadāyakānam mahapphalakaro, pubbañātīnam anussaraṇacetanāya phalamahattakaro, aratiratisaho, bhayabheravasaho, rūpāvacarajjhānānam arūpāvacarajjhānānam ca lābhī, heṭṭhimāni tīni sāmāññaphalāni pañca lokiyābhiññā āsavakkhayaññanti ca ime ca guṇe sayam abhiññā

sacchikattā hoti, etaṃ paṭicca idaṃ sandhāya vuttanti. Idamavoca Bhagavā, attamanā te bhikkhū Bhagavato bhāsitaṃ abhinandunti.

Papañcasūdaniyā Majjhimanikāyaṭṭhakathāya

Ākaṅkheyyasuttavaṇṇanā niṭṭhitā.

7. Vatthasuttavaṇṇanā

70. **Evam me sutanti** Vatthasuttaṃ. Tattha **seyyathāpi bhikkhave vatthanti** upamāvacanamevetam. Upamaṃ karonto ca Bhagavā katthaci paṭhamāmyeva upamaṃ dassetvā pacchā attham dasseti, katthaci paṭhamam attham dassetvā pacchā upamaṃ, katthaci upamāya attham parivāretvā dasseti, katthaci atthena upamaṃ.

Tathā hesa “seyyathāpissu bhikkhave dve agārā sadvārā¹, tattha cakkhumā puriso majjhe ṭhito passeyyā”²ti sakalampi Devadūtasuttaṃ upamaṃ paṭhamam dassetvā pacchā attham dassento āha. “Tirokuṭṭam tiropākāram tiropabbataṃ asajjamāno gacchati, seyyathāpi ākāse”³ti-ādinā³ pana nayena sakalampi iddhividham attham paṭhamam dassetvā pacchā upamaṃ dassento āha. “Seyyathāpi brāhmaṇapuriso sārattthiko sāragavesi”⁴ti-ādinā⁴ nayena sakalampi Cūlasāropamasuttaṃ upamāya attham parivāretvā dassento āha. “Idha pana bhikkhave ekacce kulaputtā dhammam pariyaṇanti suttaṃ -pa-. Seyyathāpi bhikkhave puriso alagaddatthiko”⁵ti-ādinā⁵ nayena sakalampi Alagaddasuttaṃ Mahāsāropamasuttanti evamādīni suttāni atthena upamaṃ parivāretvā dassento āha.

Svāyam idha paṭhamam upamaṃ dassetvā pacchā attham dasseti. Kasmā panevam Bhagavā dasseti. Puggalajjhāsayena vā desanāvilāsenā vā. Ye hi puggalā paṭhamam upamaṃ dassetvā vuccamānam attham sukhena paṭivijjhanti,

1. Sannadvārā (Ka)

2. Ma 3. 216 piṭṭhe.

3. Dī 1. 73; Khu 9. 107 piṭṭhādisu.

4. Ma 1. 258 piṭṭhe.

5. Ma 1. 186 piṭṭhe.

tesaṃ paṭhamāṃ upamaṃ dasseti. Esa nayo sabbattha. Yassā ca dhammadhātuyā suppaṭividdhattā desanāvilāsaṃ patto hoti, tassā suppaṭividdhā, tasmā esa desanāvilāsaṃ patto Dhammissaro Dhammarājā, so yathā yathā icchati, tathā tathā dhammaṃ desetīti evaṃ iminā puggalajjhāsayena vā desanāvilāsenā vā evaṃ dassetīti veditabbo.

Tattha **vatthanti** pakatiparisuddhaṃ vatthaṃ. **Saṃkiliṭṭhaṃ malaggahitaṃ** āgantukena paṃsurajādinā saṃkilesena saṃkiliṭṭhaṃ, sedajallikādinā malena gahitattā malaggahitaṃ. **Raṅgajātetī** ettha raṅgameva raṅgajātaṃ. **Upasaṃhareyyāti** upanāmeyya. **Yadi nīlakāyāti** nīlakāya vā, nīlakatthāya vāti vuttaṃ hoti. Evaṃ sabbattha. Rajako hi nīlakatthāya upasaṃharanto kaṃsanīlapalāsanīlādike nīlaraṅge upasaṃharati. Pītakatthāya upasaṃharanto kaṇikārapupphasadise pītakaraṅge. Lohitakatthāya upasaṃharanto bandhujīvakapupphasadise lohitakaraṅge. Mañjiṭṭhakatthāya upasaṃharanto kaṇavīrapupphasadise mandarattaraṅge. Tena vuttaṃ “yadi nīlakāya -pa- yadi mañjiṭṭhakāyā”ti.

Durattavaṇṇamevassāti duṭṭhu rajitavaṇṇameva assa. **Aparisuddhavaṇṇamevassāti** nīlavaṇṇopissa parisuddho na bhaveyya, sesavaṇṇopi. Tādisañhi vatthaṃ nīlakumbhiyā pakkhittampi sunīlaṃ na hoti, sesakumbhīsu pakkhittampi pītakādivaṇṇaṃ na hoti, milātanīla kuraṇḍa kaṇikāra bandhujīvaka kaṇavīrapupphavaṇṇameva hoti. **Taṃ kissa hetūti** taṃ vatthaṃ kissa hetu kiṃ kāraṇā īdisaṃ hoti, tasmīṃ vā vatthe raṅgajātaṃ kissa hetu īdisaṃ durattavaṇṇaṃ aparisuddhavaṇṇaṃ hotīti. Yasmā panassa vatthassa saṃkiliṭṭhabhāvoyevettha kāraṇaṃ, na aññaṃ kiñci, tasmā “aparisuddhattā bhikkhave vatthassā”ti āha.

Evameva khoti upamāsampaṭipādanaṃ. **Citte saṃkiliṭṭheti** cittamhi saṃkiliṭṭhamhi. Kasmā pana Bhagavā saṃkiliṭṭhavatthena opammaṃ akāsīti ce, vāyāmahapphaladassanattaṃ. Yathā hi āgantukehi malehi saṃkiliṭṭhaṃ vatthaṃ pakatiyā paṇḍarattā puna dhovīyamānaṃ paṇḍaraṃ hoti, na tattha jātikālake viya eḷakalome vāyāmo nipphalo hoti, evaṃ cittampi āgantukehi kilesehi saṃkiliṭṭhaṃ. Pakatiyā pana taṃ sakalepi paṭisandhibhavaṅgavāre paṇḍarameva. Yathāha “pabhassaramidaṃ bhikkhave cittaṃ,

taṃ ca kho āgantukehi upakkilesehi upakkiliṭṭhan”ti¹. Taṃ visodhīyamānaṃ sakkā pabhassaratarāṃ kātuṃ, na tattha vāyāmo nipphaloti evaṃ vāyāmahapphaladassanattamaṃ saṃkiliṭṭhavatthena opammaṃ akāsīti veditabbo.

Duggati pāṭikaṅkhāti idise citte duggati pāṭikaṅkhitabbā, duggatimeva esa pāpuṇissati, na aññanti evaṃ duggati icchitabbā, avassaṃ bhāvīti vuttaṃ hoti. Sā cāyaṃ duggati nāma paṭipattiduggati gatiduggatīti duvidhā hoti. Paṭipattiduggatipi agāriyapaṭipattiduggati anagāriyapaṭipattiduggatīti duvidhā hoti.

Agāriyo hi saṃkiliṭṭhacitto pāṇampi hanati, adinnampi ādiyati, sakalepi dasa akusalakammapathe pūreti, ayamassa **agāriyapaṭipattiduggati**. So tattha ṭhito kāyassa bhedaṃ nirayampi gacchati, tiracchānayanimpi, pettivisayampi gacchati, ayamassa **gatiduggati**.

Anagāriyopi imasmim sāsane pabbajito saṃkiliṭṭhacitto dūteyyapahiṇagamaṃ gacchati, vejjakammaṃ karoti, saṃghabhedāya cetiyabhedāya parakkamati, veḷudānādīhi jīvikaṃ kappeti, sakalampi anācāraṃ agocaraṃ ca paripūreti, ayamassa **anagāriyapaṭipattiduggati**. So tattha ṭhito kāyassa bhedaṃ nirayampi gacchati, tiracchānayanimpi, pettivisayampi gacchati, samaṇayakkho nāma hoti samaṇapeto, ādittehi saṃghāṭi-ādīhi sampajjalitakāyo aṭṭassaraṃ karonto vicarati, ayamassa **gatiduggati**.

Seyyathāpīti sukkapakkaṃ dassatumāraddho, tassattho kaṇhapakkhe vuttapaccanīkeneva veditabbo. Etthāpi ca sugati nāma paṭipattisugati gatisugatīti duvidhā hoti. Paṭipattisugatipi agāriyapaṭipattisugati anagāriyapaṭipattisugatīti duvidhā hoti. Agāriyo hi parisuddhacitto pāṇātipātāpi viramati, adinnādānāpi, sakalepi dasa kusalakammapathe paripūreti, ayamassa **agāriyapaṭipattisugati**. So tattha ṭhito kāyassa bhedaṃ manussamahantatampi devamahantatampi upapajjati, ayamassa **gatisugati**.

1. Am 1. 9 piṭṭhe.

Anagāriyopi imasmim̄ sāsane pabbajitvā parisuddhacitto catupārisuddhisīlam̄ sodheti, terasa dhutaṅgāni samādiyati, aṭṭhatimsārammaṇesu attano anukūlam̄ kammaṭṭhānam̄ gahetvā pantasenāsane paṭisevamāno kasiṇaparikkammaṃ katvā jhānasamāpattiyo nibbatteti, sotāpattimaggaṃ bhāveti -pa- anāgāmimaggaṃ bhāveti, ayamassa **anagāriyapaṭipattisugati**. So tattha ṭhito kāyassa bhedaṃ manussaloke vā tīsu mahākulesu, chasu vā kāmāvacaradevesu, dasasu vā brahmabhavanesu, pañcasu vā suddhāvāsesu, catūsu vā āruppesu upapajjati, ayamassa **gatisugatīti**.

71. Evaṃ saṃkiliṭṭhe citte duggati pāṭikaṅkhā, asaṃkiliṭṭhe ca sugatīti vatvā idāni yehi upakkilesehi cittaṃ saṃkiliṭṭhaṃ hoti, te dassento **katame ca bhikkhave cittassa upakkilesā, abhijjhā visamalobhoti-ādimāha**.

Tattha sakabhaṇḍe chandarāgo **abhijjhā**, parabhaṇḍe **visamalobho**. Atha vā sakabhaṇḍe vā parabhaṇḍe vā hotu, yuttapattaṭṭhāne chandarāgo abhijjhā, ayuttāpattaṭṭhāne visamalobho. Thero paṇāha “kissa vinibbhogaṃ karotha, yutte vā ayutte vā hotu, ‘rāgo visamaṃ doso visamaṃ moho visamaṃ’¹ vacanato na koci lobho avisamo nāma, tasmā lobhoyeva abhijjhāyanaṭṭhena abhijjhā, visamaṭṭhena visamaṃ, ekatthametaṃ byañjanameva nānaṃ”^{ti}. So panesa abhijjhāvisamalobho uppajjitvā cittaṃ dūseti, obhāsituṃ na deti. Tasmā “cittassa upakkilesaṃ”^{ti} vuccati.

Yathā cesa, evaṃ navavidha-āghātavattthusambhavo **byāpādo**. Dasavidha-āghātavattthusambhavo **kodho**. Punappunaṃ citta-pariyonandhano **upanāho**. Agāriyacsa vā anagāriyassa vā sukatakaṇḍavināsanāno **makkho**. Agāriyopi hi kenaci anukampakena daliddo samāno ucce ṭhāne ṭhapito, aparena samayena “kim̄ tayā mayhaṃ katan”^{ti} tassa sukatakaṇḍaṃ vināseti. Anagāriyopi sāmaṇerakālato

1. Abhi 2. 382 piṭṭhe.

pabhuti ācariyena vā upajjhāyena vā catūhi paccayehi uddesaparipucchāhi ca anuggahetvā dhammakathānayapakaraṇakosallādīni sikkhā¹ito, aparena samayena rājarājamahāmatādīhi sakkato garukato ācariyupajjhāyesu acittikato caramāno “ayaṃ amhehi daharakāle evaṃ anuggahito samvaḍḍhito ca, atha panidāni nissineho¹ jāto”ti vuccamāno “kiṃ mayham tumhehi katan”ti tesāṃ sukatakaraṇaṃ vināseti, tassa so sukatakaraṇavināsano makkho uppajjitvā cittaṃ dūseti, obhāsituṃ na deti. Tasmā “cittassa upakkilesa”ti vuccati.

Yathā cāyaṃ, evaṃ bahussutepi puggale ajjhottharivā “īdisassa ceva bahussutassa aniyatā gati, tava vā mama vā ko viseso”ti-ādinā nayena uppajjamāno yugaggāhagāhī **paḷāso**. Paresāṃ sakkārādīni khīyanā **issā**. Attano sampattiyā parehi sādharmaṇabhāvaṃ asahamānaṃ **macchariyaṃ**. Vañcanikacariyabhūtā **māyā**. Kerāṭikabhāvena uppajjamānaṃ **sāṭheyyaṃ**. Kerāṭiko hi āyatanamaccho² viya hoti, **āyatanamaccho** nāma kira macchānaṃ naṅguṭṭhaṃ dasseti sappānaṃ sīsaṃ, “tumhehi sadiso ahan”ti jānāpetuṃ. Evameva kerāṭiko puggalo yaṃ yaṃ suttantikaṃ vā ābhiddhammikaṃ vā upasaṅkamati, taṃ taṃ evaṃ vadati “ahaṃ tumhākaṃ baddhacaro, tumhe mayhaṃ anukampakā, nāhaṃ tumhe muñcāmī”ti “evamete ‘sagāravo ayaṃ amhesu sappatisso’ti maññissantī”ti. Tassetāṃ kerāṭikabhāvena uppajjamānaṃ sāṭheyyaṃ uppajjitvā cittaṃ dūseti, obhāsituṃ na deti. Tasmā “cittassa upakkilesa”ti vuccati.

Yathā cetāṃ, evaṃ vātabharitabhastasadisathaddhabhāvapaggahitasira-anivātavuttikāraṇaṃ **thambho**. Taduttarikaṇaṃ **sārambho**. So duvidhena labbhati akusalavasena ceva kusalavasena ca. Tattha agāriyassa parena kataṃ alaṅkāradim disvā taddiguṇakaraṇena uppajjamāno, anagāriyassa ca yattakaṃ yattakaṃ paro pariyāpuṇāti vā katheti vā, mānavasena taddiguṇataddiguṇakaraṇena uppajjamāno akusalo. Agāriyassa pana param ekam salākabhattaṃ dentaṃ disvā attanā dve vā tīṇi vā dātukāmatāya uppajjamāno, anagāriyassa ca parena

1. Nisneho (Sī)

2. Ānandamaccho (Sī, Syā)

ekanikāye gahite mānaṃ anissāya kevalaṃ taṃ disvā attanā ālasiyaṃ abhibhuyya dve nikāye gahetukāmatāya uppajjamāno kusalo. Idha pana akusalo adhippeto. Ayañhi uppajjitvā cittaṃ dūseti, obhāsituṃ na deti. Tasmā “cittassa upakkilesa”ti vuccati.

Yathā cāyaṃ, evaṃ jāti-ādīni nissāya cittassa uṇṇativasena pavattamāno **māno**, accuṇṇativasena **atimāno**, madaggahaṇākāro **mado**, kāmaguṇesu cittavossaggavasena uppajjamāno **pamādo** uppajjitvā cittaṃ dūseti, obhāsituṃ na deti. Tasmā “cittassa upakkilesa”ti vuccati.

Kasmā pana Bhagavā upakkilesaṃ dassento lobhamādim katvā dassetīti. Tassa paṭhamuppattito. Sabbasattānañhi yattha katthaci upapannānaṃ antamaso suddhāvāsabhūmiyampi sabbapaṭhamāṃ bhavanikantivasena lobho uppajjati, tato attano attano anurūpapaccayaṃ paṭicca yathāsambhavaṃ itare, na ca ete soḷaseva cittassa upakkilesā, etena pana nayena sabbepi kilesā gahitāyeva hontīti veditabbā.

72. Ettāvataṃ saṃkilesaṃ dassetvā idāni vodānaṃ dassento **sa kho so bhikkhaveti**-ādimāha. Tattha **iti veditvāti** evaṃ jānitvā. **Pajahatīti** samucchadappahānavasena ariyamaggena pajahati. Tattha kilesapaṭipāṭiyā maggapaṭipāṭiyāti dvidhā pahānaṃ veditabbaṃ. Kilesapaṭipāṭiyā tāva abhijjhāvisamalobho thambho sārambho māno atimāno madoti ime cha kilesā arahattamaggena pahīyanti. Byāpādo kodho upanāho pamādoti ime cattāro kilesā anāgāmimaggena pahīyanti. Makkho palāso issā macchariyaṃ māyā sāṭheyanti ime cha sotāpattimaggena pahīyantīti. Maggapaṭipāṭiyā pana sotāpattimaggena makkho palāso issā macchariyaṃ māyā sāṭheyanti ime cha pahīyanti. Anāgāmimaggena byāpādo kodho upanāho pamādoti ime cattāro. Arahattamaggena abhijjhāvisamalobho thambho sārambho māno atimāno madoti ime cha pahīyantīti.

Imasmiṃ pana t̥hāne ime kilesā sotāpattimaggavajjhā vā hontu sesamaggavajjhā vā, atha kho anāgāmimaggeneva pahānaṃ sandhāya “abhijjhāvisamalobhaṃ cittassa upakkilesaṃ pajahatī”ti-ādimāhāti veditabbā. Ayamettha paveṇimaggāgato sambhavo, so ca upari catutthamaggasseva niddiṭṭhattā yujjati, tatiyamaggena pahīnāvasesānañhi visamalobhādīnaṃ tena pahānaṃ hoti, sesānaṃ imināva. Yepi hi¹ sotāpattimaggena pahīyanti, tepi taṃsamuṭṭhāpakacittānaṃ appahīnattā anāgāmimaggeneva suppahīnā hontīti. Keci pana paṭhamamaggena cettha pahānaṃ vaṇṇayanti, taṃ pubbāparena na sandhiyati. Keci vikkhambhanappahānampi, taṃ tesāṃ icchāmatameva.

73. **Yato kho bhikkhavi** ettha **yatoti** yamhi kāle. **Pahīno hotīti** anāgāmimaggakkaṇe pahānaṃ sandhāyevāha.

74. **So Buddhhe aveccappasādenā**ti etaṃ “yato kho bhikkhave abhijjhāvisamalobho pahīno hoti, so Buddhhe aveccappasādena samannāgato hoti”ti evaṃ ekamekena padena yojetabbaṃ. Imassa hi bhikkhuno anāgāmimaggena lokuttarappasādo āgato, athassa aparena samayena Buddhaguṇe dhammaguṇe saṃhaguṇe ca anussarato lokiyo uppajjati, tamassa sabbampi lokiyalokuttaramissakaṃ pasādaṃ dassento Bhagavā “Buddhe aveccappasādenā”ti-ādimāha.

Tattha **aveccappasādenā**ti Buddhadhammasaṃhaguṇānaṃ yāthāvato ñātattā acalena accutena pasādena. Idāni yathā tassa bhikkhuno anussarato so aveccappasādo uppanno, taṃ vidhiṃ dassento “ītipi so Bhagavā”ti-ādinā nayena tīṇi anussatiṭṭhānāni vitthāresi, tesāṃ atthavaṇṇanā sabbākārena Visuddhimagge anussatikathāyaṃ vuttā.

75. Evamassa lokiyalokuttaramissakaṃ pasādaṃ dassetvā idāni kilesappahānaṃ aveccappasādasamannāgataṃ ca paccavekkhato uppajjamānaṃ

1. Imināva nayena yepi (Syā, Ka)

somanassādi-ānisaṃsaṃ dassento **yathodhi kho panassā**ti-ādimāha. Anāgāmissa hi paccante vuṭṭhitam corupaddavam vūpasametvā tam paccavekkhato mahānagare vasantassa rañño viya ime cime ca mama kilesā pahīnāti attano kilesappahānam paccavekkhato balavasomanassam uppajjati. Tam dassento Bhagavā “yathodhi kho panassā”ti-ādimāha.

Tassattho—yvāyam anāgāmī bhikkhu evam “Buddhe aveccappasādena samannāgato hoti -pa-. Dhamme -pa-. Saṃghe -pa- anuttaram puññakkhetam lokassā”ti, tassa yathodhi kho cattam hoti paṇinissaṭṭham sakasaka-odhivasena cattameva hoti, tam tam kilesajātam vantam muttam pahīnam paṇinissaṭṭham. **Sakasaka-odhivasenā**ti dve odhī kilesomi ca maggodhi ca, tattha kilesodhivasenāpi ye kilesā yam maggavajjhā, te aññamaggavajjhehi amissā hutvā sakeneva odhinā pahīnā. Maggodhivasenāpi ye kilesā yena maggena pahātabbā, tena teyeva pahīnā honti. Evam sakasaka-odhivasena tam tam kilesajātam cattameva hoti paṇinissaṭṭham, tam paccavekkhitvā ca laddhasomanasso tatuttaripi so “Buddhe aveccappasādena samannāgatomhī”ti labhati atthavedanti sambandho.

Yatodhi khotipi pāṭho. Tassa vasena ayamatto, assa bhikkhuno yatodhi kho pana cattam hoti paṇinissaṭṭham, tattha **yatoti** kāraṇavacanam, yasmāti vuttam hoti. **Odhī**ti heṭṭhā tayo maggā vuccanti. Kasmā? Te hi odhim katvā koṭṭhāsam katvā uparimaggena pahātabbakilese ṭhapetvā pajahanti, tasmā **odhī**ti vuccanti. Arahattamaggo pana kiñci kilesam anavasesetvā pajahati, tasmā **anodhī**ti vuccati. Imassa ca bhikkhuno heṭṭhāmaggattayena cattam. Tena vuttam “yatodhi kho panassa cattam hoti”ti. Tattha **kho panā**ti nipātamattam. Ayam pana piṇḍattho, yasmā assa odhi cattam hoti paṇinissaṭṭham, tasmā tam paccavekkhitvā ca laddhasomanasso tatuttaripi so “Buddhe aveccappasādena samannāgatomhī”ti labhati atthavedanti yathāpālī netabbam.

Tattha **cattanti** idam sakabhāvapariccajanavasena vuttam. **Vantanti** idam pana anādiyanabhāvadassanavasena. **Muttanti** idam santatito vinimocanavasena. **Pahīnanti** idam muttassapi kvaci anavaṭṭhānadassanavasena. **Paṇinissaṭṭhanti** idam pubbe

ādinnapubbassa paṭinissaggadassanavasena paṭimukhaṃ vā
 nissaṭṭhabhāvadassanavasena bhāvanābalena abhibhuyya
 nissaṭṭhabhāvadassanavasenāti vuttaṃ hoti. **Labhati atthavedaṃ labhati
 dhammavedanti** ettha Buddhādīsu aveccappasādoyeva araṇīyato **attho**,
 upagantabbatoti vuttaṃ hoti. Dhāraṇato **dhammo**, vinipatitum appadānatoti
 vuttaṃ hoti. **Vedoti** ganthopi ñāṇampi somanassampi. “Tiṇṇaṃ vedānaṃ
 pārāgū”ti-ādīsu¹ hi gantho “vedo”ti vuccati. “Yaṃ brāhmaṇaṃ
 vedagumābhijaññā, akiñcanaṃ kāmabhāve asattan”ti-ādīsu² ñāṇaṃ. “Ye
 vedajātā vicaranti loke”ti-ādīsu somanassaṃ. Idha pana somanassañca
 somanassasampayuttañāṇaṃca adhippetam, tasmā “labhati atthavedaṃ
 labhati dhammavedanti aveccappasādārammaṇasomanassañca
 somanassamayañāṇaṃca labhati”ti evamettha attho veditabbo.

Atha vā **atthavedanti** aveccappasādaṃ paccavekkhato uppannaṃ
 vuttappakārameva vedaṃ. **Dhammavedanti** aveccappasādassa hetum odhiso
 kilesappahānaṃ paccavekkhato uppannaṃ vuttappakārameva vedanti
 evampi ettha attho veditabbo. Vuttañhetam “hetumhi ñāṇaṃ
 dhammapaṭisambhidā, hetuphale ñāṇaṃ atthapaṭisambhidā”ti³.
Dammūpasañhitaṃ pāmojjanti tameva atthañca Dhammañca
 atthadhammānisamsabhūtaṃ vedañca paccavekkhato uppannapāmojjaṃ.
 Tañhi anavajjalakkhaṇena paccavekkhaṇākārappavattena dhammena
upasañhanti vuccati. **Pamuditassa pīti jāyatīti** iminā pāmojjena
 pamuditassa nirāmisā pīti jāyati. **Pītimanassāti** tāya pītiyā pīṇitamanassa.
Kāyo passambhatīti kāyopi passaddho hoti vūpasantadaratho.
Passaddhakāyo sukhanti evam vūpasantakāyadaratho cetasikasukhaṃ
 paṭisaṃvedeti. **Cittaṃ samādhiyatīti** cittaṃ sammā ādhiyati appitaṃ viya
 acalaṃ tiṭṭhati.

76. Evamassa kilesappahānaṃ aveccappasādasamannāgataṃ
 paccavekkhato uppajjamānaṃ somanassādi-ānisamsaṃ dassetvā idāni
 “yathodhi kho pana me”ti vārena tassa⁴ paccavekkhaṇāya pavattākāraṃ
 pakāsetvā

1. Dī 1. 82 piṭṭhādīsu.

3. Abhi 2. 307 piṭṭhe.

2. Khu 1. 438 piṭṭhe.

4. Tassā (Sī, Syā)

tasseva anāgāmimaggānubhāvasūcakaṃ phalaṃ¹ dassento **sa kho so bhikkhaveti**-ādimāha.

Tattha **evaṃsīloti** tassa anāgāmimaggasampayuttaṃ sīlakkhandhaṃ dasseti. **Evaṃdhammo evaṃpaññoti** taṃsampayuttameva samādhikkhandhaṃ paññākkhandhaṃca dasseti. **Sālinanti** lohitasāligandhasāli-ādīnaṃ anekarūpānaṃ. **Piṇḍapātanti** odanaṃ. **Vicitakālakanti** apanītakālakam. **Nevassa taṃ hoti antarāyāyāti** tassa evaṃvidhassa bhikkhuno taṃ vuttappakāraṃ piṇḍapātabhojanaṃ maggassa vā phalassa vā neva antarāyāya hoti, paṭiladdhaguṇassa hi taṃ kimantarāyaṃ karissati. Yopissa appaṭiladdho catutthamaggo ca phalaṃ ca tappaṭilābhāya vipassanaṃ ārabhatopi nevassa taṃ hoti antarāyāya, antarāyaṃ kātuṃ asamatthameva hoti. Kasmā? Vuttappakārasīladhammapaññāsaṅgahena maggena visuddhacittatā.

Yasmā cettha etadeva kāraṇaṃ, tasmā tadanurūpaṃ upamaṃ dassento **seyyathāpīti**-ādimāha.

Tattha **acchanti** vippasannaṃ. **Parisuddham** malavigamena. **Pariyodātaṃ** pabhassaratāya. **Ukkāmukhanti** suvaṇṇakārānaṃ mūsāmukhaṃ. Suvaṇṇakārānaṃ mūsā hi idha **ukkā**, aññattha pana dīpikādayopi vuccanti. “Ukkāsu dhārīyamānāsū”²ti² hi āgataṭṭhāne dīpikā “ukkā”³ti vuccati. “Ukkāṃ bandheyya, ukkāṃ bandhitvā ukkāṃ mukhaṃ ālimpeyyā”³ti³ āgataṭṭhāne āṅgārapallaṃ. “Kammārānaṃ yathā ukkā, anto jhāyati no bahī”⁴ti⁴ āgataṭṭhāne kammāruddhanaṃ. “Evaṃvipāko ukkāpāto bhavissati”⁵ti⁵ āgataṭṭhāne vātavego “ukkā”⁵ti vuccati. Imasmiṃ pana ṭhāne aññesu ca evarūpesu “saṇḍāsena jātarūpaṃ gahetvā ukkāṃ mukhe pakkhipati”³ti³ āgataṭṭhānesu suvaṇṇakārānaṃ mūsā “ukkā”³ti veditabbā.

Tatrāyaṃ upamāsaṃsandana—saṃkiliṭṭhavatthaṃ viya hi saṃkiliṭṭhajātarūpaṃ viya ca imassa bhikkhuno puthujjanakāle kāmarāgādimalānugatacittaṃ daṭṭhabbaṃ. Acchodakaṃ viya ukkāṃ mukhaṃ viya ca anāgāmimaggo. Taṃ udakaṃ

1. Anāgāmimaggānubhāvassa ca balaṃ (Sī, Syā)

2. Dī 1. 46 piṭṭhe.

3. Ma 3. 286 piṭṭhe.

4. Khu 6. 209 piṭṭhe.

5. Dī 1. 10 piṭṭhe.

ukkāmukhaṃ ca āgamma vatthasuvaṇṇānaṃ parisuddhatā viya tassa bhikkhuno vuttappakārasīladhammapaññāsaṅgahaṃ anāgāmimaggaṃ āgamma visuddhacittatāti.

77. **So mettāsahagatena cetasāti** yathānusandhivasena desanā āgatā. Tayo hi anusandhī pucchānusandhi ajjhāsayaṇusandhi yathānusandhīti. Tattha “evaṃ vutte aññataro bhikkhu Bhagavantaṃ etadavoca ‘siyā nu kho bhante bahiddhā asati paritassanā’ti. ‘Siyā bhikkhū’ti Bhagavā avocā”¹ evaṃ pucchantānaṃ vissajjitasuttavasena **pucchānusandhi** veditabbo. “Siyā kho pana te brāhmaṇa evamassa, ajjāpi nuna samaṇo Gotamo avītarāgo”² evaṃ paresaṃ ajjhāsayaṃ viditvā vuttassa suttassa vasena **ajjhāsayaṇusandhi** veditabbo. Yena pana dhammena ādimhi desanā uṭṭhitā, tassa dhammassa anurūpadhammavasena vā paṭipakkhavasena vā yesu suttasu upari desanā āgacchati, tesāṃ vasena **yathānusandhi** veditabbo. Seyyathidaṃ, Ākaṅkheyasutte heṭṭhā sīlena desanā uṭṭhitā, upari cha abhiññā āgatā. Kakacūpame heṭṭhā akkhantiyā uṭṭhitā, upari kakacūpamovādo āgato. Alagadde heṭṭhā diṭṭhiparidīpanena uṭṭhitā, upari tiparivaṭṭasuññatāpakāsanā āgatā, cūḷa-assapure heṭṭhā kilesaparidīpanena uṭṭhitā, upari brahmavihārā āgatā. Kosambiyasutte heṭṭhā bhaṇḍanena uṭṭhitā, upari sāraṇiyadhammā āgatā. Imasmimpi Vatthasutte heṭṭhā kilesaparidīpanena uṭṭhitā, upari brahmavihārā āgatā. Tena vuttaṃ “yathānusandhivasena desanā āgatā”ti. Brahmavihāresu pana anupadavaṇṇanā ca bhāvanānayo ca sabbo sabbākārena Visuddhimagge vutto.

78. Evaṃ Bhagavā abhijjhādīnaṃ upakkilesānaṃ paṭipakkhabhūtaṃ sabbaso ca kāmarāgabyāpādappahānena vihatapaccatthikattā laddhapadaṭṭhānaṃ tassa anāgāmīno brahmavihārabhāvanānaṃ dassetvā idānissa arahattāya vipassanaṃ dassetvā arahattappattim dassetum **so atthi idanti**-ādimāha.

Tassattho—so anāgāmī evaṃ bhāvitābrahmavihāro etesaṃ brahmavihārānaṃ yato kutoci vuṭṭhāya te eva brahmavihāradhamme

1. Ma 1. 189 piṭṭhe.

2. Ma 1. 28 piṭṭhe.

nāmasvasena tesam nissayam hadayavatthum vatthunissayāni bhūtānīti iminā
 nayena bhūtopādāyadhamme rūpavasena ca vavatthapetvā **atthi idanti**
 pajānāti, ettāvatānena dukkhasaccavavatthānam kataṃ hoti. Tato tassa
 dukkhassa samudayam paṭivijjhanto **atthi hīnanti** pajānāti, ettāvatānena
 samudayasaccavavatthānam kataṃ hoti. Tato tassa pahānupāyam vicinanto
atthi paṇīanti pajānāti, ettāvatānena maggasaccavavatthānam kataṃ hoti.
 Tato tena maggena adhigantabbaṭṭhānam vicinanto **atthi uttari imassa**
saññāgatassa nissaraṇanti pajānāti, imassa mayā adhigatassa
 brahmavihārasaññāgatassa uttari nissaraṇam nibbānam atthīti evam
 pajānātīti adhippāyo, ettāvatānena nirodhasaccavavatthānam kataṃ hoti.
Tassa evam jānato evam passatoti tassa vipassanāpaññāya evam catūhi
 ākārehi cattāri saccāni jānato, maggapaññāya evam passato, bhayabherave
 vuttanayeneva kāmāsavāpi cittam vimuccati -pa- itthattāyāti pajānātīti.

Evam yāva arahattā desanam pāpetvā idāni yasmā tassaṃ parisati
 nhānasuddhiko brāhmaṇo nisinno, so evam nhānasuddhiyā vaṇṇam
 vuccamānam sutvā pabbajitvā arahattam pāpuṇissatīti Bhagavatā vidito,
 tasmā tassa codanattāya “ayam vuccati bhikkhave bhikkhu sināto antarena
 sinānenā”ti imam paṭiyekkam anusandhim āha. Tattha **antarena sinānenāti**
 abbhantarena kilesavutṭhānasinānena.

79. **Sundarikabhāradvājoti Bhāradvājo** nāma so brāhmaṇo attano
 gottavasena, Sundarikāya pana nadiyā sinātassa pāpappahānam¹ hotīti
 ayamassa diṭṭhi, tasmā “Sundarikabhāradvājo”ti vuccati. So tam Bhagavato
 vacanam sutvā cintesi “mayam sinānasuddhim vaṇṇema, samaṇopi Gotamo
 tatheva vaṇṇeti, samānacchando dāni esa amhehi”ti. Atha Bhagavantam
 Bāhukam nadim gantvā tam tattha pāpam pavāhetvā āgataṃ viya
 maññamāno āha “gacchati pana bhavam Gotamo Bāhukam nadim
 sināyitun”ti. Bhagavā tassa gacchāmīti vā na gacchāmīti vā avatvāyeva
 brāhmaṇassa diṭṭhisamugghātam kattukāmo “kim brāhmaṇa Bāhukāya

1. Pāpappavāhanam (Sī)

nadiyā, kiṃ Bāhukā nadī karissatī”ti āha. Tassattho, kiṃ payojanam bahukāya, kiṃ sā karissati, asamatthā sā kassaci atthāya, kiṃ tattha gamissāmīti.

Atha brāhmaṇo taṃ pasaṃsanto **lokkhasammatā**ti-ādimāha. Tattha **lokkhasammatā**ti lūkhabhāvasammatā, **lūkhabhāvanti** cokkhabhāvaṃ, visuddhibhāvaṃ detīti evaṃ sammatāti vuttam hoti. **Lokyasammatā**tipi pāṭho. Tassattho, seṭṭham lokam gamayatīti evaṃ sammatāti. **Puññasammatā**ti puññanti sammatā. **Pavāhetī**ti gamayati visodheti. **Gāthāhi ajjhabhāsī**ti gāthāhi abhāsī. Gāthā ca vuccamānā tadatthadīpanatthameva vā gāthārucikānam vuccati visesatthadīpanattham vā. Idha panetā ubhayatthadīpanattham vuttāti veditabbā.

Bāhukanti idameva hi ettha vacanam tadatthadīpakam, sesāni visesatthadīpakāni. Yatheva hi bāhukam, evaṃ adhikakkādīnipi loko gacchati nhānena pāpam pavāhetum. Tattha ye tesam thānānam āsannā hontī, te divasassa tikkhattum nhāyanti. Ye dūrā, te yathākkamam dvikkhattum sakim ekadivasantaram, evaṃ yāva samvaccharantaram nhāyanti. Ye pana sabbathāpi gantum na sakkonti, te ghaṭhepi tato udakam āharāpetvā nhāyanti, sabbam cetam niratthakam, tasmā imam visesattham dīpetum **adhikakkādīnipī**ti āha.

Tattha **adhikakkanti** nhānasambhāravasena laddhavohāram ekam tittham vuccati. **Gayā**tipi maṇḍalavāpisaṅghānam titthameva vuccati. **Payāgā**ti etampi Gaṅgāya ekam titthameva Mahāpanādassa rañño Gaṅgāyam nimuggapāsādassa sopānasammukhaṅghānam, Bāhukā Sundarikā Sarassatī Bāhumatīti imā pana catasso nadiyo. **Bāloti** duppañño. **Pakkhandoti** pavisanto. **Na sujjetī**ti kilesasuddhim na pāpuṇāti, kevalam rajojallameva pavāheti.

Kim sundarikā karissatīti sundarikā kilesavisodhane kim karissati, na kiñci katum samatthāti adhippāyo. Esa nayo **payāgabāhukā**su. Imehi ca tīhi padehi vuttehi itarānipi cattāri lakkhaṅghāranayena vuttāneva hontī, tasmā yatheva sundarikā

payāgā bāhukā na kiñci karonti, tathā adhiakkādayopīti veditabbā.

Verinti pāṇātipātādipañcaverasamannāgataṃ. **Katakibbisanti** kataluddakammaṃ. **Na hi naṃ sodhayeti** sundarikā vā payāgā vā bāhukā vā na sodhaye, na sodhetīti vuttaṃ hoti. **Pāpakamminanti** pāpakehi verakibbisakammehi yuttaṃ, lāmakakammayuttaṃ vā verakibbisabhāvaṃ appattehi khuddakehipi pāpehi yuttanti vuttaṃ hoti.

Suddhassāti nikkilesassa. **Sadā phaggūti** niccampi phaggunīnakkhattameva. Phaggunamāse kira “uttaraphaggunadivase yo nhāyati, so saṃvaccharaṃ katapāpaṃ sodhetī”ti evaṃ diṭṭhiko so brāhmaṇo, tenassa Bhagavā taṃ diṭṭhiṃ paṭihananto āha “suddhassa ve sadā phaggū”ti. Nikkilesassa niccaṃ phaggunīnakkhattaṃ, itaro kiṃ sujhatīti. **Uposatho sadāti** suddhassa ca cātuddasapannarasādīsu uposathaṅgāni asamādiyatopi niccameva uposatho. **Suddhassa sucikammassāti** nikkilesatāya suddhassa sucīhi kāyakammādīhi samannāgatassa. **Sadā sampajjate vatanti** īdisassa ca kusalūpasañhitaṃ vatasamādānampi niccaṃ sampannameva hotīti. **Idheva sināhīti** imasmiṃyeva mama sāsane sināhi. Kiṃ vuttaṃ hoti “sace ajjhattikakilesamalappavāhanaṃ icchasi, idheva mama sāsane aṭṭhaṅgikamaggasalilena sināhi, aññatra hi idaṃ netthī”ti.

Idānissa sappāyadesanāvasena tīsupi dvāresu suddhiṃ dassento **sabbabhūtesu karohi khematanti**-ādimāha. Tattha **khematanti** abhayaṃ hitabhāvaṃ, mettanti vuttaṃ hoti. Etenassa manodvārasuddhi dassitā hoti.

Sace musā na bhaṇasīti etenassa vacīdvārasuddhi. **Sace pāṇaṃ na hīmsasi sace adinnaṃ nādiyāsīti** etehi kāyadvārasuddhi. **Saddahāno amaccharīti** etehi pana naṃ evaṃ parisuddhadvāraṃ saddhāsampadāya cāgasampadāya ca niyojesi. **Kiṃ kāhasi Gayāṃ gantvā, udapānopi te gayāti** ayaṃ pana upaḍḍhagāthā, sace sabbabhūtesu khemataṃ karissasi, musā na bhaṇissasi, pāṇaṃ na hanissasi, adinnaṃ nādiyissasi, saddahāno amaccharī bhavissasi, kiṃ kāhasi Gayāṃ gantvā udapānopi te

gayā, gayāyapi hi te nhāyantassa udapānepi imāya eva paṭipattiyā kilesasuddhi, sarīramalasuddhi pana ubhayattha samāti evaṃ yojetabbaṃ. Yasmā ca loke gayā sammatatarā, tasmā tassa Bhagavā “gacchati pana bhavaṃ Gotamo Bāhukaṃ”ti puṭṭhopi “kiṃ kāhasi Bāhukaṃ gantvā”ti avatvā “kiṃ kāhasi Gayāṃ gantvā”ti āhāti veditabbo.

80. **Evam vutteti** evamādi bhayabherave vuttattā pākaṭameva. **Eko vūpakatṭhoti**-ādīsu pana **eko** kāyavivekena. **Vūpakatṭho** cittavivekena. **Appamatto** kammaṭṭhāne sati avijahanena. **Ātāpī** kāyikacetasikavīriyasaṅkhātena ātāpena. **Pahitatto** kāye ca jīvite ca anapekkhatāya. **Viharanto** aññatara-iriyāpathavihārena. **Nacirassevāti** pabbajjaṃ upādāya vuccati. **Kulaputtāti** duvidhā kulaputtā jātikulaputtā ca ācārakulaputtā ca, ayaṃ pana ubhayathāpi kulaputto. **Agārasmāti** gharā. Agārassa hitaṃ **agāriyaṃ**, kasigorakkhādikuṭumbaposanakammaṃ vuccati, natthi ettha agāriyanti **anagāriyaṃ**, pabbajjāyetaṃ adhivacanaṃ. **Pabbajantīti** upagacchanti upasaṅkamanti. **Tadanuttaranti** taṃ anuttaraṃ. **Brahmacariyapariyosānanti** maggabrahmacariyassa pariyosānaṃ, arahattaphalanti vuttaṃ hoti. Tassa hi atthāya kulaputtā pabbajanti. **Diṭṭheva dhammeti** tasmiṃyeva attabhāve. **Sayaṃ abhiññā sacchikatvāti** attanāyeva paññāya paccakkhaṃ katvā, aparappaccayaṃ katvāti attho. **Upasampajja vihāsīti** pāpuṇitvā sampādetvā vihāsīti, evaṃ viharanto ca khīṇā jāti -pa-abbhaññāsi. Etenassa paccavekkhaṇabhūmiṃ dasseti.

Katamā panassa jāti khīṇā, kathaṃ ca naṃ abbhaññāsīti. Vuccate, kāmāñcetaṃ bhayabheravepi vuttaṃ, tathāpi naṃ idha paṭhamapurisavasena yojanāyassa dassanattaṃ puna saṅkhepato bhaṇāma. Na tāvassa atītā jāti khīṇā, pubbeva khīṇattā. Na anāgatā, tattha vāyāmābhāvato. Na paccuppanā, vijjamānattā. Maggassa pana abhāvitattā yā uppajjeyya ekacatupañcavokārabhavesu ekacatupañcakkhandhappahedā jāti, sā maggassa bhāvitattā anuppādadhammataṃ āpajjanena khīṇā, taṃ so maggabhāvanāya pahīnakilese paccavekkhitvā kilesābhāve vijjamānampi kammaṃ āyatim appaṭisandhikaṃ hotīti jānanto jānāti.

Vusitanti vutthaṃ parivutthaṃ, kataṃ caritaṃ niṭṭhāpitanti attho. **Brahmacariyanti** maggabrahmacariyaṃ. **Kataṃ karaṇīyanti** catūsu saccesu catūhi maggehi pariññāpahānasacchikiriyabhāvanāvasena soḷasavidhampi kiccaṃ niṭṭhāpitanti attho. **Nāparam itthattāyāti** idāni puna-itthabhāvāya evaṃsoḷasakiccabhāvāya, kilesakkhayāya vā maggabhāvanā natthīti. Atha vā **itthattāyāti** itthabhāvato imasmā evaṃpakārā idāni vattamānakkhandhasantānā aparaṃ khandhasantānaṃ natthi. Ime pana pañcakkhandhā pariññātā tiṭṭhanti, chinnaṃ rūkko viyāti abbaññāsi. **Aññataroti** eko. **Arahatanti** arahantānaṃ, Bhagavato sāvakaṇaṃ arahataṃ abbhantaro ahoṣīti.

Papañcasūdaniyā Majjhimanikāyaṭṭhakathāya

Vatthasuttavaṇṇanā niṭṭhitā.

8. Sallekhasuttavaṇṇanā

81. **Evaṃ me sutanti** Sallekhasuttaṃ. Tatha **Mahācundoti** tassa therassa nāmaṃ. **Sāyanhasamayanti** sāyanhakāle. **Paṭisallānā vuṭṭhitoti** ettha **paṭisallānanti** tehi tehi sattasaṅkhārehi paṭinivattitvā sallānaṃ nilīyanaṃ, ekībhāvo pavivekoti vuttaṃ hoti. Yo tato vuṭṭhito, so paṭisallānā vuṭṭhito nāma hoti. Ayaṃ pana yasmā paṭisallānānaṃ uttamato phalasaṃpattitvā vuṭṭhāsi, tasmā “paṭisallānā vuṭṭhito”ti vutto. **Bhagavantaṃ abhivādetvāti** samadasanakhujjalavibhūsitena sirasā Bhagavantaṃ sakkaccaṃ vanditvā, abhivādāpetvā vā “sukhī bhava Cundā”ti evaṃ vacībhedam kārāpetvā, Bhagavā pana kira vandito samāno suvaṇṇadundubhisadisam gīvaṃ paggayha kaṇṇasukhaṃ pemaṇiyaṃ amatābhisekasadisam brahmaghoṣaṃ nicchārento “sukhī hohī”ti tassa tassa nāmaṃ gahetvā vadati, etaṃ āciṇṇaṃ Tathāgatānaṃ. Tatridaṃ Sādhakasuttaṃ, “Sakko bhante devānamindo sāmacco saparijano Bhagavato pāde sirasā vandatīti, sukhi hotu pañcasikha Sakko devānamindo sāmacco saparijano, sukhakāmā hi devā manussā asurā nāgā gandhabbā, ye

caññe santi puthukāyā”¹. Evaṃ ca pana Tathāgatā evarūpe mahesakkhe yakkhe abhivadantīti.

Yā imāti idāni vattabbābhimukhaṃ karonto viya āha. **Anekavihitāti** nānappakārā. **Diṭṭhiyoti** micchādiṭṭhiyo. **Loke uppajjantīti** sattesu pātubhavanti. **Attavādappaṭisaṃyuttāti** “rūpaṃ attato samanupassatī”²ti-ādinayappavattena attavādena paṭisaṃyuttā, tā vīsati bhavanti. **Lokavādappaṭisaṃyuttāti** “sassato attā ca loko cā”²ti-ādinayappavattena lokavādena paṭisaṃyuttā, tā aṭṭha honti sassato, asassato, sassato ca asassato ca, nevasassato nāsassato, antavā, anantavā, antavā ca anantavā ca, nevantavā nānantavā attā ca loko cāti evaṃ pavattattā.

Ādimevāti-ādīsu ayamatto, kiṃ nu kho bhante ādimeva manasikarontassa appatvāpi sotāpattimaggāṃ vipassanāmissakapaṭhamamanasikārameva manasikarontassa bhikkhuno evamefāsaṃ ettakeneva upāyena etāsaṃ diṭṭhīnaṃ pahānaṃ ca paṭinissaggo ca hotīti. Idaṃ ca thero attanā anadhimānikopi samāno adhimānikānaṃ adhimānappahānatthaṃ adhimāniko viya hutvā pucchatīti veditabbo. Apare panāhu “therassa antevāsikā ādimanasikāreneva diṭṭhīnaṃ samucchadappahānaṃ hotīti evaṃsaññinopi, samāpattivihārā sallekhavīhārāti evaṃsaññinopi atthi. So tesāṃ atthāya Bhagavantāṃ pucchatī”²ti.

82. Athassa Bhagavā tāsāṃ diṭṭhīnaṃ pahānūpāyaṃ dassento **yā imāti**-ādimāha. Tattha yattha cetā diṭṭhiyo uppajjantīti-ādi pañcakkhandhe sandhāya vuttaṃ. Etesu hi etā diṭṭhiyo uppajjanti. Yathāha “rūpe kho bhikkhave sati rūpaṃ abhinivissa evaṃ diṭṭhi uppajjati, so attā so loko so pecca bhavissāmi nicco dhuvo sassato avipariṇāmadhammo”²ti vitthāro. Ārammaṇavasena pana ekavacanaṃ katvā **yattha cāti** āha, yasmim ārammaṇe uppajjantīti vuttaṃ hoti. Ettha ca **uppajjanti anusenti samudācarantīti** imesaṃ evaṃ nānākaraṇaṃ veditabbaṃ. Jātivasena hi ajātā jāyamānā **uppajjantīti** vuccantī. Punappunāṃ āsevītā

1. Dī 2. 214 piṭṭhe.

2. Saṃ 2. 149 piṭṭhe.

thāmagatā appaṭiviniṭā **anuseṭṭi**ti. Kāyavacīdvāraṃ sampattā **samudācaranti**ti, idametesāṃ nānākaraṇaṃ. **Taṃ netaṃ mamā**ti-ādīsu taṃ pañcakkhandhappabhedāṃ ārammaṇaṃ etaṃ mayhaṃ na hoti, ahampi eso na asmi, eso me attāpi na hotīti evametaṃ yathābhūtaṃ sammappaññāya passatoti evaṃ tāva padattho veditabbo.

Yasmā pana ettha etaṃ mamāti taṇhāgāho, tañca gaṇhanto aṭṭhasatataṇhāvicaritappabhedāṃ taṇhāpapañcaṃ gaṇhāti. Esohamasmīti mānagāho, tañca gaṇhanto navappabhedāṃ mānapapañcaṃ gaṇhāti. Eso me attāti diṭṭhigāho, tañca gaṇhanto dvāsaṭṭhidiṭṭhigatappabhedāṃ diṭṭhipapañcaṃ gaṇhāti. Tasmā **netam mamā**ti vadanto Bhagavā yathāvuttappabhedāṃ taṇhāpapañcaṃ paṭikkhipati. **Nesohamasmī**ti mānapapañcaṃ. **Na meso attāti** diṭṭhipapañcaṃ. Diṭṭhekaṭṭhāyeva cettha taṇhāmānā veditabbā. **Evametanti** evaṃ “netam mamā”ti-ādinā ākārena etaṃ khandhapañcakaṃ. **Yathābhū**tanti yathā sabhāvaṃ, yathā atthīti vuttaṃ hoti. Khandhapañcakaṃhi eteneva ākārena atthi. Mamanti-ādinā pana gayhamānampi tenākārena nevattīti adhippāyo. **Sammappaññāya passatoti** sotāpattimaggaṇṇāpariyosānāya vipassanāpaññāya suṭṭhu passantassa. **Evametāsanti** etena upāyena etāsaṃ. **Pahānaṃ paṭinissaggoti** ubhayampetaṃ samucchadappahānassevādhivacanaṃ.

Evaṃ Bhagavā ādimanasikāreneva diṭṭhīnaṃ pahānaṃ hoti nu kho noti āyasmatā Mahācundena adhimānikānaṃ vasena pañhaṃ puṭṭho sotāpattimaggena diṭṭhipahānaṃ dassavā idāni sayameva adhimānikānaṃ jhānaṃ vibhajanto **ṭhānaṃ kho panetanti**-ādimāha. Tattha **adhimānikā** nāma yesāṃ appatte pattasaññāya adhimāno uppajjati, svāyaṃ uppajjamāno neva lokavaṭṭānusārīnaṃ bālaputhujjanānaṃ uppajjati, na ariyasāvakaṇaṃ. Na hi sotāpannaṃ “sakadāgāmī ahan”ti adhimāno uppajjati, na sakadāgāmiṃ “anāgāmī ahan”ti, na anāgāmīno “arahā ahan”ti, kārakasseva pana samathavasena vā vipassanāvasena vā vikkhambhi takilesassa niccaṃ yuttapayuttassa āradhaviṭṭhāssa uppajjati. Tassa hi samathavikkhambhitānaṃ vā vipassanāvikkhambhitānaṃ vā kilesānaṃ samudācāraṃ aṇṇato “sotāpanno ahanti vā, sakadāgāmī,

anāgāmī, arahā ahan”ti vā adhimāno uppajjati, Talaṅgara¹ tissapabbatavāsi-dhammadinnattherena ovādiyamānattherānaṃ² viya.

Therassa kira acirūpasampannasseva ovāde ṭhatvā bahū bhikkhū visesaṃ adhigacchimsu, taṃ pavattiṃ sutvā Tissamahāvihāravāsī bhikkhusaṃgho “na aṭṭhānaniyojako theroti therāṃ ānethā”ti sambahule bhikkhū pāhesi. Te gantvā “āvuso Dhammadinna bhikkhusaṃgho taṃ pakkosāpetī”ti āhaṃsu. So āha “kiṃ pana tumhe bhante attānaṃ gavesatha paran”ti. Attānaṃ sappurisāti, so tesāṃ kammaṭṭhānamadāsi, sabbeva arahattaṃ pāpuṇimsu. Bhikkhusaṃgho puna aññe bhikkhū pāhesi, evaṃ yāvattiyāṃ pahitā sabbepi tattheva arahattaṃ patvā vihariṃsu.

Tato saṃgho gatagatā nāgacchantīti aññataraṃ vuḍḍhapabbajitaṃ pāhesi, so gantvā ca “bhante Dhammadinna tikkhattuṃ Tissamahāvihāravāsī bhikkhusaṃgho tuyhaṃ santike pesesi, tvaṃ nāma saṃghassa āṇaṃ garuṃ na karosi, nāgacchasi”ti āha. Thero kimetanti paṇṇasālaṃ appavisitvāva pattacīvaram gāhāpetvā tāvadeva nikkhami, so antarāmagge Haṅkanavihāraṃ³ pāvisi. Tattha ceko mahāthero saṭṭhivassātīto adhimānena arahattaṃ paṭijānāti, thero taṃ upasaṅkamitvā vanditvā paṭisanthāraṃ katvā adhigamaṃ pucchi. Thero āha “āma Dhammadinna, yaṃ pabbajitena kātabbaṃ, cirakataṃ taṃ mayā, atītasatṭhivassomhi etarahī”ti. Kiṃ bhante iddhimpi vaḷañjethāti. Āma Dhammadinnāti. Sādhu vata bhante, hatthiṃ tumhākaṃ paṭimukhaṃ āgacchantāṃ māpethāti. Sādhāvusoti thero sabbasetāṃ sattappatiṭṭhaṃ tidhāpabhinnaṃ naṅguṭṭhaṃ bījayamānaṃ soṇḍaṃ mukhe pakkhipitvā dvīhi dantehi vijjhītukāmaṃ viya paṭimukhaṃ āgacchantāṃ mahāhatthiṃ māpesi. So taṃ attanāyeva māpitaṃ hatthiṃ disvā bhīto palāyituṃ ārabhi, tadāva attānaṃ “nāhaṃ arahā”ti ṇatvā Dhammadinnassa pādamaṃle ukkuṭikaṃ nisīditvā “patiṭṭhā me hoti āvuso”ti āha. Dhammadinno “mā bhante soci, mā anattamano ahoṣi, kārakānaṃyeva adhimāno uppajjati”ti therāṃ samassāsetvā kammaṭṭhānamadāsi. Thero tassovāde ṭhatvā arahattaṃ pāpuṇi.

1. Vāḷaṅgara (Ka)

2. Ovāditattherānaṃ (Ka)

3. Taṅkhaṇavihāraṃ (Ka)

Cittalapabbatepi tādisova thero vasati. Dhammadinno tampi upasaṅkamtivā tatheva pucchi. Sopi tatheva byākāsi. Tato naṃ Dhammadinno kiṃ bhante iddhimpi vaḷañjethāti āha. Āmāvusoti. Sādhu vata bhante, ekaṃ pokkharāṇiṃ māpethāti. Thero māpesi. Ettha bhante padumagumbaṃ māpethāti. Tampi māpesi. Padumagumbe mahāpadumaṃ māpethāti. Tampi māpesi. Etasmiṃ padumagumbe ṭhatvā madhurassarena gāyantaṃ naccantaṃ ca ekaṃ itthiviggahaṃ māpethāti. Tampi māpesi. So etaṃ bhante punappunaṃ upanijjhāyathāti vatvā sayāṃ pāsādaṃ pāvīsi. Therassa taṃ upanijjhāyato saṭṭhivassāni vikkhambhitakilesā calimsu, so tadā attānaṃ ñatvā purimatthero viya Dhammadinnattherassa santike kammaṭṭhānaṃ gahetvā arahattaṃ pāpuṇi.

Dhammadinnopi anupubbena Tissamahāvihāraṃ agamāsi. Tasmīṃ ca samaye therā cetiyaṅgaṇaṃ sammapajjitvā Buddhāraṃmaṇaṃ pītiṃ uppādetvā nisinnā honti, etaṃ kira tesaṃ vattaṃ. Tena nesaṃ ekopi “idha pattacīvaraṃ ṭhapehi”ti Dhammadinnaṃ vattā pucchitāpi nāhosi. Dhammadinno eso bhavēyyāti ñatvā pana pañhaṃ pucchimsu. So pucchitapañhe tiṅhena asinā kumudaṇḍakalāpaṃ viya chinditvā pādaṅguliya mahāpathaviṃ pahari. Bhante ayaṃ acetanā mahāpathavīpi Dhammadinnassa guṇaṃ jānāti. Tumhe pana jānitthāti ca vatvā imaṃ gāthamāha—

“Acetanāyaṃ pathavī, vijānāti guṇāguṇaṃ.

Sacetanātha kho bhante, na jānātha guṇāguṇaṃ”ti.

Tāvadeva ca ākāse abbhuggantvā Talaṅgaratissapabbatameva agamāsi. Evaṃ kārakasseva adhimāno uppajjati. Tasmā Bhagavā tādisānaṃ bhikkhūnaṃ vasena jhānaṃ vibhajanto **ṭhānaṃ kho panetanti**-ādimāha.

Tassattho, atthetaṃ kāraṇaṃ, no natthi. Yena idhekacco bhikkhu bāhiraparibbājakehi sādharmaṇaṃ vivicceva kāmehi -pa- paṭhamaṃ jhānaṃ upasampajja vihareyya, yaṃ pana **tassa evamassa sallekkena viharāmīti**, yaṃ paṭipattividdhānaṃ kilese saṃlikhati, tenāhaṃ viharāmīti, taṃ na yujjati,

na hi adhimānikassa bhikkhuno jhānaṃ sallekho vā sallekhapaṭipadā vā hoti. Kasmā? Avipassanāpādakattā. Na hi so jhānaṃ samāpajjitvā tato vuṭṭhāya saṅkhāre sammasati, jhānaṃ panassa cित्तेkaggamattaṃ karoti, diṭṭhadhammasukhavihāro hoti. Tasmā tamatthaṃ dassento Bhagavā “na kho panete Cunda ariyassa vinaye sallekhā vuccanti, diṭṭhadhammasukhavihārā ete ariyassa vinaye vuccanti”ti āha.

Tattha **eteti** jhānadhammasena bahuvacanaṃ veditabbaṃ, ete paṭhamajjhānadhammāti vuttaṃ hoti. Samāpattivaseṇa vā, ekampi hi paṭhamajjhānaṃ punappunaṃ samāpattivaseṇa pavattattā bahuttaṃ gacchati. Ārammaṇavasena vā, ekampi hi paṭhamajjhānaṃ pathavīkasiṇādisu pavattivaseṇa bahuttaṃ gacchatīti. Esa nayo dutiyatatiyacatutthajjhānesu. Āruppajjhānesu pana ārammaṇabhedābhāvato purimakāraṇadvayavaseneva bahuvacanaṃ veditabbaṃ.

Yasmā cetesaṃ aṅgānipi santāni ārammaṇānipi. nibbutāni ceva sukhumāni cāti vuttaṃ hoti, tasmā tāni **santā ete vihārā**ti evaṃ vuttānīti veditabbāni. Ayaṃ tāva tesāṃ catunnampi sādharmaṇā vaṇṇanā. Visesaṇṇanā pana “sabbaso rūpasaññānaṃ”ti-ādīpadānusārato vattabbā siyā. Sā Visuddhimagge sabbākārena vuttāyeva.

83. Evaṃ yasmā adhimānikassa bhikkhuno jhānavihāro avipassanāpādakattā sallekhavihāro na hoti, na hi so jhānaṃ samāpajjitvā tato vuṭṭhāya saṅkhāre sammasati, cित्तेkaggakaro¹ diṭṭhadhamme sukhavihāro panassa hoti, tasmā tamatthaṃ dassento rūpajjhānāni ca arūpajjhānāni ca vibhajitvā idāni ca yattha sallekho kātabbo catucattālīsāya ākārehi, tañca vatthum tañca sallekhaṃ dassento **idha kho pana voti-**ādīmāha.

Kasmā pana “aṭṭhahi samāpattīhi avihimsādayo sallekhā”ti vuttā? Lokuttarapādakattā. Bāhirakānañhi aṭṭha samāpattiyo vaṭṭapādakāyeva. Sāsane saraṇagamanampi lokuttarapādakaṃ, pageva avihimsādayo. Imināyeva ca suttana veditabbaṃ “yathā bāhirakassa aṭṭhasamāpattilābhino pañcābhiññassāpi dinnadānato sāsane

1. Cित्तेkaggam karoti (Ka)

tisaraṇagatassa dinnadānaṃ mahapphalataraṃ hotī”ti. Idañhi sandhāya dakkhiṇāvisuddhisutte “bāhirake kāmesu vītarāge dānaṃ datvā koṭisatasahassaguṇā pāṭikaṅkhitabbā. Sotāpattiphalasacchikiriyāya paṭipanne dānaṃ datvā asaṅkheyyā appameyyā dakkhiṇā pāṭikaṅkhitabbā, ko pana vādo sotāpanne”ti¹ vuttaṃ. Saraṇagamanato paṭṭhāya hi tattha sotāpattiphalasacchikiriyāya paṭipanno adhippetoti, ayaṃ tāvettha Pāḷiyojanā.

Anupadavaṇṇanāyaṃ pana **idhāti** vihiṃsādivatthudīpanametam. **Kho panāti** nipātamattaṃ. **Voti** karaṇatthe sāmivacanaṃ, ayaṃ pana saṅkhepattho, yadetaṃ “pare vihiṃsakā bhavissanti”ti-ādinā nayena vihiṃsādivatthum vadāma, idha Cunda tumhehi sallekho kātabboti.

Evam saṅkhepato vatvā idāni vitthārento “pare vihiṃsakā bhavissanti, mayamettha avihimsakā bhavissāmāti sallekho karaṇīyo”ti-ādimāha.

Tattha **pareti** ye keci imaṃ sallekhamananuyuttā. **Vihimsakā bhavissantīti** pāṇinā vā leḍḍunā vāti-ādīhi sattānaṃ vihesakā bhavissanti. **Mayamettha avihimsakā bhavissāmāti** mayam pana yattheva vatthusmiṃ pare evam vihiṃsakā bhavissanti, ettheva avihimsakā bhavissāma, avihimsaṃ uppādetvā viharissāma. **Iti sallekho karaṇīyoti** evam tumhehi sallekho kātabbo. **Sallekhoti** ca idha avihimsāva veditabbā. Avihimsā hi vihiṃsaṃ sallekhati, taṃ chindati, tasmā **sallekhoti** vuccati. Esa nayo sabbattha. Ayaṃ pana viseso. **Pare micchādīṭṭhīti** ettha kammapathānaṃ antamicchādīṭṭhiṃ ca micchattānaṃ ādimicchādīṭṭhiṃ ca missetvā dīṭṭhi vuttāti veditabbā. Tathā **mayamettha sammādīṭṭhīti** vuttaṭṭhāne sammādīṭṭhi. Ettha ca kammapathakathā vitthārato Sammādīṭṭhisutte āvi bhavissati. Micchatesu micchādīṭṭhi-ādayo dvedhāvitakke.

Ayaṃ panettha saṅkhepo, pāṇaṃ atipātentīti **pāṇātipātī**, pāṇaghātakāti attho. Adinnaṃ ādiyantīti **adinnādāyī**, parassa hārinoti attho. Abrahmaṃ hīnaṃ lāmakadhammaṃ² carantīti **abrahmacārī**,

1. Ma 3. 298 piṭṭhe.

2. Lāmakakammaṃ (Ka)

methunadhammappaṭisevakāti attho. Brahmaṃ seṭṭhaṃ paṭipadaṃ carantīti **brahmacārī**, methunappaṭiviratāti attho. Ettha ca brahmacariyaṃ sallekhoti veditabbaṃ. Brahmacariyañhi abrahmacariyaṃ sallekhati. Musā vadantīti **musāvādī**, pasesaṃ atthabhañjanakaṃ tucchāṃ alikaṃ vācaṃ bhāsītāroti attho. Pisuṇā vācā etesanti **pisuṇavācā**. Pasesaṃ mammacchedikā pharusā vācā etesanti **pharusavācā**. Samphaṃ niratthakavacanaṃ palapanantīti **samphappalāpī**. Abhijjhāyantīti **abhijjhālū**, parabhaṇḍalubbhanasilāti attho. Byāpannaṃ pūtibhūtaṃ cittametesanti **byāpannacittā**. Micchā pāpikā viññugarahitā etesaṃ diṭṭhīti **micchādiṭṭhī**, kammaṭṭhāpariyāpannāya natthi dinnanti-ādivatthukāya, micchattāpariyāpannāya aniyyānikadiṭṭhiyā ca samannāgatāti attho. Sammā sobhanā viññuppasatthā etesaṃ diṭṭhīti **sammādiṭṭhī**, kammaṭṭhāpariyāpannāya atthi dinnanti-ādikāya kammassakatādiṭṭhiyā, sammattāpariyāpannāya maggadiṭṭhiyā ca samannāgatāti attho.

Micchāsāṅkappāti ayāthāva-aniiyyānika-akusalasāṅkappā. Esa nayo **micchāvācā**ti-ādīsu. Ayaṃ pana viseso, micchāsāṅkappādayo viya hi **micchāsati** nāma pāṭi-ekko koci dhammo natthi, atītaṃ pana cintayato pavattānaṃ catunnampi akusalakkhandhānametaṃ adhivacanaṃ. Yampi vuttaṃ Bhagavatā “atthesā bhikkhave anussati, nesā natthīti vadāmi, puttalābhaṃ vā bhikkhave anussarato, dhanalābhaṃ vā bhikkhave anussarato, yasalābhaṃ vā bhikkhave anussarato”ti, tampi taṃ taṃ cintentassa satipatirūpakena uppattim sandhāya vuttanti veditabbaṃ. **Micchāñāṇī**ti ettha **micchāñāṇanti** pāpakiriyāsu upāyacintāvasena pāpaṃ katvā “sukataṃ mayā”ti paccavekkhaṇākārena ca uppanno moho veditabbo, tena samannāgatā puggalā **micchāñāṇī**. **Sammāñāṇī**ti ettha pana ekūnavīsati bhedaṃ paccavekkhaṇāñāṇaṃ “sammāñāṇaṃ”ti vuccati, tena samannāgatā puggalā **sammāñāṇī**. **Micchāvimuttī**ti avimuttāyeva samānā “vimuttā mayan”ti evaṃsaññino, avimuttīyaṃ vā vimuttisaññino. Tatrāyaṃ vacanattho, micchā pāpikā viparītā vimutti etesaṃ atthīti **micchāvimuttī**. Micchāvimuttīti ca yathāvuttenākārena pavattānaṃ akusalakkhandhānametaṃ adhivacanaṃ. Phalasampayuttāni pana sammādiṭṭhi-ādīni aṭṭhaṅgāni ṭhapetvā sesadhammā **sammāvimuttī**ti veditabbā. Sā ca micchāvimuttim sallikhitvā ṭhitattā

sallekhoti veditabbā. Tattha niyojento āha “mayametta sammāvimuttī bhavissāmāti sallekho karaṇīyo”ti.

Ito parāni tīṇi nīvaraṇavasena vuttāni. **Abhijjhālū byāpannacittāti** evaṃ kammāpathesu vuttattā panettha paṭhamāni dve nīvaraṇāni na vuttānīti veditabbāni. Tattha thinamiddhena pariyuṭṭhitā abhibhūtāti **thinamiddhāpariyuṭṭhitā**. Uddhaccena samannāgatāti **uddhatā**. Vicinantā kicchanti na sakkonti sanniṭṭhānaṃ kātunti **vicikicchī**. **Kodhanāti**-ādīni dasa cittassa upakkilesavasena vuttāni. Tattha kodhādīsu yaṃ vattabbaṃ siyā, taṃ sabbaṃ Dhammāyādavatthasuttesu vuttaṃ. Ayaṃ panettha vacanattho, **kodhanāti** kujjhanasīlā. **Upanāhīti** upanāhanasīlā, upanāho vā etesaṃ atthīti **upanāhī**. Tathā **makkhī palāsī** ca. Issantīti **issukī**. Maccharāyantīti **maccharī**, maccheraṃ vā etesaṃ atthīti maccharī. Saṭṭhayantīti **saṭṭhā**, na sammā bhāsantīti vuttaṃ hoti, kerāṭīkayuttānametaṃ adhivacanaṃ. Māyā etesaṃ atthīti **māyāvī**. Thambhasamaṅgitāya **thaddhā**. Atimānāyogena **atimānī**. Vuttapaccanīkanāyena sukkapakkho veditabbo.

Dubbacāti vattuṃ dukkhā kiñci vuccamānā na sahanti. Tabbiparītā **suvacā**. Devadattādisadisā pāpakā mittā etesanti **pāpamittā**. Buddhā vā Sāriputtādisadisā vā kalyāṇā mittā etesanti **kalyāṇamittā**. Kāyaduccarītādīsu cittavossaggavasena **pamattā**. Viparītā **appamattāti** veditabbā. Imāni tīṇi pakiṇṇakavasena vuttāni. **Assaddhāti**-ādīni satta asaddhamavasena. Tattha tīsu vatthūsu saddhā etesaṃ natthīti **assaddhā**. Sukkapakkhe saddahantīti **saddhā**, saddhā vā etesaṃ atthītipi saddhā. Natthi etesaṃ hirīti **ahirikā**, akusalasamāpattiyā ajigucchamānānametaṃ adhivacanaṃ. Hirī etesaṃ mane¹, hiriyā vā yuttamanāti **hirimanā**. Na ottappantīti **anottappī**, akusalasamāpattiyā na bhāyantīti vuttaṃ hoti. Tabbiparītā **ottappī**. Appaṃ sutametesanti **appassutā**, **appanti** ca thokanti na gahetabbaṃ, natthīti gahetabbaṃ. “Appassutā”ti hi nissutā sutavirahitā vuccanti. Bahu sutametesanti **bahussutā**, Tathāgatabhāsitaṃ ekampi gāthaṃ yāthāvato ñatvā anurūpapaṭiṇṇānametaṃ adhivacanaṃ. Kucchitā sīdantīti **kusitā**, hīnavīriyānametaṃ adhivacanaṃ.

1. Mano (Ka)

āraddhaṃ vīriyametesanti **āraddhavīriyā**, sammappadhānayuttānametaṃ adhivacanaṃ, muṭṭhā sati etesanti **muṭṭhassatī**, naṭṭhassatīti vuttaṃ hoti. Upaṭṭhitā sati etesanti **upaṭṭhitassatī**, niccaṃ ārammaṇābhimukhappavattasatīnametaṃ adhivacanaṃ. Duṭṭhā paññā etesanti **duppaññā**, naṭṭhapaññāti vuttaṃ hoti. Paññāya sampannāti **paññāsampannā**, paññāti ca idha vipassanāpaññā veditabbā. Vipassanāsambhāro hi paripūro imasmim ṭhāne āgato, tasmā vipassanāpaññāva ayanti porañānaṃ āṇā.

Idāni ekameva lokuttaraguṇānaṃ antarāyakaraṃ aniyyānikadiṭṭhiṃ tīhākārehi dassento **sandiṭṭhiparāmāsīti**-ādimāha. Tattha sandiṭṭhiṃ parāmasantīti **sandiṭṭhiparāmāsī**. Ādhānaṃ gaṇhantīti **ādhānaggāhī**, **ādhānanti** daḷhaṃ vuccati, daḷhaggāhīti attho. Yuttakāraṇaṃ disvāva laddhiṃ paṇinissajantīti **paṇinissaggī**, dukkhena kicchena kasirena bahumpi kāraṇaṃ dassetvā na sakkā paṇinissaggam kātunti **duppaṇinissaggī**, ye attano uppannaṃ diṭṭhiṃ idameva saccanti daḷhaṃ gaṇhitvā api Buddhādīhi kāraṇaṃ dassetvā vuccamānā na paṇinissajjanti, tesametaṃ adhivacanaṃ. Tādisā hi puggalā yaṃ yadeva dhammaṃ vā adhammaṃ vā gaṇhanti¹, taṃ sabbaṃ “evaṃ amhākaṃ ācariyehi kathitaṃ, evaṃ amhehi sutan”ti kummova aṅgāni sake kapāle antoyeva samodahanti, kumbhīlaggāhaṃ gaṇhanti na vissajjanti. Vuttavipariyāyena sukkapakkho veditabbo.

84. Evaṃ catucattālīsāya ākārehi sallekhaṃ dassetvā idāni tasmim sallekhe cittuppādassāpi bahūpakāraṇaṃ dassetuṃ **cittuppādampi kho ahanti**-ādimāha.

Tassattho, ahaṃ Cunda kusalesu dhammesu cittuppādampi bahūpakāraṇaṃ vadāmi, yā panetā kāyena ca vācāya ca anuvidhiyanā, yathā paṭṭhamāṃ cittaṃ uppannaṃ, tattheva tesāṃ dhammānaṃ kāyena karaṇaṃ, vācāya ca “karoṭhā”ti āṇāpanaṃ vā uggahaparipucchādīni vā, tattha vādoyevako, ekantabahūpakārayeva hi tā anuvidhiyanāti dasseti. Kasmā panettha cittuppādopi bahūpakāroti. Ekantahitasukhāvahattā anuvidhiyanānaṃ hetuttā ca.

1. Suṇanti (Sī, Syā)

“Dānaṃ dassāmi”ti hi cittuppādo sayampi ekantahitasukhāvaho anuvidhiyanānampi hetu, evañhi uppannacittattāyeva dutiyadivase mahāvīthim pidahitvā mahāmaṇḍapaṃ katvā bhikkhusatassa vā bhikkhusahassassa vā dānaṃ deti, “bhikkhusaṅghaṃ nimantetha pūjetha parivisathā”ti parijane āṇāpeti. Evaṃ “saṅghassa cīvaraṃ senāsanam bhesajjaṃ dassāmi”ti cittuppādo sayampi ekantahitasukhāvaho anuvidhiyanānampi hetu, evaṃ uppannacittattāyeva hi cīvarādīni abhisankharoti deti dāpeti ca. Esa nayo saraṇagamanādīsu.

“Saraṇaṃ gacchāmi”ti hi cittaṃ uppādetvāva pacchā kāyena vā vācāya vā saraṇaṃ gaṇhāti. Tathā “pañcaṅgaṃ aṭṭhaṅgaṃ dasaṅgaṃ vā sīlaṃ samādiyissāmi”ti cittaṃ uppādetvāva kāyena vā vācāya vā samādiyati, “pabbajitvā catūsu sīlesu patiṭṭhahissāmi”ti ca cittaṃ uppādetvā kāyena vācāya ca pūretabbaṃ sīlaṃ pūreti. “Buddhavacanaṃ uggahessāmi”ti cittaṃ uppādetvāva ekaṃ vā nikāyaṃ dve vā tayo vā cattāro vā pañca vā nikāye vācāya uggaṇhāti. Evaṃ dhutaṅgasamādāna kammaṭṭhānuggaha kasiṇaparikamma jhānasamāpattivipassanā magga phala paccekabodhi sammāsambodhivasena netabbaṃ.

“Buddho bhavissāmi”ti hi cittuppādo sayampi ekantahitasukhāvaho anuvidhiyanānampi hetu, evañhi uppannacittattāyeva aparena samayena kappasatasahassādhikāni cattāri asaṅkheyyāni kāyena vācāya ca pāramiyo pūretvā sadevakaṃ lokaṃ tārento vicarati. Evaṃ sabbattha cittuppādopi bahūpakāro. Kāyavācāhi pana anuvidhiyanā atibahūpakārāyevāti veditabbā.

Evaṃ kusalesu dhammesu cittuppādassāpi bahūpakāratam dassetvā idāni tattha niyojento “tasmātiha Cundā”ti-ādimāha. Tam atthato pākaṭameva.

85. Evaṃ catucattālīsāya ākārehi dassite sallekhe cittuppādassāpi bahūpakāratam dassetvā idāni tasseva sallekhassa hitādhigamāya maggabhāvaṃ dassento **seyyathāpīti**-ādimāha.

Tassattho, yathā nāma Cunda khāṇukaṇṭakapāsāṇādīhi visamo maggo bhaveyya, tassa parikkamanāya parivajjanatthāya añño suparikammakato viya bhūmibhāgo samo maggo bhaveyya, yathā ca rukkhamūlapāsāṇa papāta kumbhīla makarādi paribyākulaṃ visamaṃ titthamassa, tassa parikkamanāya parivajjanatthāya aññaṃ avisamaṃ anupubbagambhīraṃ sopānaphalakasadisaraṃ titthaṃ bhaveyya, yaṃ paṭipanno sukheveva taṃ nadiṃ vā taḷākaraṃ vā ajjhogāhetvā nhāyeyya vā uttareyya vā, evameva kho Cunda visamamaggavisamatitthasadisāya vihiṃsāya samannāgatassa vihiṃsakapuggalassa samamaggasamatitthasadisā avihimsā hoti parikkamanāya. Yatheva hi visamamaggatitthaparivajjanatthāya samo maggo ca titthañca paṭiyattaṃ, evaṃ vihiṃsāparivajjanatthāya avihimsā paṭiyattā, yaṃ paṭipanno sukheveva manussagatiṃ vā devagatiṃ vā ajjhogāhetvā sampattiṃ vā anubhaveyya uttareyya vā lokā. Eteneva upāyena sabbapadāni yojetabbāni.

86. Evaṃ tasseva hitādhigamāya maggabhāvaṃ dassetvā idāni uparibhāgaṅgamanīyataṃ¹ dassento **seyyathāpīti**-ādimāha.

Tassattho, yathā nāma Cunda ye keci akusalā dhammā paṭisandhiyā janakā vā ajanakā vā, dinnāyapi paṭisandhiyā vipākajanakā vā ajanakā vā, sabbe te jātivaseṇa adhobhāgaṅgamanīyāti² evaṃnāmāva honti, vipākakāle aniṭṭhākantavipākattā. Yathā ca ye keci kusalā dhammā paṭisandhiyā janakā vā ajanakā vā, dinnāyapi paṭisandhiyā vipākajanakā vā ajanakā vā, sabbe te jātivaseṇa uparibhāgaṅgamanīyāti evaṃnāmāva honti, vipākakāle iṭṭhakantavipākattā, evameva kho Cunda vihiṃsakassa -pa- uparibhāgāyāti. Tatrāyaṃ opammaṣaṃsandana—yathā sabbe akusalā adhobhāgaṅgamanīyā, evaṃ vihiṃsakassa ekā vihiṃsāpi. Yathā ca sabbe kusalā uparibhāgaṅgamanīyā, evaṃ avihimsakassa ekā avihimsāpi. Eteneva upāyena akusalaṃ akusalena kusalañca kusalena upametabbaṃ, ayaṃ kirettha adhippāyoti.

87. Evaṃ tasseva sallekhassa uparibhāgaṅgamanīyataṃ dassetvā idāni parinibbāpane samatthabhāvaṃ dassetuṃ **so vata Cundāti**-ādimāha.

1. Uparibhāvaṅgamanīyataṃ (Sī, Syā)

2. Adhobhāvaṅgamanīyāti (Sī, Syā)

Tattha **soti** vuttappakārapuggalaniddeso, tassa yoti imaññ uddesavacanaññ āharitvā yo attanā palipapalipanno, so vata Cunda paraññ palipapalipannaññ uddharissatīti evaññ sabbapadesu sambandho veditabbo. **Palipapalipannoti** gambhīrakaddame nimuggo vuccati, no ca kho ariyassa vinaye. Ariyassa pana vinaye **palipanti** pañca kāmagaṇā vuccanti. **Palipannoti** tattha nimuggo bālaputhujjano, tasmā evamettha atthayojanā veditabbā. Yathā Cunda koci puriso yāva nāsikaggā gambhīre kaddame nimuggo aparaññ tattheva nimuggaññ hatthe vā sīse vā gahetvā uddharissatīti netaññ ṭhānaññ vijjati, na hi taññ kāraṇamatthi, yena so taññ uddharitvā thale patiṭṭhapeyya, evameva yo attanā pañcakāmagaṇapalipe palipanno, so vata paraññ tattheva palipapalipannaññ uddharissatīti netaññ ṭhānaññ vijjati.

Tattha siyā ayuttametaññ, puthujjanānampi bhikkhubhikkhuni-upāsaka-upāsikānaññ dhammadesanaññ sutvā hontiyeva dhammaññ abhisametāro, tasmā palipapalipanno uddharatīti, taññ na tathā daṭṭhabbaññ. Bhagavāyeva hi tattha uddharati, pasaṃsāmattameva pana dhammakathikā labhanti raññā pahitalekhavācako viya. Yathā hi rañño paccantajanapade pahitaññ lekhaññ tattha manussā lekhaññ vācetuññ ajānantā yo vācetuññ jānāti, tena vācāpetvā tamatthaññ sutvā “rañño āṇā”ti ādarena sampādentī, na ca nesaññ hoti “lekhaññakassa ayaññ āṇā”ti. Lekhaññakako pana “vissaṭṭhāya vācāya vācesi anelagaḷāyā”ti pasaṃsāmattameva labhati, evameva kiñcāpi Sāriputtapabhutayo dhammakathikā dhammaññ desenti, atha kho likhitapaṇṇavācako viya te hontī. Bhagavatoyeva pana sā dhammadesanā rañño āṇā viya. Ye ca taññ sutvā dhammaññ abhisamenti, te Bhagavāyeva uddharatīti veditabbā. Dhammakathikā pana “vissaṭṭhāya vācāya dhammaññ desenti anelagaḷāyā”ti pasaṃsāmattameva labhantīti. Tasmā yuttamevetanti. Vuttavipariyāyena sukkapakkho veditabbo.

Adanto avinīto aparinibbutoti ettha pana anibbisatāya **adanto**. Asikkhitavinayatāya **avinīto**. Anibbutakilesatāya **aparinibbutoti** veditabbo². So tādiso paraññ damessati, nibbisaññ

1. Tattheva palipannaññ (Sī, Syā)

2. Attho (Ka)

karissati, viñessati vā tisso sikkhā sikkhāpessati, parinibbāpessati vā tassa kilese nibbāpessatīti netam̐ ṭhānam̐ vijjati. Vuttavipariyāyena sukkapakkho vedītabbo.

Evameva kho Cunda vihiṃsakassa -pa- parinibbānāyāti ettha pana evamattho vedītabbo—yathā hi attanā apalipapalipanno param̐ palipapalipannam̐ uddharissati, danto damessati, vinīto viñessati, parinibbuto parinibbāpessatīti ṭhānametaṃ vijjatīti. Ki pana tanti, apalipapalipannattam̐ dantattam̐ vinītattam̐ parinibbutattam̐ ca, evameva kho Cunda vihiṃsakassa purisapuggalassa avihimsā hoti parinibbānāya. Kim̐ vuttam̐ hoti, yo attanā avihimsako, tassa yā avihimsā, ayam̐ yā esā vihiṃsakassa parassa vihiṃsā, tassā parinibbānāya hoti, attanā hi avihimsako, parassa vihiṃsācetanam̐ nibbāpessatīti ṭhānametaṃ vijjati. Kim̐ pana tanti, avihimsakattameva. Yañhi yena attanā adhigatam̐ hoti, so param̐ tadatthāya samādapetum̐ sakkotīti.

Atha vā yathā attanā apalipanno danto vinīto parinibbuto param̐ palipapalipannam̐ adantam̐ avinītam̐ aparinibbutam̐ ca uddharissati damessati viñessati parinibbāpessatīti ṭhānametaṃ vijjati, evameva vihiṃsakassa purisapuggalassa vihiṃsāpahānāya maggam̐ bhāvayato uppannā avihimsā hoti parinibbānāya. Parinibbuto viya hi aparinibbutam̐ avihimsācetanāva vihiṃsācetanam̐ parinibbāpetum̐ samatthā. Etamattham̐ dassento “evameva kho Cundā”ti-ādimāhāti evamettha attho daṭṭhabbo. Yathā cettha, evam̐ sabbapadesu. Ativīthārabhayena pana anupadayojanā na katāti.

88. Evam̐ tassa parinibbāpane samatthabhāvam̐ dassetvā idāni tam̐ desanam̐ nigametvā dhammapaṭipattiyam̐ niyojetum̐ **iti kho Cundāti-**ādimāha. Tattha **sallekha-pariyāyoti** sallekhakāraṇam̐. Esa nayo sabbattha ettha avihimsādayo eva vihiṃsādīnam̐ sallekhanato sallekhakāraṇam̐. Tesam̐ vasena cittassa uppādetabbato cittuppādakāraṇam̐, vihiṃsādi, parikkamanassa hetuto parikkamanakāraṇam̐, uparibhāganipphādanato

uparibhāgākāraṇaṃ¹, vihiṃsādīnaṃ parinibbāpanato parinibbānakāraṇanti veditabbā. **Hitesināti** hitaṃ esantena. **Anukampakenāti** anukampamānena. **Anukampaṃ upādāyāti** anukampaṃ cittaṇa pariggahetvā, pariccātipi² vuttaṃ hoti. **Kataṃ vo taṃ mayāti** taṃ mayā ime pañca pariyāyedassentena tumhākaṃ kataṃ. Ettakameva hi anukampakassa Satthu kiccaṃ, yadidaṃ aviparītadhammadesanā. Ito paraṃ pana paṭipatti nāma sāvakanāṃ kiccaṃ. Tenāha **etāni Cunda rukkhamūlāni -pa- amhākaṃ anusāsanti**.

Tattha ca **rukkhamūlāni** iminā rukkhamūlasenāsanāṃ dasseti. **Suññāgārāni** iminā janavivittaṭṭhānaṃ. Ubhayenāpi ca yogānurūpasenāsanamācikkhati, dāyajjaṃ niyyātetī. **Jhāyathāti** ārammaṇūpanijjhānena aṭṭhatimśārammaṇāni, lakkhaṇūpanijjhānena ca aniccādīto khandhāyatanādīni upanijjhāyatha, samathañca vipassanañcavaḍḍhethāti vuttaṃ hoti. **Mā pamādatthāti** mā pamajjittha. **Mā pacchā vippaṭisārino ahuvatthāti** ye hi pubbe daharakāle ārogyakāle sattaṃ appāyādisampattikāle Satthu sammukhībhāvakāle ca yonisomanasikāravirahitā rattindivaṃ maṅgulabhattā³ hutvā seyyasukhaṃ middhasukhamanubhontā pamajjanti, te pacchā jarākāle rogakāle maraṇakāle vipattikāle Satthu parinibbutakāle ca taṃ pubbe pamādavihāraṃ anussarantā, sappaṭisandhikālakiriyañca bhāriyaṃ sampassamānā vippaṭisārino honti, tumhe pana tādisā mā ahuvatthāti etamatthaṃ dassento āha “mā pacchā vippaṭisārino ahuvatthā”ti. **Ayaṃ vo amhākaṃ anusāsanti** ayaṃ amhākaṃ santikā “jhāyatha mā pamādatthā”ti tumhākaṃ anusāsanti, ovādoti vuttaṃ hoti.

Papañcasūdaniyā Majjhimanikāyaṭṭhakathāya

Sallekhasuttavaṇṇanā niṭṭhitā.

9. Sammādiṭṭhisuttavaṇṇanā

89. **Evaṃ me sutanti** Sammādiṭṭhisuttaṃ. Tattha “sammādiṭṭhi sammādiṭṭhīti āvuso vuccati, kittāvataṃ nu kho āvuso”ti vā “katamaṃ

1. Uparibhāvanipphādanato uparibhāvākāraṇaṃ (Sī, Syā)

2. Paṭiccātipi (Sī, Syā)

3. Maṅkulabhattaṃ (Ka)

panāvuso akusalan”ti vā evaṃ yattakā therena pucchā vuttā, sabbā kathetukamyatā pucchā eva.

Tattha yasmā jānantāpi sammādiṭṭhīti vadanti ajanantāpi bāhirakāpi sāsānikāpi anussavādivasenāpi attapaccakkhenāpi, tasmā taṃ bahūnaṃ vacanaṃ upādāya dvikkhattuṃ āmasanto “sammādiṭṭhi sammādiṭṭhīti āvuso vuccatī”ti āha. Ayañhi ettha adhippāyo, aparehipi sammādiṭṭhīti vuccati, athāparehipi sammādiṭṭhīti vuccati, svāyaṃ evaṃ vuccamāno atthañca lakkhaṇaṃ upādāya kittāvatā nu kho āvuso ariyasāvako sammādiṭṭhi hotīti. Tattha **sammādiṭṭhīti** sobhanāya pasatthāya ca diṭṭhiyā samannāgato. Yadā pana dhammeveva ayaṃ sammādiṭṭhisaddo vattati, tadāssa sobhanā pasatthā ca diṭṭhi **sammādiṭṭhīti** evamattho veditabbo.

Sā cāyaṃ samādiṭṭhi duvidhā hoti lokiyā lokuttarāti. Tattha kammassakatāññaṃ saccānulomikaññaṃca lokiyā sammādiṭṭhi, saṅkhepato vā sabbāpi sāsavā paññā. Ariyamaggaphalasampayuttā paññā lokuttarā sammādiṭṭhi. Puggalo pana tividho hoti puthujjano sekkho asekkho ca. Tattha puthujjano duvidho hoti bāhirako sāsāniko ca. Tattha bāhirako kammavādī kammassakatādiṭṭhiyā sammādiṭṭhi hoti, no saccānulomikāya attadiṭṭhiparāmāsakattā. Sāsāniko dvīhipi. Sekkho niyatāya sammādiṭṭhiyā sammādiṭṭhi. Asekkho asekkhāya. Idha pana niyatāya niyyānikāya lokuttarakusalasammādiṭṭhiyā samannāgato “sammādiṭṭhī”ti adhippeto. Tenevāha “ujugatāssa diṭṭhi dhamme aveccappasādena samannāgato āgato imaṃ saddhamman”ti, lokuttarakusalasammādiṭṭhiyeva hi antadvayamanupagamma ujubhāvena gatattā, kāyavaṅkāḍiṇi ca sabbavaṅkāṇi samucchinditvā gatattā ujugatā hoti, tāyeva ca diṭṭhiyā samannāgato navappakārepi lokuttaradhamme aveccappasādena acalappasādena samannāgato hoti, sabbadiṭṭhigahanāni ca vinibbeṭhento sabbakilese pajahanto jātiśaṃsārā nikkhamanto paṭipattiṃ pariniṭṭhapento ariyena maggena āgato imaṃ Sambuddhappaveditaṃ amatogadhamṃ nibbānasaṅkhātāṃ **saddhammanti** vuccati.

Yato khoti kālaparicchēdāvacanametaṃ, yasmim kāleti vuttaṃ hoti. **Akusalañca pajānātīti** dasākusalakammāpathasaṅkhātāṃ

akusalañca pajānāti, nirodhārammaṇāya pajānanāya kiccavasena “idaṃ dukkhan”ti paṭivijjhanto akusalaṃ pajānāti. **Akusalamūlañca pajānāti**ti tassa mūlapaccayabhūtaṃ akusalamūlañca pajānāti, teneva pakārena “ayaṃ dukkhasamudayo”ti paṭivijjhanto. Esa nayo **kusalañca kusalamūlañcā**ti etthāpi. Yathā cettha, evaṃ ito paresu sabbavāresu kiccavaseneva vatthupajānanā veditabbā. **Ettāvatāpī**ti ettakena iminā akusalādi-pajānanenāpi. **Sammādiṭṭhi hotī**ti vuttappakārāya lokuttarasammādiṭṭhiyā samannāgato hoti. **Ujugatāssa -pa- imaṃ saddhammanti** ettāvatā saṃkhittadesanā niṭṭhitā hoti. Desanāyeva cesā saṃkhittā, tesam̐ pana bhikkhūnaṃ vitthāravaseneva sammāmanasikārapaṭivedho veditabbo.

Dutiyavāre pana desanāpi vitthārena manasikārapaṭivedhopi vitthāreneva vuttoti veditabbo. Tattha “saṃkhittadesanāya dve heṭṭhimamaggā, vitthāradesanāya dve uparimamaggā kathitā”ti bhikkhū āhaṃsu vitthāradesanāvasāne “sabbaso rāgānusayaṃ pahāyā”ti-ādivacanaṃ sampassamānā. Thero panāha “saṃkhittadesanāyapi cattāro maggā rāsito kathitā, vitthāradesanāyapi”ti. Yā cāyaṃ idha saṃkhittavitthāradesanāsu vicāraṇā āvikatā, sā sabbavāresu idha vuttanayeneva veditabbā. Apubbānuttānapadavaṇṇanā mattameva hi ito paraṃ karissāma.

Akusalakammavathavaṇṇanā

Tattha paṭhamavārassa tāva vitthāradesanāya “pāṇātipāto kho āvuso akusalan”ti-ādīsu akosallappavattiyā akusalaṃ veditabbaṃ, parato vattabbakusalappaṭipakkhato vā. Taṃ lakkhaṇato sāvajjadukkhavipākam̐ saṃkiliṭṭham̐ vā. Ayaṃ tāvettha sādharmaṇapadavaṇṇanā.

Asādharmaṇesu pana pāṇassa atipāto **pāṇātipāto**, pāṇavadho pāṇaghātoti vuttaṃ hoti. **Pāṇoti** cettha vohārato satto, paramatthato jīvitindriyaṃ. Tasmim̐ pana pāṇe pāṇasaññino jīvitindriyupacchedaka-upakkamasamuṭṭhāpikā kāyavacīdvārānaṃ aññataradvārappavattā vadhakacetanā pāṇātipāto. So guṇavirahitesu tiracchānagatādīsu pāṇesu khuddake pāṇe appasāvajjo,

mahāsarīre mahāsāvajjo. Kasmā? Payogamahantatāya. Payogasamattepi vatthumahantatāya. Guṇavantesu manussādīsu appaguṇe paṇe appasāvajjo, mahāguṇe mahāsāvajjo. Sarīraguṇānam pana samabhāve sati kilesānam upakkamanam ca mudutāya appasāvajjo, tibbatāya mahāsavajjoti veditabbo. Tassa pañca sambhārā honti paṇo, paṇasaññitā, vadhakacittam, upakkamo, tena maraṇanti. Cha payogā sāhatthiko, āṇattiko, nissaggiyo, thāvaro, vijjāmayo, iddhimayoti. Imasmim panettha vitthāriyamāne atipapañco hoti, tasmā nam na vitthārayāma, aññañca evarūpaṃ. Atthikehi pana Samantapāsādikavinayaṭṭhakatham¹ oloketvā gahetabbā.

Adinnassa ādānam **adinnādānam**, parassa haraṇam theyyam, corikāti vuttaṃ hoti. Tattha **adinnanti** parapariggahitam, yattha paro yathākāmakāritam āpajjanto adaṇḍāraho anupavajjo ca hoti. Tasmim pana parapariggahite parapariggahitasaññino tadādāyaka-upakkamasamutṭhāpikā theyyacetanā adinnādānam, tam hīne parasantake appasāvajjam, paṇite mahāsāvajjam. Kasmā? Vatthupaṇitāya. Vatthusamatte sati guṇādhikānam santake vatthusmim mahāsāvajjam. Tam tam guṇādhikam upādāya tato tato hīnaguṇassa santake vatthusmim appasāvajjam. Tassa pañca sambhārā honti parapariggahitam, parapariggahitasaññitā, theyyacittam, upakkamo, tena haraṇanti. Cha payogā sāhatthikādayova. Te ca kho yathānurūpaṃ theyyāvahāro, pasayhāvahāro, paṭicchannāvahāro, parikappāvahāro, kusāvahāroti imesam avahārānam vasena pavattāti ayamettha saṅkhepo, vitthāro pana samantapāsādikāyam² vutto.

Kāmesumicchācāroti ettha pana **kāmesū**ti methunasamācāresu. **Micchācāro**ti ekantanindito lāmakācāro. Lakkhaṇato pana asaddhammādhippāyena kāyadvārappavattā agamanīyaṭṭhānavīkkamacetanā kāmesumicchācāro.

Tattha **agamanīyaṭṭhānam** nāma purisānam tāva māturakkhitā, piturakkhitā, mātāpiturakkhitā, bhāturakkhitā, bhāginirakkhitā, nātirakkhitā, gottarakkhitā, dhammarakkhitā, sārakkhā, sapaṇḍāti māturakkhitādayo dasa,

1. Vi-Ṭṭha 2. 39 piṭṭhe.

2. Vi-Ṭṭha 1. 264 piṭṭhe.

dhanakkīṭā, chandavāsini, bhogavāsini, paṭavāsini, odapattakini, obhaṭacumbaṭā, dāsī ca bhariyā ca, kammakārī ca bhariyā ca, dhajāhatā, muhuttikāti etā ca dhanakkīṭādayo dasāti **vīsati itthiyo**. Itthīsu pana dvinnam sārakkhāsaparidaṇḍanam, dasannam ca dhanakkīṭādīnanti dvādasannam itthīnam aññe purisā, idaṃ **agamanīyaṭṭhānam** nāma. So panesa micchācāro sīlādiguṇarahite agamanīyaṭṭhāne appasāvajjo, sīlādiguṇasampanne mahāsāvajjo. Tassa cattāro sambhārā agamanīyavatthu, tasmim sevanacittam, sevanapayogo, maggenamaggappaṭipatti-adhivāsananti. Eko payogo sāhatthiko eva.

Musāti visamvādanapurekkhārassa atthabhañjako vacīpayogo kāyapayogo vā. Visamvādanādhippāyena panassa paravisamvādanakakāyavacīpayogasamuṭṭhāpikā cetanā **musāvādo**. Aparo nayo **musāti** abhūtam ataccham vatthu. **Vādoti** tassa bhūtato tacchato viññāpanam. Lakkhaṇato pana atatham vatthum tathato param viññāpetukāmassa tathāviññattisamuṭṭhāpikā cetanā musāvādo. So yamattham bhañjati, tassa appatāya appasāvajjo, mahantatāya mahāsāvajjo. Api ca gahaṭṭhānam attano santakam adātukāmatāya natthī-ādinayappavatto appasāvajjo, sakkhinā hutvā atthabhañjanattham vutto mahāsāvajjo. Pabbajitānam appakampi telam vā sappim vā labhitvā hasādhippāyena “ajja gāme telam nadīmaññe sandatī”ti pūraṇakathānayena pavatto appasāvajjo, adiṭṭhamyeva pana diṭṭhanti-ādinā nayena vadantānam mahāsāvajjo. Tassa cattāro sambhārā honti atatham vatthu, visamvādanacittam, tajjo vāyāmo, parassa tadatthavijānananti. Eko payogo sāhatthikova. So kāyena vā kāyappaṭibaddhena vā vācāya vā visamvādakakiriyākaṇe daṭṭhabbo. Tāya ce kiriyāya paro tamattham jānāti, ayam kiriyāsamuṭṭhāpikacetanākkhaṇeyeva musāvādakammunā bajjhati.

Pisuṇā vācāti-ādīsu yāya vācāya yassa tam vācam bhāsati, tassa hadaye attano piyabhāvam parassa ca suññabhāvam karoti, sā **pisuṇā vācā**. Yāya pana attānampi parampi pharusampi karoti, sā vācā sayampi pharusā neva kaṇṇasukhā na hadayasukhā vā, ayam **pharusā vācā**.

Yena samphaṃ palapati niratthakaṃ, so **samphappalāpo**. Tesam mūlabhūtā cetanāpi piṣuṇāvācādināmameva labhati, sā eva ca idha adhippetāti. Tattha samkiliṭṭhacittassa paresam vā bhedāya attano piyakamyatāya vā kāyavacīpayogasamuṭṭhāpikā cetanā piṣuṇā vācā. Sā yassa bhedaṃ karoti, tassa appaṇṇatāya appasāvajjā, mahāṇṇatāya mahāsāvajjā. Tassā cattāro sambhārā bhinditabbo paro, “iti ime nānā bhavissanti vinā bhavissanti”ti bhedapurekkhārātā vā, “ahaṃ piyo bhavissāmi vissāsiko”ti piyakamyatā vā, tājjo vāyāmo, tassa tadatthavijānananti.

Parassa mammacchedakakāyavacīpayogasamuṭṭhāpikā ekantapharusā cetanā pharusā vācā. Tassa āvibhāvattammaidaṃ vatthu—eko kira dārako mātuvacanaṃ anādiyitvā araṇṇaṃ gacchati, taṃ mātā nivattetuṃ asakkontī “caṇḍā taṃ mahimsī anubandhatū”ti akkosī. Athassa tatheva araṇṇe mahimsī utṭhāsi, dārako “yaṃ mama mātā mukhena kathesi taṃ mā hotu, yaṃ cittaena cintesi taṃ hotū”ti saccakiriyam akāsi. Mahimsī tattheva baddhā viya aṭṭhāsi, evaṃ mammacchedakopi payogo¹ cittasaṇhatāya pharusā vācā na hoti. Mātāpitāro hi kadāci puttake evampi vadanti “coro vo² khaṇḍākhaṇḍikaṃ karontū”ti, uppalapattampi ca nesaṃ upari patantaṃ³ na icchanti. Ācariyupajjhāyā ca kadāci nissitake evaṃ vadanti “kiṃ ime ahirikā anottapino caranti⁴ niddhamatha ne”ti. Atha kho nesaṃ āgamādhigamasampattim icchanti. Yathā ca cittasaṇhatāya pharusā vācā na hoti, evaṃ vacanaṣaṇhatāya aphaṇṇatāya vācāpi na hoti. Na hi mārāpetukāmassa “imaṃ sukhaṃ sayāpethā”ti vacanaṃ aphaṇṇatāya vācā hoti. Cittapharusatāya panesā pharusā vācāva. Sā yaṃ sandhāya pavattitā, tassa appaṇṇatāya appasāvajjā, mahāṇṇatāya mahāsāvajjā. Tassā tayo sambhārā akkositabbo paro, kupitacittam, akkosanāti.

Anatthaviññāpakakāyavacīpayogasamuṭṭhāpikā akusalacetanā **samphappalāpo**. So āsevanamandatāya appasāvajjo, āsevanamahantatāya mahāsāvajjo. Tassa dve sambhārā bhāratayuddhasītāharaṇādiniratthakakathāpurekkhārātā, tathārūpīkathākathananti.

1. Vacīpayogo (Syā) 2. Te (Ka) 3. Upari patanaṃ (Ka) 4. Vadanti (Sī, Syā)

Abhijjhāyatīti **abhijjhā**, parabhaṇḍābhimukhī hutvā tanninnatāya pavattatīti attho. Sā “aho vata idaṃ mamassā”ti evaṃ parabhaṇḍābhijjhāyanalakkhaṇā. Adinnādānaṃ viya appasāvajjā ca mahāsāvajjā ca. Tassā dve sambhārā parabhaṇḍaṃ, attano pariṇāmanañca. Parabhaṇḍavatthuke hi lobhe uppannepi na tāva kammaopathabhedo hoti, yāva “aho vatīdaṃ mamassā”ti attano na pariṇāmeti.

Hitasukhaṃ byāpādayatīti **byāpādo**. So paravināsāya manopadosalakkhaṇo, pharusā vācā viya appasāvajjo mahāsāvajjo ca. Tassa dve sambhārā parasatto ca, tassa ca vināsacintā. Parasattavatthuke hi kodhe uppannepi na tāva kammaopathabhedo hoti, yāva “aho vatāyaṃ ucchijjeyya vinasseyyā”ti tassa vināsaṃ na cinteti.

Yathābhuccagahaṇābhāvena micchā passatīti **micchādiṭṭhi**. Sā “natthi dinnan”ti-ādinā nayena viparītadassanalakkhaṇā. Samphappalāpo viya appasāvajjā mahāsāvajjā ca. Api ca aniyatā appasāvajjā, niyatā mahāsāvajjā. Tassā dve sambhārā vatthuno ca gahitākāraviparītātā, yathā ca taṃ gaṇhāti, tathābhāvena tassupaṭṭhānanti.

Imesaṃ pana dasannaṃ akusalakammaopathānaṃ dhammato koṭṭhāsato ārammaṇato vedanāto mūlatoti pañcahākārehi vinicchayo veditabbo.

Tattha **dhammatoti** etesu hi paṭipāṭiyā satta cetanādhammāva honti, abhijjhādayo tayo cetanāsampayuttā.

Koṭṭhāsatotī paṭipāṭiyā satta, micchādiṭṭhi cāti ime aṭṭha kammaopathā eva honti, no mūlāni. Abhijjhābyāpādā kammaopathā ceva mūlāni ca. Abhijjhā hi mūlaṃ patvā lobho akusalamūlaṃ hoti. Byāpādo doso akusalamūlaṃ.

Ārammaṇatotī pāṇātipāto jīvitindriyārammaṇato saṅkhārārammaṇo hoti. Adinnādānaṃ sattārammaṇaṃ vā saṅkhārārammaṇaṃ vā. Micchācāro phoṭṭhabbavasena saṅkhārārammaṇo. Sattārammaṇotipi eke. Musāvādo sattārammaṇo vā saṅkhārārammaṇo vā. Tathā pisuṇā vācā. Pharusā vācā sattārammaṇāva. Samphappalāpo diṭṭhasutamutaviññātavasena

sattārammaṇo vā saṅkhārārammaṇo vā, tathā abhijjhā. Byāpādo sattārammaṇova. Micchādiṭṭhi tebhūmakadhammasena saṅkhārārammaṇā.

Vedanātoti pāṇātipāto dukkhavedano hoti. Kiñcāpi hi rājāno coraṃ disvā hasamānāpi “gacchatha naṃ ghāthethā”ti vadanti, sanniṭṭhāpakacetanā pana nesaṃ dukkhasampayuttāva hoti. Adinnādānaṃ tivedanaṃ. Micchācāro sukhamajjhattavasena dvivedano, sanniṭṭhāpakacitte pana majjhattavedano na hoti. Musāvādo tivedano, tathā pisuṇā vācā. Pharusā vācā dukkhavedanāva. Samphappalāpo tivedano. Abhijjhā sukhamajjhattavasena dvivedanā, tathā micchādiṭṭhi. Byāpādo dukkhavedano.

Mūlatoti pāṇātipāto dosamohavasena dvimūlako hoti. Adinnādānaṃ dosamohavasena vā lobhamohavasena vā. Micchācāro lobhamohavasena. Musāvādo dosamohavasena vā lobhamohavasena vā, tathā pisuṇā vācā samphappalāpo ca. Pharusā vācā dosamohavasena. Abhijjhā mohavasena ekamūlā, tathā byāpādo. Micchādiṭṭhi lobhamohavasena dvimūlāti.

Lobho akusalamūlanti-ādīsu lubbhatīti **lobho**. Dussatīti **dos**. Muiyatīti **moho**. Tesu lobho sayam ca akusalo sāvajjadukkhavipākaṭṭhena, imesaṃ ca pāṇātipātādīnaṃ akusalānaṃ kesañci sampayuttappabhāvakaṭṭhena kesañci upanissayapaccayaṭṭhena mūlanti **akusalamūlarā**. Vuttampi cetaṃ “ratto kho āvuso rāgena abhibhūto pariyādinnacitto pāṇampi hanatī”ti-ādi. Dosamohānaṃ akusalamūlabhāvepi eseva nayo.

Kusalakammavapaṇṇā

Pāṇātipātā veramaṇī kusalanti-ādīsu **pāṇātipātā**dayo vuttatthā eva. Veramā maṇatīti **veramaṇī**, veramā pajahatīti attho. Viramati vā etāya karaṇabhūtāya, vikārassa¹ vekāraṃ katvāpi **veramaṇī**. Ayam tāvettha byañjanato vapaṇṇā. Atthato pana **veramaṇī**ti kusalacittasampayuttā virati. Yā “pāṇātipātā viramantassa yā tasmim

1. Kāraṇabhūtāya veramhā puggaloti vikārassa (Sī, Syā)

samaye pāṇātipātā ārati viratī”ti evaṃ vuttā kusalacittasampayuttā virati, sā bhedato tividho hoti sampattavirati samādānavirati samucchadaviratīti. Tatha asamādinnaśikkhāpadānaṃ attano jātivayabāhusaccādīni paccavekkhitvā “ayuttaṃ amhākaṃ evarūpaṃ¹ kātun”ti sampattavatthum avitikkamantānaṃ uppajjamānā virati **sampattaviratī**ti veditabbā Sihaḷadīpe **Cakkana-upāsakassa** viya.

Tassa kira daharakāleyeva mātuyā rogo uppajji. Vejgena ca “allasasamaṃsaṃ laddhum vaṭṭatī”ti vuttaṃ. Tato Cakkanassa bhātā “gaccha tāta khettaṃ āhiṇḍāhi”ti Cakkanam pesesi. So tatha gato, tasmim ca samaye eko saso taruṇasassaṃ khādītum āgato hoti, so taṃ disvā vegena dhāvento valliyā baddho “kiri kirī”ti saddamakāsi. Cakkano tena saddena gantvā taṃ gahetvā cintesi “mātu bhesajjaṃ karomī”ti. Puna cintesi “na metaṃ patirūpaṃ, yvāhaṃ mātu jīvitakāraṇā paraṃ jīvitā voropeyyan”ti. Atha naṃ “gaccha araṇṇe sasehi saddhim tiṇodakaṃ paribhuñjā”ti muñci. Bhātarā ca “kim tāta saso laddho”ti pucchito taṃ pavattim ācikkhi. Tato naṃ bhātā paribhāsi. So mātusantikaṃ gantvā “yatohaṃ jāto, nābhijānāmi sañcicca pāṇaṃ jīvitā voropetā”ti saccaṃ vatvā adhiṭṭhāsi². Tāvadevassa mātā arogā ahoṣi.

Samādinnaśikkhāpadānaṃ pana śikkhāpadasamādāne ca tatuttari ca attano jīvitampi pariccajivā vatthum avitikkamantānaṃ uppajjamānā virati **samādānaviratī**ti veditabbā Uttaravaḍḍhamānapabbatavāsī-upāsakassa viya.

So kira **Ambariyavihāravāsīpiṅgalabuddharakkhitatherassa** santike śikkhāpadāni gahetvā khettaṃ kassati. Athassa goṇo naṭṭho, so taṃ gavesanto Uttaravaḍḍhamānapabbataṃ āruhi, tatra naṃ mahāsappo aggaheṣi. So cintesi “imāyassa tikhiṇavāsīyā sīsaṃ chindāmī”ti. Puna cintesi “na metaṃ patirūpaṃ, yvāhaṃ bhāvanīyassa garuno³ santike śikkhāpadaṃ gahetvā bhindeyyan”ti. Evaṃ yāvatiyaṃ cintetvā

1. Evarūpāna (Ka)

2. Aṭṭhāsi (Ka) Abhi-Ṭṭha 1. 146 piṭṭhepi.

3. Sāhaṃ Buddharakkhitatherassa (Ka)

“jīvitam pariccajāmi na sikkhāpadan”ti amse ṭhapitam tikhiṇadaṇḍavāsīm araṇṇe chaḍḍesi. Tāvadeva naṃ mahāvālo¹ muñcivā agamāsīti.

Ariyamaggasampayuttā pana virati **samucchedaviratī**ti veditabbā. Yassā uppattito pabhuti “pāṇam ghātesāmī”ti² ariyapuggalānam cittampi na uppajjatīti. Sā panāyam virati kosallappavattiyā **kusalanti** vuttā. Kucchitasayanato³ vā kusanti laddhavohāram dussilyam lunātītipi **kusalam**. Katamañcāvuso kusalanti imassa pana pañhassa ananurūpattā kusalāti na vuttā.

Yathā ca akusalānam, evaṃ imesampi kusalakammaphānam dhammato koṭṭhāsato ārammaṇato vedanāto mūlatoti pañcahākārehi vinicchayo veditabbo.

Tattha **dhammatoti**, etesu hi paṭipāṭiyā satta cetanāpi vaṭṭanti, viratīyopi. Ante tayo cetanāsampayuttāva.

Koṭṭhāsatotī paṭipāṭiyā satta kammaphā eva, no mūlāni. Ante tayo kammaphāceva mūlāni ca. Anabhijjhā hi mūlam⁴ patvā alobho kusalamūlam hoti. Abyāpādo adoso kusalamūlam. Sammādiṭṭhi amoho kusalamūlam.

Ārammaṇatotī pāṇātipātādīnam ārammaṇāneva etesaṃ ārammaṇāni, vītikkamītatoyeva hi veramaṇī nāma hoti. Yathā pana nibbānārammaṇo ariyamaggo kilese pajahati, evaṃ jīvitindriyādi-ārammaṇāpete kammaphā pāṇātipātādīni dussilyāni pajahantīti veditabbā.

Vedanātotī sabbe sukhavedanā vā hontī, majjhattavedanā vā. Kusalam patvā hi dukkhavedanā nāma natthi.

Mūlatoti paṭipāṭiyā satta kammaphā nāṇasampayuttacittena viramantassa alobha-adosa-amohavasena timulā hontī. Nāṇavippayuttacittena viramantassa dvimulā. Anabhijjhā nāṇasampayuttacittena

1. Mahāsappo (Syā)

3. Kucchitassa salanato (Sī, Syā)

2. Ghātesāmāti (Sī, Syā)

4. Kammapham (Syā, Ka)

viramantassa dvimūlā. Ñāṇavippayuttacittena ekamūlā. Alobho pana attanāva attano mūlaṃ na hoti, abyāpādepi eseva nayo. Sammādiṭṭhi alobhādosavasena dvimūlāvāti.

Alobho kusalamūlanti-ādīsu na lobhoti **alobho**, lobhapaṭipakkhassa dhammassetaṃ adhivacanaṃ. Adosāmohepi eseva nayo. Tesu alobho sayañca kusalaṃ, imesañca pāṇātipātā veramaṇī-ādīnaṃ kusalaṃ kesañci sampayuttappabhāvakaṭṭhena kesañci upanissayapaccayaṭṭhena mūlanti **kusalamūlaṃ**. Adosāmohānampi kusalamūlabhāve eseva nayo.

Idāni sabbampi taṃ saṅkhepena ca vitthārena ca desitaṃ atthaṃ nigamento **yato kho āvusoti**-ādi-appanāvāraṃ āha. Tattha **evaṃ akusalaṃ pajānāti**ti evaṃ yathānidḍiṭṭhadasaṅkusalakammamapathavasena akusalaṃ pajānāti. **Evaṃ akusalamūlanti**-ādīsopi eseva nayo. Ettāvata ekena nayena catusaccakammaṭṭhānikassa yāva arahattā niyyānaṃ kathitaṃ hoti. Kathaṃ? Ettha hi ṭhapetvā abhijjhaṃ dasa akusalakammamapathā ca kusalakammamapathā ca dukkhasaccaṃ. Abhijjhā ca lobho akusalamūlañcāti ime dve dhammā nipariyāyena samudayasaccaṃ. Pariyāyena pana sabbepi kammamapathā dukkhasaccaṃ. Sabbāni kusalākusalamūlāni samudayasaccaṃ. Ubhinnā appavatti nirodhasaccaṃ. Dukkhaṃ pariṇānanto samudayaṃ pajahamāno nirodhaṃ pajānanto ariyamaggo maggasaccanti iti dve saccāni sarūpena vuttāni, dve āvattahāravasena veditabbāni.

So sabbaso rāgānusayaṃ pahāyāti so evaṃ akusalādīni pajānanto sabbākārena rāgānusayaṃ pajahitvā. **Paṭighānusayaṃ paṭivinodetvāti** paṭighānusayañca sabbākāreneva nīharitvāti vuttaṃ hoti. Ettāvata anāgānimaggo kathito. **Asmīti diṭṭhimānānusayaṃ samūhanitvāti** pañcasu khandhesu kañci dhammaṃ anavakārīkaritvā “asmī”ti iminā samūhaggahaṇākārena pavattaṃ diṭṭhimānānusayaṃ samugghāṭetvā.

Tattha **diṭṭhimānānusayanti** diṭṭhisadisāṃ mānānusayanti vuttaṃ hoti. Ayañhi mānānusayo asmīti pavattattā diṭṭhisadiso hoti, tasmā evaṃ

vutto. Imañca asmimānaṃ vitthārato viññātukāmena Khandhiyavagge Khemakasuttaṃ¹ oloketabbanti.

Avijjāṃ pahāyāti vaṭṭamūlaṃ avijjāṃ pajahitvā. **Vijjāṃ uppādetvāti** tassā avijjāya samugghāṭikāṃ arahattamaggavijjāṃ uppādetvā. Ettāvatā arahattamaggo kathito. **Diṭṭheva dhamme dukkhassantakaro hotīti** asmiṃyeva attabhāve vaṭṭadukkhassa paricchedakaro hoti. **Ettāvatāpi kho āvusoti** desanaṃ niyyātetī, imāya kammaopathadesanāya vuttamanasikārapaṭivedhavasenaṃpīti vuttaṃ hoti. Sesaṃ vuttanayameva. Evaṃ anāgāmiṃmagga-arahattamaggehi desanaṃ niṭṭhapesīti.

Kammaopathavāraṇṇanā niṭṭhitā.

Āhāravāraṇṇanā

90. **Sādhāvusoti kho -pa- āgato imāṃ saddhammanti** evaṃ āyasmato Sāriputtassa kusalākusalamukhena catusaccadesanaṃ sutvā taṃ āyasmato Sāriputtassa bhāsitaṃ “sādhāvuso”ti iminā vacanena te bhikkhū abhinanditvā imasseva vacanassa samuṭṭhāpakena cittena anumoditvā vacasā sampaṭicchitvā cetasā sampiyāyitvāti vuttaṃ hoti. Idāni yasmā thero nānappakārena catusaccadesanaṃ desetun paṭibalo, yathāha “Sāriputto bhikkhave pahoti cattāri ariyasaccāni vitthārena ācikkhitun desetun”ti, yasmā vā uttarimpi desetukāmo va hutvā “ettāvatāpi kho”ti avaca, tasmā aparenapi nayena saccadesanaṃ sotukāmā te bhikkhū āyasmantaṃ Sāriputtaṃ uttari pañhaṃ apucchimsu. Tena sayameva pucchitvā vissajjitapañhato uttariṃ siyā kho pañāvuso aññopi pariyāyo bhaveyya aññampi kāraṇanti iminā nayena aññaṃ atirekaṃ pañhaṃ pucchimsu, purimapañhassa vā uparibhāge pucchimsūti vuttaṃ hoti. Atha nesaṃ byākaramāno thero **siyā āvusoti**-ādimāha. Tatthāyaṃ anuttānapadavaṇṇanā, **āhāranti** paccayaṃ. Paccayo hi āharati attano phalaṃ, tasmā “āhāro”ti vuccati.

1. Saṃ 2. 103 piṭṭhe.

Bhūtānaṃ vā sattānanti-ādīsu **bhūtāti** sañjātā nibbattā. **Sambhavesīnanti** ye sambhavaṃ jātīm nibbattīm esanti gavesanti. Tattha catūsu yonīsu aṇḍajalābujā sattā yāva aṇḍakosaṃ vatthikosañca na bhindanti, tāva **sambhavesino** nāma. Aṇḍakosaṃ vatthikosañca bhinditvā bahi nikkhantā **bhūtā** nāma. Saṃsedajā opapātikā ca paṭhamacittakkaṇe sambhavesino nāma. Dutiyacittakkaṇato pabhuti bhūtā nāma. Yena yena vā iriyāpathena jāyanti, yāva te tato aññaṃ na pāpuṇanti, tāva sambhavesino nāma. Tato paraṃ bhūtā nāma.

Atha vā **bhūtāti** jātā abhinibbattā, ye bhūtāyeva na puna bhavissantīti saṅkhyāṃ gacchanti, tesāṃ khīṇāsavānametaṃ adhivacanāṃ. Sambhavamesantīti **sambhavesino**. Appahīnabhavasāmyojanattā āyatimpi sambhavaṃ esantānaṃ sekkhaputhujjanānametaṃ adhivacanāṃ. Evaṃ sabbathāpi imehi dvīhi padehi sabbasatte pariyādiyati. **Vāsaddo** cettha sampiṇḍanattho, tasmā bhūtānañca sambhavesīnañcāti ayamattho veditabbo.

Ṭhitiyāti ṭhitatthaṃ. **Anuggahāyāti** anuggahatthaṃ upakāratthaṃ. Vacanabhedo cesa, attho pana dvinnampi padānaṃ ekoyeva. Atha vā **ṭhitiyāti** tassa tassa sattassa uppannadhammānaṃ anuppabandhavasena avicchedāya. **Anuggahāyāti** anuppannānaṃ uppādāya. Ubhopi cetāni bhūtānaṃ ṭhitiyā ceva anuggahāya ca. Sambhavesīnaṃ vā ṭhitiyā ceva anuggahāya cāti evaṃ ubhayattha daṭṭhabbāni. **Kabaḷikāro āhāro**ti kabaḷaṃ katvā ajjhoharitabbato kabaḷikāro āhāro, odanakummāsādivatthukāya ojāyetaṃ adhivacanāṃ. **Oḷāriko vā sukhumo vāti** vatthu-oḷārikatāya oḷāriko, vatthusukhumatāya sukhumo. Sabhāvena pana sukhumarūpapariyāpannattā kabaḷikāro āhāro sukhumova hoti. Sāpi cassa vatthuto oḷārikatā sukhumatā ca upādāyupādāya veditabbā.

Kumbhīlānañhi āhāraṃ upādāya morānaṃ āhāro sukhumo. Kumbhīlā kira pāsāṇe gilanti. Te ca nesaṃ kucchippattāva vilīyanti. Morā sappavicchikādipāṇe khādanti. Morānaṃ pana āhāraṃ upādāya taracchānaṃ āhāro sukhumo. Te kira tivassachadditāni visāṇāni ceva aṭṭhīni ca khādanti. Tāni ca nesaṃ kheḷena temitamatteneva kandamūlaṃ

viya mudukāni honti. Taracchānampi āhāraṃ upādāya hatthīnaṃ āhāro sukhumo. Tepi nānārukkhasākhāyo khādanti. Hatthīnaṃ āhārato gavayagokaṇṇamigādīnaṃ āhāro sukhumo. Te kira nissārāni nānārukkhapaṇṇādīni khādanti. Tesampi āhārato gunnaṃ āhāro sukhumo. Te¹ allasukkhatiṇāni khādanti. Tesam² āhārato sasānaṃ āhāro sukhumo. Sasānaṃ āhārato sakuṇānaṃ āhāro sukhumo. Sakuṇānaṃ āhārato paccantavāsīnaṃ āhāro sukhumo. Paccantavāsīnaṃ āhārato gāmabhojakānaṃ āhāro sukhumo. Gāmabhojakānaṃ āhārato rājarājamahāmattānaṃ āhāro sukhumo. Tesampi āhārato cakkavattino āhāro sukhumo. Cakkavattino āhārato bhummadevānaṃ āhāro sukhumo. Bhummadevānaṃ āhārato Cātumahārājikānaṃ āhāro sukhumo. Evaṃ yāva Paranimmitavasavattīnaṃ āhāro vitthāretabbo, tesam āhāro sukhumotveva niṭṭhaṃ patto.

Ettha ca oḷārike vatthusmiṃ oḷā paritṭā hoti dubbalā, sukhume balavatī. Tathā hi ekapattapūrampi yāguṃ pivato muhutteneva jighacchito hoti, yaṃkiñcideva khāditukāmo. Sappiṃ pana pasaṭamattaṃ pivitvā divasaṃ abhottukāmo hoti. Tattha vatthu parissamaṃ vinodeti, na pana sakkoti pāletuṃ. Oḷā pāleti, na sakkoti parissamaṃ vinodetuṃ. Dve pana ekato hutvā parissamaṃ ceva vinodenti pāleti cāti.

Phasso dutiyoti cakkhusamphassādi chabbidhopi phasso etesu catūsu āhāresu dutiyo āhāroti veditabbo. Desanānayo eva cesa. Tasmā iminā nāma kāraṇena dutiyo vā tatiyo vāti idamettha na gavesitabbaṃ. **Manosañcetanāti** cetanā eva vuccati. **Viññāṇanti** yaṃkiñci cittaṃ.

Etthāha, yadi paccayaṭṭho āhāraṭṭho, atha kasmā aññesupi sattānaṃ paccayesu vijjamānesu imeyeva cattāro vuttāti. Vuccate,

1. Tā (Sī)

2. Tāsam (Sī)

ajjhattikasantatiyā visesapaccayattā. Visesapaccayo hi kabaḷikārāhārabhakkhānaṃ sattānaṃ rūpakāyassa kabaḷikāro āhāro. Nāmakāye vedanāya phasso, viññāṇassa manosañcetanā, nāmarūpassa viññāṇaṃ. Yathāha—

“Seyyathāpi bhikkhave ayaṃ kāyo āhāraṭṭhitiko, āhāraṃ paṭicca tiṭṭhati, anāhāro no tiṭṭhati. Tathā phassapaccayā vedanā, saṅkhārapaccayā viññāṇaṃ, viññāṇapaccayā nāmarūpan”ti.

Ko panettha āhāro, kiṃ āharatīti. Kabaḷikārāhāro ojaṭṭhamakarūpāni āharati. Phassāhāro tisso vedanā, manosañcetanāhāro tayo bhava, viññāṇāhāro paṭisandhināmarūpanti.

Katham? Kabaḷikārāhāro tāva mukhe ṭhapitamattoyeva aṭṭha rūpāni samuṭṭhāpeti. Dantavicuṇṇitaṃ pana ajjhoharīyamānaṃ ekekaṃ sitthaṃ aṭṭhaṭṭha rūpāni samuṭṭhāpetiyeva, evaṃ ojaṭṭhamakarūpāni āharati.

Phassāhāro pana sukhavedaniyo phasso uppajjamāno sukhavedanaṃ āharati, tathā dukkhavedaniyo dukkhaṃ, adukkhamasukhavedaniyo adukkhamasukhanti evaṃ sabbathāpi phassāhāro tisso vedanā āharati.

Manosañcetanāhāro kāmabhavūpagaṃ kammaṃ kāmabhavaṃ āharati, rūpārūpabhavūpagāni taṃ taṃ bhavaṃ. Evaṃ sabbathāpi manosañcetanāhāro tayo bhava āharati.

Viññāṇāhāro pana ye ca paṭisandhikkhaṇe taṃsampayuttakā tayo khandhā, yāni ca tisantativasena tiṃsarūpāni uppajjanti, sahaṇṇādipaccayanayena tāni āharatīti vuccati. Evaṃ viññāṇāhāro paṭisandhināmarūpaṃ āharatīti.

Ettha ca manosañcetanāhāro tayo bhava āharatīti sāsavā kusalākusalacetanāva vuttā. Viññāṇaṃ paṭisandhināmarūpaṃ āharatīti paṭisandhiviññāṇameva vuttaṃ. Avisesena pana taṃsampayuttataṃsamuṭṭhānadhammānaṃ āhāraṇatopete **āharāti** veditabbā.

Etesu catūsu āhāresu kabaḷikārāhāro upatthambhento āhāraḷakkamā sādheti. Phasso phusantoyeva. Manosañcetanā āyūhamānāva. Viññāṇam vijānantameva.

Katham? Kabaḷikārāhāro hi upatthambhento kāyaṭṭhapanena sattānam ṭhitiyā hoti. Kammajanitopi hi ayaṁ kāyo kabaḷikārāhārena upatthambhito dasapi vassāni vassasatampi yāva āyuparimāṇam tiṭṭhati. Yathā kim? Yathā māṭuyā janitopi dārako dhāṭiyā thaññādini pāyevā posīyamānova ciram tiṭṭhati, yathā cupatthambhena upatthambhitageham. Vuttampi cetam—

“Yathā mahārāja gehe patante aññena dārunā upatthambhenti, aññena dārunā upatthambhitaṁ santaṁ evaṁ taṁ gehaṁ na patati, evameva kho mahārāja ayaṁ kāyo āhāraṭṭhitiko, āhāram paṭicca tiṭṭhati”ti.

Evaṁ kabaḷikāro āhāro upatthambhento āhāraḷakkamā sādheti. Evaṁ sādhentopi ca kabaḷikāro āhāro dvinnam rūpasantatīnam paccayo hoti āhārasamuṭṭhānassa ca upādinnassa ca. Kammajānam anupālako hutvā paccayo hoti. Āhārasamuṭṭhānānam janako hutvā paccayo hoti.

Phasso pana sukhādivatthubhūtam ārammaṇam phusantoyeva sukhādivedanāpavattanena sattānam ṭhitiyā hoti. Manosañcetanā kusalākusalakammavasena āyūhamānāyeva bhavamūlanipphādanato sattānam ṭhitiyā hoti. Viññāṇam vijānantameva nāmarūpappavattanena sattānam ṭhitiyā hoti.

Evaṁ upatthambhanādivasena āhāraḷakkamā sādhayamānesu panetesu cattāri bhayāni daṭṭhabbāni. Seyyathidaṁ, kabaḷikārāhāre nikantiyeva bhayaṁ, phasse upagamanameva, manosañcetanāya āyūhanameva, viññāṇe abhinipātoyeva bhayanti. Kim kāraṇā? Kabaḷikārāhāre hi nikantiṁ katvā sītādīnam purekkhatā sattā āhāratthāya muddāgaṇanādikkammāni karontā anappakam dukkham nigacchanti. Ekacce ca imasmim

sāsane pabbajitvāpi vejjakammādikāya anesanāya āhāraṃ pariyesantā diṭṭhepi dhamme gārayhā honti. Samparāyepi tassa saṅghāṭipi ādittā sampajjalitāti-ādinā Lakkhaṇasaṃyutte vuttanayena samaṇapetā honti. Imināva tāva kāraṇena kabaḷikārāhāre nikantiyeva bhayanti veditabbā.

Phassaṃ upagacchantāpi phassassādino paresaṃ rakkhitagopitesu dārādīsu bhaṇḍesu aparajjhanti. Te saha bhaṇḍena bhaṇḍasāmikā gahetvā khaṇḍākhaṇḍikaṃ vā chinditvā saṅkārakūṭesu chaḍḍenti. Rañño vā niyyātentī. Tato ne rājā vividhā kammakāraṇā kārāpetī. Kāyassa ca bhedā duggatī nesaṃ pāṭikaṅkhā hotī. Iti phassassādamūlakaṃ diṭṭhadhammikampi samparāyīkampi bhayaṃ sabbamāgatameva¹ hotī. Iminā kāraṇena phassāhāre upagamanameva bhayanti veditabbaṃ.

Kusalākusalakammāyūhaneneva pana tammūlakaṃ tīsu bhavesu bhayaṃ sabbamāgataṃyeva hotī. Iminā kāraṇena manosañcetanāhāre āyūhanameva bhayanti veditabbaṃ.

Paṭisandhiviññāṇaṅca yasmim̐ yasmim̐ ṭhāne abhinipatati, tasmim̐ tasmim̐ ṭhāne paṭisandhināmarūpaṃ gahetvāva nibbattati, tasmim̐ ca nibbatte sabbabhayāni nibbattāniyeva honti, tammūlakattāti, iminā kāraṇena viññāṇāhāre abhinipātoyeva bhayanti veditabbo.

Evaṃ sabhayesu pana imesu āhāresu Sammāsambuddho kabaḷikārāhāre nikantipariyādānatthaṃ “seyyathāpi bhikkhave dve jāyampatikā”ti-ādinā² nayena **puttamaṃsūpamaṃ** desesi. Phassāhāre nikantipariyādānatthaṃ “seyyathāpi bhikkhave gāvī niccammā”ti-ādinā nayena **niccammagāvūpamaṃ** desesi. Manosañcetanāhāre nikantipariyādānatthaṃ “seyyathāpi bhikkhave aṅgārakāsū”ti-ādinā nayena **aṅgārakāsūpamaṃ** desesi. Viññāṇāhāre nikantipariyādānatthaṃ “seyyathāpi bhikkhave coraṃ āgucārin”ti-ādinā nayena **sattisatāhatūpamaṃ** desesi.

Tatrāyaṃ bhūtamattaṃ katvā saṅkhepato atthayojanā, dve kira jāyampatikā puttaṃ gahetvā parittena pātheyyena yojanasatikaṃ

1. Samāgatameva (Syā)

2. Saṃ 1. 322 piṭṭhe.

kantāramaggaṃ paṭipajjimsu. Tesam paññāsa yojanāni gantvā pātheyyaṃ nitthāsi. Te khuppipāsaturā viralacchāyāyaṃ nisīdimsu. Tato puriso bhariyaṃ āha “bhadde ito samantā paññāsa yojanāni gāmo vā nigamo vā natthi, tasmā yaṃ taṃ purisena kātabbaṃ bahumpi kasigorakkhādikkammaṃ, na dāni sakkā taṃ mayā kātuṃ, ehi maṃ māretvā upaḍḍhamāṃsaṃ khāditvā upaḍḍhaṃ pātheyyaṃ katvā puttena saddhiṃ kantāraṃ nittharāhi”ti. Sāpi āha “sāmi mayā dāni yaṃ taṃ itthiyā kātabbaṃ bahumpi suttakantaṇḍikkammaṃ, taṃ kātuṃ na sakkā, ehi maṃ māretvā upaḍḍhamāṃsaṃ khāditvā upaḍḍhaṃ pātheyyaṃ katvā puttena saddhiṃ kantāraṃ nittharāhi”ti. Tato so taṃ¹ āha “bhadde mātugāmamaraṇena dvinnaṃ maraṇaṃ paññāyati. Na hi mando kumāro mātaraṃ vinā jīvituṃ sakkoti. Yadi pana mayaṃ jīvāma, puna dāraṃ labheyyāma, handa dāni puttakaṃ māretvā maṃsaṃ gahetvā kantāraṃ nittharāma”ti.

Tato mātā puttamaḥa “tāta pitu santikaṃ gacchāhi”ti. So agamāsi. Athassa pitā “mayā puttakaṃ possessāmīti kasigorakkhādīhi anappakaṃ dukkhamanubhūtaṃ, na sakkomi puttaṃ māretuṃ, tvaṃyeva tava puttakaṃ mārehi”ti vatvā “tāta mātusantikameva gacchāhi”ti āha. So agamāsi. Athassa mātāpi “mayā puttaṃ patthentiyā govatakukkuravatadevatāyācanādīhipi tāva anappakaṃ dukkhaṃ anubhūtaṃ, ko pana vādo kucchinā pariharantiyā, na sakkāhaṃ puttaṃ māretuṃ”ti vatvā “tāta pitusantikaṃyeva gacchāhi”ti āha. Evaṃ so dvinnaṃ antarā gacchantoyeva mato. Te taṃ disvā paridevitvā pubbe vuttanayeneva maṃsāni gahetvā khādantā pakkamimsu. Tesam so puttamaṃsāhāro navahi kāraṇehi paṭikūlattā neva davāya hoti na madāya na maṇḍanāya na vibhūsanāya, kevalaṃ antāranittharaṇatthāyeva hoti.

Katamehi navahi kāraṇehi paṭikūloti ce. Sajātimaṃsatāya
 ñātimaṃsatāya puttamaṃsatāya piyaputtamaṃsatāya taruṇamaṃsatāya
 āmakamaṃsatāya agorasamaṃsatāya² aloṇatāya adhūpitatāyāti. Tasmā yo
 bhikkhu kabaḷikārāhāraṃ evaṃ puttamaṃsasadiṣaṃ

1. Puna so taṃ (Ka)

2. Agorasatāya (Ka Sī), agocaratāya (Ka sī), abhogamaṃsatāya (Syā)

passati, so tattha nikantiṃ pariyādiyati, ayaṃ tāva **puttamaṃsūpamāyaṃ** atthayojanā.

Niccammagāvūpamāyaṃ pana yathā sā gāvī gīvato yāva khurā, tāva cammaṃ uddāletvā muttā yaṃ yadeva nissāya tiṭṭhati, tattha pāṇakehi khajjamānā dukkhassevādhikaraṇaṃ hoti, evaṃ phassopi yaṃ yadeva vatthum ārammaṇaṃ vā nissāya tiṭṭhati, tamtaṃvatthārammaṇasambhavassa vedayitadukkhassa adhikaraṇameva hoti. Tasmā yo bhikkhu phassāhāraṃ evaṃ niccammagāvisadisaṃ passati, so tattha nikantiṃ pariyādiyati, ayaṃ **niccammagāvūpamāyaṃ** atthayojanā.

Āṅgārakāsūpamāyaṃ pana yathā sā āṅgārakāsu, evaṃ mahāpariāhaṭṭhena tayo bhavā. Yathā nānābhāsu gahetvā tattha upakaḍḍhakā¹ dve purisā, evaṃ bhavesu upakaḍḍhanaṭṭhena manosañcetanā. Tasmā yo bhikkhu manosañcetanāhāraṃ evaṃ āṅgārakāsūpakaḍḍhakapurisasadisaṃ passati, so tattha nikantiṃ pariyādiyati, ayaṃ **āṅgārakāsūpamāyaṃ** atthayojanā.

Sattisatāhatūpamāyaṃ pana yena so puriso pubbaṇhasamaye sattisatena haññati, tamassa sarīre vaṇamukhasataṃ katvā antarā aṭṭhatvā vinivijjhivā aparabhāgeyeva patati, evaṃ itarāni dve sattisatāni, evamassa patitokāse apatitvā apatitvā gatāhi sattīhi sabbasarīraṃ chiddāvachiddameva hoti, tassa ekavaṇamukhepi uppannassa dukkhassa pamāṇaṃ natthi, ko pana vādo tīsu vaṇamukhasatesu. Tattha sattinipātakālo viya paṭisandhiviññānanibbattakālo. Vaṇamukhajananaṃ viya khandhajananaṃ. Vaṇamukhesu dukkhavedanuppādo viya jātesu khandhesu vaṭṭamūlakanānāvidhadukkhuppādo. Aparo nayo, āgucārī puriso viya paṭisandhiviññānaṃ. Tassa sattighātehi uppannavāṇamukhāni viya viññānapaccayā nāmarūpaṃ. Vaṇamukhapaccayā tassa purisassa kakkhaḷadukkhuppādo viya nāmarūpapaccayā viññāṇassa dvattiṃsakammakāraṇa-aṭṭhanavutirogādivasena nānappakāradukkhuppādo daṭṭhabbo. Tasmā yo bhikkhu viññāṇāhāraṃ evaṃ sattisatāhasadisaṃ passati, so tattha nikantiṃ pariyādiyati, ayaṃ **sattisatāhatūpamāyaṃ** atthayojanā.

1. Upakaḍḍhantā (Syā, Ka)

So evaṃ imesu āhāresu nikantiṃ pariyādiyanto cattāropi āhāre parijānāti, yesu pariññātesu sabbampi pariññātaṃ vatthu pariññātameva hoti. Vuttañhetāṃ Bhagavatā—

“Kabaḷikāre bhikkhave āhāre pariññāte pañcakāmaguṇiko rāgo pariññāto hoti. Pañcakāmaguṇike rāge pariññāte natthi taṃ saṃyojanaṃ, yena saṃyojanena saṃyutto ariyasāvako puna imaṃ lokaṃ āgaccheyya. Phasse bhikkhave āhāre pariññāte tisso vedanā pariññātā honti. Tīsu vedanāsu pariññātāsu ariyasāvakassa natthi kiñci uttarikaraṇīyanti vadāmi. Manosañcetanāya bhikkhave āhāre pariññāte tisso taṇhā pariññātā honti. Tīsu taṇhāsu pariññātāsu ariyasāvakassa natthi kiñci uttarikaraṇīyanti vadāmi. Viññāṇe bhikkhave āhāre pariññāte nāmarūpaṃ pariññātaṃ hoti. Nāmarūpe pariññāte ariyasāvakassa natthi kiñci uttarikaraṇīyanti vadāmi”¹.

Taṇhāsamudayā āhārasamudayoti purimataṇhāsamudayā paṭisandhikānaṃ āhārānaṃ samudayo nibbato hotīti attho. Kathaṃ? Paṭisandhikkhaṇe hi tisantativasena uppannasamatimsarūpabbhantare jātā ojā atthi, ayaṃ taṇhāpaccayā nibbato upādinnakakabaḷikārāhāro. Paṭisandhicittasampayuttā pana phassacetanā sayañca cittaṃ viññāṇanti ime taṇhāpaccayā nibbattā upādinnakaphassamanosañcetanā viññāṇāhārāti. Evaṃ tāva purimataṇhāsamudayā paṭisandhikānaṃ āhārānaṃ samudayo vedītabbo. Yasmā panidha upādinnakāpi anupādinnakāpi āhārā missetvā kathitā, tasmā anupādinnakānampi evaṃ taṇhāsamudayā āhārasamudayo vedītabbo. Aṭṭhalobhasahagatacittasamuṭṭhitesu hi rūpesu ojā atthi, ayaṃ saha-jātataṇhāpaccayā nibbato anupādinnakakabaḷikārāhāro. Lobhasahagatacittasampayuttā pana phassacetanā sayañca cittaṃ viññāṇanti ime taṇhāpaccayā nibbattā anupādinnakaphassamanosañcetanā viññāṇāhārāti.

1. Saṃ 1. 323 piṭṭhādīsu.

Taṇhānirodhā āhāranirodhoti imissā upādinnakānañca anupādinnakānañca āhārānaṃ paccayabhūtāya taṇhāya nirodhena āhāranirodho paññāyati. Sesam vuttanayameva. Ayaṃ pana viseso, idha cattāripi saccāni sarūpeneva vuttāni. Yathā ca idha, evaṃ ito uttarimpi sabbavāresūti. Tasmā sabbattha asaṃmuyhantena saccāni uddharitabbāni. Sabbavāresu ca “ettāvātāpi kho āvuso”ti idaṃ desanāniyyātanaṃ tattha tattha desitadhamavasena yojetabbaṃ. Tassa idha tāva ayaṃ yojanā. **Ettāvātāpīti** imāya āhāradesanāya vuttamanasikārappaṭivedhavasenāpīti vuttaṃ hoti. Esa nayo sabbatthāpi.

Āhāravāraṇṇanā niṭṭhitā.

Saccavāraṇṇanā

91. Idāni “sādhāvuso”ti purimanayeneva therassa bhāsitaṃ abhinanditvā anumoditvā te bhikkhū uttarimpi pañhaṃ pucchimsu. Thero ca nesaṃ aññenapi pariyāyena byākāsi. Esa nayo ito paresupi sabbavāresu. Tasmā ito paraṃ evarūpāni vacanāni anāmasitvā yena yena pariyāyena byākaroti, tassa tasseva atthaṃ vaṇṇayissāma. Imassa pana vārassa saṅkhepadesanāyaṃ **dukkhañca pajānātīti** ettha **dukkhanti** dukkhasaccaṃ. Vitthāradesanāyaṃ pana yaṃ vattabbaṃ siyā, taṃ sabbaṃ Visuddhimagge Saccaniddese vuttamevāti.

Saccavāraṇṇanā niṭṭhitā.

Jarāmaṇavāraṇṇanā

92. Ito paraṃ paṭiccasamuppādavasena desanā hoti. Tattha jarāmaṇavāre tāva **tesaṃ tesanti** ayaṃ saṅkhepato anekesaṃ sattānaṃ sādharmaṇaniddesoti ñātabbo. Yā Devadattassa jarā, yā Somadattassa jarāti evañhi divasampi kathentassa neva sattā

pariyādānaṃ gacchanti. Imehi pana dvīhi padehi na koci satto apariyādinno hoti. Tasmā vuttaṃ “ayaṃ saṅkhepato anekesaṃ sattānaṃ sādharmaṇaniddeso”ti.

Tamhi tamhīti ayaṃ gatijātivaseṇa anekesaṃ nikāyānaṃ sādharmaṇaniddeso. **Sattanikāyeti** sādharmaṇaniddeseṇa niddiṭṭhassa sarūpanidassanaṃ. **Jarā jīraṇatāti**-ādīsu pana **jarāti** sabhāvaniddeso. **Jīraṇatāti** ākāraniddeso. **Khaṇḍiccanti**-ādayo kālātikkame kiccaniddesā. Pacchimā dve pakatiniddesā. Ayañhi **jarāti** iminā padena sabhāvato dīpitā, tenassāyaṃ sabhāvaniddeso. **Jīraṇatāti** iminā ākārato. Tenassāyaṃ ākāraniddeso. **Khaṇḍiccanti** iminā kālātikkame dantanakhānaṃ khaṇḍitabhāvakaṇakiccato. **Pāliccanti** iminā kesalomānaṃ palitabhāvakaṇakiccato. **Valittacatāti** iminā maṃsaṃ milāpetvā tace valittabhāvakaṇakiccato dīpitā. Tenassā ime **khaṇḍiccanti**-ādayo tayo kālātikkame kiccaniddesā. Te hi imesaṃ vikārānaṃ dassanavasena pākaṭibhūtā pākaṭajarā dassitā. Yatheva hi udakassa vā aggino vā vātassa vā tiṇarukkhādīnaṃ sambhaggapalibhaggatāya vā jhāmatāya vā gatamaggo pākaṭo hoti, na ca so gatamaggo tāneva udakādīni, evameva jarāya dantādīsu khaṇḍiccādivaseṇa gatamaggo pākaṭo, cakkhuṃ ummīletvāpi gayhati. Na ca khaṇḍiccādīneva¹ jarā, na hi jarā cakkhuviññeyyā hoti.

Āyuno saṃhāni indriyānaṃ paripākoti imehi pana padehi kālātikkameyeve abhibyattatāya āyukkhaṇayacakkhādi-indriyaparipākasaññitāya pakatiyā dīpitā. Tenassime pacchimā dve pakatiniddesāti veditabbā.

Tattha yasmā jaraṃ pattassa āyu hāyati, tasmā jarā “āyuno saṃhāni”ti phalūpacāreṇa vuttā. Yasmā ca daharakāle suppasannāni sukhumampi attano visayaṃ sukheveva gaṇhanasamatthāni cakkhādīni indriyāni jaraṃ pattassa paripakkāni āluṭitāni avisadāni oḷārikampi attano visayaṃ gahetuṃ asamattāni honti, tasmā “indriyānaṃ paripāko”tipi

1. Na ca khaṇḍiccādivaseṇa (Syā)

phalūpacāreṇeva vuttā. Sā paṇāyaṃ evaṃ niddiṭṭhā sabbāpi jarā pākaṭā paṭicchannāti duvidhā hoti.

Tattha dantādīsu khaṇḍabhāvādīdassanato rūpadhammesu jarā **pākaṭajarā** nāma. Arūpadhammesu pana tādisassa vikārassa adassanato **paṭicchannajarā** nāma. Tattha yvāyaṃ khaṇḍādibhāvo dissati, so tādisānaṃ dantādīnaṃ suviññeyyattā vaṇṇoyeva, taṃ cakkhunā disvā manodvāreṇa cintetvā “ime dantā jarāya pahaṭā”ti jaraṃ jānāti udakaṭṭhāne baddhāni gosīsādīni oloketvā heṭṭhā udakassa atthibhāvaṃ jānaṃ viya. Puna avīci savīcīti evampi duvidhā hoti. Tattha maṇi kanakarajata pavāḷasūriyādīnaṃ mandadasakādīsu pāṇīnaṃ viya pupphaphalapallavādīsu ca apāṇīnaṃ viya antarantarā vaṇṇavisesādīnaṃ duviññeyyattā jarā **avīcījarā** nāma, nirantarajarāti attho. Tato aññesu pana yathāvuttesu antarantarā vaṇṇavisesādīnaṃ suviññeyyattā jarā **savīcījarā** nāmāti veditabbā.

Ito paraṃ **tesaṃ tesanti**-ādi vuttanayeneva veditabbaṃ. **Cuti cavanatāti**-ādīsu pana **cutīti** cavanakavasena vuccati, ekacatupañcakkhandhānaṃ sāmāññavacanametāṃ. **Cavanatāti** bhāvavacanena lakkhaṇanīdassanaṃ. **Bhedoti** cutikkhandhānaṃ bhaṅgupattiparidīpanaṃ¹. **Antaradhānanti** ghaṭasseva bhinnassa bhinnānaṃ cutikkhandhānaṃ yena kenaci pariyaṇena ṭhānābhāvaparidīpanaṃ. **Maccu maraṇanti** maccusaṅkhātāṃ maraṇaṃ. Tena **samucchedamaraṇā**dīni nisedheti. **Kālo** nāma antako, tassa kiriyāti **kālakiriyā**. Etena lokasammutiyā maraṇaṃ dīpeti.

Idāni paramatthena dīpetuṃ **khandhānaṃ bhedoti**-ādimāha. Paramatthena hi khandhāyeva bhijjanti, na satto nāma koci marati. Khandhesu pana bhijjamānesu satto marati, bhinnesu matoti vohāro hoti.

Ettha ca catuvokāravasena khandhānaṃ bhedo, ekavokāravasena kaḷavarassa nikkhepo. Catuvokāravasena vā khandhānaṃ bhedo, sesadvayavasena kaḷavarassa nikkhepo veditabbo. Kasmā? Bhavadvayepi rūpakāyasaṅkhātassa kaḷavarassa sambhavato. Atha vā yasmā ca cātumahārājikādīsu khandhā bhijjanteva, na kiñci nikkhipanti², tasmā tesaṃ

1. Bhaṅgupattiparidīpanaṃ (?)

2. Nikkhipati (Ka)

vasena khandhānaṃ bhedo, manussādīsu kaḷevarassa nikkhepo. Ettha ca kaḷevarassa nikkhepakāraṇato maraṇaṃ kaḷevarassa nikkhepoti vuttanti evamattho daṭṭhabbo.

Iti ayaṅca jarā idaṅca maraṇaṃ. Idaṃ vuccatāvusoti idaṃ ubhayampi ekato katvā jarāmaraṇanti kathiyati. Sesam vuttanayamevāti.

Jarāmarāṇavāraṇṇanā niṭṭhitā.

Jātivāraṇṇanā

93. Jātivāre **jāti sañjātī**ti-ādīsu jāyanaṭṭhena **jāti**, sā aparipuṇṇāyatanavasena yuttā. Sañjāyanaṭṭhena **sañjāti**, sā paripuṇṇāyatanavasena yuttā. Okkamaṇaṭṭhena **okkanti**, sā aṇḍajalābujavasena yuttā. Te hi aṇḍakosaṅca vatthikosaṅca okkamantā¹ pavisantā viya paṭisandhim gaṇhanti. Abhinibbattaṇaṭṭhena **abhinibbatti**, sā saṃsedaja-opapātikavasena yuttā, te hi pākaṭāyeva hutvā nibbattanti. Ayaṃ tāva vohāradesanā.

Idāni paramatthadesanā hoti. Khandhāyeva hi paramatthato pātubhavanti, na satto. Tattha ca **khandhānanti** ekavokārabhave ekassa catuvokārabhave catunnaṃ pañcavokārabhave pañcannampi gahaṇaṃ veditabbaṃ. **Pātubhāvoti** uppatti. **Āyatanānanti** ettha tatra tatra uppajjamānāyatanavaseneva saṅgaho veditabbo. **Paṭilābhoti** santatiyaṃ pātubhāvoyeva. Pātubhavantāneva hi tāni paṭiladdhāni nāma honti. **Ayaṃ vuccatāvuso jātī**ti iminā padena vohārato paramatthato ca desitāya jātiyā nigamaṇaṃ karotīti. **Bhavasamudayāti** ettha pana jātiyā paccayabhūto kammabhavo veditabbo. Sesam vuttanayamevāti.

Jātivāraṇṇanā niṭṭhitā.

1. Okkamanti okkamantā (Syā), okkantā (Ka)

Bhavavāraṇṇanā

94. Bhavavāre **kāmabhavoti** kammabhavo ca upapattibhavo ca. Tattha **kammabhavo** nāma kāmabhavūpagam kammameva. Tam hi upapattibhavassa kāraṇatā “sukho Buddhānamuppādo¹, dukkho pāpassa uccayo”ti-ādīni² viya phalavohārena bhavoti vuttaṃ. **Upapattibhavo** nāma tena kammena nibbattaṃ upādinnakhandhapañcakaṃ. Tañhi tattha bhavatīti katvā **bhavoti** vuttaṃ. Evaṃ sabbathāpi idaṃ kammañca upapatti ca ubhayampetamidha “kāmabhavo”ti vuttaṃ. Esa nayo **rūpārūpabhavesu**. **Upādānasamudayāti** ettha pana upādānaṃ kusalakammabhavassa upanissayavaseneva paccayo hoti. Akusalakammabhavassa upanissayavasenapi saha-jātādivasenapi. Upapattibhavassa pana sabbassāpi upanissayavaseneva. Sesam vuttanayamevāti.

Upādānavāraṇṇanā

95. Upādānavāre **kāmupādānanti**-ādīsu vatthukāmaṃ upādiyati etena, sayam vā tam upādiyatīti **kāmupādānaṃ**. Kāmo ca so upādānañcāti vā kāmupādānaṃ. **Upādānanti** daḥhaggahaṇaṃ vuccati. Daḥhattho hi ettha upasaddo “upāyāsa upakaṭṭhā”ti-ādīsu viya, pañcakāmaguṇikarāgassetam adhivacanaṃ. Ayamettha saṅkhepo. Vitthārato panetaṃ “tattha katamaṃ kāmupādānaṃ, yo kāmesu kāmaccando”ti³ vuttanayena veditabbaṃ.

Tathā diṭṭhi ca sā upādānañcāti **diṭṭhupādānaṃ**. Atha vā diṭṭhim upādiyati, upādiyanti vā etena diṭṭhinti diṭṭhupādānaṃ ()⁴. Upādiyati hi purimadiṭṭhim uttaradiṭṭhi. Upādiyanti ca tāya diṭṭhim. Yathāha “sassato attā ca loko ca, idameva saccam moghamaññan”ti-ādī⁵, sīlabbatupādāna-attavādupādānavajjassa sabbadiṭṭhigatassetam adhivacanaṃ. Ayamettha saṅkhepo. Vitthārato panetaṃ “tattha katamaṃ diṭṭhupādānaṃ natthi dinnan”ti³ vuttanayena veditabbaṃ.

1. Khu 1. 42 Dhammapade.

2. Khu 1. 30 piṭṭhe.

3. Abhi 1. 241; Abhi 2. 389 piṭṭhādīsu.

4. (Sassato attā ca loko cāti-ādīsu hi purimadiṭṭhim upādiyatīti tathā) (Syā)

5. Ma 3. 22 piṭṭhe.

Tathā sīlabbataṃ upādiyanti etena, sayam vā taṃ upādiyati, sīlabbatañca taṃ upādānañcāti vā **sīlabbatupādānaṃ**. Gosīlagovatādīni hi evaṃ suddhīti abhinivesato sayameva upādānāti ayamettha saṅkhepo. Vitthārato panetaṃ “tatha katamaṃ sīlabbatupādānaṃ, ito bahiddhā samaṇabrāhmaṇānaṃ sīlena suddhī”ti¹ vuttanayena vedītabbaṃ.

Idāni vadanti etenāti **vādo**. Upādiyanti etenāti **upādānaṃ**. Kim vadanti, upādiyanti vā? Attānaṃ. Attano vādupādānaṃ **attavādupādānaṃ**. Attavādamattameva vā attāti upādiyati etenāti attavādupādānaṃ, vīsativatthukāya sakkāyadiṭṭhiyā etaṃ adhivacanaṃ. Ayamettha saṅkhepo. Vitthārato panetaṃ “tatha katamaṃ attavādupādānaṃ, idha assutavā puthujjano ariyānaṃ adassāvī”ti¹ vuttanayena vedītabbaṃ.

Taṇhāsamudayāti ettha taṇhā kāmupādānassa upanissayavasena anantarasamanantaranatthivigatāsevanavasena vā paccayo. Avasesānaṃ pana sahaṇṭādivasenāpi. Sesam vuttanayamevāti.

Taṇhāvāraṇṇanā

96. Taṇhāvāre **rūpataṇhā -pa- dhammataṇhāti** evaṃ cakkhudvārādīsu javanavīthiyam pavattāya taṇhāya “seṭṭhiputto brāhmaṇaputto”ti evamādīsu pitito nāmaṃ viya pitisadisārammaṇato nāmaṃ. Ettha ca rūpārammaṇā taṇhā, rūpe taṇhāti **rūpataṇhā**. Sā kāmārāgabhāvena rūpaṃ assādentī pavattamānā **kāmataṇhā**. Sassatadiṭṭhisahagatarāgabhāvena rūpaṃ niccaṃ dhuvaṃ sassatanti evaṃ assādentī pavattamānā **bhavataṇhā**. Ucchedadiṭṭhisahagatarāgabhāvena rūpaṃ ucchijjati vinassati pecca na bhavissatīti evaṃ assādentī pavattamānā **vibhavataṇhāti** evaṃ tivīdhā hoti. Yathā ca rūpataṇhā, tathā saddataṇhādayopīti etāni aṭṭhārasa taṇhāvīcaritāni² honti. Tāni aṭṭhattarūpādīsu aṭṭhārasa, bahiddhārūpādīsu aṭṭhārasāti chattimsa. Iti atītāni chattimsa, anāgatāni chattimsa, paccuppannāni chattimsāti aṭṭhasataṃ. “Aṭṭhattikassupādāya ‘asmī’ti

1. Abhi 1. 241; Abhi 2. 389 piṭṭhādīsu.

2. Taṇhānaṃ vicaritāni (Sī)

hoti, ‘itthasmī’ti hoti”¹ti vā evamādinā ajjhattikarūpādinissitāni aṭṭhārasa, “bāhirassupādāya ‘iminā asmī’ti hoti, ‘iminā’itthasmī’ti hoti”²ti evamādinā bāhirarūpādinissitāni aṭṭhārasāti chattimsa. Iti atītāni chattimsa, anāgatāni chattimsa, paccuppannāni chattimsāti evampi **aṭṭhasatataṇhāvicaritāni** honti. Puna saṅgahe karīyamāne rūpādīsu ārammaṇesu chaḷeva taṇhākāyā tissoyeva kāmataṇhādayo hontīti. Evaṃ—

“Niddesatthena niddesa-vitthārā vitthārassa ca.
Puna saṅgahato taṇhā, viññātabbā vibhāvināti.

Vedanāsamudayāti ettha pana **vedanāti** vipākavedanā adhippetā. Sā katham chasu dvāresu taṇhāya paccayo hotīti ce. Assādanīyato, sukhāya hi vedanāya assādanena sattā vedanam mamāyantā vedanāya taṇham uppādetvā vedanārāgarattā hutvā cakkhudvāre iṭṭhameva rūpam patthenti, laddhā ca nam assādenti, ārammaṇadāyakānam ca cittakārādīnam sakkāram karonti. Tathā sotadvārādīsu iṭṭhe ca saddādayo patthenti, laddhā ca ne assādenti, ārammaṇadāyakānam ca viñāvādaka **gandhikasūda** tantavāya nānāvidhasippasandassakādīnam sakkāram karonti. Yathā kim, yathā puttasinehena puttam mamāyantā dhātiyā sakkāram karonti, sappāyasappikhīrādīniyeva nam pāyenti ceva bhojenti ca. Sesam vuttanayameva.

Vedanāvāraṇṇanā

97. Vedanāvāre **vedanākāyāti** vedanāsamūhā. **Cakkhusamphassajā vedanā** -pa- **manosamphassajā vedanāti** etam “cakkhusamphassajā vedanā atthi kusalā, atthi akusalā, atthi abyākatā”³ti evam Vibhaṅge āgatattā cakkhudvārādīsu pavattānam kusalākusalābyākatavedanānam “Sāriputto, Mantāṇiputto”³ti evamādīsu mātito nāmam viya mātisadisavatthuto nāmam. Vacanattho panettha cakkhusamphassahetu jātā vedanā **cakkhusamphassajā vedanāti**. Esa nayo sabbattha. Ayam tāvettha

1. Abhi 2. 406 piṭṭhe.

2. Abhi 2. 410 piṭṭhe.

3. Abhi 2. 16 piṭṭhe.

sabbasaṅgāhikakathā. Vipākavasena pana cakkhudvāre dve cakkhuviññāṇāni dve manodhātuyo tisso manoviññāṇadhātuyoti etā hi sampayuttavasena vedanā veditabbā. Esa nayo sotadvārādīsu. Manodvāre manoviññāṇadhātusampayuttāva.

Phassasamudayāti ettha pana pañcadvāre pañcavattukavedanānam saḥajātacakkhusamphassādisamudayā samudayo hoti. Avasesānam cakkhusamphassādayo upanissayādivasena paccayā. Manodvāre tadārammaṇavedanānam advārikānam ca paṭisandhibhavaṅgacutivedanānam saḥajātamanosamphassasamudayā samudayo hotīti veditabbo. Sesam vuttanayameva.

Phassavāraṇṇanā

98. Phassavāre **cakkhusamphassoti** cakkhumhi samphasso. Esa nayo sabbattha. **Cakkhusamphasso -pa- kāyasamphassoti** ettāvata ca kusalākusalavipākā pañcavattukā dasa samphassā vuttā honti. **Manosamphassoti** iminā sesā bāvīsati lokiyavipākamanasampayuttaphassā. **Saḷāyatanasamudayāti** channaṃ cakkhādīnaṃ āyatanānaṃ samudayena imassa chabbidhassāpi samphassassa samudayo hotīti veditabbo. Sesam vuttanayamevāti.

Saḷāyatanavāraṇṇanā

99. Saḷāyatanavāre **cakkhāyatananti**-ādīsu yaṃ vattabbaṃ, taṃ sabbam Visuddhimagge Khandhaniddese ceva Ayatananiddese ca vuttanayameva. **Nāmarūpasamudayāti** ettha pana yaṃ nāmaṃ yañca rūpaṃ yañca nāmarūpaṃ yassa āyatanassa paccayo hoti, tassa vasena Visuddhimagge Paṭiccasamuppādaniddese vuttanayena nāmarūpasamudayā saḷāyatanasamudayo veditabbo. Sesam vuttappakāramevāti.

Nāmarūpavāraṇṇanā

100. Nāmarūpavāre namanalakkhaṇaṃ **nāmaṃ**. Rupanalakkhaṇaṃ **rūpaṃ**. Vitthāravāre panassa **vedanāti** vedanākkhandho. **Saññāti** saññākkhandho. **Cetanā phasso manasikāroti** saṅkhārakkhandho veditabbo. Kāmañca aññepi

saṅkhārakkhandhasaṅgahitā dhammā santi, ime pana tayo sabbadubbalesupi cittesu santi. Tasmā etesaṃyeva vasenettha saṅkhārakkhandhopi dassito.

Cattāri ca mahābhūtānīti ettha **cattārī**ti gaṇanaparicchedo. **Mahābhūtānī**ti pathavī āpa teja vāyānametaṃ adhivacanāṃ. Yena pana kāraṇena tāni mahābhūtānī vuccanti, yo cettha añño vinicchayanayo, so sabbo Visuddhimagge Rūpakkhandhaniddese vutto.

Catunnaṅca mahābhūtānaṃ upādāyāti ettha pana **catunnanti** upayogatthe sāmivacanāṃ, **cattāri ca mahābhūtānī**ti vuttamā hoti. **Upādāyāti** upādiyitvā, gahetvāti attho. Nissāyāti eke. Vattamānanti ayaṃ cettha pāṭhaseso. Samūhatthe vā etaṃ sāmivacanāṃ. Tena catunnaṅca mahābhūtānaṃ samūhaṃ upādāya vattamānaṃ rūpanti ayamattho veditabbo. Evaṃ sabbathāpi yāni **cattāri pathavī-ādīni mahābhūtāni**, yaṃ ca catunnaṃ mahābhūtānaṃ upādāya pavattamānaṃ cakkhāyatanādibhedena Abhidhammapāḷiyameva¹ vuttamā tevīsatividhamā rūpaṃ, taṃ sabbampi “rūpaṃ”ti veditabbaṃ. **Viññāṇasamudayāti** ettha pana yaṃ viññāṇaṃ yassa nāmassa yassa ca rūpassa yassa ca nāmarūpassa paccayo hoti, tassa vasena Visuddhimagge Paṭiccasamuppādaniddese vuttanayeneva viññāṇasamudayā nāmarūpasamudayo veditabbo. Sesamā vuttanayamevāti.

Viññāṇavāraṇṇanā

101. Viññāṇavāre **cakkhuvīññāṇanti** cakkhumhi viññāṇaṃ, cakkhuto vā jātamaṃ viññāṇanti **cakkhuvīññāṇaṃ**. Evaṃ **sotaghānaji vāhākāyaviññāṇāni**. Itamaṃ pana manoyeva viññāṇanti **manovīññāṇaṃ**. Dvipaṅcaviññāṇavajjassa tebhūmakavipākacittassetamaṃ adhivacanāṃ. **Saṅkhārasamudayāti** ettha pana yo saṅkhāro yassa viññāṇassa paccayo hoti, tassa vasena saṅkhārasamudayā viññāṇasamudayo veditabbo. Sesamā vuttanayamevāti.

Saṅkhāravāraṇṇanā

102. Saṅkhāravāre abhisāṅkhāraṇalakkhaṇo **saṅkhāro**. Vitthāravāre panassa **kāyasāṅkhāro**ti kāyato pavattasaṅkhāro, kāyadvāre

1. Abhidhamme Pāḷiyameva (Sī, Syā)

copanavasena pavattānaṃ kāmāvacarakusalato aṭṭhannaṃ, akusalato dvādasannanti vīsatiyā kāyasañcetanānametaṃ adhivacanaṃ. **Vacīsaṅkhāro**ti vacito pavattasaṅkhāro, vacīdvāre vacanabhedavasena pavattānaṃ vīsatiyā eva vacīsañcetanānametaṃ adhivacanaṃ. **Cittasaṅkhāro**ti cittato pavattasaṅkhāro, kāyavacīdvāre copanaṃ akatvā raho nisīditvā cintayantassa pavattānaṃ lokiyakusalākusalavasena ekūnatimsamanosañcetanānametaṃ adhivacanaṃ. **Avijjāsamudayā**ti ettha pana kusalānaṃ upanissayavasena akusalānaṃ sahaajādivasenaṇṇi avijjāpaccayo hotīti veditabbo. Sesāṃ vuttanayamevāti.

Avijjāvāraṇṇanā

103. Avijjāvāre **dukkhe aññāṇanti** dukkhasacce aññāṇaṃ, mohassetāṃ adhivacanaṃ. Esa nayo **samudaye aññāṇanti**-ādīsu. Tattha catūhi kāraṇehi dukkhe aññāṇaṃ veditabbaṃ antogadhato vatthuto ārammaṇato paṭicchādanato ca. Tathā hi taṃ dukkhasaccapariyāpannattā dukkhe antogadhaṃ, dukkhasaccaṃ cassa nissayapaccayabhāvena vatthu, ārammaṇapaccayabhāvena ārammaṇaṃ, dukkhasaccaṅca etaṃ paṭicchādeti tassa yāthāvalakkhaṇappaṭivedhanivāraṇena, ñāṇappavattiyā cettha appadānena.

Samudaye aññāṇaṃ tīhi kāraṇehi veditabbaṃ vatthuto ārammaṇato paṭicchādanato ca. Nirodhe paṭipadāyaṅca aññāṇaṃ ekeneva kāraṇena veditabbaṃ paṭicchādanato. Nirodhapaṭipadāya hi paṭicchādakameva aññāṇaṃ tesāṃ yāthāvalakkhaṇappaṭivedhanivāraṇena, tesu ca ñāṇappavattiyā appadānena. Na pana tattha antogadhaṃ, tasmim saccadvaye apariyāpannattā. Na tassa taṃ saccadvayaṃ vatthu, asahaajātattā. Nārammaṇaṃ, tadārabba appavattanato. Pacchimaṇhi saccadvayaṃ gambhīrattā duddasaṃ, na cettha andhabhūtaṃ aññāṇaṃ pavattati. Purimaṃ pana vañcaniyaṭṭhena¹ sabhāvalakkhaṇassa duddasattā gambhīraṃ, tattha vipallāsaggāhavasena pavattati.

Api ca **dukkheti** ettāvataṃ saṅghato vatthuto ārammaṇato kiccato ca avijjā dīpitā. **Dukkhasamudayeti** ettāvataṃ vatthuto

1. Paccanikaṭṭhena (Sī, Syā)

ārammaṇato kiccato ca. **Dukkhanirodhe dukkhanirodhagāminiyā paṭipadāyāti** ettāvataṅ kiccato. Avisesato pana **aññānti** etena sabhāvato niddiṭṭhāti nātabbā. **Āsavasamudayāti** ettha pana kāmāsavabhavāsavā sahajātādivasena avijjāya paccayā honti. Avijjāsavo upanissayavaseneva. Pubbuppannā cettha avijjā avijjāsavoti veditabbā. Sā aparāparuppannāya avijjāya upanissayapaccayo hoti. Sesam vuttanayamevāti.

Āsavavāraṇṇanā

104. Āsavavāre **avijjāsamudayāti** ettha avijjā kāmāsavabhavāsavānaṃ sahajātādivasena paccayo hoti. Avijjāsavassa upanissayavaseneva. Aparāparuppannā cettha avijjā avijjāsavoti veditabbā. Pubbuppannā avijjāyevassa aparāparuppannassa avijjāsavassa upanissayapaccayo hoti. Sesam vuttanayamevāti. Ayaṃ vāro yā esā paṭiccasamuppādapadesu jeṭṭhikā avijjā, tassāpi paccayadassanavasena vutto. Evaṃ vuttana vārena saṃsārassa anamataggaṭā sādhitā hoti. Kathaṃ? Āsavasamudayena hi avijjāsamudayo. Avijjāsamudayenāpi āsavasamudayo. Evaṃ āsavā avijjāya avijjāpi āsavānaṃ paccayoti katvā pubbakoti na paññāyati avijjāya, tassā apaññāyanato saṃsārassa anamataggaṭā siddhā hotīti.

Evaṃ sabbepe ime smim kammaṭṭhavāro āhāravāro dukkhavāro jarāmaraṇa, jāti, bhava, upādāna, taṇhā, vedanā, phassa, saḷāyatana, nāmarūpa, viññāṇa, saṅkhāra, avijjā, āsavavāroti **soḷasavārā** vuttā.

Tesu ekekassa vārassa saṅkhepavittārasena dvidhā vibhattā dvattiṃsaṭṭhānāni honti. Iti imasmim sutte imāsu dvattiṃsaṭṭhānesu cattāri saccāni kathitāni. Etesamīyeva vittārasena vuttasu soḷasasu ṭhānesu arahattaṃ kathitaṃ. Therassa pana matena dvattiṃsāyapi ṭhānesu cattāri saccāni cattāro ca maggā kathitāti. Iti sakalepi pañcamahānikāyasaṅgahite Buddhavacane natthi taṃ suttaṃ, yattha dvattiṃsakkhattuṃ cattāri saccāni dvattiṃsakkhattuṃ ca arahattaṃ pakāsitaṃ aññatra imamahā Sammādiṭṭhisuttāti.

Idamavocāyasmā Sāriputtoti idam dvattiṃsāya catusaccapariyāyehi dvattiṃsāya arahattapariyāyehīti catusaṭṭhiyā kāraṇehi alaṅkaritvā Sammādiṭṭhisuttaṃ āyasmā Sāriputto avoca, attamanā te bhikkhū āyasmato Sāriputtassa bhāsitaṃ abhinandunti.

Papañcasūdaniyā Majjhimanikāyaṭṭhakathāya

Sammādiṭṭhisuttavaṇṇanā niṭṭhitā.

10. Satipaṭṭhānasuttavaṇṇanā

105. **Evam me sutanti** Satipaṭṭhānasuttaṃ. Tattha **kurūsu viharatīti** Kurunāmakā jānapadino rājakumāro, tesaṃ nivāso ekopi janapado ruḥhīsaddena **Kurūti** vuccati, tasmim Kurūsu janapade¹. Aṭṭhakathācariyā panāhu—Mandhātukāle tīsu dīpesu manussā Jambudīpo nāma Buddhapaccekabuddhamahāsāvakaḥcakkavattipabhutīnaṃ uttamapurisānaṃ uppattibhūmi uttamadīpo atiramaṇīyoti sutvā raññā Mandhātucakkavattinā cakkaratanaṃ purakkhatvā cattāro dīpe anusamīyāyantaṃ saddhim āgamaṃsu. Tato rājā pariṇāyakaratanaṃ pucchi “atthi nu kho manussalokato ramaṇīyatarāṃ ṭhānaṃ”ti. Kasmā deva evaṃ bhaṇasi, kim na passasi candimasūriyānaṃ ānubhāvaṃ, nanu etesaṃ ṭhānaṃ ito ramaṇīyatarāṃ”ti.

Rājā cakkaratanaṃ purekkhatvā tattha agamāsi. Cattāro mahārājāno “Mandhātumahārājā āgato”ti sutvāva “mahiddhiko mahānubhāvo rājā² na sakkā yuddhena paṭibāhituṃ”ti sakarajjaṃ niyyātesuṃ. So taṃ gahetvā puna pucchi “atthi nu kho ito ramaṇīyatarāṃ ṭhānaṃ”ti. Athassa Tāvatiṃsabhavanaṃ kathayimāsu “Tāvatiṃsabhavanaṃ deva ramaṇīyatarāṃ, tattha Sakkassa devaraṇṇo ime cattāro mahārājāno paricārakā dovārikabhūmiyaṃ tiṭṭhanti. Sakko devarājā mahiddhiko mahānubhāvo. Tassimāni pana upabhogaṭṭhānāni, yojanasahassubbedho vejyantapāsādo, pañcayojanasatubbedhā Sudhammā devasabhā, diyaḍḍhayaojanasatiko vejyantaratho, tathā Erāvaṇo hatthī,

1. Kurujanapade (Sī, Syā, Ka)

2. Mahiddhiko rājā (Syā, Ka)

dibbarukkhasahassapaṭimaṇḍitaṃ Nandanavanam Cittalatāvanam
Phārusakavanam Missakavanam, yojanasatubbedho pāricchattako kovīlāro,
tassa heṭṭhā saṭṭhiyojanāyāmā paṇṇāsajojanavitthatā
pañcadasajojanubbedhā jayasumanapupphavaṇṇā paṇḍukambalasilā, yassā
mudutāya Sakkassa nisīdato upaḍḍhakāyo anupavisati”ti.

Tam sutvā rājā tattha gantukāmo cakkaratanam abbhukkiri. Tam ākāse
patiṭṭhāsi saddhim caturaṅginiyā senāya. Atha dvinnam devalokānam
vemajjhato cakkaratanam otarivā pathaviyam patiṭṭhāsi saddhim
pariṇāyakaratanappamukhāya caturaṅginiyā senāya. Rājā ekakova
Tāvatisabhavanam agamāsi. Sakko “Mandhātā āgato”ti sutvāva tassa
paccuggamanam katvā “svāgataṃ te mahārāja, sakam te mahārāja, anusāsa
mahārājā”ti vatvā saddhim nātakehi rajjam dvebhāge katvā ekam
bhāgamadāsi. Rañño Tāvatisabhavane patiṭṭhitamattasseva manussabhāvo¹
vigacchi, devabhāvo pāturahosi.

Tassa kira Sakkena saddhim Paṇḍukambalasilāyam nisinnassa
akkhinimisamattena nānattam paññāyati. Tam asallakkhentā devā Sakkassa
ca tassa ca nānatte muyhanti. So tattha dibbasampattim anubhavamāno yāva
chattimsa sakkā uppajjitvā cutā, tāva rajjam kāretvā atittoyeva kāmehi tato
cavitvā attano uyyāne patiṭṭhito² vātātapena phuṭṭhagatto³ kālamakāsi.

Cakkaratane pana pathaviyam patiṭṭhite pariṇāyakaratanam
suvaṇṇapaṭṭe Mandhātu-upāhanam likhāpetvā idam Mandhāturajjanti
rajjamanusāsi. Tepi tīhi dīpehi āgatamanussā puna gantum asakkontā
pariṇāyakaratanam upasaṅkamitvā “deva mayam rañño ānubhāvena āgatā,
idāni gantum na sakkoma, vasanaṭṭhānam no dehī”ti yācimsu. So tesam
ekekam janapadamadāsi. Tattha pubbavidehato āgatamanussehi
āvasitapadeso tāyeva purimasaññāya **Videharatṭhanti** nāmam labhi.
Aparagoyānato āgatamanussehi āvasitapadeso **Aparantajanapadoti** nāmam
labhi. Uttarakuruto āgatamanussehi āvasitapadeso **Kururatṭhanti** nāmam

1. Manussatbhāvo (Syā)

2. Patito (Sī, Syā)

3. Phuṭṭhagatto (Sī)

labhīti. Bahuke pana gāmanigamādayo upādāya bahuvacanena voharīyati. Tena vuttaṃ “Kurūsu viharatī”ti.

Kammāsadhammaṃ nāma kurūnaṃ nigamoti kammāsadhammanti ettha keci dhakārassa dakārena atthaṃ vaṇṇayanti. Kammāso ettha damitoti **kammāsadammo**. **Kammāsoti** kammāsapādo porisādo vuccati. Tassa kira pāde khāṇukena viddhaṭṭhāne vaṇo ruhanto cittadārusadiso hutvā ruhi, tasmā **kammāsapādoti** paññāyittha. So ca tasmiṃ okāse damito porisādabhāvato paṭisedhito. Kena? Mahāsattena. Katarasmiṃ jātaketi? **Mahāsutasomajātaketi** eke. Ime pana therā **Jayaddisajātaketi** vadanti. Tadā hi mahāsattena kammāsapādo damito. Yathāha—

“Putto yadā homi jayaddisassa,
Pañcālaraṭṭhādhipatissa atrajo.
Cajitvāna pāṇaṃ pitaraṃ pamocayim,
Kammāsapādampi cahaṃ pasādayin”ti.

Keci pana dhakāreneva atthaṃ vaṇṇayanti. Kururaṭṭhavāsīnaṃ kira kuruvattadhammo tasmiṃ kammāso jāto, tasmā taṃ ṭhānaṃ kammāso ettha dhammo jātoti **kammāsadhammanti** vuccati, tattha niviṭṭhanigamassāpi etadeva nāmaṃ. Bhumnavacanena kasmā na vuttanti, avasanokāsato. Bhagavato kira tasmiṃ nigame vasanokāso koci vihāro nāhosi. Nigamato pana apakkamma aññatarasmiṃ udakasampanne ramaṇīye bhūmibhāge mahāvanasaṅḍo ahosi. Tattha Bhagavā vihāsi. Taṃ nigamaṃ gocaragāmaṃ katvā, tasmā evamettha attho veditabbo “Kurūsu viharatī kammāsadhammaṃ nāma Kurūnaṃ nigamo, taṃ gocaragāmaṃ katvā”ti.

Uddesavāraḥkathāvaṇṇanā

106. **Ekāyano ayaṃ bhikkhave maggoti** kasmā Bhagavā idaṃ suttamabhāsi? Kururaṭṭhavāsīnaṃ gambhīradesanāpaṭiggahaṇasamatthatāya. Kururaṭṭhavāsino kira bhikkhū bhikkhuniyo upāsakā upāsikāyo utupaccayādisampannattā tassa raṭṭhassa sappāya-utupaccayasevanena

niccaṃ kallasarīrā kallacittā ca honti. Te cittasarīrakallatāya anuggahitapaññābalā gambhīrakatham paṭiggahetuṃ samatthā honti. Tena nesaṃ Bhagavā imaṃ gambhīradesanāpaṭiggahaṇasamatthataṃ sampassanto ekavīsatiyā ṭhānesu kammaṭṭhānaṃ arahatte pakkhipitvā idaṃ gambhīrattham Satipaṭṭhānasuttaṃ abhāsi. Yathā hi puriso suvaṇṇacaṅkoṭakaṃ labhitvā tattha nānāpupphāni pakkhipeyya, suvaṇṇamañjūsaṃ vā pana labhitvā sattaratanāni pakkhipeyya, evaṃ Bhagavā Kururaṭṭhavāsipariṣaṃ labhitvā gambhīradesanaṃ desesi. Tenevettha aññānīpi gambhīratthāni Dīghanikāye **Mahānidānaṃ Mahāsatipaṭṭhānaṃ** imasmiṃ Majjhimanikāye **Sāropamaṃ Rukkhūpamaṃ Raṭṭhapālaṃ Māgaṇḍiyaṃ Āneñjasappāyanti** aññānīpi suttāni desesi.

Api ca tasmim janapade catasso parisā pakatīyāva satipaṭṭhānabhāvanānuyogamanuyuttā viharanti, antamaso dāsakammakaraparijanāpi satipaṭṭhānappaṭisaṃyuttameva katham kathenti. Udakatiṭṭhasuttakantaṭṭhānādīsipi niraṭṭhakakathā nāma na pavattati. Sace kāci itthī “amma tvaṃ katarāṃ satipaṭṭhānabhāvanāṃ manasikarosī”ti pucchitā “na kiñci”ti vadati. Taṃ garahanti “dhiratthu¹ tava jīvitāṃ, jīvamānāpi² tvaṃ matasadisā”ti. Atha naṃ “mā dāni puna evamakāsi”ti ovaditvā aññatarāṃ satipaṭṭhānaṃ uggaṇhāpentī. Yā pana “ahaṃ asukaṃ satipaṭṭhānaṃ manasikaromī”ti vadati. Tassā “sādhu sādhu”ti sādhuṅkārāṃ datvā “tava jīvitāṃ sujīvitāṃ³, tvaṃ nāma manussattaṃ pattā, tavatthāya Sammāsambuddho uppanno”ti-ādīhi pasāmsanti. Na kevalaṃ cettha manussajātiyāyeva satipaṭṭhānamanasikārayuttā, te nissāya viharantā tiracchānagatāpi. Tatridaṃ vatthu—eko kira naṭako⁴ suvapotaṃ gahetvā sikkhāpento vicarati. So bhikkhunupassayaṃ upanissāya vasitvā gamanakāle suvapotaṃ pamussitvā gato. Taṃ sāmaṇeriyo gahetvā paṭijaggiṃsu. Buddharakkhitotissa nāmaṃ akaṃsu. Taṃ ekadivasaṃ purato nisinnaṃ disvā mahātherī āha “Buddharakkhitā”ti, kiṃ ayyeti. Atthi koci tava manasikāroti⁵, natthi ayyeti. Āvuso pabbajitānaṃ santike vasantena nāma vissatṭha-attabhāvena bhavituṃ na vaṭṭati, kocideva manasikāro icchitabbo, tvaṃ pana aññaṃ na sakkhissasi, “atthi

1. Niraṭṭhakaṃ (Syā, Ka)

2. Jīvantīpi (Syā)

3. Saṭṭhakaṃ tava jīvitāṃ (Ka)

4. Naṭagaṇo (Sī)

5. Bhāvanāmanasikāroti (Sī, Syā)

aṭṭhī”ti sajjhāyaṃ karohīti. So theriyā ovāde ṭhatvā “aṭṭhi aṭṭhī”ti sajjhāyanto carati.

Taṃ ekadivasaṃ pātova toraṇagge nisīditvā bālātapam̐ tapamānaṃ eko sakuṇo nakhapañjarena aggahesi. So “kira kirī”ti saddamakāsi. Sāmaṇeriyo sutvā “ayye Buddharakkhito sakuṇena gahito, mocema nan”ti leḍḍu-ādīni gahetvā anubandhitvā mocesuṃ. Taṃ ānetvā purato ṭhapitaṃ therī āha “Buddharakkhita sakuṇena gahitakāle kiṃ cintesī”ti. Na ayye aññaṃ cintesiṃ, “aṭṭhipuñjova aṭṭhipuñjaṃ gahetvā gacchati, katarasmimpi ṭhāne vippakirissatī”ti evaṃ ayye aṭṭhipuñjameva cintesinti. Sādhu sādhu Buddharakkhita anāgate bhavakkhayassa te paccayo bhavissatīti. Evaṃ tattha tiracchānagatāpi satipaṭṭhānamanasikārayuttā, tasmā nesaṃ Bhagavā satipaṭṭhānabuddhimeva janento idaṃ suttaṃ abhāsi.

Tattha **ekāyanoti** ekamaggo. Maggassa hi—

“Maggo pantho patho pajjo, añjasaṃ vaṭumāyanaṃ.
Nāvā uttarasetū ca, kullo ca bhisisaṅkamo”ti¹—

Bahūni nāmāni. Svāyaṃ idha ayananāmena vutto. Tasmā **ekāyano ayaṃ bhikkhave maggoti** ettha ekamaggo ayaṃ bhikkhave maggo, na dvedhāpathabhūtoti evamattho daṭṭhabbo. Atha vā ekena ayitabboti ekāyano, **ekenāti** gaṇasaṅgaṇikaṃ pahāya vūpakaṭṭhena pavivittacittena. **Ayitabboti** paṭipajjitabbo. Ayanti vā etenāti ayano, saṃsārato nibbānaṃ gacchantīti attho. Ekassa ayano ekāyano, **ekassāti** seṭṭhassa. Sabbasattānaṃ seṭṭho ca Bhagavā, tasmā Bhagavatoti vuttaṃ hoti. Kiñcāpi hi tena aññepi ayanti, evaṃ santepi Bhagavatova so ayano tena uppāditattā. Yathāha “so hi brāhmaṇa Bhagavā anuppannassa maggassa uppādetā”ti-ādi². Ayatīti vā ayano, gacchati pavattatīti attho. Ekasmiṃ ayanoti ekāyano, imasmim̐yeva dhammavinaye pavattati, na aññatrāti vuttaṃ hoti. Yathāha “imasmim̐ kho Subhadda dhammavinaye ariyo aṭṭhaṅglo maggo upalabbhatī”ti³. Desanābhedoyeva heso, attho paneko.

1. Khe 8. 201 piṭṭhe.

2. Ma 3. 59 piṭṭhe.

3. Dī 2. 125 piṭṭhe.

Api ca ekaṃ ayatīti ekāyano. Pubbabhāge
nānāmukhabhāvanānayappavattopi aparabhāge ekaṃ nibbānameva
gacchatīti vuttaṃ Hoti. Yathāha brahmā Sahampati—

“Ekāyanam jātikhayantadassī,
Maggaṃ pajānāti hitānukampī.
Etena maggena tarimsu pubbe,
Tarissanti ye ca taranti oghan”¹.

Keci pana “na pāraṃ diguṇaṃ yaṅti”²ti gāthāyena yasmā ekavāraṃ
nibbānaṃ gacchati. Tasmā “ekāyano”³ti vadanti, taṃ na yujjati. Imassa hi
atthassa sakim ayanoti iminā byañjanaena bhavitabbaṃ. Yadi pana ekaṃ
ayanamassa ekā gati pavattīti evaṃ atthaṃ yojetvā vucceyya, byañjanaṃ
yujjeyya. Attho pana ubhayathāpi na yujjati. Kasmā? Idha
pubbabhāgamaggassa adhippetattā. Kāyādicatu-ārammaṇappavatto hi
pubbabhāgasatipaṭṭhānamaggo idha adhippeto, na lokuttaro. So
anekavārampi ayati, anekañcassa ayanam hoti.

Pubbepi ca imasmim pade mahātherānaṃ sākacchā ahoṣiyeva.
Tipiṭakacūlanāgattthero “pubbabhāgasatipaṭṭhānamaggo”⁴ti āha. Ācariyo
panassa Tipiṭakacūlasumatthero “missakamaggo”⁵ti āha. Pubbabhāgo
bhanteti. Missako āvusoti. Ācariye punappunaṃ bhaṇante appaṭibāhitvā
tuṅhī ahoṣi. Pañhaṃ avinicchinitvāva uṭṭhahimsu. Athācariyatthero
nhānakoṭṭhakaṃ gacchanto “mayā missakamaggo kathito, Cūlanāgo
pubbabhāgoti ādāya voharati, ko nu kho ettha nicchayo”⁶ti suttantaṃ ādito
paṭṭhāya parivattento “yo hi koci bhikkhave ime cattāro satipaṭṭhāne evaṃ
bhāveyya satta vassāni”⁷ti imasmim ṭhāne sallakkhesi, lokuttaramaggo
uppajjitvā satta vassāni tiṭṭhamāno nāma natthi, mayā vutto missakamaggo
na labbhati, Cūlanāgena diṭṭho pubbabhāgamaggova labbhatīti nātva
aṭṭhamiyaṃ dhammassavane saṃghuṭṭhe agamāsi.

1. Saṃ 3. 162 piṭṭhe.

Porāṇakattherā kira piyadhammassavanā honti. Saddaṃ sutvāva “ahaṃ paṭhamāṃ, ahaṃ paṭhamāṃ”ti ekappahāreṇeva osaranti. Tasmim ca divase Cūḷanāgattherassa vāro. Tena dhammāsane nisīditvā bījanim gahetvā pubbagāthāsu vuttāsu therassa āsanapiṭṭhiyaṃ ṭhitassa etadahosi “raho nisīditvā na vakkhāmi”ti. Porāṇakattherā hi anusūyakā honti, na attano rucimeva ucchubhāraṃ viya evaṃ ukkhipitvā vicaranti, kāraṇameva gaṇhanti, akāraṇaṃ vissajjenti, tasmā thero “āvuso Cūḷanāgā”ti āha. So ācariyassa viya saddoti dhammaṃ ṭhapetvā “kiṃ bhante”ti āha. Āvuso Cūḷanāga mayā vutto missakamaggo na labbhati, tayā vutto pubbabhāgasatipaṭṭhānamaggova labbhatīti.

Thero cintesi “amhākaṃ ācariyo sabbapariyattiko tepiṭako sutabuddho, evarūpassapi nāma bhikkhuno ayaṃ pañho āluṇeti, anāgate mama bhātikā imaṃ pañhaṃ āluṇessantīti suttāṃ gahetvā imaṃ pañhaṃ niccalaṃ karissāmi”ti paṭisambhidāmagгато “ekāyanamaggo vuccati pubbabhāgasatipaṭṭhānamaggo—

Maggānaṭṭhaṅgiko seṭṭho, saccānaṃ caturo padā.

Virāgo seṭṭho Dhammānaṃ, dvipadānaṃ ca cakkhumā.

Eseva maggo natthañño, dassanassa visuddhiyā.

Etañhi tumhe paṭipajjatha, mārasenappamaddanaṃ.

Etañhi tumhe paṭipannā, dukkhassantaṃ karissathā”ti¹—

Suttaṃ āharitvā ṭhapesi.

Maggoti kenaṭṭhena maggo? Nibbānagamaṇaṭṭhena nibbānatthikehi magganiyaṭṭhena ca. **Sattānaṃ visuddhiyā**ti rāgādīhi malehi abhijjhāvisamalobhādīhi ca upakkilesehi kiliṭṭhacittānaṃ sattānaṃ visuddhatthāya. Tathā hi imināva maggena ito satahassakappādīhikānaṃ catunnaṃ asaṅkhyeyyānaṃ upari ekasmiññeva kappe nibbatte Taṇhaṅkaramedhaṅkarasaraṇaṅkaradīpaṅkaranāmake Buddhe ādīm katvā Sakyamunipariyosānā aneke Sammāsambuddhā anekasatā Paccekabuddhā gaṇanapathaṃ vītivattā ariyasāvaka cāti

1. Khu 1. 52 piṭṭhe Dhammapade.

ime sattā sabbe cittamalaṃ pavāhetvā paramavisuddhiṃ pattā.
Rūpamalavasena pana saṃkilesavodānapaññattiyeva natthi. Tathāhi—

Rūpena saṃkiliṭṭhena, saṃkilissanti māṇavā.
Rūpe suddhe visujjhanti, anakkhātaṃ Mahesinā.
Cittena saṃkiliṭṭhena, saṃkilissanti māṇavā.
Citte suddhe visujjhanti, iti vuttaṃ Mahesinā.

Yathāha “cittasaṃkilesā bhikkhave sattā saṃkilissanti, cittavodānā visujjhanti”¹. Tañca cittavodānaṃ iminā satipaṭṭhānamaggena hoti. Tenāha “sattānaṃ visuddhiyā”^{ti}.

Sokaparidevānaṃ samatikkamāyāti sokassa ca paridevassa ca samatikkamāya, pahānāyāti attho. Ayam hi maggo bhāvito **Santatihāmattā**dīnaṃ viya sokasamatikkamāya, **Paṭācārā**dīnaṃ viya ca paridevasamatikkamāya ca saṃvattati. Tenāha “sokaparidevānaṃ samatikkamāyā”^{ti}. Kiñcāpi hi Santatihāmatto—

“Yam pubbe taṃ visodhehi, pacchā te māhu kiñcanaṃ.
Majjhe ce no gahessasi, upasanto carissasī”^{ti}—

Imaṃ gāthaṃ sutvā saha paṭisambhidāhi arahattaṃ patto.

Paṭācārā—

“Na santi puttā tāṇāya, na pitā nāpi bandhavā.
Antakenādhīpanassa, natthi ñātīsu tāṇatā”^{ti}—

Imaṃ gāthaṃ sutvā sotāpattiphale patiṭṭhitā. Yasmā pana kāyavedanācittadhammesu kañci dhammaṃ anāmasitvā bhāvanā nāma natthi, tasmā tepi imināva maggena sokaparideve samatikkantāti veditabbā.

Dukkhadomanassānaṃ atthaṅgamāyāti kāyikadukkhassa ca cetasikadomanassassa cāti imesaṃ dvinnaṃ atthaṅgamāya, nirodhāyāti attho. Ayam hi maggo bhāvito Tissattherādīnaṃ viya dukkhassa, Sakkādīnaṃ viya ca domanassassa atthaṅgamāya saṃvattati.

1. Saṃ 2. 123 piṭṭhe.

2. Khu 1. 425 piṭṭhe.

3. Khu 1. 54 piṭṭhe.

Tatrāyaṃ atthadīpanā—Sāvattthiyaṃ kira **Tisso** nāma kuṭumbikaputto cattālīsa hiraññakoṭiyo pahāya pabbajitvā agāmake araññe viharati, tassa kaniṭṭhabhātubhariyā “gacchatha naṃ jīvitā voropethā”ti pañcasate core pesesi. Te gantvā theram parivāretvā nisīdīmsu. Thero āha “kasmā āgatattha upāsakā”ti. Tam jīvitā voropessāmāti. Pāṭibhogam¹ me upāsakā gahetvā ajjekarattim jīvitam dethāti. Ko te samaṇa imasmim thāne pāṭibhogo bhavissatīti. Thero mahantaṃ pāsānaṃ gahetvā dve ūruṭṭhīni bhinditvā “vaṭṭati upāsakā pāṭibhogo”ti āha. Te apakkamitvā caṅkamanasīse aggim katvā nipajjīmsu. Therassa vedanaṃ vikkhambhetvā sīlam paccavekkhato parisuddham sīlam nissāya pītipāmojjaṃ uppajji. Tato anukkamena vipassanaṃ vadḍhento tiyāmarattim samaṇadhammaṃ katvā aruṇuggamane arahattaṃ patto imaṃ udānaṃ udānesi—

“Ubho pādāni bhinditvā, saññapessāmi vo ahaṃ.

Attiyāmi harāyāmi, sarāgamaraṇaṃ ahaṃ.

Evāhaṃ cintayitvāna, yathābhūtaṃ vipassisaṃ.

Sampatte aruṇuggamhi, arahattapāpuṇin”ti.

Aparepi timsa bhikkhū Bhagavato santike kammaṭṭhānaṃ gahetvā araññavihāre vassaṃ upagantvā “āvuso tiyāmarattim samaṇadhammova kātabbo, na aññamaññassa santikaṃ āgantabban”ti vatvā viharīmsu. Tesam samaṇadhammaṃ katvā paccūsasamaye pacalāyantānaṃ eko byaggho āgantvā ekekaṃ bhikkhum gahetvā gacchati. Na koci “maṃ byaggho gaṇhī”ti vācampi nicchāresi. Evaṃ pañcasu dasasu bhikkhūsu khāditesu uposathadivase “itare āvuso kuhin”ti pucchitvā ṇatvā ca “idāni gahitena gahitomhīti vattabban”ti vatvā viharīmsu.

Atha aññataraṃ daharabhikkhum purimanayeneva byaggho gaṇhi. So “byaggho bhante”ti āha. Bhikkhū kattaradaṇḍe ca ukkāyo ca gahetvā mocessāmāti anubandhimsu. Byaggho bhikkhūnaṃ agatim² chinnataṭṭhānaṃ āruyha taṃ bhikkhum pādaṅguṭṭhakato paṭṭhāya khādītum ārabhi. Itarepi

1. Pāṭibhogam (Ka)

2. Agatipatham (Sī)

“idāni sappurisa amhehi kattabbaṃ natthi, bhikkhūnaṃ vireso nāma evarūpe
 t̥hāne paññāyatī”ti āhaṃsu. So byagghamukhe nipannova taṃ vedanaṃ
 vikkhambhetvā vipassanaṃ vad̥dento yāva gopphakā khādītasamaye
 sotāpanno hutvā, yāva jaṇṇukā khādītasamaye sakadāgāmī, yāva nābhiyā
 khādītasamaye anāgāmī hutvā, hadayarūpe akhādīteyeva saha
 paṭisambhidāhi arahattaṃ patvā imaṃ udānaṃ udānesi—

“Sīlavā vatasampanno, paññavā susamāhito.

Muhuttaṃ pamādamanvāya, byagghenoruddhamānaso.

Pañjarasmim̐ gahetvāna, silāya uparīkato¹.

Kāmaṃ khādatu maṃ byaggho, bhakkho kāyo amittānaṃ.

Paṭiladdhe kammaṭṭhāne, maraṇaṃ hehiti² bhaddakaṃ”ti.

Aparopi Pītamallatthero³ nāma gihikāle tīsu rajjesu paṭākam̐ gahetvā
 Tambapaṇṇidīpaṃ āgamma rājānaṃ disvā raññā katānuggaho ekadivasam̐
 kilañjakāpaṇasāladvārena gacchanto “rūpaṃ bhikkhave na tumhākam̐, taṃ
 pajahatha, taṃ vo pahīnaṃ dīgharattaṃ hitāya sukhāya bhavissatī”ti⁴
 natumhākavaggam̐⁵ sutvā cintesi “neva kira rūpaṃ attano, na vedanā”ti. So
 taṃyeva aṅkusaṃ katvā nikkhamitvā Mahāvihāraṃ gantvā pabbajjamaṃ
 yācitvā pabbajito upasampanno dvemātikā paguṇaṃ katvā timsa bhikkhū
 gahetvā gabalavāliya-aṅgaṇaṃ gantvā samaṇadhammaṃ akāsi. Pādesu
 avahantesu jaṇṇukehi caṅkamati. Tameṇaṃ rattiṃ eko migaluddako migoti
 maññamāno sattiyā pahari. Satti vinivijjhivā gatā. So taṃ sattiṃ harāpetvā
 pahāramukhāni tiṇavaṭṭiyā pūrāpetvā pāsānapiṭṭhiyaṃ attānaṃ nisīdāpetvā
 okāsaṃ kāretvā vipassanaṃ vad̥dhetvā saha paṭisambhidāhi arahattaṃ patvā
 ukkāsitāsaddena āgatānaṃ bhikkhūnaṃ byākaritvā imaṃ udānaṃ udānesi—

“Bhāsitaṃ Buddhasēṭṭhassa, sabbalokaggavādino.

Na tumhākamidam̐ rūpaṃ, taṃ jaheyyātha bhikkhavo.

1. Upanītako (Sī, Syā) Dī-Ṭṭha 2. 340 piṭṭhe passitabbaṃ.

2. Dīpamallatthero (Syā)

3. Natumhākavākyam̐ (Dī-Ṭṭha 2. 340 piṭṭhe)

4. Hoti (Syā)

5. Sam̐ 2. 28 piṭṭhe.

Aniccā vata saṅkhārā, uppādavayadhammino.
Uppajjitvā nirujjhanti, tesaṃ vūpasamo sukho”ti.

Atha naṃ bhikkhū āhaṃsu “sace bhante Sammāsambuddho arogo abhavissā, addhā te muddhamatthake hatthaṃ pasāretvā sīsaṃ parāmaseyyā”ti. Ettāvatā ayaṃ maggo Tissattherādīnaṃ viya dukkhassa atthaṅgamāya saṃvattati.

Sakko pana Devānamindo attano pañcavidhaṃ pubbanimittaṃ disvā maraṇabhayasantaḥḥito domanassajāto Bhagavantam upasaṅkamitvā pañhaṃ pucchi. So upekkhāpañhavissajjanāvasāne asītisahassāhi devatāhi saddhiṃ sotāpattiphale patiṭṭhāsi. Sā cassa¹ upapatti puna pākatikāva ahosi.

Subrahmāpi devaputto accharāsahassaparivāro saggasampattim anubhoti, tattha pañcasatā accharāyo rukkhato pupphāni ocinantiyo cavitvā niraye upapannā. So “kiṃ imā cirāyanti”ti upadhārento tāsāṃ niraye nibbatabhāvaṃ disvā “kittakaṃ nu kho mama āyū”ti upaparikkhanto attanopi āyuparikkhayaṃ viditvā tattheva niraye nibbattanabhāvaṃ disvā bhīto ativiya domanassajāto hutvā “imaṃ me domanassaṃ satthā vinayissati² na añño”ti avasesā pañcasatā accharāyo gahetvā Bhagavantam upasaṅkamitvā pañhaṃ pucchi—

“Niccaṃ utrastamidaṃ cittaṃ, niccaṃ ubbiggidaṃ mano.
Anuppannesu kicchesu, atho uppatitesu ca.
Sace atthi anutrastaṃ, taṃ me akkhāhi pucchito”ti³.

Tato naṃ Bhagavā āha—

“Nāññatra bojjhā tapasā, nāññatrindriyasamvarā.
Nāññatra sabbanissaggā, sotthim passāmi paṇinan”ti³.

So desanāpariyosāne pañcahi accharāsatehi saddhiṃ sotāpattiphale patiṭṭhāya taṃ sampattim thāvaram katvā devalokameva

1. Sāpassa (Syā)

2. Vinodessati (Ka)

3. Saṃ 1. 52 piṭṭhe.

agamāsīti. Evamayam maggo bhāvito sakkādīnam viya domanassassa atthaṅgamāya saṁvattatīti veditabbo.

Ñāyassa adhigamāyāti ñāyo vuccati ariyo aṭṭhaṅgiko maggo, tassa adhigamāya, pattiyāti vuttaṁ hoti. Ayam hi pubbabhāge lokiyo satipaṭṭhānamaggo bhāvito lokuttarassa maggassa adhigamāya saṁvattati. Tenāha “ñāyassa adhigamāya”ti. **Nibbānassa sacchikiriyāyāti** taṇhāvānavirahitattā nibbānanti laddhanāmassa amatassa sacchikiriyāya, attapaccakkhatāyāti vuttaṁ hoti. Ayañhi maggo bhāvito anupubbena nibbānasacchikiriyam sādheti. Tenāha “nibbānassa sacchikiriyāya”ti.

Tattha kiñcāpi “sattānam visuddhiyā”ti vutte sokasamatikkamādīni atthato siddhāneva honti, ṭhapetvā pana sāsana-yuttikovidā aññesaṁ na pākaṭāni, na ca Bhagavā paṭhamam sāsana-yuttikovidam janam katvā pacchā dhammam deseti. Tena teneva pana suttena tam tam attham ñāpeti. Tasmā idha yaṁ yaṁ attham ekāyanamaggo sādheti, tam tam pākaṭam katvā dassento “sokaparidevānam samatikkamāyā”ti-ādimāha. Yasmā vā yā sattānam visuddhi ekāyanamaggena saṁvattati, sā sokaparidevānam samatikkamena hoti, sokaparidevānam samatikkamo dukkhadomanassānam atthaṅgama, dukkhadomanassānam atthaṅgamo ñāyassādhigamena, ñāyassādhigamo nibbānassa sacchikiriyāya. Tasmā imampi kamaṁ dassento “sattānam visuddhiyā”ti vatvā “sokaparidevānam samatikkamāyā”ti-ādimāha.

Api ca vaṇṇabhaṇanametaṁ ekāyanamaggassa. Yatheva hi Bhagavā “dhammam vo bhikkhave desessāmi ādikalyāṇam majjhekalyāṇam pariyośānakalyāṇam sāttham sabyañjanam kevalaparipuṇṇam parisuddham brahmacariyam pakāsessāmi, yadidaṁ chachakkānī”ti¹ chachakkadesanāya aṭṭhahi padehi vaṇṇam abhāsi, yathā ca ariyavaṁsadesanāya “cattārome bhikkhave ariyavaṁsā aggaññā rattaññā vaṁsaññā porāṇā asaṁkiṇṇā asaṁkiṇṇapubbā na saṁkiyanti, na saṁkiyissanti, appaṭikuṭṭhā samaṇehi brāhmaṇehi

1. Ma 3. 327 piṭṭhe.

viññūhī”ti¹ navahi padehi vaṇṇaṃ abhāsi, evaṃ imassapi ekāyanamaggassa sattānaṃ visuddhiyāti-ādīhi sattahi padehi vaṇṇaṃ abhāsi.

Kasmā iti ce, tesaṃ bhikkhūnaṃ ussāhajanatthaṃ. Vaṇṇabhāsaṇaṃ hi satvā te bhikkhū “ayaṃ kira maggo hadayasantāpabhūtaṃ sokaṃ, vācāvippalāpabhūtaṃ paridevaṃ, kāyika-asātabhūtaṃ dukkhaṃ, cetasika-asātabhūtaṃ domanassanti cattāro upaddave hanati, visuddhiṃ nīyamaṃ nibbānanti tayo visese āvahaṭi”ti ussāhajātā imaṃ dhammadesanaṃ uggahetabbaṃ pariyaṇṇatappaṃ dhāretabbaṃ vācetaṇṇaṃ, imaṃca maggaṃ bhāvetabbaṃ maññissanti. Iti tesaṃ bhikkhūnaṃ ussāhajanatthaṃ vaṇṇaṃ abhāsi, kambalavāṇijādayo kambalādīnaṃ vaṇṇaṃ viya.

Yathā hi satahassagghanikapāṇḍukambalavāṇijena kambalaṃ gaṇhathāti ugghositepi asukakambaloti na tāva manussā jānanti. Kesakambalavālakambalādayopi hi duggandhā kharasamphassā kambalātveva vuccanti. Yadā pana tena gandhārako rattakambalo sukhumo ujjalo sukhasamphassoti ugghositaṃ hoti, tadā ye pahonti, te gaṇhanti. Ye na pahonti, te pi dassanakāmā honti, evamevaṃ “ekāyano ayaṃ bhikkhave maggo”ti vuttepi asukamaggoti na tāva pākaṭo hoti. Nānappakārakā hi aniyānamaggāpi maggātveva vuccanti. “Sattānaṃ visuddhiyā”ti-ādīmihi pana vutte “ayaṃ kira maggo cattāro upaddave hanati², tayo visese āvahaṭi”ti ussāhajātā imaṃ dhammadesanaṃ uggahetabbaṃ pariyaṇṇatappaṃ dhāretabbaṃ vācetaṇṇaṃ, imaṃca maggaṃ bhāvetabbaṃ maññissanti vaṇṇaṃ bhāsanto “sattānaṃ visuddhiyā”ti-ādīmāha. Yathā ca satahassagghanikapāṇḍukambalavāṇijopamā, evaṃ rattajambunadasuvaṇṇa-udakappasādakamaṇiratanaṃ visuddhamuttāratana dhotapavāḷādivāṇijūpamādayopettha āharitabbā.

Yadidanti nipāto, ye imeti ayamassa attho. **Cattāro**ti gaṇanaparicchedo, tena na tato heṭṭhā na uddhanti satipaṭṭhānaparicchedaṃ dīpeti. **Satipaṭṭhānāti** tayo satipaṭṭhānā satigocaropi, tidhā paṭipannesu sāvakesu Sattuno paṭighānunanayavītivattatāpi, satipi.

1. Am 1. 336 piṭṭhe.

2. Harati (Sī, Syā)

“Catunnaṃ bhikkhave satipaṭṭhānānaṃ samudayañca atthaṅgamañca desessāmi, taṃ suṇātha. Ko ca bhikkhave kāyassa samudayo. Āhārasamudayā kāyassa samudayo”¹ ti-ādīsu¹ hi satigocaro **satipaṭṭhānanti** vuccati. Tathā “kāyo paṭṭhānaṃ, no sati. Sati paṭṭhānañceva sati cā”² ti-ādīsupi². Tassattho—paṭiṭṭhāti asminti paṭṭhānaṃ. Kā paṭiṭṭhāti? Sati. Satiyā paṭṭhānaṃ **satipaṭṭhānaṃ**. Padhānaṃ ṭhānanti vā paṭṭhānaṃ. Satiyā paṭṭhānaṃ satipaṭṭhānaṃ, hatthiṭṭhāna-assaṭṭhānādīni viya. “Tayo satipaṭṭhānā, yadariyo sevati, yadariyo sevamāno satthā gaṇamanusāsiturahatī”³ ti³ etthāpi tidhā paṭipannesu sāvakesu Satthuno paṭighānūnayaṅvītivattatā “satipaṭṭhānaṃ”⁴ ti vuttā. Tassattho—paṭṭhapetabbato paṭṭhānaṃ, pavattayitabbatoti attho. Kena paṭṭhapetabbatoti, satiyā. Satiyā paṭṭhānaṃ satipaṭṭhānanti. “Cattāro satipaṭṭhānā bhāvītā bahulikatā satta bojjhaṅge paripūrentī”⁴ ti-ādīsu⁴ pana satieva “satipaṭṭhānaṃ”⁵ ti vuccati. Tassattho—paṭiṭṭhātīti paṭṭhānaṃ, upaṭṭhāti okkantitvā⁵ pakkhanditvā pavattatīti attho. Satiyeva paṭṭhānaṃ satipaṭṭhānaṃ. Atha vā saraṇaṭṭhena sati, upaṭṭhānaṭṭhena paṭṭhānaṃ. Iti sati ca sā paṭṭhānañcātipi satipaṭṭhānaṃ. Idamidha adhippetam.

Yadi evaṃ, kasmā “satipaṭṭhānā”⁶ ti bahuvacanaṃ? Satibahuttā. Ārammaṇabhedena hi bahukā etā satiyo. Atha maggoti kasmā ekavacanaṃ? Maggaṭṭhena ekattā. Catassopi hi etā satiyo maggaṭṭhena ekattaṃ gacchanti. Vuttañhetam “maggoti kenaṭṭhena maggo, nibbānagamaṇaṭṭhena, nibbānatthikehi magganīyaṭṭhena cā”⁶ ti. Catassopi cetā aparabhāge kāyādīsu ārammaṇesu kiccaṃ sādhamānā nibbānaṃ gacchanti. Ādito paṭṭhāya ca nibbānatthikehi maggīyanti, tasmā catassopi eko maggoti vuccanti. Evaṃ ca sati vacanānusandhinā sānusandhikāva desanā hoti, “mārasenappamaddanaṃ vo bhikkhave maggaṃ desessāmi, taṃ suṇātha. Katamo ca bhikkhave mārasenappamaddano maggo, yadidaṃ sattabojjhaṅgā”⁶ ti-ādīsu⁶ viya hi yathā mārasenappamaddanoti ca sattabojjhaṅgāti ca atthato ekaṃ, byañjanaṃevettha nānaṃ. Evaṃ ekāyanamaggoti ca cattāro satipaṭṭhānāti ca

1. Saṃ 3. 161 piṭṭhe.

2. Khu 9. 406 piṭṭhe.

3. Ma 3. 263 piṭṭhe.

4. Am 3. 287 piṭṭhe.

5. Okkhanditvā (Sī)

6. Saṃ 3. 88 piṭṭhe.

atthato ekaṃ, byañjanamevettha nānaṃ. Tasmā maggaṭṭhena ekattā ekavacanaṃ, ārammaṇabhedena satibahuttā bahuvacanaṃ veditabbaṃ.

Kasmā pana Bhagavatā cattārova satipaṭṭhānā vuttā anūnā anadhikāti. Veneyyahitattā. Taṇhācaritadiṭṭhicaritasamathayānikavipassanāyānikesu hi mandatikkhavasena dvedhā dvedhā pavattesu veneyyesu mandassa taṇhācaritassa oḷārikaṃ kāyānupassanāsatiipaṭṭhānaṃ Visuddhimaggo, tikkhassa sukhamaṃ vedanānupassanaṃ satipaṭṭhānaṃ. Diṭṭhicaritassāpi mandassa nātipphabhedagataṃ cittānupassanāsatiipaṭṭhānaṃ Visuddhimaggo, tikkhassa atippabhedagataṃ dhammānupassanāsatiipaṭṭhānaṃ. Samathayānikassa ca mandassa akicchena adhigantabbanimittaṃ paṭhamaṃ satipaṭṭhānaṃ Visuddhimaggo, tikkhassa oḷārikārammaṇe asaṅghahanato dutiyaṃ. Vipassanāyānikassāpi mandassa nātipphabhedagatārammaṇaṃ tatiyaṃ, tikkhassa atippabhedagatārammaṇaṃ catutthaṃ. Iti cattārova vuttā anūnā anadhikāti.

Subhasukhanicca attabhāva vipallāsapahānatthaṃ vā. Kāyo hi asubho, tattha ca subhavipallāsavipallatthā sattā, tesāṃ tattha asubhabhāvadassanena tassa vipallāsassa pahānatthaṃ paṭhamaṃ satipaṭṭhānaṃ vuttaṃ. Sukhaṃ niccaṃ attāti gahitesupi ca vedanādisu vedanā dukkhā, cittaṃ aniccaṃ, dhammā anattā, tesu ca sukhanicca-attavipallāsavipallatthā sattā, tesāṃ tattha dukkhādibhāvadassanena tesāṃ vipallāsānaṃ pahānatthaṃ sesāni tīṇi vuttānīti evaṃ subhasukhanicca-attabhāvavipallāsapahānatthaṃ vā cattārova vuttā anūnā anadhikāti veditabbā.

Na kevalaṅca vipallāsapahānatthameva, atha kho caturoghayogāsavagantha-upādāna-agatipahānatthampi catubbidhāhārapariññatthaṅca cattārova vuttāti veditabbā. Ayāṃ tāva pakaraṇanayo.

Aṭṭhakathāyaṃ pana saraṇavasena ceva ekattasamosaraṇavasena ca ekameva satipaṭṭhānaṃ ārammaṇavasena cattāroti etadeva vuttaṃ. Yathā hi catudvāre nagare pācīnato āgacchantā pācīnadisāya uṭṭhānakaṃ bhaṇḍaṃ gahetvā pācīnavāreṇa nagarameva pavisanti, dakkhiṇato pacchimoto uttarato āgacchantā uttaradisāya uṭṭhānakaṃ bhaṇḍaṃ gahetvā uttaradvāreṇa nagarameva pavisanti, evaṃsāmpadamidaṃ veditabbaṃ. Nagaraṃ viya hi

nibbānamahānagaraṃ. Dvāraṃ viya aṭṭhaṅgiko lokuttaramaggo.
Pācīnadisādayo viya kāyādayo.

Yathā pācīnato āgacchantā pācīnadisāya uṭṭhānakaṃ bhaṇḍaṃ gahetvā
pācīnadvārena nagarameva pavisanti, evaṃ kāyānupassanāmukhena
āgacchantā cuddasavidhena kāyānupassanaṃ bhāvetvā
kāyānupassanābhāvanānubhāvanibbattena ariyamaggena ekaṃ nibbānameva
osaranti.

Yathā dakkhiṇato āgacchantā dakkhiṇadisāya uṭṭhānakaṃ bhaṇḍaṃ
gahetvā dakkhiṇadvārena nagarameva pavisanti, evaṃ
vedanānupassanāmukhena āgacchantā navavidhena vedanānupassanaṃ
bhāvetvā vedanānupassanābhāvanānubhāvanibbattena ariyamaggena ekaṃ
nibbānameva osaranti.

Yathā pacchimato āgacchantā pacchimadisāya uṭṭhānakaṃ bhaṇḍaṃ
gahetvā pacchimadvārena nagarameva pavisanti, evaṃ
cittānupassanāmukhena āgacchantā soḷasavidhena cittānupassanaṃ bhāvetvā
cittānupassanābhāvanānubhāvanibbattena ariyamaggena ekaṃ nibbānameva
osaranti.

Yathā uttarato āgacchantā uttaradisāya uṭṭhānakaṃ bhaṇḍaṃ gahetvā
uttaradvārena nagarameva pavisanti, evaṃ dhammānupassanāmukhena
āgacchantā pañcavidhena dhammānupassanaṃ bhāvetvā
dhammānupassanābhāvanānubhāvanibbattena ariyamaggena ekaṃ
nibbānameva osaranti.

Evaṃ saraṇavasena ceva ekattasamosaraṇavasena ca ekameva
satipaṭṭhānaṃ ārammaṇavasena cattārova vuttāti veditabbā.

Katame cattāroti kathetukamyatāpucchā. **Idhāti** imasmim sāsane.
Bhikkhveti dhammapaṭiggāhakaṃ puggalālanametam. **Bhikkhūti**
paṭipattisampādakapuggalanidassanametam. Aññepi ca devamanussā
paṭipattiṃ sampādentiyeva, seṭṭhattā pana paṭipattiyā
bhikkhubhāvadassanato ca “bhikkhū”ti āha. Bhagavato hi anusāsaniṃ
sampaṭicchantesu¹ bhikkhu seṭṭho, sabbappakārāya anusāsaniyā
bhājanabhāvato, tasmā seṭṭhattā “bhikkhū”ti āha. Tasmim gahite pana sesā
gahitāva honti rājagamanādīsu rājaggahaṇena sesaparisā viya. Yo ca imaṃ
paṭipattiṃ paṭipajjati, so bhikkhu nāma

1. Paṭipannesu (Syā)

hotīti paṭipattiyā bhikkhubhāvadassanatopi “bhikkhū”ti āha. Paṭipannako hi devo vā hotu manusso vā, bhikkhūti saṅkhaṃ gacchatiyeva. Yathāha—

“Alaṅkato cepi samaṃ careyya,
Santo danto niyato brahmacārī.
Sabbesu bhūtesu nidhāya daṇḍaṃ,
So brāhmaṇo so samaṇo sa bhikkhū”ti¹.

Kāyeti rūpakāye. Rūpakāyo hi idha aṅgapaccaṅgānaṃ kesādīnañca dhammānaṃ samūhaṭṭhena hatthikāyarathakāyādayo viya kāyoti adhippeto. Yathā ca samūhaṭṭhena, evaṃ kucchitānaṃ āyaṭṭhena. Kucchitānañhi paramajegucchānaṃ so āyotipi kāyo. **Āyoti** uppattideso. Tatrāyaṃ vacanattho, āyanti tatoti āyo. Ke āyanti? Kucchitā kesādayo. Iti kucchitānaṃ āyoti kāyo. Kāyānupassīti kāyaṃ anupassanasīlo, kāyaṃ vā anupassamāno.

“Kāye”ti ca vatvāpi puna “kāyānupassī”ti dutiyaṃ kāyaggahaṇaṃ asammissato vavatthānaghanavinibbhogādīdassanatthaṃ katanti veditabbaṃ. Tena na kāye vedanānupassī vā, cittadhammānupassī vā, atha kho kāyānupassīyevāti kāyasaṅkhāte vatthusmiṃ kāyānupassanākārasseva dassanena asammissato vavatthānaṃ dassitaṃ hoti. tathā na kāye aṅgapaccaṅgavimutta-ekadhammānupassī, nāpi kesalomādivinimutta-itthipurisānupassī. Yopi cettha kesalomādiko bhūtopādāyasamūhasaṅkhāto kāyo, tatthapi na bhūtopādāyavinimutta-ekadhammānupassī, atha kho rathasambhārānupassako viya aṅgapaccāṅgasamūhānupassī, nagarāvayavānupassako viya kesalomādisamūhānupassī, kadalikkhandhapattavaṭṭhivinibbhujanako viya rittamuṭṭhiviniveṭṭhako viya ca bhūtopādāyasamūhānupassīyevāti nānappakārato samūhavaseneva kāyasaṅkhātassa vatthuno dassanena ghanavinibbhogo dassito hoti. Na hettha yathāvuttasamūhavinimutto kāyo vā itthī vā puriso vā añño vā koci dhammo

1. Khu 1. 34 piṭṭhe.

dissati, yathāvuttadhammasamūhamatteyeva pana tathā tathā sattā micchābhinivesaṃ karonti. Tenāhu porāṇā—

“Yaṃ passati na taṃ diṭṭhaṃ, yaṃ diṭṭhaṃ taṃ na passati.
Apassaṃ bajjhate mūḷho, bajjhamāno na muccati”ti.

Ghanavinibbhogādidadassanatthanti vuttaṃ. Ādisaddena cettha ayampi attho veditabbo—ayañhi ekasmiṃ kāye kāyānupassīyeva, na aññadhammānupassī, kiṃ vuttaṃ hoti, yathā anudakabhūtāyapi marīciyā udakānupassino honti, na evaṃ aniccadukkhānatta-asubhabhūteyeva imasmiṃ kāye niccasukha-attasubhabhāvānupassī, atha kho kāyānupassī aniccadukkhānatta-asubhākārasamūhānupassīyevāti. Atha vā yvāyaṃ parato “idha bhikkhave bhikkhu araññagato vā -pa-. So satova assasati”ti-ādinā nayena assāsapassāsādicuṇṇikajāta-aṭṭhikapariyosāno kāyo vutto, yo ca “idhekacco pathavikāyaṃ aniccato anupassati āpokāyaṃ tejokāyaṃ vāyokāyaṃ kesakāyaṃ lomakāyaṃ chavikāyaṃ cammakāyaṃ maṃsakāyaṃ ruhirakāyaṃ nahārukāyaṃ aṭṭhikāyaṃ aṭṭhimiñjakāyaṃ”ti paṭisambhidāyaṃ¹ kāyo vutto, tassa sabbassa imasmiṃyeva kāye anupassanato “kāye kāyānupassī”ti evampi attho daṭṭhabbo.

Atha vā kāye ahanti vā mamanti vā evaṃ gahetabbassa yassa kassaci ananupassanato, tassa tasseva pana kesālomādikassa nānādhammasamūhassa anupassanato kāye kesādīdhammasamūhasaṅkhātākāyānupassīti evamattho daṭṭhabbo. Api ca “imasmiṃ kāye aniccato anupassati, no niccato”ti-ādinā nayena paṭisambhidāyaṃ¹ āgatanayassa sabbasseva aniccalakkhaṇādino ākārasamūhasaṅkhātassa kāyassānupassanatopi “kāye kāyānupassī”ti evampi attho daṭṭhabbo.

Tathā hi ayaṃ kāye kāyānupassanāpaṭipadaṃ paṭipanno bhikkhu imaṃ kāyaṃ aniccānupassanādīnaṃ sattannaṃ anupassanānaṃ vasena aniccato anupassati, no niccado. Dukkhatō anupassati, no sukhato.

1. Khu 9. 406 piṭṭhe.

Anattato anupassati, no attato. Nibbindati, no nandati. Virajjati, no rajjati. Nirodheti, no samudeti. Paṭinissajjati, no ādiyati. So tam aniccato anupassanto niccasaññaṃ pajahati, dukkhato anupassanto sukhasaññaṃ pajahati, anattato anupassanto attasaññaṃ pajahati, nibbindanto nandim pajahati, virajjanto rāgaṃ pajahati, nirodhento samudayaṃ pajahati, paṭinissajjanto ādānaṃ pajahatīti veditabbo.

Viharatīti iriyati. **Ātāpīti** tīsu bhavesu kilese ātāpetīti ātāpo, vīriyassetam nāmaṃ. **Ātāpo** assa atthīti **ātāpī**. **Sampajānoti** sampajaññasankhātena ñāṇena samannāgato. **Satimāti** kāyapariggāhikāya satiyā samannāgato. Ayaṃ pana yasmā satiyā ārammaṇaṃ pariggahetvā paññāya anupassati, na hi sativirahitassa anupassanā nāma atthi. Tenevāha “satiṃ ca khvāhaṃ bhikkhave sabbattikaṃ vadāmi”¹. Tasmā ettha “kāye kāyānupassī viharatī”²ti ettāvata kāyānupassanāsatipaññānakammaṭṭhānaṃ² vuttaṃ hoti. Atha vā yasmā anātāpino antosaṅkhepo antarāyakaro hoti, asampajāno upāyapariggāhe anupāyaparivajjane ca sammuyhati, muṭṭhassati upāyāpariccāge anupāyapariggāhe ca asamattho hoti, tenassa tam kammaṭṭhānaṃ na sampajjati, tasmā yesaṃ dhammānaṃ ānubhāvena tam sampajjati. Tesam dassanattham “ātāpī sampajāno satimāti idaṃ vuttan”³ti veditabban.

Iti kāyānupassanāsatipaññānaṃ sampayogaṅgañcassa dassetvā idāni pahānaṅgaṃ dassetuṃ **vineyya loke abhijjhādomanassanti** vuttaṃ. Tattha **vineyyāti** tadaṅgavinayena vā vikkhambhanavinayena vā vinayitvā. **Loketi** tasmimyeva kāye. Kāyo hi idha lujjanapalujjanatṭhena lokoti adhippeto. Yasmā panassa na kāyamatteyeva abhijjhādomanassaṃ pahīyati, vedanādīsupi pahīyatiyeva, tasmā “pañcapi upādānakkhandhā loko”³ti Vibhaṅge³ vuttaṃ. Lokasaṅkhātattā vā tesam dhammānaṃ atthuddhāranayenetam vuttaṃ. Yaṃ panāha “tattha katamo loko, sveva kāyo loko”³ti. Ayamevettha attho, tasmim loke abhijjhādomanassaṃ vineyyāti evaṃ sambandho daṭṭhabbo. Yasmā panettha abhijjhāgahaṇena

1. Saṃ 3. 100 piṭṭhe.

2. ...satipaññānaṃ (Sī, Ka)

3. Abhi 2. 202 piṭṭhe.

kāmacchando, domanassaggahaṇena byāpādo saṅgahaṃ gacchati, tasmā nīvaraṇapariyāpannabalavadhammadvayadassanena nīvaraṇappahānaṃ vuttaṃ hotīti veditabbaṃ.

Visesena cettha abhijjhāvinayena kāyasampattimūlakassa anurodhassa, domanassavinayena pana kāyavipattimūlakassa virodhassa, abhijjhāvinayena ca kāye abhiratiyā, domanassavinayena kāyabhāvanāya anabhiratiyā, abhijjhāvinayena kāye abhūtānaṃ subhasukhabhāvādīnaṃ pakkhepssa, domanassavinayena kāye bhūtānaṃ asubhāsukhabhāvādīnaṃ apanayanassa ca pahānaṃ vuttaṃ. Tena yogāvacarassa yogānubhāvo yogasamatthatā ca dīpitā hoti. yogānubhāvo hi esa, yadidaṃ anurodhavirodhavippamutto aratiratisaho abhūtapakkhepabhūtāpanayanavirahito ca hoti. Anurodhavirodhavippamutto cesa aratiratisaho abhūtaṃ apakkipanto bhūtañca anapanento yogasamattho hotīti.

Aparo nayo “kāye kāyānupassī”ti ettha anupassanāya kammaṭṭhānaṃ vuttaṃ. “Viharatī”ti ettha vuttavihārena kammaṭṭhānikassa kāyapariharaṇaṃ. “Ātāpī”ti-ādīsu ātāpena sammappadhānaṃ, satisampajaññaena sabbatthikakammaṭṭhānaṃ kammaṭṭhānapariharaṇūpāyo vā, satiyā vā kāyānupassanāvasena paṭiladdhasamatho, sampajaññaena vipassanā, abhijjhādomanassavinayena bhāvanāphalaṃ vuttanti veditabbaṃ.

Vibhaṅge pana “**anupassī**ti tattha katamā anupassanā. Yā paññā pajānanā -pa- sammādiṭṭhi. Ayaṃ vuccati anupassanā. Imāya anupassanāya upeto hoti samupeto upāgato samupāgato upapanno sampanno samannāgato. Tena vuccati anupassīti.

Viharatīti iriyati vattati pāleti yapeti yāpeti carati viharati. Tena vuccati viharatīti.

Ātāpīti tattha katamo ātāpo. Yo cetasiko vīriyārambho -pa- sammāvāyāmo. Ayaṃ vuccati ātāpo. Iminā ātāpena upeto hoti -pa- samannāgato. Tena vuccati ātāpīti.

Sampajānoti tattha katamaṃ sampajaññaṃ. Yā paññā pajānanā -pa-sammādiṭṭhi. Idaṃ vuccati sampajaññaṃ. Iminā sampajaññaena upeto hoti -pa-samannāgato. Tena vuccati sampajānoti.

Satimāti tattha katamā sati. Yā sati anussati -pa-sammāsati. Ayaṃ vuccati sati. Imāya satiyā upeto hoti -pa-samannāgato. Tena vuccati satimāti.

Vineyya loke abhijjhādomanassanti tattha katamo loko. Sveva kāyo loko, pañcapi upādānakkhandhā loko. Ayaṃ vuccati loko. Tattha katamā abhijjhā. Yo rāgo sārāgo anunayo anurodho nandī nandīrāgo cittassa sārāgo, ayaṃ vuccati abhijjhā. Tattha katamaṃ domanassam. Yaṃ cetasaṃ asātaṃ, cetasaṃ dukkhaṃ, cetosamphassaṃ asātaṃ -pa-dukkhā vedanā. Idaṃ vuccati domanassam. Iti ayañca abhijjhā idañca domanassam imamhi loke vinītā honti paṭivinītā santā vūpasantā samitā vūpasamitā atthaṅgatā abbatthaṅgatā appitā byappitā sositā visositā byantikā, tena vuccati vineyya loke abhijjhādomanassan¹ti¹ evametesam padānaṃ attho vutto. Tena saha ayaṃ Aṭṭhakathānayo yathā saṃsandati, evaṃ veditabbo. Ayaṃ tāva kāyānupassanāsati paṭṭhānuddesassa atthavaṇṇanā.

Vedanāsu. Citte. Dhammesu dhammānupassī viharati -pa-vineyya loke abhijjhādomanassanti ettha pana **vedanānupassī**ti evamādisu vedanādīnaṃ puna vacane payojanaṃ kāyānupassanāyaṃ vuttanayeneva veditabbaṃ. **Vedanāsu vedanānupassī, citte cittānupassī, dhammesu dhammanupassī**ti ettha pana **vedanā**ti tisso vedanā, tā ca lokiyā eva. Cittampi lokiyam, tathā dhammā. Tesam vibhāgo niddesavāre pākaṭo bhavissati. Kevalam panidha yathā vedanā anupassitabbā, tathā anupassanto **vedanāsu vedanānupassī**ti veditabbo. Esa nayo cittadhammesupi. Katham ca vedanā anupassitabbāti. Sukhā tāva vedanā dukkhato, dukkhā sallato, adukkhamasukhā aniccato. Yathāha—

1. Abhi 2. 201 piṭṭhādisu.

“Yo sukhaṃ dukkhato adda, dukkhamaddakkhi sallato.
Adukkhamasukhaṃ santam, adakkhi nam aniccato.
Sa ve sammaddaso bhikkhu, upasanto carissatī”¹.

Sabbā eva cetā dukkhātipi anupassitabbā. Vuttañhetam “yamkiñci vedayitam, sabbam tam dukkhasminti vadāmī”². Sukhadukkhato pi ca anupassitabbā. Yathāha “sukhā vedanā ṭṭhisukhā vipariṇāmadukkhā”³ sabbam vitthāretabbam. Api ca aniccādisattānupassanāvasenapi anupassitabbā. Sesam niddesavāreyeva pākaṭam bhavissati. Cittadhammesupi cittam tāva ārammaṇādhipatisahajātabhūmikammavipākakiriyādinānattabhedānam aniccādisattānupassanānam niddesavāre āgatasarāgādibhedānañca vasena anupassitabbam. Dhammā salakkhaṇasāmaññalakkhaṇānam suññatadhammassa aniccādisattānupassanānam niddesavāre āgatasantāsantādibhedānam ca vasena anupassitabbā. Sesam vuttanayameva. Kāmañcetta yassa kāyasañkhāte loke abhijjhādomanassam pahīnam, tassa vedanādilokesupi tam pahīnameva. Nānāpuggalavasena pana nānācittakkhaṇikasatipaṭṭhānabhāvanāvasena ca sabbattha vuttam. Yato vā ekattha pahīnam sesesupi pahīnam hoti. Tenevassa tattha pahānadassanattampi evam vuttanti veditabbanti.

Uddesavāarakathā niṭṭhitā.

Kāyānupassanā ānāpānappabbavaṇṇanā

107. Idāni seyyathāpi nāma cheko vilīvakārako thūlakilañjasaṇhakilañjacaṅkoṭakapeḷāpuṭādīni upakaraṇāni kattukāmo ekaṃ mahāveṇum labhitvā catudhā bhinditvā tato ekekaṃ veṇukhaṇḍam gahetvā phāletvā tam tam upakaraṇam kareyya, evameva Bhagavā satipaṭṭhānadesanāya sattānam anekappakāravisesādhigamaṃ kattukāmo ekameva sammāsatiṃ “cattāro satipaṭṭhānā. Katame cattāro, idha bhikkhave bhikkhu kāye kāyānupassī viharatī”^{ti}-ādīnā nayena ārammaṇavasena catudhā bhinditvā tato ekekaṃ satipaṭṭhānam gahetvā vibhajanto “kathañca bhikkhave”^{ti}-ādīnā nayena niddesavāram vatthumāraddho.

1. Saṃ 2. 409 piṭṭhe.

2. Saṃ 2. 417 piṭṭhe.

3. Ma 1. 377 piṭṭhe.

Tattha **kathañcāti**-ādi vitthāretukamyatāpucchā. Ayaṃ panettha saṅkhepattho—bhikkhave kena ca pakārena bhikkhu kāye kāyānupassī viharatīti. Esa nayo sabbapucchāvāresu. **Idha bhikkhave bhikkhūti** bhikkhave imasmiṃ sāsane bhikkhu. Ayañhettha idhasaddo sabbappakārakāyānupassanānibbattakassa puggalassa sannissayabhūtasāsanaparidīpano aññasāsanassa tathābhāvapaṭisedhano ca. Vuttañhetam “idheva bhikkhave samaṇo -pa- suñña parappavādā samaṇebhi aññehī”ti¹. Tena vuttam “imasmiṃ sāsane bhikkhū”ti.

Araññagato vā -pa- suññāgāragato vā”ti idamassa satipaṭṭhānabhāvanānurūpasenāsanapariggahaparidīpanam. Imassa hi bhikkhuno dīgharattam rūpādīsu ārammaṇesu anuvisaṭam cittam kammaṭṭhānavīthim otaritam na icchati, kūṭagoṇayuttaratho viya uppathameva dhāvati, tasmā seyyathāpi nāma gopo kūṭadhenuyā sabbam khīram pivitvā vaḍḍhitam kūṭavaccham dametukāmo dhenuto apantvā ekamante mahantam thambham nikhaṇitvā tattha yottena bandheyya. Athassa so vaccho ito cito ca vipphanditvā palāyitum asakkonto tameva thambham upanisīdeyya vā upanipajjeyya vā, evameva imināpi bhikkhunā dīgharattam rūpārammaṇādirasapānavadḍhitam duṭṭhacittam² dametukāmena rūpādi-ārammaṇato apantvā araññaṃ vā rukkhāmūlam vā suññāgāram vā pavesetvā³ tattha satipaṭṭhānārammaṇatthambhe satiyottena bandhitabbaram. Evamassa tam cittam ito cito ca vipphanditvāpi pubbe āciṇṇārammaṇam alabhamānam satiyottam chinditvā palāyitum asakkontam tamevārammaṇam upacārappanāvasena upanisīdati ceva upanipajjati ca. Tenāhu porāṇā—

“Yathā thambhe nibandheyya, vaccham damam naro idha.
Bandheyyevam sakam cittam, satiyārammaṇe daḷhan”ti.

Evamassa tam senāsanam bhāvanānurūpam hoti. Tena vuttam “idamassa satipaṭṭhānabhāvanānurūpasenāsanapariggahaparidīpanam”ti.

1. Ma 1. 92 piṭṭhe.

2. Muṭṭhacittam (Ka)

3. Pavisetvā (Syā)

Api ca yasmā idaṃ kāyānupassanāya muddhabhūtaṃ
 sabbabuddhapaccekabuddhabuddhasāvakanāṃ
 viśesādhigamaḍḍhadhammasukhavihārapadaḍḍhānaṃ
 ānāpānassatikammaḍḍhānaṃ itthipurisahaḍḍhi-assādisaddasamākulaṃ
 gāmantarāṃ apariccajivā na sukaraṃ sampādetuṃ, saddakaṇṭakattā jhānassa.
 Agāmake pana araṇṇe sukaraṃ yogāvacaraṇa idaṃ kammaḍḍhānaṃ
 pariggahetvā ānāpānacatutthajjhānaṃ nibbattetvā tadeva jhānaṃ pādakaṃ
 katvā saṅkhāre sammasitvā aggaphalaṃ arahattaṃ pāpuṇituṃ. Tasmāssa
 anurūpasenāsaṇaṃ dassento Bhagavā “araṇṇagato vā”ti-ādimāha.

Vatthuvijjācariyo viya hi Bhagavā. So yathā vatthuvijjācariyo
 nagarabhūmiṃ passitvā suḍḍhu upaparikkhitvā “ettha nagaraṃ māpethā”ti
 upadisati, sotthinā ca nagare niḍḍhite rājakulato mahāsakkāraṃ labhati,
 evameva yogāvacaraṇa anurūpaṃ senāsaṇaṃ upaparikkhitvā “ettha
 kammaḍḍhānaṃ anuyuṇḍjitabbaṃ”ti upadisati. Tato tattha kammaḍḍhānaṃ
 anuyuṇḍjantena yoginā anukkameṇa arahatte patte “Sammāsambuddho vata
 so Bhagavā”ti mahantaṃ sakkāraṃ labhati.

Ayaṃ pana bhikkhu dīpisaḍḍisoti vuccati. Yathā hi Mahādīpirājā araṇṇe
 tiṇagahaṇaṃ vā vanagahaṇaṃ vā pabbatagahaṇaṃ vā nissāya nilīyitvā
 vanamahimsagokaṇṇasūkarādayo mige gaṇḍhāti, evameva ayaṃ araṇṇādīsu
 kammaḍḍhānaṃ anuyuṇḍjanto bhikkhu yathākkameṇa cattāro magge ceva
 cattāri ariyaphalāni ca gaṇḍhāti. Tenāhu porāṇā—

“Yathāpi Dīpiko nāma, nilīyitvā gaṇḍhati mige.
 Tathevāyaṃ Buddhaputto, yuttayogo vipassako.
 Araṇṇaṃ pavisitvāna, gaṇḍhati phalamuttamaṃ”ti.

Tenassa parakkamajavayoggabhūmiṃ araṇṇasenāsaṇaṃ dassento
 Bhagavā “araṇṇagato vā”ti-ādimāha. Ito paraṃ imasmiṃ tāva ānāpānapabbe
 yaṃ vattabbaṃ siyā, taṃ Visuddhimagge vuttameva.

Tassa pana imesaṃ “dīghaṃ vā assasanto dīghaṃ assasāmīti pajānāti
 -pa- passambhayaṃ kāyasāṅkhāraṃ passasissāmīti sikkhati”ti evaṃ

vuttānaṃ assāsapassāsānaṃ vasena sikkhato assāsapassāsanimitte cattāri jhānāni uppajjanti. So jhānā vuṭṭhahitvā assāsapassāse vā pariggaṇhāti jhānaṅgāni vā. Tattha assāsapassāsakammiko “ime assāsapassāsā kiṃ nissitā, vatthum nissitā, vatthu nāma karajakāyo, karajakāyo nāma cattāri mahābhūtāni upādārūpañcā”ti evaṃ rūpaṃ pariggaṇhāti, tato tadārammaṇe phassapañcamake nāmantī evaṃ nāmarūpaṃ pariggahetvā tassa paccayaṃ pariyesanto avijjādipaṭiccasamuppādaṃ disvā “paccayapaccayuppannadhammamattamevetāṃ, añño satto vā puggalo vā natthī”ti vitiṇṇakaṅkho sapaccayanāmarūpe tilakkhaṇaṃ āropetvā vipassanaṃ vaḍḍhento anukkamena arahattaṃ pāpuṇāti. Idaṃ ekassa bhikkhuno yāva arahattā niyyānamukhaṃ.

Jhānakammikopi “imāni jhānaṅgāni kiṃ nissitāni, vatthum nissitāni. Vatthu nāma karajakāyoti jhānaṅgāni nāmaṃ, karajakāyo rūpaṃ”ti nāmarūpaṃ vavatthapetvā tassa paccayaṃ pariyesanto avijjādipaccayākāraṃ disvā “paccayapaccayuppannadhammamattamevetāṃ, añño satto vā puggalo vā natthī”ti vitiṇṇakaṅkho sapaccayanāmarūpe tilakkhaṇaṃ āropetvā vipassanaṃ vaḍḍhento anukkamena arahattaṃ pāpuṇāti, idaṃ ekassa bhikkhuno yāva arahattā niyyānamukhaṃ.

Iti ajjhattaṃ vāti evaṃ attano vā assāsapassāsakāye kāyānupassī viharati. **Bahiddhā vāti** parassa vā assāsapassāsakāye. **Ajjhattabahiddhā vāti** kālena attano, kālena parassa assāsapassāsakāye. Etenassa paguṇakammaṭṭhānaṃ aṭṭhapetvā aparāparaṃ sañcaraṇakālo kathito. Ekasmiṃ kāle pana idaṃ ubhayaṃ na labbhati.

Samudayadhammānupassī vāti yathā nāma kammārabhastāṅca gaggaraṇāḷiṅca tajaṅca vāyāmaṃ paṭicca vāto aparāparaṃ sañcarati, evaṃ bhikkhuno karajakāyaṅca nāsāpuṭaṅca cittaṅca paṭicca assāsapassāsakāyo aparāparaṃ sañcarati. Kāyādayo dhammā samudayadhammā, te passanto “samudayadhammānupassī vā kāyasmiṃ viharatī”ti vuccati.

Vayadhammānupassī vāti yathā bhastāya apanītāya gaggaraṇāḷiyā bhinnāya taje ca vāyāme asati so vāto nappavattati, evameva kāye bhinne nāsāpuṭe viddhaste

citte ca niruddhe assāsapassāsakāyo nāma nappavattatīti kāyādinirodhā assāsapassāsanirodhoti evaṃ passanto “vayadhammānupassī vā kāyasmiṃ viharatī”ti vuccati. **Samudayavayadhammānupassī vā**ti kālena samudayaṃ, kālena vayaṃ anupassanto. **Atthi kāyoti vā panassāti** kāyova atthi, na satto, na puggalo, na itthī, na puriso, na attā, na attaniyaṃ, nāhaṃ, na mama, na koci, na kassacīti evamassa sati paccupaṭṭhitā hoti.

Yāvadevāti payo janaparicchedavavatthāpanametaṃ. Idaṃ vuttaṃ hoti—yā sati paccupaṭṭhitā hoti, sā na aññatthāya. Atha kho yāvadeva ñāṇamattāya aparāparaṃ uttaruttari¹ ñāṇapamāṇatthāya ceva satipamāṇatthāya ca, satisampajaññānaṃ vuḍḍhatthāyāti attho. **Anissito ca viharatīti** taṇhānissayadiṭṭhinissayānaṃ vasena anissito viharati. **Na ca kiñci loke upādiyatīti** lokasmiṃ kiñci rūpaṃ vā -pa- viññānaṃ vā “ayaṃ me attā vā attaniyaṃ vā”ti na gaṇhāti. **Evampīti** upari atthaṃ upādāya sampiṇḍanattho pikāro. Iminā pana padena Bhagavā ānāpānapabbadesanaṃ niyyātetvā dasseti.

Tattha assāsapassāsapariggāhikā sati dukkhasaccaṃ, tassā samuṭṭhāpikā purimataṇhā samudayasaccaṃ, ubhinnaṃ appavatti nirodhasaccaṃ, dukkhaparijānāno samudayapajahāno nirodhārammaṇo ariyamaggo maggasaccaṃ. Evaṃ catusaccavasena ussakkivā nibbutiṃ pāpuṇātīti idamekassa assāsapassāsavasena abhiniviṭṭhassa bhikkhuno yāva arahattā niyyānamukhanti.

Ānāpānapabbavaṇṇanā niṭṭhitā.

Iriyāpathapabbavaṇṇanā

108. Evaṃ assāsapassāsavasena kāyānupassanaṃ vibhajivā idāni iriyāpathavasena vibhajitum **puna caparanti**-ādimāha. Tattha kāmāṃ soṇasiṅgālādayopi gacchantā “gacchāmā”ti jānanti, na panetaṃ evarūpaṃ jānanaṃ sandhāya vuttaṃ. Evarūpañhi jānanaṃ sattūpaladdhiṃ na pajahati, attasaññaṃ na

1. Uttaruttarim (Si)

ugghāṭeti, kammaṭṭhānaṃ vā satipaṭṭhānabhāvanā vā na hoti. Imassa pana bhikkhuno jānanaṃ sattūpaladdhiṃ pajahati, attasaññaṃ ugghāṭeti, kammaṭṭhānañceva satipaṭṭhānabhāvanā ca hoti. Idañhi “ko gacchati, kassa gamaṇaṃ, kiṃ kāraṇā gacchati”ti evaṃ sampajānanaṃ¹ sandhāya vuttaṃ. Ṭhānādīsupi eśeva nayo.

Tattha **ko gacchatī**ti na koci satto vā puggalo vā gacchati. **Kassa gamaṇanti** na kassaci sattassa vā puggalassa vā gamaṇaṃ. **Kiṃ kāraṇā gacchatī**ti cittakiriyavāyodhātuvipphārena gacchati. Tasmā esa evaṃ pajānāti “gacchāmi”ti² cittaṃ uppajjati, taṃ vāyaṃ janeti, vāyo viññattiṃ janeti, cittakiriyavāyodhātuvipphārena sakalakāyassa purato abhinīhāro gamaṇanti vuccati. Ṭhānādīsupi eśeva nayo.

Tatrāpi hi “tiṭṭhāmi”ti cittaṃ uppajjati, taṃ vāyaṃ janeti, vāyo viññattiṃ janeti, cittakiriyavāyodhātuvipphārena sakalakāyassa koṭiṭo paṭṭhāya ussitabhāvo ṭhānanti vuccati. “Nisīdāmi”ti cittaṃ uppajjati, taṃ vāyaṃ janeti, vāyo viññattiṃ janeti, cittakiriyavāyodhātuvipphārena heṭṭhimakāyassa samiñjanaṃ uparimakāyassa ussitabhāvo nisajjāti vuccati. “Sayāmi”ti cittaṃ uppajjati, taṃ vāyaṃ janeti, vāyo viññattiṃ janeti, cittakiriyavāyodhātuvipphārena sakalasarīrassa tiriyato pasāraṇaṃ sayananti vuccatīti.

Tassa evaṃ pajānato evaṃ hoti “satto gacchati satto tiṭṭhati”ti vuccati. Atthi³ pana koci satto gacchanto⁴ vā ṭhito vā? Natthi. Yathā pana “sakaṭaṃ gacchati sakaṭaṃ tiṭṭhati”ti vuccati, na ca kiñci sakaṭaṃ nāma gacchantam vā tiṭṭhantaṃ vā atthi. Cattāro pana goṇe yojetvā chekamhi sārathimhi pājente “sakaṭaṃ gacchati sakaṭaṃ tiṭṭhati”ti vohāramattameva hoti, evameva ajānanaṭṭhena⁵ sakaṭaṃ viya kāyo. Goṇā viya cittajavātā. Sārathi viya cittaṃ. Gacchāmi tiṭṭhāmīti citte uppanne vāyodhātu viññattiṃ janayamānā uppajjati, cittakiriyavāyodhātuvipphārena gamaṇādīni pavattanti. Tato “satto gacchati,

1. Evarūpaṃ jānanaṃ (Sī)

2. Gacchissāmīti (Sī)

3. Atthato (Ka)

4. Gantā (Sī, Syā) Ṭīkā oloketabbā.

5. Ajavanaṭṭhena (Sī), pājanaṭṭhena (Ka)

satto tiṭṭhati, ahaṃ gacchāmi, ahaṃ tiṭṭhāmi”ti vohāramattaṃ hotīti.

Tenāha—

“Nāvā mālutavegena, jiyāvegena tejanaṃ.

Yathā yāti tathā kāyo, yāti vātāhato ayaṃ.

Yantaṃ suttavaseneva, cittasuttavasenidaṃ.

Payuttaṃ kāyayantampi, yāti ṭhāti nisīdati.

Ko nāma ettha so satto, yo vinā hetupaccaye.

Attano ānubhāvena, tiṭṭhe vā yadi vā vaje”ti.

Tasmā evaṃ hetupaccayavaseneva pavattāni gamanādīni sallakkhento esa gacchanto vā gacchāmīti pajānāti, ṭhito vā, nisinno vā, sayāno vā sayānomhīti pajānātīti veditabbo.

Yathā yathā vā panassa kāyo paṇihito hoti, tathā tathā naṃ pajānātīti sabbasaṅgāhikavacanametam. Idaṃ vuttaṃ hoti—yena yena vā ākārena tassa kāyo ṭhito hoti, tena tena naṃ pajānāti. Gamanākārena ṭhitam gacchatīti pajānāti. Ṭhānanisajjāsayanākārena ṭhitam sayānoti pajānātīti.

Iti ajjhataṃ vāti evaṃ attano vā catu-iriyāpathapariggaḥaṇena kāye kāyānupassī viharati. **Bahiddhā vāti** parassa vā catu-iriyāpathapariggaḥaṇena. **Ajjhattabahiddhā vāti** kālena attano, kālena parassa catu-iriyāpathapariggaḥaṇena kāye kāyānupassī viharati.

Samudayadhammānupassī vāti-ādīsu pana “avijjāsamudayā rūpasamudayo”ti-ādīnā¹ nayena pañcahākārehi rūpakkhandhassa samudayo ca vayo ca nīharitabbo. Tañhi sandhāya idha “samudayadhammānupassī vā”ti-ādī vuttaṃ. **Atthi kāyoti vā panassāti**-ādī vuttasadisameva.

Idha pana catu-iriyāpathapariggāhikā sati dukkhasaccaṃ, tassā samuṭṭhāpikā purimataṇhā samudayasaccaṃ, ubhinnaṃ apavatti nirodhasaccaṃ, dukkhaparijānana samudayapajahano nirodhārammaṇo ariyamaggo maggasaccaṃ.

1. Khu 9. 53 Paṭisambhidāmagge.

Evam̐ catusaccavasena ussakkitvā nibbutim̐ pāpuṇātīti idamekassa catu-
iriyāpathapariggāhakassa bhikkhuno yāva arahattā niyyānamukhanti.

Iriyāpathapabbavaṇṇanā niṭṭhitā.

Catusampajañṇapabbavaṇṇanā

109. Evam̐ iriyāpathavasena kāyānupassanam̐ vibhajitvā idāni
catusampajañṇavasena vibhajitum̐ **puna caparanti**-ādimāha. Tattha
abhikkante paṭikkanteti ettha tāva **abhikkantaṃ** vuccati gamanam̐.
Paṭikkantaṃ nivattanam̐. Tadubhayampi catūsu iriyāpathesu labbhati.
Gamane tāva purato kāyam̐ abhiharanto **abhikkamati** nāma. Paṭinivattento
paṭikkamati nāma. Ṭhānepi ṭhitakova kāyam̐ purato onāmento abhikkamati
nāma. Pacchato apanāmento paṭikkamati nāma. Nisajjāyapi nisinnakova
āsanassa purima-aṅgābhimukho saṃsaranto abhikkamati nāma. Pacchima-
aṅgappadesam̐ pacchā saṃsaranto paṭikkamati nāma. Nipajjāyapi eseva
nayo.

Sampajānakārī hotīti sampajañṇena sabbakiccakārī, sampajañṇameva vā
kārī. So hi abhikkantādīsu sampajañṇam̐ karoteva, na katthaci
sampajañṇavirahito hoti. Tattha sātthakasampajañṇam̐ sappāyasampajañṇam̐
gocarasampajañṇam̐ asammohasampajañṇanti catubbidham̐ sampajañṇam̐.
Tattha abhikkamanacitte uppanne cittavaseneva agantvā “kiṃ nu me ettha
gatena attho atthi natthī”ti atthānattham̐ pariggaṇhitvā atthapariggahaṇam̐
sātthakasampajañṇam̐. Tattha ca atthoti
cetiya-dassanabodhidassanasam̐ghadassanatheradassana-
asubhadassanādivasena dhammato vaḍḍhi. Cetiyaṃ vā bodhiṃ vā disvāpi hi
Buddhārammaṇam̐ sam̐ghadassanena sam̐ghārammaṇam̐ pītim̐ uppādetvā
tadeva khayavayato sammasanto arahattam̐ pāpuṇāti. There disvā tesam̐
ovāde patiṭṭhāya asubham̐ disvā tattha paṭhamajjhānam̐ uppādetvā tadeva
khayavayato sammasanto arahattam̐ pāpuṇāti. Tasmā etesam̐ dassanam̐
sātthakam̐. Keci pana “āmisatopi vaḍḍhi atthoyeva, tam̐ nissāya
brahmacariyānuggahāya paṭipannattā”ti vadanti.

Tasmiṃ pana gamane sappāyāsappāyam̐ pariggaṇhitvā
sappāyapariggahaṇam̐ **sappāyasampajañṇam̐**. Seyyathidam̐, cetiyadassanam̐
tāva sātthakam̐. Sace pana

cetiyaṣṣa mahāpūjāya dasadvādasayojanantare parisā sannipatanti. Attano vibhavanurūpaṃ itthiyopi purisāpi alaṅkatappaṭiyattā cittakammarūpakāni viya sañcaranti. Tatra cassa iṭṭhe ārammaṇe lobho, aniṭṭhe paṭiḅho, asamapekkhane¹ moho uppajjati, kāyasamsaggāpattim vā āpajjati, jīvitabrahmacariyānaṃ vā antarāyo hoti, evaṃ taṃ ṭhānaṃ asappāyaṃ hoti. Vuttappakāra-antarāyābhāve sappāyaṃ. Bodhidassanepi eseva nayo. Saṃghadassanampi sātthaṃ. Sace pana antogāme mahāmaṇḍapaṃ kāretvā sabbarattim dhammassavanaṃ kārentesu manussesu vuttappakārenea janasannipāto ceva antarāyo ca hoti, evaṃ taṃ ṭhānaṃ asappāyaṃ. Antarāyābhāve sappāyaṃ. Mahāparisaparivārānaṃ therānaṃ dassanepi eseva nayo.

Asubhadassanampi sātthaṃ. Tadatthadīpanatthaṅca idaṃ vatthu—eko kira daharabhikkhu sāmaṇeraṃ gahetvā dantakaṭṭhatthāya gato. Sāmaṇero maggā okkamitvā purato gacchanto asubhaṃ disvā paṭhamajjhānaṃ nibbattetvā tadeva pādakaṃ katvā saṅkhāre sammasanto tīṇi phalāni sacchikatvā uparimaggatthāya kammaṭṭhānaṃ pariggahetvā aṭṭhāsi. Daharo taṃ apassanto “sāmaṇerā”ti pakkosi. So “mayā pabbajitadivasato paṭṭhāya bhikkhunā saddhim dve kathā nāma na kathitāpubbā. Aññasmimpi divase uparivisesaṃ nibbattessāmi”ti cintetvā “kiṃ bhante”ti paṭivacanaṃ adāsi. Ehīti ca vutte ekavacaneneva āgantvā “bhante iminā tāva maggena gantvā mayā ṭhitokāse muhuttaṃ puratthābhimukho ṭhatvā olokethā”ti āha. So tathā katvā tena pattavisesameva pāpuṇi. Evaṃ ekaṃ asubhaṃ dvinnāṃ janānaṃ atthāya jāyati. Evaṃ sātthampi panetaṃ purisassa mātugāmāsubhaṃ asappāyaṃ. Mātugāmassa ca purisāsubhaṃ sabhāgameva sappāyanti evaṃ sappāyapariggahaṇaṃ **sappāyasampajaññaṃ** nāma.

Evaṃ pariggahitasātthasappāyassa pana aṭṭhatimsāya kammaṭṭhānesu attano cittarucitakammaṭṭhānasaṅkhātāṃ gocaraṃ uggahetvā bhikkhīcāragocare taṃ gahetvā gamaṇaṃ **gocarasampajaññaṃ** nāma. Tassāvibhāvatthaṃ idaṃ catukkaṃ veditabbaṃ. Idhekacco bhikkhu harati na paccāharati, ekacco na harati

1. Asamapekkhanena (Si)

paccāharati, ekacco neva harati na paccāharati, ekacco harati ca paccāharati ca.

Tattha yo bhikkhu divasaṃ caṅkamaṇa nisajjāya āvaraṇīyehi dhammehi cittaṃ parisodhetvā tathā rattiyā paṭhamañ yāmaṃ majjhime yāme seyyañ kappetvā pacchimayāmepe nisajjācaṅkamehi vītināmetvā pageva cetiyaṅgaṇabodhiyaṅgaṇavattaṃ katvā rodhirukkhe udakaṃ abhisiñcivā pānīyaṃ paribhojanīyaṃ paccupaṭṭhapetvā ācariyupajjhāyavattādīni sabbāni Khandhakavattāni samādāya vattati. So sarīraparikammaṃ katvā senāsaṇaṃ pavisitvā dve tayo pallāṅke usumaṃ gāhāpento kammaṭṭhānaṃ anuyuñjitvā bhikkhācāraṇelāya uṭṭhahitvā kammaṭṭhānasīseṇeva pattacīvaramādāya senāsaṇato nikkhamitvā kammaṭṭhānaṃ manasikarontova cetiyaṅgaṇaṃ gantvā sace Buddhānussatikammaṭṭhānaṃ hoti, taṃ avissajjetvāya cetiyaṅgaṇaṃ pavisati. Aññaṃ ce kammaṭṭhānaṃ hoti, sopānapādamūle ṭhatvā hatthena gahitabhaṇḍaṃ viya taṃ ṭhapetvā Buddhāraṃmaṇaṃ pītiṃ gahetvā cetiyaṅgaṇaṃārūya mahantaṃ cetiyaṃ ce, tikkhattuṃ padakkhiṇaṃ katvā catūsu ṭhānesu vanditabbaṃ. Khuddakaṃ cetiyaṃ ce, tatheva padakkhiṇaṃ katvā aṭṭhasu ṭhānesu vanditabbaṃ. Cetiyaṃ vanditvā bodhiyaṅgaṇaṃ pattenāpi Buddhassa Bhagavato sammukhā viya nipaccakāraṃ dassetvā bodhi vanditabbo. So evañ cetiyaṅca bodhiṅca vanditvā paṭisāmitaṭṭhānaṃ gantvā paṭisāmitabhaṇḍakaṃ hatthena gaṇhanto viya nikkhattakammaṭṭhānaṃ gahetvā gāmasamīpe kammaṭṭhānasīseṇeva cīvaram pārupitvā gāmaṃ piṇḍāya pavisati.

Atha naṃ manussā disvā “ayyo no āgato”ti paccuggantvā pattaṃ gahetvā āsaṇasālāyaṃ vā gehe vā nisīdāpetvā yāguṃ datvā yāva bhattaṃ na niṭṭhāti, tāva pāde dhovitvā telena makkhetvā purato nisīditvā pañhaṃ vā pucchanti, dhammaṃ vā sotukāmā honti. Sacepi na kathāpenti, janasaṅgahatthaṃ dhammakathā nāma kātabbāyevāti Aṭṭhakathācariyā vadanti. Dhammakathā hi kammaṭṭhānavinimuttā nāma natthi. Tasmā kammaṭṭhānasīseṇeva dhammaṃ kathetvā kammaṭṭhānasīseṇeva āhāraṃ paribhuñjitvā anumodanaṃ katvā nivattiyamānehipi manussehi anugato va gāmato nikkhamitvā tattheva nivattetvā maggaṃ paṭipajjati. Atha naṃ puretaraṃ nikkhamitvā

bahigāme katabhattakiccā sāmaṇeradaharabhikkhū disvā paccuggantvā pattacīvaramassa gaṇhanti.

Porāṇā bhikkhū kira “na amhākaṃ upajjhāyo ācariyo”ti mukhaṃ ulloketvā vattaṃ karonti. Sampattaparicchedeneva karonti. Te taṃ pucchanti “bhante ete manussā tumhākaṃ kiṃ honti mātupakkhato sambandhā pitipakkhato”ti. Kiṃ disvā pucchathāti. Tumhesu etesaṃ pemaṃ bahumānanti. Āvuso yaṃ mātāpitūhipi dukkaraṃ, taṃ ete amhākaṃ karonti, pattacīvarampi no etesaṃ santakameva, etesaṃ ānubhāvena neva bhaye bhayaṃ, na chātake chātaṃ jānāma, edisā nāma amhākaṃ upakārino natthīti tesāṃ guṇe kathento gacchati, ayaṃ vuccati **harati na paccāharatīti**.

Yassa pana pageva vuttappakāraṃ vattapaṭipattim karontassa kammajatejo pajjalati, anupādinnaṃ muñcitvā upādinnaṃ gaṇhāti, sarīrato sedā muccanti, kammaṭṭhānavīthim nārohati, so pageva pattacīvaramādāya vegasāva cetiyaṃ vanditvā gorūpanaṃ nikkhamanavelāyameva gāmaṃ yāgubhikkhāya pavisitvā yāguṃ labhitvā āsanasālaṃ gantvā pivati. Athassa dvattikkhattuṃ ajjhoharaṇamatteneva kammajatejo upādinnaṃ muñcitvā anupādinnaṃ gaṇhāti. Ghaṭasatena nhāto viya tejodhātupariḷāhanibbāpanaṃ patvā kammaṭṭhānasīna yāguṃ paribhuñjitvā pattañca mukhañca dhovitvā antarābhatte kammaṭṭhānaṃ manasikatvā avasesaṭṭhāne piṇḍāya caritvā kammaṭṭhānasīna āhāraṃ paribhuñjitvā tato paṭṭhāya poṅkhānupoṅkhaṃ upaṭṭhahamaṇaṃ kammaṭṭhānaṃ gahetvāva āgacchati, ayaṃ vuccati **na harati paccāharatīti**. Edisā ca bhikkhū yāguṃ pivitvā vipassanaṃ ārabhitvā Buddhasāsane arahattaṃ pattā nāma gaṇanapathaṃ vītivattā, Sihaḷadīpeyeveva tesu tesu gāmesu āsanasālāyaṃ na taṃ āsanaṃ atthi, yattha yāguṃ pivitvā arahattappattabhikkhū natthīti.

Yo pana pamādavihārī hoti nikkhattadhuro, sabbavattāni bhinditvā pañcavidhacetokhilavinibandhacitto viharanto “kammaṭṭhānaṃ nama atthī”tipi saññaṃ akatvā gāmaṃ piṇḍāya pavisitvā ananulomikena gihisamsaggena saṃsaṭṭho caritvā ca bhuñjitvā ca tuccho nikkhamati, ayaṃ vuccati **neva harati na paccāharatīti**.

Yo panāyaṃ harati ca paccāharati cāti vutto, so gatapaccāgatikavattavasena veditabbo. Attakāmā hi kulaputtā sāsane pabbajitvā dasapi vīsampi timsampi cattālīsampi paññāsampi satampi ekato vasantā katikavattaṃ katvā viharanti āvuso tumhe na iṇaṭṭā na bhayaṭṭā na jīvikāpakatā pabbajitā, dukkhā muccitukāmā panettha¹ pabbajitā, tasmā gamane uppanakilesaṃ gamaneyeva niggaṇhatha, ṭhāne, nisajjāyaṃ, sayane uppanakilesaṃ sayaneyeva niggaṇhathāti. Te evaṃ katikavattaṃ katvā bhikkhācāraṃ gacchantā aḍḍha-usabha-usabha-aḍḍhagāvutagāvutantaresu pāsāṇā honti. Tāya saññāya kammaṭṭhānaṃ manasikarontāva gacchanti. Sace kassaci gamane kilesa uppajjati, tattheva naṃ niggaṇhāti. Tathā asakkonto tiṭṭhati. Athassa pacchato āgacchantopi tiṭṭhati. So “ayaṃ bhikkhu tuyhaṃ uppannavitakkaṃ jānāti, ananucchavikaṃ te etan”ti attānaṃ paṭicodetvā vipassanaṃ vaḍḍhetvā tattheva ariyabhūmiṃ okkamati. Tathā asakkonto nisīdati. Athassa pacchato āgacchantopi nisīdatīti soyeva nayo. Ariyabhūmiṃ okkamituṃ asakkontopi taṃ kilesaṃ vikkhambhetvā kammaṭṭhānaṃ manasikarontova gacchati. Na kammaṭṭhānavippayuttena cittaena pādaṃ uddharati. Uddharati ce, paṭinivattetvā purimapadesaṃyeva eti Āḷindakavāsī Mahāphussadevatthero viya.

So kira ekūnavīsativassāni gatapaccāgatikavattaṃ² pūrento eva vihāsi. Manussāpi sudaṃ antarāmagge kasantā ca vapantā ca maddantā ca kammāni ca karontā therāṃ tathāgacchantaṃ disvā “ayaṃ thero punappunaṃ nivattitvā gacchati. Kiṃ nu kho maggamūḷho udāhu kiñci pamuṭṭho”ti samullapanti. So taṃ anādiyitvā kammaṭṭhānayuttacitteneva samaṇadhammaṃ karonto vīsativassabbhantare arahattaṃ pāpuṇi. Arahattappattadivaseyevassa caṅkamanakoṭiyaṃ adhivatthā devatā aṅgulīhi dīpaṃ ujjāletvā aṭṭhāsi. Cattāropi mahārājāno Sakko ca Devānamindo brahmā ca Sahampati upaṭṭhānaṃ agamaṃsu. Tañca obhāsaṃ disvā Vanavāsīmahātissatthero taṃ dutiyadivase pucchi “rattibhāge āyasmato santike obhāso ahosi, kiṃ so obhāso”ti. Thero vikkhepaṃ karonto “okāso nāma dīpobhāso”ti maṇi-obhāso”ti evamādimāha.

1. Panattha (Sī)

2. Gatapaccāgatavattaṃ (Ka)

Tato paṭicchādettha tumheti nibaddho āmāti paṭijānitvā ārocesi
kālavallimaṇḍapavāsī Mahānāgatthero viya ca.

Sopi kira gatapaccāgatikavattaṃ pūrento paṭhamaṃ tāva Bhagavato
mahāpadhānaṃ pūjessāmīti satta vassāni ṭhānacaṅkamanameva adhiṭṭhāsi.
Puna soḷasa vassāni gatapaccāgatikavattaṃ pūretvā arahattaṃ pāpuṇi. So
kammaṭṭhānayutteneva cittena pādaṃ uddharanto viyuttena uddhate
paṭinivattanto gāmassa samīpaṃ gantvā “gāvī nu pabbajito nū”ti
āsaṅkanīyapadese ṭhatvā cīvaraṃ pārupitvā kacchakantarato udakena pattaṃ
dhovivā udakaḅḅūsaṃ karoti. Kim kāraṇā, mā me bhikkhaṃ dātuṃ
vandituṃ vā āgate manusse dīghāyukā hothāti vacanamattenāpi
kammaṭṭhānavikkhepo ahoṣīti. Ajja bhante katimīti divasaṃ vā
bhikkhugaṇaṇaṃ vā pañhe vā pucchito pana udakaṃ gilitvā ārocesi. Sace
divasādipucchakā na honti, nikkhamaṇavelāya gāmadvāre niṭṭhubhitvāva
yāti Kalambatitthavihāre vassūpagatapaññāsabhikkhū viya.

Te kira āsālhipuṇṇamāyaṃ katikavattaṃ akaṃsu “arahattaṃ appatvā
aññamaññaṃ na ālapissāmā”ti. Gāmaṅca piṇḍāya pavisantā udakaḅḅūsaṃ
katvā pavisimsu. Divasādisu pucchitesu vuttanayeneva paṭipajjimsu. Tattha
manussā niṭṭhubhanaṃ disvā jānimsu “ajjeko āgato, ajja dve”ti. Evaṅca
cintesuṃ “kim nu kho ete amhehiyeva saddhiṃ na sallapanti, udāhu
aññamaññaṃpi, yadi aññamaññaṃ na sallapanti, addhā vivādaḅḅatā
bhavissanti, etha ne aññamaññaṃ khamāpessāmā”ti. Sabbe vihāraṃ gantvā
paññāsāya bhikkhūsu dvepi bhikkhū ekokāse nāddasaṃsu. Tato yo tesu
cakkhumā puriso, so āha “na bho kalahakāraṅkaṇaṃ okāso īdiso hoti,
susammaṭṭhaṃ cetiyaṅgaṇaṃ bodhiyaṅgaṇaṃ, sunikkhittā sammajjaniyo,
sūpaṭṭhapitaṃ¹ pānīyaṃ paribhojanīyaṃ”ti. Te tatova nivattā, tepi bhikkhū
antotemāseyeva arahattaṃ patvā mahāpavāraṇāya visuddhipavāraṇaṃ²
pavāresuṃ.

Evam Kālavallimaṇḍapavāsī Mahānāgatthero viya Kalambatitthavihāre
vassūpagatabhikkhū viya ca kammaṭṭhānayutteneva cittena pādaṃ
uddharanto

1. Sūpaṭṭhitaṃ (Sī)

2. Visuddhipavāraṇāya (Ka)

gāmasamīpaṃ patvā udakagaṇḍūsaṃ katvā vīthiyo sallakkhetvā yattha surāsoṇḍadhuttādayo kalahakārakā caṇḍahatthi-assādayo vā natthi, taṃ vītiṃ paṭipajjati. Tattha ca piṇḍāya caramāno na turitaturito viya javena gacchati. Na hi javena piṇḍapāṭiyadhutaṅgaṃ nāma kiñci atthi. Visambhūmibhāgappattaṃ pana udakasakaṭaṃ viya niccalo hutvā gacchati. Anugharaṃ pavitṭho ca taṃ dātukāmaṃ vā adātukāmaṃ vā sallakkhetuṃ tadanurūpaṃ kālaṃ āgamento bhikkhaṃ gahetvā antogāme vā bahigāme vā vihārameva vā āgantvā yathāphāsuke patirūpe okāse nisīditvā kammaṭṭhānaṃ manasikaronto āhāre paṭikūlasaṅgānaṃ upaṭṭhāpetvā akkhabbhaṅjanavaṇalepanaputtamaṃsūpamāvasena naṃ paccavekkhanto aṭṭhaṅgasamannāgataṃ āhāraṃ āhāreti, neva davāya na madāya na maṇḍanāya na vibhūsanāya. Bhuttāvī ca udakakiccaṃ katvā muhuttaṃ bhattakilamathaṃ paṭippassambhetvā yathā purebhattaṃ, evaṃ pacchābhattaṃ. Yathā purimayāmaṃ, evaṃ pacchimayāmaṃca kammaṭṭhānameva manasikaroti, ayaṃ vuccati **harati ca paccāharati cāti**.

Idaṃ pana haraṇapaccāharaṇasaṅkhātāṃ gatapaccāgatikavattaṃ pūrento yadi upanissayasampanno hoti. Paṭhamavaye eva arahattaṃ pāpuṇāti. No ce paṭhamavaye pāpuṇāti, atha majjhimavaye. No ce majjhimavaye pāpuṇāti, atha pacchimavaye. No ce pacchimavaye pāpuṇāti, atha maraṇasamaye. No ce maraṇasamaye pāpuṇāti, atha devaputto hutvā. No ce devaputto hutvā pāpuṇāti, anuppanne Buddhē nibbato paccekabodhiṃ sacchikaroti. No ce paccekabodhiṃ sacchikaroti, atha Buddhānaṃ sammukhībhāve khippābhiṅgā vā hoti seyyathāpi therō Bāhiyo Dārucīriyo, mahāpaṅgā vā seyyathāpi therō Sāriputto, mahiddhiko vā seyyathāpi therō Mahāmogallāno, dhutaṅgadhāro vā seyyathāpi therō Mahākassapo, dibbacakkhuko vā seyyathāpi therō Anuruddho, vinayadhāro vā seyyathāpi therō Upāli, dhammakathiko vā seyyathāpi therō Puṇṇo Mantāṇiputto, āraṅgiko vā seyyathāpi therō Revato, bahussuto vā seyyathāpi therō Ānando, sikkhākāmo vā seyyathāpi therō Rāhulo Buddhaputtoti. Iti imasmiṃ catukke yvāyaṃ harati ca paccāharati ca, tassa **gocarasampajaṅgānaṃ** sikhāpattaṃ hoti.

Abhikkamādīsu pana asammuyhanam **asammohasampajaññam**. Tam evam veditabban—idha bhikkhu abhikkamanto vā paṭikkamanto vā yathā andhaputhujjanā abhikkamādīsu “attā abhikkamati, attanā abhikkamo nibbattito”ti vā “aham abhikkamāmi, mayā abhikkamo nibbattito”ti vā sammuyhanti. Tathā asammuyhanto “abhikkamāmi”ti citte uppajjamāne teneva cittaena saddhim cittasamuṭṭhānā vāyodhātu viññattim janayamānā uppajjati, iti cittakiriyavāyodhātuvipphārasena ayam kāyasammato aṭṭhisanghāto abhikkamati, tassevam abhikkamato ekekapāduddharaṇe pathavīdhātu āpodhātūti dve dhātuyo omattā honti mandā, itarā dve adhimattā honti balavatiyo, tathā atiharaṇavītiaraṇesu. Vossajjane tejovāyodhātuyo omattā honti mandā, itarā dve adhimattā honti balavatiyo. Tathā sannikkhepanasannirumbhanesu¹. Tattha uddharaṇe pavattā rūpārūpadhammā atiharaṇam na pāpuṇanti. Tathā atiharaṇe pavattā vītiaraṇam, vītiaraṇe pavattā vossajjanam, vossajjane pavattā sannikkhepanam, sannikkhepane pavattā sannirumbhanam² na pāpuṇanti. Tattha tattheva pabban pabban sandhi sandhi odhi odhi³ hutvā tattakapāle pakkhittatilāni viya paṭapaṭāyantā⁴ bhijjanti. Tattha ko eko abhikkamati, kassa vā ekassa abhikkamanam. Paramatthato hi dhātūnamyeva gamanam, dhātūnam ṭhānam, dhātūnam nisajjanam, dhātūnam sayanam, tasmim tasmīhi koṭṭhāse saddhim rūpena—

Aññam uppajjate cittaṃ, aññam cittaṃ nirujjhati.

Avīcimanusambandho, nadīsotova vattatīti.

Evam abhikkamādīsu asammuyhanam **asammohasampajaññam** nāmāti.

Niṭṭhito abhikkante paṭikkante sampajānakārī hotīti padassa attho.

Ālokite vilokiteti ettha pana **ālokitaṃ** nāma purato pekkhanam.

Vilokitaṃ nāma anudisāpekkhanam. Aññānīpi heṭṭhā upari pacchato pekkhanavasena olokita-ullokitaṭṭhalokitāni

1. ...sannirujjhanesu (Ka)

3. Pabbapabban sandhisandhim odhi-odhim (Sī)

2. Sannirujjhanam (Ka)

4. Taṭataṭāyantā (bahūsu)

nāma honti, tāni idha na gahitāni. Sārūppavasena pana imāneva dve gahitāni, iminā vā mukhena sabbānipi tāni gahitānevāti.

Tattha “ālokesāmī”ti citte uppanne cittavaseneva anoloketvā atthapariggahaṇaṃ sātthakasampajaññaṃ. Taṃ āyasmantaṃ Nandaṃ kāyasakkhiṃ katvā veditabbaṃ. Vuttañhetāṃ Bhagavatā “sace bhikkhave Nandassa puratthimā disā āloketabbā hoti, sabbaṃ cetasā samannāharitvā Nando puratthimaṃ disaṃ āloketi, evaṃ me puratthimaṃ disaṃ ālokayato na abhiḥhādomanassa pāpakā akusalā dhammā anvāssaveyyunti iti so tattha sampajāno hoti, sace bhikkhave Nandassa pacchimā disā, uttarā disā, dakkhiṇā disā, uddhaṃ, adho, anudisā āloketabbā hoti, sabbaṃ cetaso samannāharitvā Nando anudisaṃ āloketi. Evaṃ me anudisaṃ ālokayato -pasampajāno hotī”ti¹.

Api ca idhāpi pubbe vuttacetiyadassanādivaseneva sātthakatā ca sappāyatā ca veditabbā. Kammaṭṭhānassa pana avijahanameva gocarasampajaññaṃ. Tasmā khandhadhātu-āyatanakammaṭṭhānikehi attano kammaṭṭhānavaseneva, kasiṇādikammaṭṭhānikehi vā pana kammaṭṭhānasīseneva ālokanavilokanaṃ kātabbaṃ. Abbhantare attā nāma āloketā vā viloketā vā natthi, ālokesāmīti pana citte uppajjamāne teneva cittaena saddhiṃ cittasamuṭṭhānā vāyodhātu viññattiṃ janayamānā uppajjati. Iti cittakiriyavāyodhātuvipphāravaseneva heṭṭhimaṃ akkhidalaṃ adho sīdati, uparimaṃ uddhaṃ laṅgheti, koci yantakena vivaranto nāma natthi, tato cakkhuviññāṇaṃ dassanakiccaṃ sādheṇtaṃ uppajjatīti. Evaṃ sampajānanaṃ panettha **asammohasampajaññaṃ** nāma.

Api ca mūlapariññā-āgantukatāvakālikabhāvavasena pettha asammohasampajaññaṃ veditabbaṃ. Mūlapariññāvasena tāva—

Bhavaṅgāvajjanaṃ ceva, dassanaṃ sampañcchanaṃ.
Santīraṇaṃ voṭṭhabbanaṃ, javanaṃ bhavati sattamaṃ.

Tattha bhavaṅgaṃ upapattibhavassa aṅgakiccaṃ sādhayamānaṃ pavattati, taṃ āvaṭṭetvā kiriyamanodhātu āvajjanakiccaṃ sādhayamānā, tannirodhā

1. Am 3. 14 piṭṭhe.

cakkhuviññāṇaṃ dassanakiccaṃ sādhayamānaṃ, tannirodhā vipākamanodhātu sampaṭicchana-kiccaṃ sādhayamānā, tannirodhā vipākamanoviññāṇadhātu santīraṇa-kiccaṃ sādhayamānā, tannirodhā kiriyamanoviññāṇadhātu voṭṭhabbanakiccaṃ sādhayamānā, tannirodhā sattakkhattuṃ javanaṃ javati. Tattha paṭhamajavanepi “ayaṃ itthī, ayaṃ puriso”ti rajjanadussanamuyhanavasena ālokitavilokitaṃ na hoti. Dutiyajavanepi -pa-. Sattamajavanepi. Etesu pana yuddhamaṇḍale yodhesu viya hetṭhupariyavasena bhijjivā patitesu “ayaṃ itthī, ayaṃ puriso”ti rajjanādivasena ālokitavilokitaṃ hoti. Evaṃ bhāvettha mūlapariññāvasena asammohasampajaññaṃ veditabbaṃ.

Cakkhudvāre pana rūpe āpāthagate bhavaṅgacalanato uddhaṃ sakakiccaṃ nipphādanavasena āvajjanādīsu uppajjitvā niruddhesu avasāne javanaṃ uppajjati. Taṃ pubbe uppannaṃ āvajjanādīnaṃ gehabhūte cakkhudvāre āgantukapuriso viya hoti. Tassa yathā paragehe kiñci yācituṃ pavitṭhassa āgantukapurisassa gehasāmikesu tuṇhīmāsinesu āṇākaraṇaṃ na yuttaṃ. Evaṃ āvajjanādīnaṃ gehabhūte cakkhudvāre āvajjanādīsipi arajjantesu adussantesu amuyhantesu ca rajjanadussanamuyhanaṃ ayuttanti evaṃ āgantukabhāvavasena asammohasampajaññaṃ veditabbaṃ.

Yāni pana tāni cakkhudvāre voṭṭhabbanapariyosānāni cittāni uppajjanti, tāni saddhiṃ sampayuttadhammehi tattha tattheva bhijjanti, aññaṃaññaṃ na passantīti ittarāni¹ tāvakālikāni honti. Tattha yathā ekasmiṃ ghare sabbesu mānusakesu matesu avasesassa ekassa taṅkhaṇaṇṇeva maraṇadhammassa na yuttā naccagītādīsū abhirati nāma, evameva ekadvāre sasampayuttesu āvajjanādīsū tattha tattheva matesu avasesassa taṅkhaṇeyeva maraṇadhammassa javanassāpi rajjanadussanamuyhanavasena abhirati nāma na yuttāti evaṃ tāvakālikabhāvavasena asammohasampajaññaṃ veditabbaṃ.

Api ca khandhāyatanadhātupaccayapaccavekkhaṇavasena petaṃ veditabbaṃ. Ettha hi cakkhu ceva rūpañca rūpakkhandho, dassanaṃ viññāṇakkhandho, taṃsampayuttā vedanā vedanākkhandho, saññā saññākkhandho, phassādikā saṅkhārakkhandho.

1. Itarāni (Si)

Evametesam pañcannaṃ khandhānaṃ samavāye ālokanavilokanaṃ paññāyati. Tattha ko eko āloketi, ko viloketi. Tathā cakkhu cakkhāyatanam, rūpaṃ rūpāyatanam, dassanaṃ manāyatanam, vedanādayo sampayuttadhammo dhammāyatanam. Evametesam catunnaṃ āyatanānaṃ samavāye ālokanavilokanaṃ paññāyati. Tattha ko eko āloketi, ko viloketi. Tathā cakkhu cakkhudhātu, rūpaṃ rūpadhātu, dassanaṃ cakkhuviññādhātu, taṃsampayuttā vedanādayo dhammadhātu. Evametāsaṃ catunnaṃ dhātūnaṃ samavāye ālokanavilokanaṃ paññāyati. Tattha ko eko āloketi, ko viloketi. Tathā cakkhu nissayapaccayo, rūpaṃ ārammaṇapaccayo, āvajjanaṃ anantarasamanantarūpanissayanatthivigatapaccayo, āloko upanissayapaccayo, vedanādayo sahaajātapaccayo. Evametesam paccayānaṃ samavāye ālokanavilokanaṃ paññāyati. Tattha ko eko āloketi, ko viloketīti evamettha khandhāyatanadhātupaccayapaccavekkhaṇavasena pi asammohasampajaññaṃ veditabbaṃ.

Samiñjite pasāriteti pabbānaṃ samiñjanapasāraṇe. Tattha cittavaseneva samiñjanapasāraṇaṃ akatvā hatthapādānaṃ samiñjanapasāraṇapaccayā atthānattham pariggahetvā atthapariggahaṇaṃ sātthakasampajaññaṃ. Tattha hatthapāde aticiraṃ samiñjetvā pasāretvā eva vā t̥hitassa khaṇe khaṇe vedanā uppajjanti, cittaṃ ekaggaṃ na labhati, kammaṭṭhānaṃ paripatati, visesaṃ nādhigacchati. Kāle samiñjentassa kāle pasārentassa pana tā vedanā na uppajjanti, cittaṃ ekaggaṃ hoti, kammaṭṭhānaṃ phātiṃ gacchati, visesamadhigacchatīti evaṃ atthānatthapariggahaṇaṃ veditabbaṃ.

Atthe pana satipi sappāyāsappāyaṃ pariggaṇhitvā sappāyapariggahaṇaṃ sappāyasampajaññaṃ. Tatrāyaṃ nayo— mahācetiyaṅgaṇe kira daharabhikkhū sajjhāyaṃ gaṇhanti. Tesam piṭṭhipasse daharabhikkhuniyo dhammaṃ suṇanti. Tatreko daharo hattham pasārento kāyasamsaggaṃ patvā teneva kāraṇena gihi jāto. Aparopi bhikkhu pādam pasārento aggimhi pasāresi, atṭhim āhacca pādo jhāyi. Aparo vammike pasāresi, so āsīvisena daṭṭho. Aparo cīvarakuṭidaṇḍake pasāresi, taṃ

maṇisappo daṁsi. Tasmā evarūpe asappāye apasāretvā sappāye pasāretabbaṁ. Idamettha sappāyasampajaññaṁ.

Gocarasampajaññaṁ pana Mahātheravatthunā dīpetabbaṁ—mahāthero kira divāṭṭhāne nisinno antevāsikehi saddhiṁ kathayamāno sahasā hatthaṁ samiṅjetvā puna yathāṭṭhāne ṭhapetvā saṅikaṁ samiṅjesi. Tam antevāsikā pucchimsu “kasmā bhante sahasā hatthaṁ samiṅjetvā puna yathāṭṭhāne ṭhapetvā saṅikaṁ samiṅjayitthā”ti. Yato paṭṭhāyāhaṁ āvuso kammaṭṭhānaṁ manasikātuṁ āraddho, na me kammaṭṭhānaṁ muñcitvā hattho samiṅjitapubbo, idāni pana tumhehi saddhiṁ kathayamānena kammaṭṭhānaṁ muñcitvā samiṅjito, tasmā puna yathāṭṭhāne ṭhapetvā samiṅjesinti. Sādhū bhante bhikkhunā nāma evarūpena bhavitabbanti. Evametthāpi kammaṭṭhānāvijahanameva gocarasampajaññanti veditabbaṁ.

Abbhantare attā nāma koci samiṅjento vā pasārento vā natthi. Uttappakāracittakiriyavāyodhātuvipphārena pana sutkākaḍḍhanavasena dāruyantassa hatthapādalaṅgaṁ viya samiṅjanapasāraṇaṁ hotīti evaṁ pariṅjanaṁ panettha asammohasampajaññanti veditabbaṁ.

Saṅghāṭipattacīvaradhāraṇeti ettha saṅghāṭicīvarānaṁ nivāsanapārūpanavasena pattassa bhikkhāpaṭiggahaṇādivasena paribhogo dhāraṇaṁ nāma. Tattha saṅghāṭicīvaradhāraṇe tāva nivāsetvā pārūpitvā ca piṇḍāya carato āmisalābho “sītassa paṭighātāyā”ti-ādinā nayena Bhagavatā uttappakāroyeva ca attho attho nāma. Tassa vasena sātthakasampajaññaṁ veditabbaṁ.

Uḥhapakatikassa pana dubbalassa ca cīvaraṁ sukhumaṁ sappāyaṁ. Sītālukassa ghaṇaṁ dupaṭṭaṁ. Viparītaṁ asappāyaṁ. Yassa kassaci jīṇṇaṁ asappāyameva. Aggaḷādidāne hissa taṁ palibodhakaraṁ hoti. Tathā paṭṭuṇṇadukūlādibhedāṁ lobhanīyacīvaraṁ. Tādisañhi araṅṅe ekakassa nivāsantarāyakaraṁ jīvitantarāyakaraṁ vāpi hoti. Nippariyāyena pana yaṁ nimittakammādimicchājīvavasena uppannaṁ, yaṁ cassa sevamānassa akusalā dhammā abhivaḍḍhanti, kusalā dhammā parihāyanti, taṁ asappāyaṁ. Viparītaṁ

sappāyaṃ. Tassa vasenettha sappāyasampajaññaṃ,
kammaṭṭhānāvijahanavaseneva ca gocarasampajaññaṃ veditabbaṃ.

Abbhantare attā nāma koci cīvaraṃ pārupanto natthi.
Vuttappakāracittakiriyavāyodhātuvipphārenea pana cīvarapārūpanaṃ hoti.
Tattha cīvarampi acetanaṃ, kāyopi acetano. Cīvaraṃ na jānāti “mayā kāyo
pāruto”ti. Kāyopi na jānāti “ahaṃ cīvarena pāruto”ti, dhātuyova
dhātusamūhaṃ paṭicchādenti paṭapilotikāya potthakarūpapaṭicchādane viya.
Tasmā neva sundaraṃ cīvaraṃ labhitvā somanassaṃ kātabbaṃ, na
asundaraṃ labhitvā domanassaṃ. Nāgavammikacetiyarukkhādīsu¹ hi keci
mālāgandhadhūmavattādīhi sakkāraṃ karonti, keci
gūthamuttakaddamaṇḍasatthappahārādīhi asakkāraṃ, na te
nāgavammikarukkhādayo somanassaṃ vā domanassaṃ vā karonti. Evameva
neva sundaraṃ cīvaraṃ labhitvā somanassaṃ kātabbaṃ. Na asundaraṃ
labhitvā domanassanti evaṃ pavattapaṭisaṅkhānavaśena panettha
asammohasampajaññaṃ veditabbaṃ.

Pattadhāraṇepi pattaṃ sahasāva aggahetvā imaṃ gahetvā piṇḍāya
caramāno bhikkhaṃ labhissāmīti evaṃ pattaggahaṇapaccayā paṭilabhitabba-
atthavasena sātthakasampajaññaṃ veditabbaṃ.

Kisadubbalarīrassa pana garu patto asappāyo. Yassa kassaci
catupañcagaṇṭhikāhato dubbisodhanīyo asappāyova. Duddhotapatto hi na
vaṭṭati, taṃ dhovantasseva cassa palibodho hoti. Mañivaṇṇapatto pana
lobhanīyo cīvare vuttanayeneva asappāyo. Nimittakammādivasena laddho
pana yaṃ cassa sevamānassa akusalā dhammā abhivaḍḍhanti, kusalā
dhammā parihāyanti, ayaṃ ekanta-asappāyova. Viparīto sappāyo. Tassa
vasenettha sappāyasampajaññaṃ, kammaṭṭhānāvijahanavaseneva ca
gocarasampajaññaṃ veditabbaṃ.

Abbhantare attā nāma koci pattaṃ gaṇhanto natthi.
Vuttappakāracittakiriyavāyodhātuvipphārenea pana pattaggahaṇaṃ nāma
hoti. Tattha pattopi acetano, hatthāpi acetanā. Patto na jānāti “ahaṃ hattheti
gahito”ti. Hatthāpi na jānanti “patto amhehi gahito”ti.

1. Nānāvammikacetiyarukkhādīsu (Syā)

Dhātuyova dhātusamūhaṃ gaṇhanti saṇḍāsena aggivaṇṇapattaggahaṇe viyāti evaṃ pavattapaṭisaṅkhānavasenettha asammohasampajaññaṃ veditabbaṃ.

Api ca yathā chinnahatthapāde vaṇamukhehi paggharitapubbalohitakimikule nīlamakkhikasamparikiṇṇe anāthasālāyaṃ nipanne anāthamanusse disvā dayālukā purisā tesāṃ vaṇapaṭṭacoḷakāni ceva kapālādīhi ca bhesajjāni upanāmenti. Tattha coḷakānipi kesañci saṅhāni, kesañci thūlāni pāpuṇanti. Bhesajjakapālakānipi kesañci susaṅṭhānāni, kesañci dussaṅṭhānāni pāpuṇanti, na te tattha sumanā vā dummanā vā honti. Vaṇappaṭṭicchādanamatteneva hi coḷakena bhesajjapaṭṭiggaḥaṇamatteneva ca kapālakena tesāṃ attho, evameva yo bhikkhu vaṇacoḷakāṃ viya cīvaram, bhesajjakapālakāṃ viya pattam, kapāle bhesajjamiva ca patte laddham bhikkham sallakkheti. Ayaṃ saṅghāṭṭipattacīvaradhāraṇe asammohasampajaññaṃ uttamasampajānakārīti veditabbo.

Asitādīsu **asī**teti piṇḍapātabhojane. **Pī**teti yāgu-ādipāne. **Khāyī**teti piṭṭhakkhajjakādikhādane. **Sāyī**teti madhuphāṇitādisāyane. Tattha “neva davāyā”ti-ādinā nayena vutto aṭṭhavidhopi attho attho nāma. Tassa vasena sātthakasampajaññaṃ veditabbaṃ. Lūkhapaṇītatittamadhurādīsu pana yena bhojanena yassa aphāsu hoti, taṃ tassa asappāyaṃ. Yaṃ pana nimittakammādivasena paṭiladdham, yaṃ cassa bhuñjato akusalā dhammā abhivaḍḍhanti, kusalā dhammā parihāyanti, taṃ ekanta-asappāyameva. Viparītaṃ sappāyaṃ. Tassa vasenettha sappāyasampajaññaṃ, kammaṭṭhānāvijahanavaseneva ca gocarasampajaññaṃ veditabbaṃ.

Abbhantare attā nāma koci bhuñjako natthi, vuttappakāracittakiriyavāyodhātuvipphāravaseneva pana pattapaṭṭiggaḥaṇaṃ nāma hoti. Cittakiriyavāyodhātuvipphāreneva hatthassa patte otāraṇaṃ nāma hoti. Cittakiriyavāyodhātuvipphāreneva ālopakaraṇaṃ ālopa-uddharaṇaṃ mukhavivaraṇaṃ ca hoti. Na koci kuñcikāya yantakena ca hanukaṭṭhīni vivarati, cittakiriyavāyodhātuvipphāreneva ālopassa mukhe ṭhapanam, uparidantānam musalakiccāsādhanaṃ, heṭṭhādantānam udukkhalakiccāsādhanaṃ, jivhāya hatthakiccāsādhanaṃ ca hoti.

Iti taṃ tattha aggajivhāya tanukakheḷo mūlajivhāya bahalakheḷo makkheti. Taṃ heṭṭhādanta-udukkhale jivhāhatthaparivattitaṃ kheḷa-udakatemitāṃ uparidantamusalasañcuṇṇitaṃ koci kaṭacchunā vā dabbiyā vā antopavesento nāma natthi, vāyodhātuyāva pavisati. Pavitṭhaṃ pavitṭhaṃ koci palālasantharaṃ katvā dhārento nāma natthi, vāyodhātuvaseneva tiṭṭhati. Ṭhitaṃ ṭhitaṃ koci uddhanaṃ katvā aggim jāletvā pacanto nāma natthi, tejjodhātuyāva paccati¹. Pakkaṃ pakkaṃ koci daḍḍena vā yatṭhiyā vā bahi nīhārako nāma natthi, vāyodhātuyeva nīharati.

Iti vāyodhātu atiharati ca vītiharati ca dhāreti ca parivatteti ca sañcuṇṇeti ca visoseti ca nīharati ca. Pathavīdhātu dhāreti ca parivatteti ca sañcuṇṇeti ca visoseti ca. Āpodhātu sineheti ca allattaṃ ca anupāleti. Tejjodhātu antopavitṭhaṃ paripāceti. Ākāsadhātu añjaso hoti. Viññāḍadhātu tattha tattha sammāpayogamanvāya ābhujatīti² evaṃpavattapaṭisaṅkhānavasenettha asammohasampajaññaṃ veditabbaṃ.

Api ca gamanato pariyesanato paribhogato āsayato nidhānato aparipakkato paripakkato phalato nissandato sammakkhaṇatoti evaṃ dasavidhapaṭikūlabhāvapaccavekkhaṇatopettha asammohasampajaññaṃ veditabbaṃ. Vitthārakathā panettha Visuddhimagge āhārapaṭikūlasaññāniddesato gahetabbā.

Uccārapassāvakkammeti uccārassa ca passāvassa ca karaṇe. Tattha pattakāle uccārapassāvāṃ akarontassa sakalasarīrato sedā muccanti, akkhīni bhamanti, cittaṃ na ekaggaṃ hoti, aññe ca rogā uppajjanti. Karontassa pana sabbaṃ taṃ na hotīti ayamettha attho. Tassa vasena sātthakasampajaññaṃ veditabbaṃ. Aṭṭhāne uccārapassāvāṃ karontassa pana āpatti hoti, ayaso vaḍḍhati, jīvitantarāyo hoti. Patirūpe ṭhāne karontassa sabbaṃ taṃ na hotīti idamettha sappāyaṃ. Tassa vasena sappāyasampajaññaṃ, kammaṭṭhānāvijahanavaseneva ca gocarasampajaññaṃ veditabbaṃ.

1. Pacati (Ka)

2. Ābhujatīti (Sī)

Abbhantare attā nāma koci uccārapassāvaṃ karonto natthi. Cittakiriya-vāyodhātuvipphārenea pana uccārapassāvakkammaṃ hoti. Yathā pana pakke gaṇḍe gaṇḍabhedena pubbalohitaṃ akāmatāya nikkhamati, yathā ca atibharitā udakabhājanā udakaṃ akāmatāya nikkhamati, evaṃ pakkāsayamuttavattḥisu sannicitā¹ uccārapassāvā vāyuvegasamuppilīṭā akāmatāyapi nikkhamanti. So paṇāyaṃ evaṃ nikkhamanto uccārapassāvo neva tassa bhikkhuno attano hoti, na parassa. Kevalaṃ sarīranissandova hoti. Yathā kiṃ? Yathā udakatumbato² purāṇa-udakaṃ chaḍḍentassa neva taṃ attano hoti, na paresaṃ. Kevalaṃ paṭijagganamattameva hoti. Evaṃpavattapaṭisaṅkhānavasenettha asammohasampajaññaṃ veditabbaṃ.

Gatādīsu **gateti** gamane. **Ṭhiteti** ṭhāne. **Nisinni** nisajjāya. **Sutteti** sayane. **Jāgariteti** jāgaraṇe. **Bhāsiteti** kathane. **Tuṇhībhāveti** akathane. “Gacchanta vā gacchāmiti pajānāti, ṭhito vā ṭhitomhīti pajānāti, nisinna vā nisinnomhīti pajānāti, sayāno vā sayānomhīti pajānāti”ti imasmiṃhi ṭhāne addhāna-iriyāpathā kathitā. “Abhikkante paṭikkante ālokite vilokite samiṅjite pasārite”ti imasmiṃ majjhimā. “Gate ṭhite nisinne sutte jāgarite”ti idha pana khuddakacuṇṇika-iriyāpathā kathitā. Tasmā etesupi vuttanayenēva sampajānakāritā veditabbā.

Tipiṭakamahāsīvadthero paṇāha—yo ciraṃ gantvā vā caṅkamtivā vā aparabhāge ṭhito iti paṭisaṅcikkhati “caṅkamanakāle pavattā rūpārūpadhammā ettheva niruddhā”ti, ayaṃ **gate sampajānakārī** nāma. Yo sajjhāyaṃ vā karonto pañhaṃ vā vissajjento kammaṭṭhānaṃ vā manasikaronto ciraṃ ṭhatvā aparabhāge nisinna iti paṭisaṅcikkhati “ṭhitakāle pavattā rūpārūpadhammā ettheva niruddhā”ti, ayaṃ **ṭhite sampajānakārī** nāma. Yo sajjhāyādikaraṇavaseneva ciraṃ nisīditvā aparabhāge nipanno iti paṭisaṅcikkhati “nisinnakāle pavattā rūpārūpadhammā ettheva niruddhā”ti, ayaṃ **nisinne sampajānakārī** nāma. Yo pana nipannako sajjhāyaṃ vā karonto kammaṭṭhānaṃ vā manasikaronto niddaṃ okkamitvā aparabhāge

1. Sannissitā (Syā)

2. Udakakumbhato (Syā)

vuṭṭhāya iti paṭisañcikkhati “sayanakāle pavattā rūpārūpadhammā ettheva niruddhā”ti, ayaṃ **sutte jāgarite ca sampajānakārī** nāma.

Kiriyamayacittānañhi appavattaṃ suttaṃ nāma, pavattaṃ jāgaritaṃ nāmāti. Yo pana bhāsamāno “ayaṃ saddo nāma oṭṭhe ca paṭicca dante ca jivhañca tāluṃ ca paṭicca cittassa ca tadanurūpaṃ payogaṃ paṭicca jāyati”ti sato sampajāno bhāsati, ciraṃ vā pana kālaṃ sajjhāyaṃ vā katvā dhammaṃ vā kathetvā kammaṭṭhānaṃ vā parivattetvā pañhaṃ vā vissajjetvā aparabhāge tuñhībhūto iti paṭisañcikkhati “bhāsitaṃ uppannā rūpārūpadhammā ettheva niruddhā”ti, ayaṃ **bhāsita sampajānakārī** nāma. Yo tuñhībhūto ciraṃ dhammaṃ vā kammaṭṭhānaṃ vā manasikatvā aparabhāge iti paṭisañcikkhati “tuñhībhūtakāle pavattā rūpārūpadhammā ettheva niruddhā, upādārūpapavattiyā sati **bhāsati** nāma, asati **tuñhī bhavati** nāmā”ti, ayaṃ **tuñhībhāve sampajānakārī** nāmāti.

Tayidaṃ Mahāsīvattherena vuttaṃ asammodhadhuraṃ imasmim Satipaṭṭhānasutte adhippetam. Sāmaññaphale pana sabbampi catubbidham sampajaññaṃ labbhati. Tasmā visesato ettha asammodhasampajaññasseva vasena sampajānakārītā veditabbā. Sampajānakārī sampajānakārīti ca sabbapadesu satisampayuttasseva sampajaññassa vasenattho veditabbo. Vibhaṅgappakaraṇe pana “sato sampajāno abhikkamati, sato sampajāno paṭikkamati”ti¹ evaṃ etāni padāni vibhattāneva.

Iti ajjhataṃ vāti evaṃ catusampajaññapariggahaṇena attano vā kāye, parassa vā kāye, kālena vā attano, kālena vā parassa kāye kāyānupassī viharati. Idha **samudayavayadhammānupassī**-ādīsu rūpakkhandhasseva samudayo ca vayo ca nīharitabbo. Sesam vuttasadisameva.

Idha catusampajaññapariggāhikā sati dukkhasaccaṃ, tassā samuṭṭhāpikā purimataṅhā samudayasaccaṃ, ubhinnaṃ appavatti nirodhasaccaṃ, vuttappakāro ariyamaggo maggasaccaṃ. Evaṃ catusaccavasena ussakkivā nibbutim pāpuṇātīti

1. Abhi 2. 259 Jhānavibhaṅge.

idamekassa catusampajaññapariggāhakassa bhikkhuno vasena yāva arahattā niyyānamukhanti.

Catusampajaññapabbavaṇṇanā niṭṭhitā.

Paṭikūlamanasikārapabbavaṇṇanā

110. Evaṃ catusampajaññavasena kāyānupassanaṃ vibhajitvā idāni paṭikūlamanasikāravasena vibhajitum **puna caparanti-ādimāha**. Tattha **inameva kāyanti-ādīsu** yaṃ vattabbaṃ siyā, taṃ sabbaṃ sabbākārena vitthārato Visuddhimagge kāyagatāsatikammaṭṭhāne vuttaṃ. **Ubhatomukhāti** heṭṭhā ca upari cāti dvīhi mukhehi yuttā. **Nānāvihitassāti** nānāvidhassa.

Idaṃ panettha opammasaṃsandanaṃ—ubhatomukhā putoli¹ viya hi cātumahābhūtikā kāyo, tattha missetvā pakkhittanānāvidhadhaññaṃ viya kesādayo dvattimsākārā, cakkhumā puriso viya yogāvacaro, tassa taṃ putoliṃ muñcitvā paccavekkhato nānāvidhadhaññassa pākāṭakālo viya yogino dvattimsākārassa vibhūtākāro² veditabbo.

Iti ajjhataṃ vāti evaṃ kesādipariggahaṇena attano vā kāye, parassa vā kāye, kālena vā attano, kālena vā parassa kāye kāyānupassī viharati, ito paraṃ vuttanayameva. Kevalaṃ hi idha dvattimsākārapariggāhikā sati dukkhasaccanti evaṃ yojanaṃ katvā niyyānamukhaṃ veditabbaṃ. Sesāṃ purimasadisamevāti.

Paṭikūlamanasikārapabbavaṇṇanā niṭṭhitā.

Dhātumanasikārapabbavaṇṇanā

111. Evaṃ paṭikūlamanasikāravasena kāyānupassanaṃ vibhajitvā idāni dhātumanasikāravasena vibhajitum **puna caparanti-ādimāha**. Tatrāyaṃ

1. Mūtoḷi (Sī, Syā)

2. Vibhūtākālo (Ka)

opammasaṃsandanaena saddhiṃ atthavaṇṇanā—yathā koci goghātako vā tasseva vā bhattavetanabhato antevāsiko gāviṃ vadhitvā vinivijjhivā catasso disā gatānaṃ mahāpathānaṃ vemajjhaṭṭhānasaṅkhāte catumahāpathe koṭṭhāsaṃ koṭṭhāsaṃ katvā nisinno assa, evameva bhikkhu catunnaṃ iriyāpathānaṃ yena kenaci ākārena ṭhitattā yathāṭhitānaṃ, yathāṭhitattā ca yathāpaṇihitānaṃ kāyaṃ “atthi imasmiṃ kāye pathavīdhātu -pa- vāyodhātū”ti evaṃ paccavekkhati.

Kim vuttaṃ hoti—yathā goghātakassa gāviṃ posentassāpi āghātanaṃ āharantassāpi āharitvā tattha bandhitvā ṭhapentassāpi vadhentassāpi vadhitānaṃ mataṃ passantassāpi tāvadeva gāvīti saññā na antaradhāyati, yāva naṃ padāletvā bīlaso na vibhajati. Vibhajivā nisinnassa pana gāvīti saññā antaradhāyati, maṃsasaññā pavattati, nāssa evaṃ hoti “ahaṃ gāviṃ vikkiṇāmi, ime gāviṃ haranti”ti. Atha khvassa “ahaṃ maṃsaṃ vikkiṇāmi, ime maṃsaṃ haranti”cceva hoti, evameva imassāpi bhikkhuno pubbe bālaputhujjanakāle gihibhūtassāpi pabbajitassāpi tāvadeva sattoti vā puggaloti vā saññā na antaradhāyati, yāva imameva kāyaṃ yathāṭhitānaṃ yathāpaṇihitānaṃ ghanavinibbhogaṃ katvā dhātuso na paccavekkhati. Dhātuso paccavekkhato panassa sattasaññā antaradhāyati, dhātuvaseneva cittaṃ santiṭṭhati. Tenāha Bhagavā “imameva kāyaṃ yathāṭhitānaṃ yathāpaṇihitānaṃ dhātuso paccavekkhati, atthi imasmiṃ kāye pathavīdhātu āpodhātu tejodhātu vāyodhātūti. Seyyathāpi bhikkhave dakkho goghātako vā -pa- vāyodhātū”ti.

Goghātako viya hi yogī, gāvīti saññā viya sattasaññā, catumahāpatho viya catu-iriyāpatho, bīlaso vibhajivā nisinnabhāvo¹ viya dhātuso paccavekkhaṇanti ayamettha Pāḷivaṇṇanā, kammaṭṭhānakathā pana Visuddhimagge vitthāritā.

Iti ajjhataṃ vāti evaṃ catudhātupariggahaṇena attano vā kāye, parassa vā kāye, kālena vā attano, kālena vā parassa kāye

1. Nisinnagoghātako (Syā)

kāyānupassī viharati. Ito paraṃ vuttanayameva. Kevalaṅhi idha catudhātupariggāhikā sati dukkhasaccanti evaṃ yojanaṃ katvā niyyānamukhaṃ vedītabbāṃ. Sesāṃ purimasadisamevāti.

Dhātumanasikārapabbavaṇṇanā niṭṭhitā.

Navasivathikapabbavaṇṇanā

112. Evaṃ dhātumanasikāravasena kāyānupassanaṃ vibhajitvā idāni navahi sivathikapabbehi vibhajitum **puna caparanti-ādimāha**. Tattha **seyyathāpi passeyyāti** yathā passeyya. **Sarīranti** matasarīraṃ. **Sivathikāya chaḍḍitanti** susāne apaviddhaṃ. Ekāhaṃ matassa assāti **ekāhamataṃ**. Dvīhaṃ matassa assāti **dvīhamataṃ**. Tīhaṃ matassa assāti **tīhamataṃ**. Bhastā viya vāyunā uddhaṃ jīvitapariyādānā yathānukkamaṃ samuggatena sūnabhāvena uddhumātattā **uddhumātakaṃ**. Vinīlaṃ vuccati viparibhinnavaṇṇaṃ. Vinīlameva **vinīlakaṃ**. Paṭikūlattā vā kucchitaṃ vinīlanti **vinīlakaṃ**. Maṃsussadaṭṭhānesu rattavaṇṇassa pubbasannicayaṭṭhānesu setavaṇṇassa yebhuyyena ca nīlavaṇṇassa nīlaṭṭhānesu nīlasāṭakapārutasseva chavasarīrassetāṃ adhivacanaṃ. Paribhinnatṭhānehi navahi vā vaṇamukhehi visandamānaṃ pubbaṃ vipubbaṃ. Vipubbameva **vipubbakaṃ**, paṭikūlattā vā kucchitaṃ vipubbanti **vipubbakaṃ**. Vipubbakaṃ jātaṃ tathābhāvaṃ gatanti **vipubbakajātaṃ**.

So imameva kāyanti so bhikkhu imaṃ attano kāyaṃ tena kāyena saddhiṃ nāṇena upasaṃharati upaneti. Kathaṃ? Ayampi kho kāyo evaṃdhammo evaṃbhāvī evaṃmanatītoti. Idaṃ vuttaṃ hoti—āyu, usmā, viññāṇanti imesaṃ tiṇṇaṃ dhammānaṃ atthitāya ayaṃ kāyo ṭhānagamanādikhamo hoti, imesaṃ pana vigaṃā ayampi evaṃdhammo evaṃpūtikasabhāvoyeva, **evaṃbhāvī** evaṃuddhumātādibhedo bhavissati, **evaṃmanatīto** evaṃuddhumātādibhāvaṃ anatikkantoti.

Iti ajjhataṃ vāti evaṃ uddhumātādipariggahaṇena attano vā kāye, parassa vā kāye, kālena vā attano, kālena vā parassa kāye kāyānupassī viharati.

Khajjamānanti udarādīsu nisīditvā udaramaṃsa-oṭṭhamāṃsa-akkhikūṭādinī luñcitvā luñcitvā khādiyamānaṃ. **Samaṃsalohitanti** sesāvasesamaṃsalohitayuttaṃ. **Nimaṃsalohitamakkhitanti** maṃse khīṇepi lohitaṃ na sussati, taṃ sandhāya vuttaṃ “nimaṃsalohitamakkhitaṃ”ti. **Aññenāti** aññena disābhāgena. **Hatthaṭṭhikanti** catusaṭṭhibhedampi hatthaṭṭhikaṃ pāṭi-ekkaṃ vippakiṇṇaṃ. **Pādaṭṭhikādīsupi** eseva nayo. **Terovassikānī**ti atikkantasamvaccharāni. **Pūtīnī**ti abbhokāse ṭhitāni vātātapavuṭṭhisamphassena terovassikāneva pūtīni honti. Antobhūmigatāni pana cirataraṃ tiṭṭhanti. **Cuṇṇakajātānī**ti cuṇṇaṃ cuṇṇaṃ hutvā vippakiṇṇāni. Sabbattha so imamevāti vuttanayena khajjamānādīnaṃ vasena yojanā kātabbā.

Iti ajjhataṃ vāti evaṃ khajjamānādipariggahaṇena yāva cuṇṇakabhāvā attano vā kāye, parassa vā kāye, kālena vā attano, kālena vā parassa kāye kāyānupassī viharati.

Idha pana ṭhatvā navasivathikā samodhānetabbā. “Ekāhamataṃ vā”ti-ādinā nayena vuttā sabbāpi ekā, “kākehi vā khajjamānaṃ”ti-ādikā ekā, “aṭṭhikasaṅkhalikaṃ samaṃsalohitaṃ nhārusambandhan”ti ekā, “nimaṃsalohitamakkhitaṃ nhārusambandhan”ti ekā, “apagataṃsamaṃsalohitaṃnhārusambandhan”ti ekā, “aṭṭhikāni apagatasambandhānī”ti-ādikā ekā, “aṭṭhikāni setāni saṅkhavaṇṇapaṭibhāgānī”ti ekā, “puñjakitāni terovassikānī”ti ekā, “pūtīni cuṇṇakajātānī”ti ekā.

Evaṃ kho bhikkhaviti idaṃ navasivathikā dassetvā kāyānupassanaṃ niṭṭhapento āha. Tattha navasivathikapariggāhikā sati dukkhasaccaṃ, tassā samuṭṭhāpikā purimataṇhā samudayasaccaṃ, ubhinnaṃ appavatti nirodhasaccaṃ, dukkhaparijānanaṃ samudayapajahanaṃ nirodhārammaṇo ariyamaggo maggasaccaṃ. Evaṃ catusaccavaseneva ussakkivā nibbutiṃ pāpuṇātīti idaṃ navasivathikapariggāhakānaṃ bhikkhūnaṃ yāva arahattā niyyānamukhanti.

Navasivathikapabbavaṇṇanā niṭṭhitā.

Etāvata ca ānāpānapabbaṃ iriyāpathapabbaṃ catusampajaññapabbaṃ paṭikūlamanasikārapabbaṃ dhātumanasikārapabbaṃ navasivathikapabbānīti cuddasapabbā kāyānupassanā niṭṭhitā hoti.

Tattha ānāpānapabbam paṭikūlamanasikārapabbanti imāneva dve appanākammaṭṭhānāni. Sivathikānam pana ādīnavānupassanāvasena vuttattā sesāni dvādasāpi upacārakammaṭṭhānānevāti.

Kāyānupassanā niṭṭhitā.

Vedanānupassanāvaṇṇanā

113. Evaṃ Bhagavā cuddasavidhena kāyānupassanāsatipaṭṭhānam kathetvā idāni navavidhena vedanānupassanam kathetum **kathaṇca bhikkhaveli**-ādimāha. Tattha **sukham vedananti** kāyikam vā cetasikam vā sukham vedanam vedayamāno “aham sukham vedanam vedayāmī”¹ti pajānātīti attho. Tattha kāmam uttānaseyyakāpi dārakā thaṇṇapivanādīkāle sukham vedayamānā “sukham vedayāmā”ti pajānanti, na panetaṃ evarūpaṃ jānanam sandhāya vuttaṃ. Evarūpaṃ jānanam hi sattūpaladdhiṃ na jahati, sattasaṇṇam na ugghāṭeti, kammaṭṭhānam vā satipaṭṭhānabhāvanā vā na hoti. Imassa pana bhikkhuno jānanam sattūpaladdhiṃ jahati, sattasaṇṇam ugghāṭeti, kammaṭṭhānam ceva satipaṭṭhānabhāvanā ca hoti. Idaṇhi “ko vedayati, kassa vedanā, kim kāraṇā vedanā”ti evaṃ sampajānavediyanam sandhāya vuttaṃ.

Tattha **ko vedayātīti** na koci satto vā puggalo vā vedayati. **Kassa vedanāti** na kassaci sattassa vā puggalassa vā vedanā. **Kim kāraṇā vedanāti** vatthu-ārammaṇāva panassa vedanā. Tasmā esa evaṃ pajānāti “taṃ taṃ sukhādīnam vatthum ārammaṇam katvā vedanāva vedayati. Taṃ pana vedanāpavattim upādāya ‘aham vedayāmī’ti vohāramattaṃ hotī”ti. Evaṃ vedanāva vatthum ārammaṇam katvā vedanāva vedayātīti sallakkhento esa “sukham vedanam vedayāmī”ti pajānātīti veditabbo. Cittalapabbate aññataro thero viya. Thero kira aphāsukakāle balavavedanāya nitthunanto aparāparam parivattati. Tameko daharo āha “kataram vo bhante ṭhānam rujjati”ti. Āvuso pāṭiyekkam rujjanaṭṭhānam nāma natthi, vatthum ārammaṇam katvā vedanāva vedayātīti. Evaṃ

1. Vediyāmīti (Sī, Syā)

jānanakālato paṭṭhāya adhivāsetum vaṭṭati no bhanteti. Adhivāsemi āvusoti. Adhivāsanā bhante seyyāti. Thero adhivāsesi. Tato vāto yāva hadayā phālesi, mañcake antāni rāsikatāni ahesum. Thero daharassa dassesi “vaṭṭatāvuso ettakā adhivāsanā”ti. Daharo tuṅhī ahosi. Thero vīriyasamataṃ yojetvā saha paṭisambhidāhi arahattaṃ pāpuṇitvā samasīsī hutvā parinibbāyi.

Yathā sukhaṃ, evaṃ dukkhaṃ -pa- nirāmiṣaṃ adukkhamasukhaṃ vedanaṃ vedayamāno “nirāmiṣaṃ adukkhamasukhaṃ vedanaṃ vedayāmi”ti pajānāti. Iti Bhagavā rūpakammaṭṭhānaṃ kathetvā arūpakammaṭṭhānaṃ kathento vedanāvasena kathesi. Duvidhañhi kammaṭṭhānaṃ rūpakammaṭṭhānañca arūpakammaṭṭhānañca. Rūpapariggaho arūpapariggahotipi etadeva vuccati. Tattha Bhagavā rūpakammaṭṭhānaṃ kathento saṅkhepamanasikārasena vā vitthāramanasikārasena vā catudhātuvavatthānaṃ kathesi. Tadubhayampi sabbākārato Visuddhimagge dassitameva.

Arūpakammaṭṭhānaṃ pana kathento yebhuyyena vedanāvasena katheti. Tividho hi arūpakammaṭṭhāne abhiniveso phassavasena vedanāvasena cittavasenāti. Kathaṃ? Ekaccassa hi saṅkhittena vā vitthārena vā pariggahite rūpakammaṭṭhāne tasmim ārammaṇe cittacetāsikānaṃ paṭhamābhiniṇipāto¹ taṃ ārammaṇaṃ phusanto uppajjamāno phasso pākaṭo hoti. Ekaccassa taṃ ārammaṇaṃ anubhavatī uppajjamānā vedanā pākaṭā hoti. Ekaccassa taṃ ārammaṇaṃ pariggahetvā vijānantam uppajjamānaṃ viññānaṃ pākaṭam hoti. Tattha yassa phasso pākaṭo hoti, sopi² “na kevalam phassova uppajjati, tena saddhim tadeva ārammaṇaṃ anubhavamānā vedanāpi uppajjati, sañjānanamānā saññāpi, cetayamānā cetanāpi, vijānanamānaṃ viññāṇampi uppajjati”ti phassapañcamakeyeva pariggaṇhāti. Yassa vedanā pākaṭā hoti. So “na kevalam vedanāva uppajjati, tāya saddhim tadevārammaṇaṃ phusamāno phassopi uppajjati, sañjānanamānā saññāpi, cetayamānā cetanāpi, vijānanamānaṃ viññāṇampi uppajjati”ti phassapañcamakeyeva pariggaṇhāti. Yassa viññānaṃ pākaṭam hoti, so “na kevalam viññāṇameva uppajjati, tena saddhim tadevārammaṇaṃ phusamāno

1. Paṭhamābhiniṇipāte (Sī)

2. So (Ka)

phassopi uppajjati, anubhavamānā vedanāpi, sañjānanamānā saññāpi, cetaṃmānā cetanāpi uppajjati”ti phassapañcamakeyeva pariḅgaṇhāti.

So “ime phassapañcamakā dhammā kiṃ nissitā”ti upadhārento “vatthuṃ nissitā”ti pajānāti. Vatthu nāma karajakāyo, yaṃ sandhāya vuttaṃ “idañca me viññāṇaṃ ettha sitaṃ ettha paṭibaddhaṃ”ti¹. So atthato bhūtāni ceva upādārūpāni ca. Evamettha “vatthu rūpaṃ, phassapañcamakā nāmaṃ”ti nāmarūpamattameva passati. Rūpaṃ cettha rūpakkhandho, nāmaṃ cattāro arūpino khandhāti pañcakkhandhamattaṃ hoti. Nāmarūpavinimuttā hi pañcakkhandhā, pañcakkhandhavinimuttañca nāmarūpaṃ natthi.

So “ime pañcakkhandhā kiṃ hetukā”ti upaparikkhanto “avijjādihetukā”ti passati. Tato paccayo ceva paccayuppannañca idaṃ, añño satto vā puggalo vā natthi, suddhasaṅkhārapuñjamattamevāti sappaccayanāmarūpavasena tilakkhaṇaṃ āropetvā vipassanāpaṭipāṭiyā “aniccaṃ dukkhaṃ anattā”ti sammasanto vicarati.

So “ajja ajjā”ti paṭivedhaṃ ākaṅkhamāno tathārūpe divase utusappāya puggalasappāya bhojanasappāya dhammassavanasappāyaṃ labhitvā ekapallaṅkena nisinno vipassanaṃ matthakaṃ pāpetvā arahatte paṭiṭṭhāti. Evaṃ imesampi tiṇṇaṃ janānaṃ yāva arahattā kammaṭṭhānaṃ kathitaṃ hoti.

Idha pana Bhagavā arūpakammaṭṭhānaṃ kathento vedanāvasena kathesi. Phassavasena vā hi viññāṇavasena vā kathīyamānaṃ na pākaṭaṃ hoti, andhakāraṃ viya khāyati. Vedanāvasena pana pākaṭaṃ hoti. Kasmā? Vedanānaṃ uppattipākaṭatāya. Sukhadukkhavedanānañhi uppatti pākaṭā. Yadā sukhaṃ uppajjati, sakalasarīraṃ khobhentaṃ maddantaṃ pharamānaṃ abhisandayamānaṃ satadhotāṃ sappiṃ khādāpayantaṃ viya satapākatelaṃ makkhayamānaṃ viya ghaṭasahassena pariḷāhaṃ nibbāpayamānaṃ viya “aho sukhaṃ aho sukhaṃ”ti vācaṃ nicchārayamānameva uppajjati. Yadā dukkhaṃ uppajjati, sakalasarīraṃ khobhentaṃ maddantaṃ pharamānaṃ abhisandayamānaṃ tattaphālaṃ pavesentaṃ viya vilīnatambalohena āsiṅcantaṃ viya sukkhatiṇavanappatimhi araññe dāru-ukkākalāpaṃ khipamānaṃ²

1. Dī 1. 72; Ma 2. 209 piṭṭhesu.

2. Khipiyamānaṃ (Sī), pakkipayamānaṃ (Syā), pakkipamānaṃ (Ka)

viya “aho dukkham aho dukkhan”ti vippalāpayamānameva uppajjati. Iti sukhadukkhavedanānam uppatti pākaṭā hoti.

Adukkhamasukhā pana duddīpanā andhakārāva avibhūtā. Sā sukhadukkhānam apagame sātāsātappaṭikkhepavasena majjhatakkārabhūtā adukkkhamasukhā vedanāti nayato gaṇhantassa pākaṭā hoti. Yathā kim? Yathā antarā piṭṭhipāsāṇam ārohitvā palātassa migassa anupatham gacchanto migaluddako piṭṭhipāsāṇassa orabhāgepi parabhāgepi padaṃ disvā majjhe apassantopi “ito ārulho, ito orulho, majjhe piṭṭhipāsāṇe iminā padesena gato bhavissati”ti nayato jānāti, evaṃ ārulhaṭṭhāne padaṃ viya hi sukhavedanāya uppatti pākaṭā hoti. Orulhaṭṭhāne padaṃ viya dukkhavedanāya uppatti pākaṭā hoti. “Ito āruyha ito oruyha majjhe evaṃ gato”ti nayato gahaṇam viya sukhadukkhānam apagame sātāsātappaṭikkhepavasena majjhatakkārabhūtā adukkkhamasukhā vedanāti nayato gaṇhantassa pākaṭā hoti. Evaṃ Bhagavā paṭhamam rūpakammaṭṭhānam kathetvā pacchā arūpakammaṭṭhānam vedanāvasena nibbattetvā¹ dassesi.

Na kevalañca idheva evaṃ dassesi, Cūḷataṇhāsaṅkhaye, Mahātaṇhāsaṅkhaye, Cūḷavedalle, Mahāvedalle, Raṭṭhapālasutte, Māgaṇḍiyasutte, Dhātuvibhaṅge, Āneñjasappāye, **Dīghanikāyamhi** Mahānidāne, Sakkapaṇhe, Mahāsatipaṭṭhāne, **Samyuttamhi** Cūḷanidānasutte, Rukkhopame, Parivīmaṃsanasutte, sakale Vedanāsamyutteti evaṃ anekesu suttesu paṭhamam rūpakammaṭṭhānam kathetvā pacchā arūpakammaṭṭhānam vedanāvasena nibbattetvā dassesi. Yathā ca tesu, evaṃ imasmimpi Satipaṭṭhānasutte paṭhamam rūpakammaṭṭhānam kathetvā pacchā arūpakammaṭṭhānam vedanāvasena nibbattetvā dassesi.

Tattha **sukham vedananti**-ādīsu ayaṃ aparopi pajānanapariyāyo— **sukham vedanam vedayāmīti pajānāti**ti sukhavedanākkhaṇe dukkhāya vedanāya abhāvato sukham vedanam vedayamāno “sukham vedanam vedayāmi”ti pajānāti. Tena yā pubbe anubhūtapubbā dukkhā vedanā, tassā idāni abhāvato imissā ca sukhāya vedanāya ito paṭhamam

1. Vinivaṭṭetvāva (Sī)

abhāvato vedanā nāma aniccā adhuvā vipariṇāmadhammā, itiha tattha sampajāno hoti.

Vuttampi cetam Bhagavatā—

“Yasmiṃ aggivessana samaye sukhaṃ vedanaṃ vedeti, neva tasmim̄ samaye dukkhaṃ vedanaṃ vedeti, na adukkhamasukhaṃ vedanaṃ vedeti, sukhaṃyeva tasmim̄ samaye vedanaṃ vedeti, yasmiṃ aggivessana samaye dukkhaṃ -pa- adukkhamasukhaṃ vedanaṃ vedeti, neva tasmim̄ samaye sukhaṃ vedanaṃ vedeti, na dukkhaṃ vedanaṃ vedeti, adukkhamasukhaññeva tasmim̄ samaye vedanaṃ vedeti. Sukhāpi kho aggivessana vedanā aniccā saṅkhatā paṭiccasamuppannā khayadhammā vayadhammā virāgadhammā nirodhadhammā. Dukkhāpi kho -pa-. Adukkhamasukhāpi kho aggivessana vedanā aniccā -pa- nirodhadhammā. Evaṃ passaṃ aggivessana sutavā ariyasāvako sukhāyapi vedanāya dukkhāyapi vedanāya adukkhamasukhāyapi vedanāya nibbindati, nibbindaṃ virajjati, virāgā vimuccati, vimuttasmiṃ vimuttamiti ñāṇaṃ hoti. ‘Khīṇā jāti, vusitaṃ brahmacariyaṃ, kataṃ karaṇīyaṃ, nāparaṃ itthattāyā’ti pajānāti”¹.

Sāmisāṃ vā sukhanti-ādīsu sāmisā sukhā nāma

pañcakāmaguṇāmisaniṣṣitā cha gehasitasomanassavedanā. **Nirāmisā sukhā** nāma cha nekkhammasitasomanassavedanā. **Sāmisā dukkhā** nāma cha gehasitadomanassavedanā. **Nirāmisā dukkhā** nāma cha nekkhammasitadomanassavedanā. **Sāmisā adukkhamasukhā** nāma cha gehasita-upekkhā vedanā. **Nirāmisā adukkhamasukhā** nāma cha nekkhammasita-upekkhā vedanā. Tāsaṃ vibhāgo uparipaṇṇāsake Pāḷiyaṃ āgatoyeva.

Iti ajjhataṃ vāti evaṃ sukhavedanādipariggahaṇena attano vā vedanāsu, parassa vā vedanāsu, kālena vā attano, kālena vā parassa vedanāsu vedanānupassī viharati. **Samudayavayadhammānupassī vā**ti ettha pana “avijjāsamudayā vedanāsamudayo”ti-ādīhi² pañcahi pañcahi ākārehi vedanānaṃ samudayañca vayañca passanto samudayadhammānupassī

1. Ma 2. 168 piṭṭhe.

2. Khu 9. 54 piṭṭhe Paṭisambhidāmagge.

vā vedanāsu viharati, vayadhammānupassī vā vedanāsu viharati, kālena samudayadhammānupassī vā, kālena vayadhammānupassī vā vedanāsu viharatīti vedītabbo. Ito paramā kāyānupassanāyaṃ vuttanayameva.

Kevalañhi idha vedanāpariggāhikā sati dukkhasaccanti evaṃ yojanaṃ katvā vedanāpariggāhakassa bhikkhuno niyyānamukhaṃ vedītabbaṃ. Sesāṃ tādīsamevāti.

Vedanānupassanā niṭṭhitā.

Cittānupassanāvaṇṇanā

114. Evaṃ navavidhena vedanānupassanāsatipaññānaṃ kathetvā idāni soḷasaavidhena cittānupassanaṃ kathetuṃ **kathaṅca bhikkhaveli-**ādimāha. Tatha **sarāganti** aṭṭhavidhaṃ lobhasahagataṃ. **Vītarāganti** lokiyakusalābyākataṃ. Idamā pana yasmā sammasanaṃ na dhammasamodhānaṃ, tasmā idha ekapadepe lokuttaraṃ na labbhati. Sesāni cattāri akusalacittāni neva purimapadaṃ, na pacchimapadaṃ bhajanti. **Sadosanti** duvidhaṃ dosasahagataṃ. **Vītadosanti** lokiyakusalābyākataṃ. Sesāni dasākusalacittāni neva purimaṃ padaṃ, na pacchimaṃ padaṃ bhajanti. **Samohanti** vicikicchāsahagatañceva uddhaccasahagatañcāti duvidhaṃ. Yasmā pana moho sabbākusalesu uppajjati, tasmā tānīpi idha vaṭṭantīyeva. Imasmiṃyeva hi duke dvādasākusalacittāni pariyādiṇṇānīti. **Vītamohanti** lokiyakusalābyākataṃ. **Samkhittanti** thinamiddhānupatitaṃ, etañhi samkuṭṭitacittaṃ nāma. **Vikkhittanti** uddhaccasahagataṃ, etañhi pasaṭacittaṃ¹ nāma.

Mahaggatanti rūpārūpāvacaraṃ. **Amahaggatanti** kāmāvacaraṃ. **Sa-**uttaranti kāmāvacaraṃ. **Anuttaranti** rūpāvacaraṅca arūpāvacaraṅca. Tatrāpi sa-uttaraṃ rūpāvacaraṃ, anuttaraṃ arūpāvacarameva. **Samāhitanti** yassa appanāsamādhi upacārasamādhi vā atthi. **Asamāhitanti** ubhayasamādhivirahitaṃ. **Vimuttanti** tadaṅgavikkhambhanavimuttīhi vimuttaṃ. **Avimuttanti** ubhayavimuttivirahitaṃ, samucchedapaññāpassaddhinissaraṇavimuttīnaṃ pana idha okāsova natthi.

1. Pasavacittaṃ (Syā)

Iti ajjhataṃ vāti evaṃ sarāgādipariggahaṇena yasmim̐ yasmim̐ khaṇe yaṃ yaṃ cittaṃ pavattati, taṃ taṃ sallakkhento attano vā citte, parassa vā citte, kālena vā attano, kālena vā parassa citte cittānupassī viharati.

Samudayavayadhammānupassīti ettha pana “avijjāsamudayā viññāṇasamudayo”¹ evaṃ pañcahi pañcahi ākārehi viññāṇassa samudayo ca vayo ca nīharitabbo. Ito paraṃ vuttanayameva.

Kevalaṅhi idha cittapariggāhikā sati dukkhasaccanti evaṃ yojanaṃ katvā cittapariggāhakassa bhikkhuno niyyānamukhaṃ veditabbaṃ. Sesam̐ tādīsamevāti.

Cittānupassanā niṭṭhitā.

Dhammānupassanā nīvaraṇapabbavaṇṇanā

115. Evaṃ soḷasavidhena cittānupassanāsatiṭṭhānaṃ kathetvā idāni pañcavidhena dhammānupassanaṃ kathetuṃ **kathaṅca bhikkhave**ti-ādimāha. Api ca Bhagavatā kāyānupassanāya suddharūpapariggaho kathito, vedanācittānupassanāhi suddha-arūpapariggaho. Idāni rūpārūpamissakapariggahaṃ kathetuṃ “kathaṅca bhikkhave”ti-ādimāha. Kāyānupassanāya vā rūpakkhandhapariggahova kathito, vedanānupassanāya vedanākkhandhapariggahova, cittānupassanāya viññāṇakkhandhapariggahovāti idāni saññāsañkhārakkhandhapariggahampi kathetuṃ “kathaṅca bhikkhave”ti-ādimāha.

Tattha **santanti** abhiṇhasamudācāravasena saṃvijjamānaṃ. **Asantanti** asamudācāravasena vā pahīnattā vā avijjamānaṃ. **Yathā cāti** yena kāraṇena kāmacchandassa uppādo hoti. **Taṅca pajānātīti** taṅca kāraṇaṃ pajānāti. Iminā nayena sabbapadesu attho veditabbo.

Tattha subhanimutte ayonisomanasikārena kāmacchandassa uppādo hoti. Subhanimittam̐ nāma subhampi subhanimittam̐, subhārammaṇampi subhanimittam̐. **Ayonisomanasikāro** nāma anupāyamanasikāro uppathamanasikāro anicce niccanti vā dukkhe sukham̐ti vā anattani attāti vā

1. Khu 9. 54 piṭṭhe Paṭisambhidāmagge.

asubhe subhanti vā manasikāro, taṃ tattha bahulaṃ pavattayato kāmaccando uppajjati. Tenāha Bhagavā “atthi bhikkhave subhanimittaṃ, tattha ayonisomanasikārabahulikāro, ayamāhāro anuppanassa vā kāmaccandassa uppādāya uppanassa vā kāmaccandassa bhiiyobhāvāya vepullāyā”ti¹.

Asubhanimitte pana yonisomanasikārenassa pahānaṃ hoti.

Asubhanimittaṃ nāma asubhampi asubhārammaṇampi. **Yonisomanasikāro** nāma upāyamanasikāro pathamanasikāro anicce aniccanti vā dukkhe dukkhanti vā anattani anattāti vā asubhe asubhanti vā manasikāro, taṃ tattha bahulaṃ pavattayato kāmaccando pahīyati. Tenāha Bhagavā “atthi bhikkhave asubhanimittaṃ, tattha yonisomanasikārabahulikāro, ayamāhāro anuppanassa vā kāmaccandassa anuppādāya uppanassa vā kāmaccandassa pahānāyā”ti².

Api ca cha dhammā kāmaccandassa pahānāya samvattanti asubhanimittassa uggaho asubhabhāvanānuyogo indriyesu guttadvāratā bhojane mattaññutā kalyāṇamittatā sappāyakathāti. Dasavidhañhi asubhanimittaṃ uggaṇhantassāpi kāmaccando pahīyati, bhāventassāpi, indriyesu pihitadvārassāpi, catunnaṃ pañcannaṃ ālopānaṃ okāse sati udakaṃ pivivā yāpanasīlatāya bhojane mattaññunopi. Tenetaṃ vuttaṃ—

“Cattāro pañca ālope, abhutvā udakaṃ pive.

Alaṃ phāsuvihārāya, pahitattassa bhikkhuno”ti³.

Asubhakammikatissattherasadise asubhavanārate kalyāṇamitte sevantassāpi kāmaccando pahīyati, ṭhānanisajjādīsu dasa-asubhanissitasappāyakathāyapi pahīyati. Tena vuttaṃ “cha dhammā kāmaccandassa pahānāya samvattantī”ti. Imehi pana chahi dhammehi pahīnassa kāmaccandassa arahattamaggena āyatim anuppādo hotīti pajānāti.

Paṭighanimitte ayonisomanasikārena pana byāpādassa uppādo hoti. Tattha paṭighampi paṭighanimittaṃ, paṭighārammaṇampi paṭighanimittaṃ. Ayonisomanasikāro sabbattha ekalakkaṇova. Taṃ tasmim nimitte bahulaṃ

1. Saṃ 3. 90 piṭṭhe.

2. Saṃ 3. 93 piṭṭhe.

3. Khu 2. 343 piṭṭhe.

pavattayato byāpādo uppajjati. Tenāha Bhagavā “atthi bhikkhave paṭighanimittam, tattha ayonisomanasikārabahulikāro, ayamāhāro anuppannassa vā byāpādassa uppādāya uppannassa vā byāpādassa bhiyyobhāvāya vepullāyā”¹.

Mettāya pana cetovimuttiyā yonisomanasikārenassa pahānam hoti. Tattha tattha “mettā”^{ti} vutte appanāpi upacāropi vaṭṭati. “Cetovimutti”^{ti} appanāva. Yonisomanasikāro vuttalakkaṇova. Tam tattha bahulam pavattayato byāpādo pahiyati. Tenāha Bhagavā “atthi bhikkhave mettā cetovimutti, tattha yonisomanasikārabahulikāro, ayamāhāro anuppannassa vā byāpādassa anuppādāya uppannassa vā byāpādassa pahānāyā”².

Api ca cha dhammā byāpādassa pahānāya saṁvattanti mettānimittassa uggaho mettābhāvanānuyogo kammassakatāpaccavekkhaṇā paṭisaṅkhānabahutā kalyāṇamittatā sappāyakathāti. Odhisaka-anodhisakadisāpharaṇānañhi aññataravasena mettā uggāṇhantassāpi byāpādo pahiyati, odhiso anodhiso disāpharaṇavasena mettā bhāventassāpi. “Tvam etassa kuddho kim karissasi, kimassa silādīni nāsetum sakkhissasi, nanu tvam attano kamma āgantvā attano kammeneva gamissasi, parassa kujjhanam nāma vītaccitaṅgāra tatta-ayasalāka gūthādīni gahetvā param paharitukāmatāsadisam hoti. Esopi tava kuddho kim karissati, kim te silādīni vināsetum sakkhissati, esa attano kammeneva āgantvā attano kamma gamissati, appaṭicchitapaheṇakam viya paṭivātam khittarajomuṭṭhi viya ca etassevesa kodho matthake patissati”^{ti} evam attano ca parassa ca kammassakataṁ paccavekkhatopi, ubhayakammassakataṁ paccavekkhitvā paṭisaṅkhāne ṭhitassāpi, Assaguttattherasadise mettābhāvanārate kalyāṇamitte sevantassāpi byāpādo pahiyati. Ṭhānanisajjādīsu mettānissitasappāyakathāyapi pahiyati. Tena vuttam “cha dhammā byāpādassa pahānāya saṁvattanti”^{ti}. Imehi pana chahi dhammehi pahīnassa byāpādassa anāgāmi maggena āyatim anuppādo hotīti pajānāti.

1. Saṁ 3. 91 piṭṭhe.

2. Saṁ 3. 93 piṭṭhe.

Arati-ādīsu ayonisomanasikārena thinamiddhassa uppādo hoti. **Arati** nāma ukkaṇṭhitā. **Tandī** nāma kāyālasiyatā. **Vijambhitā** nāma kāyavināmanā. **Bhattasammado** nāma bhattamucchā bhattapariḷāho. **Cetaso līnattam** nāma cittassa līnākāro. Imesu arati-ādīsu ayonisomanasikāraṃ bahulaṃ pavattayato thinamiddhaṃ uppajjati. Tenāha “atthi bhikkhave arati tandī vijambhitā bhattasammado cetaso līnattam, tattha ayonisomanasikārabahulikāro, ayamāhāro anuppannessa vā thinamiddhassa uppādāya uppannessa vā thinamiddhassa bhīyyobhāvāya vepullāyā”¹.

Ārambhadhātu-ādīsu pana yonisomanasikārenassa pahānaṃ hoti. **Ārambhadhātu** nāma paṭhamārambhavīriyaṃ. **Nikkamadhātu** nāma kosajjato nikkhantatāya tato balavataraṃ. **Parakkamadhātu** nāma paraṃ paraṃ ṭhānaṃ akkamanato tatopi balavataraṃ. Imasmiṃ tippabhede vīriye yonisomanasikāraṃ bahulaṃ pavattayato thinamiddhaṃ pahīyati. Tenāha “atthi bhikkhave ārambhadhātu nikkamadhātu parakkamadhātu, tattha yonisomanasikārabahulikāro, ayamāhāro anuppannessa vā thinamiddhassa anuppādāya uppannessa vā thinamiddhassa pahānāyā”².

Api ca cha dhammā thinamiddhassa pahānāya saṃvattanti, atibhojane nimittaggāho iriyāpathasamparivattanatā ālokasaññāmanasikāro abbhokāsavāso kalyāṇamittatā sappāyakathāti. Āharahatthaka tatravaṭṭaka alaṃsāṭaka kākamāsaka bhuttavamitaka bhojanaṃ bhuñjitvā rattiṭṭhāne divāṭṭhāne nisinnassa hi samaṇadhammaṃ karoto thinamiddhaṃ mahāhatthī viya ottharantaṃ āgacchati. Catupañca-ālopa-okāsaṃ pana ṭhapetvā pānīyaṃ pivtvā yāpanasīlassa bhikkhuno taṃ na hotīti evaṃ atibhojane nimittaṃ gaṇhantassāpi thinamiddhaṃ pahīyati. Yasmiṃ iriyāpathe thinamiddhaṃ okkamati, tato aññaṃ parivattentassāpi, rattiṃ candālokadīpāloka-ukkāloke divā sūriyālokaṃ manasikarontassāpi, abbhokāse vasantassāpi, Mahākassapattherasadise pahīnathinamiddhe kalyāṇamitte sevantassāpi thinamiddhaṃ pahīyati. Ṭhānanisajjādīsu dhutaṅganissitasappāyakathāyapi pahīyati. Tena vuttaṃ “cha dhammā thinamiddhassa

1. Saṃ 3. 91 piṭṭhe.

2. Saṃ 3. 92 piṭṭhe.

pahānāya saṁvattantī”ti. Imehi pana chahi dhammehi pahīnassa thinamiddhassa arahattamaggena āyatim anuppādo hotīti pajānāti.

Cetaso avūpasame ayonisomanasikārena uddhaccakukkuccassa uppādo hoti. **Avūpasamo** nāma avūpasantākāro. Uddhaccakukkuccamevetam atthato. Tattha ayonisomanasikāram bahulam pavattayato uddhaccakukkuccam uppajjati. Tenāha “atthi bhikkhave cetaso avūpasamo, tattha ayonisomanasikārabahulikāro, ayamāhāro anuppanna vā uddhaccakukkuccassa uppādāya uppanna vā uddhaccakukkuccassa bhiyyobhāvāya vepullāyā”ti¹.

Samādhisaṅkhāte pana cetaso vūpasame yonisomanasikārenassa pahānam hoti. Tenāha “atthi bhikkhave cetaso vūpasamo, tattha yonisomanasikārabahulikāro, ayamāhāro anuppanna vā uddhaccakukkuccassa anuppādāya uppanna vā uddhaccakukkuccassa pahānāyā”ti².

Api ca cha dhammā uddhaccakukkuccassa pahānāya saṁvattanti bahussutā paripucchakatā vinaye pakataññutā vuddhasevitā kalyāṇamittatā sappāyakathāti. Bāhusaccenapi hi ekaṁ vā dve vā tayo vā cattāro vā pañca vā nikāye Pāḷivasena ca atthavasena ca uggaṇhantassāpi uddhaccakukkuccam pahīyati. Kappiyākappiyapariucchābahulassāpi, vinayapaññattiyam ciṇṇavasibhāvatāya pakataññunopi, vuddhe mahallakattare upasaṅkamantassāpi, Upālittherasadise vinayadhare kalyāṇamitte sevantassāpi uddhaccakukkuccam pahīyati. Thānanisajjādīsu kappiyākappiyānissitasappāyakathāyapi pahīyati. Tena vuttam “cha dhammā uddhaccakukkuccassa pahānāya saṁvattantī”ti. Imehi pana chahi dhammehi pahīne uddhaccakukkucce uddhaccassa arahattamaggena kukkuccassa anāgāmaggena āyatim anuppādo hotīti pajānāti.

Vicikicchāṭṭhānīyesu dhammesu ayonisomanasikārena vicikicchāya uppādo hoti. **Vicikicchāṭṭhānīyā** dhammā nāma punappunam vicikicchāya kāraṇatā vicikicchāva. Tattha ayonisomanasikāram bahulam pavattayato vicikicchā uppajjati. Tenāha “atthi bhikkhave vicikicchāṭṭhānīyā

1. Saṁ 3. 91 piṭṭhe.

2. Saṁ 3. 93 piṭṭhe.

dhammā, tattha ayonisomanasikārabahulikāro, ayamāhāro anuppannāya vā vicikicchāya uppādāya uppannāya vā vicikicchāya bhīyyobhāvāya vepullāyā”ti¹.

Kusalādīsu dhammesu yonisomanasikārena panassā pahānaṃ hoti. Tenāha “atthi bhikkhave kusalākusalā dhammā sāvajjānavajjā dhammā sevitabbāsevitabbā dhammā hīnappaṇītā dhammā kaṇhasukkasappaṭibhāgā dhammā, tattha yonisomanasikārabahulikāro, ayamāhāro anuppannāya vā vicikicchāya anuppādāya uppannāya vā vicikicchāya pahānāyā”ti².

Api ca cha dhammā vicikicchāya pahānāya saṃvattanti bahussutatā paripucchakatā vinaye pakataññūtā adhimokkhabahulatā kalyāṇamittatā sappāyakathāti. Bāhusaccenapi hi ekaṃ vā -pa- pañca vā nikāye Pāḷivasena atthavasena atthavasena ca uggaṇhantassāpi vicikicchā pahīyati. Tīṇi ratanāni ārabha paripucchābahulassāpi, vinaye ciṇṇavasibhāvassāpi, tīsu ratanesu okappaniyasaddhāsaṅkhātā-adhimokkhabahulassāpi, saddhādhimutte Vakkalitherasadise kalyāṇamitte sevantassāpi vicikicchā pahīyati. Thānanisajjādīsu tiṇṇaṃ ratanānaṃ guṇanissitasappāyakathāyapi pahīyati. Tena vuttaṃ “cha dhammā vicikicchāya pahānāya saṃvattanti”ti. Imehi pana chahi dhammehi pahānāya vicikicchāya sotāpattimaggena āyatim anuppādo hotīti pajānāti.

Iti ajjhataṃ vāti evaṃ pañcanīvaraṇapariggahaṇena attano vā dhammesu, parassa vā dhammesu, kālena vā attano, kālena vā parassa dhammesu dhammānupassī viharati. Samudayavayā panettha subhanimitta asubhanimittādīsu ayonisomanasikārayonisomanasikāravasena pañcasu nīvaraṇesu vuttanayena nīharitabbā. Ito paraṃ vuttanayameva.

Kevalaṅhi idha nīvaraṇapariggāhikā sati dukkhasaccanti evaṃ yojanaṃ katvā nīvaraṇapariggāhakassa bhikkhuno niyyānamukhaṃ veditabbaṃ. Sesaṃ tādīsamevāti.

Nīvaraṇapabbavaṇṇanā niṭṭhitā.

1. Saṃ 3. 91 piṭṭhe.

2. Saṃ 3. 93 piṭṭhe.

Khandhapabbavaṇṇanā

116. Evaṃ pañcaṇīvaraṇavasena dhammānupassanaṃ vibhajitvā idāni pañcakkhandhavasena vibhajitum **puna caparanti**-ādimāha. Tattha **pañcasu upādānakkhandhesūti** upādānassa khandhā upādānakkhandhā, upādānassa paccayabhūtā dhammapuñjā dhammarāsayoti attho. Ayamettha saṅkhepo. Vitthārato pana Khandhakathā Visuddhimagge vuttā. **Iti rūpanti** “idaṃ rūpaṃ, ettakaṃ rūpaṃ, na ito paraṃ rūpaṃ atthī”ti sabhāvato rūpaṃ pajānāti, **vedanādīsupi** eseva nayo. Ayamettha saṅkhepo. Vitthārena pana rūpādāni Visuddhimagge Khandhakathāyameva vuttāni. **Iti rūpassa samudayoti** evaṃ avijjāsamudayādivasena pañcahākārehi rūpassa samudayo. **Iti rūpassa atthaṅgamoti** evaṃ avijjānirodhādivasena pañcahākārehi rūpassa atthaṅgamo, vedanādīsupi eseva nayo. Ayamettha saṅkhepo. Vitthāro pana Visuddhimagge udayabbayañāṅakathāyaṃ vutto.

Iti ajjhataṃ vāti evaṃ pañcakkhandhapariggahaṇena attano vā dhammesu, parassa vā dhammesu, kālena vā attano, kālena vā parassa dhammesu dhammānupassī viharati. Samudayavayā panettha “avijjāsamudayā rūpasamudayo”ti-ādīnaṃ¹ pañcasu khandhesu vuttānaṃ paññāsāya lakkhaṇānaṃ vasena nīharitabbā. Ito paraṃ vuttanayameva.

Kevalaṇhi idha khandhapariggāhikā sati dukkhasaccanti evaṃ yojanaṃ katvā khandhapariggāhakassa bhikkhuno niyyānamukhaṃ vedītabbāṃ. Sesāṃ tādīsamevāti.

Khandhapabbavaṇṇanā niṭṭhitā.

Āyatanapabbavaṇṇanā

117. Evaṃ pañcakkhandhavasena dhammānupassanaṃ vibhajitvā idāni āyatanavasena vibhajitum **puna caparanti**-ādimāha. Tattha **chasu ajjhattikabāhiresu āyatanesūti** cakkhu sotāṃ ghānaṃ jivhā kāyo manoti imesu chasu ajjhattikesu rūpaṃ saddo gandho raso phoṭṭhabbo dhammāti imesu

1. Khu 9. 53 Paṭisambhidāmagge.

chasu bāhiresu. **Cakkhum ca pajānāti**ti cakkhupasādam
yāthāvasarasalakkhaṇavasena pajānāti. **Rūpe ca pajānāti**ti bahiddhā
catusamuṭṭhānikarūpañca yāthāvasarasalakkhaṇavasena pajānāti. **Yañca
tadubhayaṃ paṭicca uppajjati saññojananti** yañca taṃ cakkhum ceva rūpe
cāti ubhayaṃ paṭicca kāmarāgasaññojanam
paṭighamānadiṭṭhivicikicchāsīlabbataparāmāsabhavarāga-
issāmacchariyāvijjāsāññojananti dasavidham saññojanam uppajjati, tañca
yāthāvasarasalakkhaṇavasena pajānāti.

Katham panetaṃ uppajjati. Cakkhudvāre tāva āpāthagataṃ
iṭṭhārammaṇam kāmassādasena assādayato abhinandato
kāmarāgasāññojanam uppajjati. Anīṭṭhārammaṇe kujjhato
paṭighasāññojanam uppajjati. “Ṭhapetvā maṃ na koci añño etaṃ
ārammaṇam vibhāvetuṃ samattho atthī”ti maññato mānasāññojanam
uppajjati. “Etaṃ rūpārammaṇam niccam dhuvan”ti gaṇhato
diṭṭhisāññojanam uppajjati. “Etaṃ rūpārammaṇam satto nu kho, sattassa nu
kho”ti vicikicchato vicikicchāsāññojanam uppajjati. “Sampattibhave vata no
idaṃ sulabham jātan”ti bhavaṃ patthentassa bhavarāgasāññojanam
uppajjati. “Āyatimpi evarūpaṃ sīlabbataṃ samādiyivā sakkā laddhun”ti
sīlabbataṃ samādiyantassa sīlabbataparāmāsasāññojanam uppajjati. “Aho
vata etaṃ rūpārammaṇam aññe na labheyyun”ti usūyato¹ issāsāññojanam
uppajjati. Attanā laddham rūpārammaṇam aññassa maccharāyato
macchariyasāññojanam uppajjati. Sabbeheva sahaajāta-aññāṇavasena
avijjāsāññojanam uppajjati.

Yathā ca anuppanassāti yena kāraṇena asamudācārasena
anuppanassa tassa dasavidhassāpi saññojanassa uppādo hoti, tañca kāraṇam
pajānāti. **Yathā ca uppanassāti** appahīnaṭṭhena pana samudācārasena vā
uppanassa tassa dasavidhassāpi saññojanassa yena kāraṇena pahānam hoti,
tañca kāraṇam pajānāti. **Yathā ca pahīnassāti**
tadaṅgavikkhambhanappahānavasena pahīnassāpi tassa dasavidhassa
saññojanassa yena kāraṇena āyatim anuppādo hoti, tañca pajānāti. Kena
kāraṇena panassa āyatim anuppādo hoti? Diṭṭhivicikicchāsīlabbataparāmāsa-
issāmacchariyabhedassa tāva pañcavidhassa saññojanassa

1. Usūyāyato (Syā)

sotāpattimaggena āyatim̄ anuppādo hoti.

Kāmarāgapaṭiḡhasaññojanadvayassa oḷārikassa sakadāgāmimaggena, aṇusahagatassa anāgāmimaggena, mānabhavarāgāvijjāsaññojanattayassa arahattamaggena āyatim̄ anuppādo hoti.

Sotañca pajānāti sadde cāti-ādīsupi eseva nayo. Apicettha āyatanakathā vitthārato Visuddhimagge Āyatananiddese vuttanayeneva veditabbā.

Iti ajjhataṃ vāti evaṃ ajjhattikāyatanapariggahaṇena attano vā dhammesu, bāhirāyatanapariggahaṇena parassa vā dhammesu, kālena vā attano, kālena vā parassa dhammesu dhammānupassī viharati. Samudayavayā panettha “avijjāsamudayā cakkhusamudayo”ti rūpāyatanassa rūpakkhandhe, arūpāyatanesu manāyatanassa viññāṇakkhandhe, dhammāyatanassa sesakkhandhesu vuttanayene nīharitabbā. Lokuttaradhammā na gahetabbā. Ito paraṃ vuttanayameva.

Kevalañhi idha āyatanapariggāhikā sati dukkhasaccanti evaṃ yojanaṃ katvā āyatanapariggāhakassa bhikkhuno niyyānamukhaṃ veditabbaṃ. Sesāṃ tādīsamevāti.

Āyatanapabbavaṇṇanā niṭṭhitā.

Bojjhaṅgapabbavaṇṇanā

118. Evaṃ cha-ajjhattikabāhirāyatanavasena dhammānupassanaṃ vibhajitvā idāni bojjhaṅgavasena vibhajituṃ **puna caparanti-ādīmāha**. Tattha **bojjhaṅgesūti** bujghanakasattassa aṅgesu. **Santanti** paṭilābhavasena saṃvijjamānaṃ. **Satisambojjhaṅganti** satisaṅkhātaṃ sambojjhaṅgaṃ. Ettha hi sambujjhati āraddhavipassakato paṭṭhāya yogāvacaroti sambodhi, yāya vā so sati-ādīkāya sattadhammasāmaggiyā sambujjhati kilesaniddāto uṭṭhāti, saccāni vā paṭivijjhanti, sā dhammasāmaggī sambodhi. Tassa sambodhissa, tassā vā sambodhiyā aṅganti **sambojjhaṅgaṃ**. Tena vuttaṃ “satisaṅkhātaṃ sambojjhaṅgaṃ”ti. Sesasambojjhaṅgesupi imināva nayena vacanatto veditabbo.

Asantanti appaṭilābhavasena avijjamānaṃ. **Yathā ca anuppannessāti-**ādīsu pana satisambojjhaṅgassa tāva “atthi bhikkhave satisambojjhaṅgaṭṭhānīyā dhammā, tattha yonisomanasikārabahulīkāro, ayamāhāro anuppannassa vā satisambojjhaṅgassa uppādāya, uppannassa vā satisambojjhaṅgassa bhīyyobhāvāya vepullāya bhāvanāya pāripūriyā saṃvattatī”¹ti evaṃ uppādo hoti. Tattha satīyeva satisambojjhaṅgaṭṭhānīyā dhammā. Yonisomanasikāro vuttalakkaṇoyeva, taṃ tattha bahulaṃ pavattayato satisambojjhaṅgo uppajjati.

Api ca cattāro dhammā satisambojjhaṅgassa uppādāya saṃvattanti satisampajaññaṃ muṭṭhassatipuggalaparivajjanatā upaṭṭhitassatipuggalasevanatā tadadhimuttatāti. Abhikkantādīsu hi sattu upaṭṭhānesu satisampajaññaena bhattanikkhittakākasadise muṭṭhassatipuggale parivajjanena Tissadattathera-abhayattherasadise upaṭṭhitassatipuggale sevanena ṭhānanisajjādīsu satīsamuṭṭhāpanatthaṃ ninnapoṇapabbhāracittatāya ca satisambojjhaṅgo uppajjati. Evaṃ catūhi kāraṇehi uppannassa panassa arahattamaggena bhāvanāpāripūrī hotīti pajānāti.

Dhammavicayasambojjhaṅgassa pana “atthi bhikkhave kusalākusalā dhammā -pa- kaṇhasukkasappaṭibhāgā dhammā, tattha yonisomanasikārabahulīkāro, ayamāhāro anuppannassa vā dhammavicayasambojjhaṅgassa uppādāya, uppannassa vā dhammavicayasambojjhaṅgassa bhīyyobhāvāya vepullāya bhāvanāya pāripūriyā saṃvattatī”²ti evaṃ uppādo hoti.

Api ca satta dhammā dhammavicayasambojjhaṅgassa uppādāya saṃvattanti paripucchakatā vatthuvisadakiriyā indriyasamattapaṭipādanā duppaññapuggalaparivajjanā paññavantapuggalasevanā gambhīraññācariyapaccavekkhaṇā tadadhimuttatāti. Tattha **paripucchakatā**ti khandhadhātu-āyatana-indriyabalabojjhaṅgamaggaṅgajhānaṅgasamathavipassanānaṃ atthasannissitaparipucchābahulatā.

Vatthuvisadakiriyāti ajjhattikabāhirānaṃ vatthūnaṃ visadabhāvakaṇaṃ. Yadā hissa kesanakhalomā atidīghā hontī, sarīraṃ vā ussanadosaṅceva sedamalamakkhitaṅca, tadā ajjhattikaṃ vatthu avisadaṃ hoti

1. Saṃ 3. 60 piṭṭhe.

2. Saṃ 3. 91 piṭṭhe.

aparissuddham. Yadā pana cīvaraṃ jīṇaṃ kiliṭṭhaṃ duggandhaṃ hoti, senāsaṇaṃ vā uklāpaṃ, tadā bāhiraṃ vatthu avisadaṃ hoti aparissuddham. Tasmā kesādicchedāpanena uddhaṃvirecana-adhovirecanādīhi sarīrasallahukabhāvakaraṇena ucchādananhāpanena ca ajjhattikaṃ vatthu visadaṃ kātabbhaṃ.

Sūcikkammadhovanarajanaparibhaṇḍakaraṇādīhi bāhiraṃ vatthu visadaṃ kātabbhaṃ. Etasmiñhi ajjhattikabāhire vatthusmiṃ avisade uppannesu cittacetāsikesu ñāṇampi aparissuddhaṃ hoti, aparissuddhāni dīpakapallakavaṭṭitelāni nissāya uppannadīpasikhāya obhāso viya. Visade pana ajjhattikabāhire vatthumhi uppannesu cittacetāsikesu ñāṇampi visadaṃ hoti, aparissuddhāni dīpakapallakavaṭṭitelāni nissāya uppannadīpasikhāya obhāso viya. Tena vuttaṃ “vatthuvisadakiriya dhammavicayasambojjhaṅgassa uppādāya saṃvattatī”ti.

Indriyasamattapaṭipādanā nāma saddhādīnaṃ indriyānaṃ samabhāvakaraṇaṃ. Sace hissa saddhindriyaṃ balavaṃ hoti, itarāni mandāni. Tato vīriyindriyaṃ paggahakiccaṃ, satindriyaṃ upaṭṭhānakiccaṃ, samādhindriyaṃ avikkhepakiccaṃ, paññindriyaṃ dassanakiccaṃ kātuṃ na sakkoti. Tasmā taṃ dhammasabhāvapaccavekkhaṇena vā yathā vā manasikaroto balavaṃ jātaṃ, tathā amanasikārena hāpetabbaṃ. Vakkalittherassa vatthu cettha nidassanaṃ. Sace pana vīriyindriyaṃ balavaṃ hoti, atha neva saddhindriyaṃ adhimokkha-kiccaṃ kātuṃ sakkoti, na itarāni itarakiccabhedā. Tasmā taṃ passaddhādibhāvanāya hāpebbaṃ. Tatrāpi Soṇattherassa vatthu dassetabbaṃ. Evaṃ sesesupi ekassa balavabhāve sati itaresaṃ attano kiccesu asamatthatā veditabbā.

Visesato panettha saddhāpaññānaṃ samādhivīriyānaṃ ca samataṃ pasaṃsanti. Balavasaddho hi mandapañño mudhāpasanno¹ hoti, avatthusmiṃ pasīdati. Balavapañño mandasaddho kerāṭikapakkhaṃ bhajati. Bhesajjasamuṭṭhito viya rogo atekiccho hoti. Cittuppādamatteneva kusalaṃ hotīti atidhāvitvā dānādīni akaronto niraye uppajjati. Ubhinnaṃ samatāya vatthusmiṃyeva pasīdati. Balavasamādhim² pana mandavīriyaṃ samādhissa kosajjapakkhattā kosajjaṃ adhibhavati. Balavavīriyaṃ mandasamādhim³ vīriyassa

1. Muddhappasanno (Sī, Syā)

2. Balavasamādhī (Sī), balavā samādhī (Syā)

3. Mandasamādhī (Sī), mando samādhī (Syā)

uddhaccapakkhattā uddhaccaṃ adhibhavati. Samādhi pana vīriyena saṃyojito kosajje patitum na labhati. Vīriyaṃ samādhinā saṃyojitaṃ uddhacce patitum na labhati. Tasmā tadubhayaṃ samaṃ kātabbāṃ. Ubhayasamatāya hi appanā hoti.

Api ca samādhikammikassa balavatīpi saddhā vaṭṭati. Evaṃ saddahanto okappento appanaṃ pāpuṇissati. Samādhipaññāsu pana samādhikammikassa ekaggatā balavatī vaṭṭati, evaṃhi so appanaṃ pāpuṇāti. Vipassanākammikassa paññā balavatī vaṭṭati, evaṃhi so lakkhaṇappaṭivedhaṃ pāpuṇāti. Ubhinnaṃ pana samatāyapi¹ appanā hotiyeva. Sati pana sabbattha balavatī vaṭṭati. Sati hi cittaṃ uddhaccapakkhikānaṃ saddhāvīriyapaññānaṃ vasena uddhaccapātato, kosajjapakkhikena ca samādhinā kosajjapātato rakkhati. Tasmā sā loṇadhūpanaṃ viya sabbabyañjanesu sabbakammika-amacco viya ca sabbarājakicesu sabbattha icchitabbā. Tenāha “sati ca pana sabbatthikā vuttā Bhagavatā. Kim kārāṇā? Cittaṃhi sati paṭissaraṇaṃ, ārakkhapaccupaṭṭhānā ca sati, na ca vinā satiyā cittassa paggahaniggaho hoti”ti.

Duppaññapuggalaparivajjanā nāma khandhādibhede anogaḷhapaññānaṃ dummedhapuggalānaṃ ārakāva parivajjanāṃ. **Paññavantaḷpuggalasevanā** nāma samapaññāsalakkhaṇapariggāhikāya udayabbayapaññāya samannāgatapuggalasevanā. **Gambhīraññācariyapaccavekkhaṇā** nāma gambhīresu khandhādīsū pavattāya gambhīrapaññāya pabhedapaccavekkhaṇā. **Tadadhimuttatā** nāma ṭhānanisajjādīsū dhammavicayasambojjhaṅgasamuṭṭhāpanatthaṃ ninnapoṇapabbhāracittatā. Evaṃ uppanassa panassa arahattamaggena bhāvanāpāripūrī hotīti pajānāti.

Vīriyasambojjhaṅgassa “atthi bhikkhave ārambhadhātu nikkamadhātu parakkamadhātu, tattha yonisomanasikārabahulīkāro, ayamāhāro anuppanassa vā vīriyasambojjhaṅgassa uppādāya, uppanassa vā vīriyasambojjhaṅgassa bhīyyobhāvāya vepullāya bhāvanāya pāripūriyā saṃvattatī”ti² evaṃ uppādo hoti.

1. Samatāya ca (Syā)

2. Saṃ 3. 92 piṭṭhe.

Api ca ekādasa dhammā vīriyasambojjhaṅgassa uppādāya saṁvattanti
 apāyabhayapaccavekkhaṇatā ānisaṁsadassāvitā
 gamanavīthipaccavekkhaṇatā piṇḍapātāpacāyanatā
 dāyajjamahattapaccavekkhaṇatā satthumahattapaccavekkhaṇatā
 jātimahattapaccavekkhaṇatā sabrahmacārimahattapaccavekkhaṇatā
 kusītapuggalaparivajjanatā āraddhavīriyapuggalasevanatā tadadhimuttatāti.

Tattha nirayesu pañcavidhabandhanakammakāraṇato paṭṭhāya
 mahādukkhaṁ anubhavanakālepi, tiracchānayoṇiyaṁ jālakkipakumīnādīhi
 gahitakālepi, pājanakaṇṭakādippahāratunnassa pana sakaṭavāhanādīkalepi,
 pettivisaye anekānipi vassasahassāni ekaṁ Buddhantarampi khuppipāsāhi
 āturitakālepi¹, kālakañjika-asuresu saṭṭhihattha-asītihatthappamāṇena²
 aṭṭhicammamatteneva atabhāvena vātātapādidukkhānubhavanakālepi na
 sakkā vīriyasambojjhaṅgaṁ uppādetuṁ, ayameva te bhikkhu kālo
 vīriyakaraṇāyāti evaṁ apāyabhayaṁ paccavekkhantassāpi
 vīriyasambojjhaṅgo uppajjati.

“Na sakkā kusītena navalokuttaradhammaṁ laddhuṁ,
 āraddhavīriyeneva sakkā ayamānisaṁso vīriyassā”ti evaṁ
 ānisaṁsadassāvinopi uppajjati. “Sabbabuddhapaccekabuddhamahāsāvakehi³
 te gatamaggo gantabbo, so ca na sakkā kusītena gantun”ti evaṁ
 gamanavīthiṁ paccavekkhantassāpi uppajjati. “Ye taṁ piṇḍapātādīhi
 upaṭṭhahanti, ime te manussā neva ñātakā, na dāsakammakarā, nāpi ‘taṁ
 nissāya jīvissāmā’ti te paṇītāni piṇḍapātādīni denti, atha kho attano kāraṇaṁ
 mahapphalataṁ paccāsīsamānā denti, Satthārāpi ‘ayaṁ ime paccaye
 paribhuñjitvā kāyadalhībahulo sukhaṁ viharissatī’ti na evaṁ sampassatā
 tuyhaṁ paccayā anuññātā, atha kho ‘ayaṁ ime paribhuñjamāno
 samaṇadhammaṁ katvā vaṭṭadukkhato muccissatī’ti te paccayā anuññātā, so
 dāni tvaṁ kusīto viharanto na taṁ piṇḍaṁ apacāyissasi, āraddhavīriyasessa
 hi piṇḍapātāpacāyanaṁ nāma hotī”ti evaṁ piṇḍapātāpacāyanaṁ
 paccavekkhantassāpi uppajjati Mahāmittattherassa viya.

1. Āturībhūtakālepi (Sī, Syā)

2. Sattatihattha-asītihatthappamāṇena (Ka)

3. ...mahāsāvakeva (Sī)

Thero kira kassakaleṇe nāma paṭivasati. Tassa ca gocaragāme ekā mahā-upāsikā theram puttam katvā paṭijjagati. Sā ekadivasam araṇṇam gacchantī dhītaram āha “amma asukasmim ṭhāne purāṇataṇḍulā, asukasmim khīram, asukasmim sappi, asukasmim phāṇitam, tava bhātikassa ayyamittassa āgatakāle bhattam pacitvā khīrasappiphāṇitehi saddhim dehi, tvam ca bhuñjeyyāsi, aham pana hiyyo pakkam pārivāsikabhattam kañjikenā bhuttāmhī”ti. Divā kim bhuñjissasi ammāti. Sākapaṇṇam pakkhipitvā kaṇataṇḍulehi ambilayāguṃ pacitvā ṭhapehi ammāti.

Thero cīvaram pārupitvā pattam nīharantova tam saddam sutvā attānam ovadi “mahā-upāsikā kira kañjiyena pārivāsikabhattam bhuñji, divāpi kaṇapaṇṇambilayāguṃ bhuñjissati, tuyham atthāya pana purāṇataṇḍulādīni ācikkhati, tam nissāya kho panesā neva khettam na vatthum na bhattam na vattham paccāsīsatī, tisso pana sampattiyo patthayamānā deti, tvam etissā tā sampattiyo dātum sakkhissasi na sakkhissasīti, ayam kho pana piṇḍapāto tayā sarāgena sadosena samohena na sakkā gaṇhitunti pattam thavikāya pakkhipitvā gaṇṭhikam muñcitvā nivattitvā kassakaleṇameva gantvā pattam heṭṭhāmañce cīvaram cīvaravamse ṭhapetvā arahattam apāpuṇitvā na nikkhamissāmī”ti vīriyam adhiṭṭhahitvā nisīdi. Dīgharattam appamatto hutvā nivutthabhikkhu vipassanam vaḍḍhetvā purebhattameva arahattam patvā vikasitam viya padumam mahākhīṇāsavo sitam karontova nikkhami. Leṇadvāre rukkhamhi adhivatthā devatā—

“Namo te purisājañña, namo te purisuttama.

Yassa te āsavā khīṇā, dakkhiṇeyyosi mārisā”ti—

Evam udānam udānetvā “bhante piṇḍāya pavīṭṭhānam tumhādisānam arahantānam bhikkham datvā mahallakittiyo dukkhā muccissantī”ti āha.

Thero uṭṭahitvā dvāram vivaritvā kalam olokento pātoyevāti ñatvā pattacīvaramādāya gāmam pāvisi. Dārikāpi bhattam sampādetvā “idāni me bhātā āgamissati, idāni āgamissati”ti dvāram olokayamānā nisīdi. Sā there gharadvāram sampatte pattam gahetvā sappiphāṇitayojitassa khīrapīṇḍapātassa pūretvā hatthe ṭhapesi. Thero “sukham hotū”ti anumodanam katvā pakkāmi. Sāpi tam

olokayamānāva aṭṭhāsi. Therassa hi tadā ativiya parisuddho chavivaṇṇo ahosi, vippasannāni indriyāni, mukhaṃ bandhanā pamuttatālapakkaṃ viya ativiya virocittha. Mahā-upāsikā araṇṇā āgantvā “kiṃ amma bhātiko te āgato”ti pucchi. Sā sabbaṃ taṃ pavattiṃ ārocesi. Sā upāsikā “ajja me puttassa pabbajitakiccaṃ matthakaṃ pattan”ti ñatvā “abhiramati te amma bhātā Buddhasāsane na ukkaṇṭhatī”ti āha.

“Mahantaṃ kho panetaṃ Satthu dāyajjaṃ, yadidaṃ satta-ariyadhanaṃ nāma, taṃ na sakkā kusītena gahetuṃ. Yathā hi vippaṭipannaṃ puttaṃ mātāpitaro ‘ayaṃ amhākaṃ aputto’ti paribāhiraṃ karonti, so tesāṃ accayena dāyajjaṃ na labhati, evaṃ kusītopi idaṃ ariyadhanadāyajjaṃ na labhati, āraddhavīriyova labhatī”ti dāyajjamahattataṃ paccavekkhatopi uppajjati. “Mahā kho pana te Satthā, Satthuno hi mātukucchismiṃ paṭisandhiggahaṇakālepi abhinikkhamaṇeṃpi abhisambodhiyampi dhammacakkappavattanayamakapāṭihāriyadevorohaṇa-āyusaṅkhāravossajjanesupi parinibbānakālepi dasasahasilokadhātu kampittha, yuttaṃ nu te evarūpassa Satthuno sāsane ‘pabbajitvā kusītena bhavitun’ti evaṃ Satthumahattaṃ paccavekkhatopi uppajjati.

Jātiyāpi “tvaṃ idāni na lāmakaajātiko, asambhinnāya mahāsammatapaveṇiyā āgato, Ukkākarājavaṃse jātosī, Suddhodhanamahārājassa Mahāmāyādeviyā ca nattā, Rāhulabhaddassa kaniṭṭho, tayā nāma evarūpena Jinaputtana hutvā na yuttaṃ kusītena viharitun”ti evaṃ jātimahattaṃ paccavekkhatopi uppajjati. “Sāriputtamoggallānā ceva asīti ca mahāsāvaka vīriyeneva lokuttaradhammaṃ paṭivijjhimsu, tvaṃ etesaṃ sabrahmacārīnaṃ maggaṃ paṭipajjissasi na paṭipajjissasi”ti evaṃ sabrahmacārimahattaṃ paccavekkhatopi uppajjati. Kucchiṃ pūretvā ṭhita-ajagarasadise vissatṭhakāyikacetasikavīriye kusītapuggale parivajjantassāpi, āraddhavīriye pahitatte puggale sevantassāpi, ṭhānanisajjādīsu vīriyuppādanatthaṃ ninnapoṇapabbhāracittassāpi uppajjati. Evaṃ uppānassa panassa arahattamaggena bhāvanāpāripūri hotīti pajānāti.

Pītisambojjhaṅgassa “atthi bhikkhave pītisambojjhaṅgaṭṭhānīyā dhammā, tattha yonisomanasikārabahulīkāro, ayamāhāro anuppannaṃ vā

pītisambojjhaṅgassa uppādāya, uppannassa vā pītisambojjhaṅgassa bhiyyobhāvāya vepullāya bhāvanāya pāripūriyā saṁvattatī”¹ti evaṁ uppādo hoti. Tattha pītiyeva pītisambojjhaṅgaṭṭhānīyā dhammā nāma, tassa uppādakamanasikāro yonisomanasikāro nāma.

Api ca ekādasa dhammā pītisambojjhaṅgassa uppādāya saṁvattanti Buddhānussati dhamma, saṅgha, sīla, cāga, devatānussati upasamānussati lūkhapuggalaparivajjanatā siniddhapuggalasevanatā pasādanīyasuttantapaccavekkhaṇatā tadadhimuttatīti.

Buddhagūṇe anussarantassāpi hi yāva upacārā sakalasarīraṁ pharamāno pītisambojjhaṅgo uppajjati. Dhammasaṅghagūṇe anussarantassāpi, dīgharattaṁ akhaṇḍaṁ katvā rakkhitaṁ catupārisuddhisīlaṁ paccavekkhantassāpi, gihino dasasīlapañcasīlaṁ paccavekkhantassāpi, dubbhikkhabhayādīsu paṇītaṁ bhojanaṁ sabrahmacārīnaṁ datvā “evaṁ nāma adamhā”ti cāgaṁ paccavekkhantassāpi, gihinopi evarūpe kāle sīlavantānaṁ dinnadānaṁ paccavekkhantassāpi, yehi guṇehi samannāgatā devatā devattaṁ pattā, tathārūpānaṁ guṇānaṁ attani atthitaṁ paccavekkhantassāpi, “samāpattiyā vikkhambhitā kilesā saṭṭhipi, sattatipi vassāni na samudācarantī”ti paccavekkhantassāpi, cetiyadassanabodhidassanatheradassanesu asakkaccakiriyāya saṁsūcitalūkhabhāve Buddhādīsu pasādasiṅhābhāvena gadrabhapiṭṭhe rajasadise lūkhapuggale parivajjantassāpi, Buddhādīsu pasādabahule muducitte siniddhapuggale sevantassāpi, ratanattayaguṇaparidīpake pasādanīye suttante paccavekkhantassāpi, ṭhānanisajjādīsu pīti-
uppādanatthaṁ ninnapoṇapabbhāracittassāpi uppajjati. Evaṁ uppannassa panassa arahattamaggena bhāvanāpāripūrī hotīti pajānāti.

Passaddhisambojjhaṅgassa “atthi bhikkhave kāyapassaddhi cittapassaddhi, tattha yonisomanasikārabahulīkāro, ayamāhāro anuppannassa vā passaddhisambojjhaṅgassa uppādāya, uppannassa vā passaddhisambojjhaṅgassa bhiyyobhāvāya vepullāya bhāvanāya pāripūriyā saṁvattatī”ti evaṁ uppādo hoti.

Api ca satta dhammā passaddhisambojjhaṅgassa uppādāya saṁvattanti paṇītabhojanasevanatā utusukhasevanatā iriyāpathasukhasevanatā

1. Saṁ 3. 92 piṭṭhe.

majjhataṭṭhapayogatā sāraddhakāyapuggalaparivajjanatā
passaddhakāyapuggalasevanatā tadadhimuttatāti.

Paṇītañhi siniddham sappāyabhojanam bhuñjantassāpi, sītuṅhesu utūsu
ṭhānādīsu iriyāpathesu sappāyam utum ca iriyāpatham ca sevantassāpi
passaddhi uppajjati. Yo pana mahāpurisajātiko sabba-utu-
iriyāpathakkhama hoti, na tam sandhāyetam vuttam. Yassa
sabhāgavisabhāgatā atthi, tasseva visabhāge utu-iriyāpathe vajjetvā sabhāge
sevantassāpi uppajjati. Majjhataṭṭhapayogo vuccati attano ca parassa ca
kammassakatāpaccavekkhaṇā, iminā majjhataṭṭhapayogena uppajjati. Yo
leḍḍudaṇḍādīhi param vihetṭhayamānova vicarati. Evarūpam sāraddhakāyam
puggalam parivajjantassāpi, samyatapādapāṇim passaddhakāyam puggalam
sevantassāpi, ṭhānanisajjādīsu passaddhi-uppādanatthāya
ninnapoṇapabbhāracittassāpi uppajjati. Evaṃ uppānassa panassa
arahattamaggena bhāvanāpāripūri hotīti pajānāti.

Samādhisambojjhaṅgassa “atthi bhikkhave samathanimittam
abyagganimittam, tattha yonisomanasikārabahulīkāro, ayamāhāro
anuppannassa vā samādhisambojjhaṅgassa uppādāya, uppannassa vā
samādhisambojjhaṅgassa bhīyyobhāvāya vepullāya bhāvanāya pāripūriyā
samvattatī”¹ti evaṃ uppādo hoti. Tattha samathova samathanimittam,
avikkhepaṭṭhena ca abyagganimittanti.

Api ca ekādasa dhammā samādhisambojjhaṅgassa uppādāya samvattanti
vatthuvisadakiriyatā indriyasamattapaṭipādanatā nimittakusalatā samaye
cittassa paggahaṇatā samaye cittassa niggahaṇatā samaye sampahaṃsanatā
samaye ajjuhekkhanatā asamāhitapuggalaparivajjanatā
samāhitapuggalasevanatā jhānavimokkhapaccavekkhaṇatā tadadhimuttatāti.
Tattha **vatthuvisadakiriyatā** ca **indriyasamattapaṭipādanatā** ca vuttanayeneva
veditabbā.

Nimittakusalatā nāma kaṣiṇanimittassa uggahaṇakusalatā. **Samaye
cittassa paggahaṇatā**ti yasmim samaye atisithilavīriyatādīhi līnam cittam
hoti, tasmim samaye dhammavicayavīriyasambojjhaṅgasamuṭṭhāpanena
tassa paggahaṇam. **Samaye cittassa niggahaṇatā**ti yasmim samaye

1. Saṃ 3. 92 piṭṭhe.

accāraddhavīriyatādīhi uddhataṃ cittaṃ hoti, tasmim̐ samaye passaddhisamādhī-upekkhāsambojjhaṅgasamuṭṭhāpanena tassa niggahaṇaṃ. **Samaye sampahaṃsanatā**ti yasmim̐ samaye cittaṃ paññāpayogamandatāya vā upasamasukhānadhigamena vā nirassādaṃ hoti, tasmim̐ samaye aṭṭhasaṃvegavatthupaccavekkhaṇena saṃvejeti. Aṭṭha saṃvegavatthūni nāma jātijarābyādhimaraṇāni cattāri, apāyadukkhaṃ pañcamaṃ, atīte vaṭṭamūlakaṃ dukkhaṃ, anāgate vaṭṭamūlakaṃ dukkhaṃ, paccuppanne āhārapariyeṭṭhimūlakaṃ dukkhanti. Ratanattayaguṇānussaraṇena ca pasādaṃ janeti. Ayaṃ vuccati “samaye sampahaṃsanatā”ti.

Samaye ajjupekkhanatā nāma yasmim̐ samaye sammāpaṭipattiṃ āgamma alīnaṃ anuddhataṃ anirassādaṃ ārammaṇe samappavattaṃ samathavīthipaṭipannaṃ cittaṃ hoti, tadāssa paggahaniggahasampahaṃsanesu na byāpāraṃ āpajjati sārathi viya samappavattesu. Assesu. Ayaṃ vuccati “samaye ajjupekkhanatā”ti. **Asamāhitapuggalaparivajjanatā** nāma upacāraṃ vā appanaṃ vā appattānaṃ vikkhittacittānaṃ puggalānaṃ ārakā parivajjanaṃ. **Samāhitapuggalasevanatā** nāma upacārena vā appanāya vā samāhitacittānaṃ sevanaṃ bhajānaṃ payirupāsanaṃ. **Tadadhimuttatā** nāma ṭhānanisajjādīsu samādhī-uppādanatthaṃyeva ninnapoṇapabbhāracittatā. Evañhi paṭipajjato esa uppajjati. Evaṃ uppanassa panassa arahattamaggena bhāvanāpāripūrī hotīti pajānāti.

Upekkhāsambojjhaṅgassa “atthi bhikkhave upekkhāsambojjhaṅgaṭṭhānīyā dhammā, tattha yonisomanasikārabahulīkāro, ayamāhāro anuppanassa vā upekkhāsambojjhaṅgassa uppādāya, uppanassa vā upekkhāsambojjhaṅgassa bhīyyobhāvāya vepullāya bhāvanāya pāripūriyā saṃvattatī”¹ evaṃ uppādo hoti. Tattha upekkhāyeva upekkhāsambojjhaṅgaṭṭhānīyā dhammā nāma.

Api ca pañca dhammā upekkhāsambojjhaṅgassa uppādāya saṃvattanti sattamajjhattatā saṅkhāramajjhattatā sattaśaṅkhārelāyanapuggalaparivajjanatā sattaśaṅkhāramajjhattapuggalasevanatā tadadhimuttatāti.

Tattha dvīhākārehi sattamajjhattataṃ samuṭṭhāpeti “tvaṃ attano kammaṇa āgantvā attano kammaṇa gamissasi, esopi attano kammaṇa

1. Saṃ 3. 92 piṭṭhe.

āgantvā attano kammena gamissati, tvaṃ kaṃ kelāyasi”ti evaṃ kammassakatāpaccavekkhaṇena ca, “paramatthato sattoyeva natthi, so tvaṃ kaṃ kelāyasi”ti evaṃ nissattapaccavekkhaṇena ca. Dvīhevākārehi saṅkhāramajjhataṃ samuṭṭhāpeti “idaṃ cīvaraṃ anupubbena vaṇṇavikāraṃ ceva jīṇṇabhāvaṃ ca upagantvā pādapuñchanacoḷakaṃ hutvā yaṭṭhikoṭiyā chaḍḍaniyaṃ bhavissati, sace panassa sāmiko bhaveyya, nāssa evaṃ vinassitum dadeyyā”ti evaṃ asāmikabhāvaṃ paccavekkhaṇena, “anaddhaniyaṃ idaṃ tāvakālikan”ti evaṃ tāvakālikatāpaccavekkhaṇena ca. Yathā ca cīvare, evaṃ pattādīsupi yojanā kātabbā.

Sattasaṅkhāra kelāyanapuggalaparivajjanatāti ettha yo puggalo gihi vā attano puttadhītādike, pabbajito vā attano antevāsikasamānupajjhāyakādike¹ mamāyati, sahattheneva nesāṃ kesacchedanasūcikkammacīvaradhovanarajanapattapacanādīni karoti, muhuttampi apassanto “asuko sāmaṇero kuhiṃ, asuko daharo kuhin”ti bhantamigo viya ito cito ca āloketi, aññena kesacchedanādīnaṃ atthāya “muhuttaṃ tāva asukaṃ pesethā”ti yācīyamānopi “amhepi taṃ attano kammaṃ na kārema, tumhe taṃ gahetvā kilamessathā”ti na deti. Ayaṃ **sattakelāyano** nāma. Yo pana pattacīvarathālakakattarayaṭṭhi-ādīni mamāyati, aññassa hatthena parāmasitumpi na deti, tāvakālikaṃ yācito “mayampi idaṃ mamāyantā² na paribhuñjāma, tumhākaṃ kiṃ dassāmā”ti vadati. Ayaṃ **saṅkhāra kelāyano** nāma. Yo pana tesu dvīsupi vatthūsu majjhatto udāsino. Ayaṃ **sattasaṅkhāramajjhatto** nāma. Iti ayaṃ upekkhāsambojjhaṅgo evarūpaṃ sattasaṅkhāra kelāyanaṃ puggalaṃ ārakā parivajjantassāpi, sattasaṅkhāramajjhattapuggalaṃ sevantassāpi, ṭhānanisajjādīsū taduppādanatthaṃ ninnapoṇapabbhāracittassāpi uppajjati. Evaṃ uppanassa panassa arahattamaggena bhāvanāpāripūrī hotīti pajānāti.

Iti ajjhataṃ vāti evaṃ attano vā satta sambojjhaṅge pariggaṇhitvā, parassa vā, kālena vā attano, kālena vā parassa bojjhaṅge

1. Antevāsikasaddhivihārikasamānupajjhāyakādike (Syā)

2. Noyantā (Ka)

pariggaṇhitvā dhammesu dhammānupassī viharati. Samudayavayā panettha bojjaṅgānaṃ nibbattinirodhavasena veditabbā. Ito paraṃ vuttanayameva.

Kevalañhi idha bojjaṅgapariggāhikā sati dukkhasaccanti evaṃ yojanaṃ katvā bojjaṅgapariggāhakassa bhikkhuno niyyānamukhaṃ veditabbaṃ. Sesāṃ tādīsamevāti.

Bojjaṅgapabbavaṇṇanā niṭṭhitā.

Catusaccapabbavaṇṇanā

119. Evaṃ sattabojjaṅgavasena dhammānupassanaṃ vibhajitvā idāni catusaccavasena vibhajituṃ **puna caparanti-ādimāha**.

Tattha **idaṃ dukkhanti yathābhūtaṃ pajānātīti** ṭhapetvā taṅhaṃ tebhūmake dhamme “idaṃ dukkhaṃ”ti yathāsabhāvato pajānāti, tasseva kho pana dukkhassa janikaṃ samuṭṭhāpikaṃ purimataṅhaṃ “ayaṃ dukkhasamudayo”ti, ubhinnaṃ appavattiṃ nibbānaṃ “ayaṃ dukkhanirodho”ti, dukkhaparijānaṃ samudayapajhanaṃ nirodhasacchikaraṇaṃ ariyamaggaṃ “ayaṃ dukkhanirodhagāminī paṭipadā”ti yathāsabhāvato pajānātīti attho. Avasesā ariyasaccakathā Visuddhimagge vitthāritāyeva.

Iti ajjhataṃ vāti evaṃ attano vā cattāri saccāni pariggaṇhitvā, parassa vā, kālena vā attano, kālena vā parassa cattāri saccāni pariggaṇhitvā dhammesu dhammānupassī viharati. Samudayavayā panettha catunnaṃ saccānaṃ yathāsambhavato uppattinivattivasena veditabbā. Ito paraṃ vuttanayameva.

Kevalañhi idha catusaccapariggāhikā sati dukkhasaccanti evaṃ yojanaṃ katvā saccapariggāhakassa bhikkhuno niyyānamukhaṃ veditabbaṃ. Sesāṃ tādīsamevāti.

Catusaccapabbavaṇṇanā niṭṭhitā.

Ettāvata ānāpānaṃ catu-iriyāpathaṃ catusampajaññaṃ dvattiṃsākāraṃ catudhātuvavatthānaṃ navasivathikā vedanānupassanā cittānupassanā nīvaraṇapariggaho khandhapariggaho āyatanapariggaho bojjhaṅgapariggaho saccapariggahoti ekavīsati kammaṭṭhānāni vuttāni. Tesu ānāpānaṃ dvattiṃsākāro navasivathikāti ekādasa appanākammaṭṭhānāni honti. Dīghabhāṇakamahāsīvatthero pana “navasivathikā ādīnavānupassanāvasena vuttā”ti āha. Tasmā tassa matena dveveva appanākammaṭṭhānāni, sesāni upacārakammaṭṭhānāni. Kim panetesu sabbesu abhiniveso jāyatīti. Na jāyati. Iriyāpathasampajaññānīvaraṇabojjhaṅgesu hi abhiniveso na jāyati, sesesu jāyatīti. Mahāsīvatthero panāha “etesupi abhiniveso jāyati, ayañhi atthi nu kho me cattāro iriyāpathā, udāhu natthi, atthi nu kho me catusampajaññaṃ, udāhu natthi, atthi nu kho me pañcanīvaraṇā, udāhu natthi, atthi nu kho me sattabojjhaṅgā, udāhu natthīti evaṃ pariggaṇhāti, tasmā sabbattha abhiniveso jāyatī”ti.

137. **Yo hi koci bhikkhavi** yo hi koci¹ bhikkhu vā bhikkhunī vā upāsako vā upāsikā vā. **Evaṃ bhāveyyāti** ādito paṭṭhāya vuttena bhāvanānukkamena bhāveyya. **Paṭikaṅkhanti** paṭikaṅkhitabbaṃ, avassaṃ bhāvīti attho. **Aññāti** arahattaṃ. **Sati vā upādiseseti** upādānasese vā sati aparikkhīṇe. **Anāgāmitāti** anāgāmi bhāvo.

Evaṃ sattannaṃ vassānaṃ vasena sāsanassa niyyānikabhāvaṃ dassetvā puna tato appatarepi kāle dassento “tiṭṭhantu bhikkhave”ti-ādīmāha. Sabbampi cetāṃ majjhimasseva neyyapuggalassa² vasena vuttaṃ. Tikkhapaññaṃ pana sandhāya “pāto anusitṭho sāyaṃ visesaṃ adhigamissati, sāyaṃ anusitṭho pāto visesaṃ adhigamissati”ti³ vuttaṃ.

1. Yo koci (Sī, Syā)

2. Veneyyapuggalassa (sabbattha), tikkhapaññaṃ panāti-ādivacanañca Majjhimapāṇṇāsake Bodhirājakumārasuttaṭṭhakathā ca manasikātabbā.

3. Ma 2. 300 piṭṭhe.

Iti Bhagavā “evaṃniyyānikaṃ bhikkhave mama sāsanaṃ”ti dassetvā ekavīsatiyāpi thānesu arahattanikūṭena desitaṃ desanaṃ niyyātentō “ekāyano ayaṃ bhikkhave maggo -pa- iti yaṃ taṃ vuttaṃ, idametaṃ paṭicca vuttaṃ”ti āha. Sesāṃ uttānatthamevāti.

Papañcasūdaniyā Majjhimanikāyaṭṭhakathāya

Satipaṭṭhānasuttavaṇṇanā niṭṭhitā.

Paṭhamavaggavaṇṇanā niṭṭhitā.

2. Sihanādavagga

1. Cūlasihanādasuttavaṇṇanā

139. **Evam me sutanti** Cūlasihanādasuttam¹. Yasmā panassa atthuppattiko nikkhepo, tasmā taṃ dassetvā cassa apubbapadavaṇṇanam karissāma. Katarāya pana idaṃ atthuppattiyā nikkhittanti. Lābhasakkārapaccayā titthiyaparidevite. Bhagavato kira Dhammadāyādasutte vuttanayena mahālābhasakkāro uppajji. Catuppamāṇiko hi ayaṃ lokasannivāso, rūpappamāṇo rūpappasanno, ghosappamāṇo ghosappasanno, lūkhappamāṇo lūkhappasanno, dhammappamāṇo dhammappasannoti imesaṃ puggalānam vasena catudhā ṭhito.

Tesaṃ idaṃ nānākaraṇam—katamo ca puggalo rūpappamāṇo rūpappasanno? Idhekacco puggalo āroham vā passivā pariṇāham vā passivā saṅghānam vā passivā pāripūrim vā passivā tattha pamāṇam gahetvā pasādam janeti, ayaṃ vuccati puggalo rūpappamāṇo rūpappasanno.

Katamo ca puggalo ghosappamāṇo ghosappasanno? Idhekacco puggalo paravaṇṇanāya parathomanāya parapasaṃsanāya paravaṇṇahārikāya tattha pamāṇam gahetvā pasādam janeti, ayaṃ vuccati puggalo ghosappamāṇo ghosappasanno.

Katamo ca puggalo lūkhappamāṇo lūkhappasanno? Idhekacco puggalo cīvaralūkham vā passivā pattalūkham vā passivā senāsanalūkham vā passivā vividham vā dukkarakārikam passivā tattha pamāṇam gahetvā pasādam janeti, ayaṃ vuccati puggalo lūkhappamāṇo lūkhappasanno.

Katamo ca puggalo dhammappamāṇo dhammappasanno? Idhekacco puggalo sīlam vā passivā samādhim vā passivā paññam vā passivā tattha pamāṇam gahetvā pasādam janeti, ayaṃ vuccati puggalo dhammappamāṇo dhammappasannoti.

1. Cullasihanādasuttam (Syā)

Imesu catūsu puggalesu rūpappamāṇopi Bhagavato ārohapariṇāhasaṅṭhānapāripūrivaṇṇapokkharataṃ asīti-anubyañjanappaṭiṃṇatattā nānāratana-cittamiva suvaṇṇamahāpaṭaṃ dvattiṃsamahāpurisalakkhaṇasamākiṇṇatāya tārāgaṇasamujjalāṃ viya gaganatalāṃ sabbaphāliphullāṃ viya ca yojanasatubbedhaṃ pāricchattakaṃ aṭṭhārasaratanubbedhaṃ byāmapabhāparikkhepaṃ sassirikaṃ anopamasarīraṃ disvā Sammāsambuddheyeva pasīdati.

Ghosappamāṇopi Bhagavatā kappasatasahassādhikāni cattāri asaṅkheyyāni dasa pāramiyo dasa upapāramiyo dasa paramatthapāramiyo pūritā, aṅgapariccāgo puttadārapariccāgo rajjapariccāgo attapariccāgo¹ nayanapariccāgo ca katoti-ādinā nayena pavattaṃ ghosaṃ sutvā Sammāsambuddheyeva pasīdati.

Lūkhappamāṇopi Bhagavato cīvaralūkhaṃ disvā “sace Bhagavā agāraṃ ajjhāvasissa, kāsikavatthameva adhārayissa. Pabbajitvā panānena sāṇapaṃsukūlacīvarena santussamānena bhāriyaṃ katan”ti Sammāsambuddheyeva pasīdati. Pattalūkhampi disvā “iminā agāraṃ ajjhāvasantena rattavarasuvaṇṇabhājanesu cakkavattibhojanārahaṃ sugandhasālibhojanaṃ paribhuttaṃ, pabbajitvā pana pāsāṇamayaṃ pattaṃ ādāya uccaṇīcakuladvāresu sapadānaṃ piṇḍāya caritvā laddhapīṇḍiyālopena santussamāno bhāriyaṃ karoti”ti Sammāsambuddheyeva pasīdati. Senāsanalūkhaṃ disvāpi “ayaṃ agāraṃ ajjhāvasanto tiṇṇaṃ utūnaṃ anucchavikesu tīsu pāsādesu tividhanāṭakaparivāro dibbasampattiṃ viya rajjasiriṃ anubhavitvā idāni pabbajjūpagato rukkhamaṇḍalānānānādisu dārupalakasilāpaṭṭapīṭhamañcakādīhi santussamāno² bhāriyaṃ karoti”ti Sammāsambuddheyeva pasīdati. Dukkarakārikamassa disvāpi “chabbassāni nāma muggayūsakulatthayūsahareṇuyūsādīnaṃ pasaṭamattena yāpessati, appāṇakaṃ jhānaṃ³ jhāyissati, sarīre ca jīvite ca anapekkho viharissati, aho dukkarakārako Bhagavā”ti Sammāsambuddheyeva pasīdati.

1. Dhanapariccāgo (Syā)

2. ...vidalamañcakādīsu sayamāno (Sī) ...vidalamañcakādīhi santussamāno (Syā)

3. Apāṇakajjhānaṃ (Syā, Ka)

Dhammappamaṇopi Bhagavato sīlaguṇaṃ samādhiguṇaṃ paññāguṇaṃ
jhānavimokkhasamādhisamāpattisampadaṃ abhiññāpāripūriṃ
yamakapāṭihāriyaṃ devorohaṇaṃ pāthikaputtadamaṇādīni¹ ca anekāni
acchariyāni disvā Sammāsambuddheyeva pasīdati, te evaṃ pasannā
Bhagavato mahantaṃ lābhasakkāraṃ abhiharanti. Titthiyānaṃ pana
bāverujātake kākassa viya lābhasakkāro parihāyittha. Yathāha—

“Adassanena morassa, sikhino mañjubhāṇino.
Kākaṃ tattha apūjesuṃ, maṃsena ca phalena ca.
Yadā ca sarasampanno, moro bāverumāgamā².
Atha lābho ca sakkāro, vāyasassa ahāyatha.
Yāva nuppajjati Buddho, Dhammarājā pabhaṅkaro.
Tāva aññe apūjesuṃ, puthū samaṇabrāhmaṇe.
Yadā ca sarasampanno, Buddho dhammadesayi.
Atha lābho ca sakkāro, titthiyānaṃ ahāyathā”ti³.

Te evaṃ pahīnalābhasakkārā rattim ekadvaṅgulamattaṃ obhāsetvāpi
sūriyuggamane khajjopanakā viya hatappabhā ahesuṃ.

Yathā hi khajjopanakā, kālapakkhamhi rattiyā.
Nidassayanti obhāsaṃ, etesaṃ visayo hi so.
Yadā ca rasmisampanno, abbhudeti pabhaṅkaro.
Atha khajjupasaṅghānaṃ⁴, pabhā antaradhāyati.
Evaṃ khajjupasadisā, titthiyāpi puthū idha.
Kālapakkhūpame loke, dīpayanti sakaṃ guṇaṃ.
Yadā ca Buddho lokasmiṃ, udeti amitappabho.
Nippabhā titthiyā honti, sūriye khajjupakā yathāti.

Te evaṃ nippabhā hutvā kacchupīlakādīhi kiṇṇasarīrā
paramapārijuññapattā yena Buddho yena dhammo yena saṅgho yena ca
mahājanassa sannipāto,

1. Pāṭikaputtadamaṇādīni (Syā)

3. Khu 5. 113 piṭṭhe.

2. Pāverumāgamā (Ka)

4. Khajjupasaṅkhānaṃ (Sī)

tena tena gantvā antaravīthiyampi siṅghāṭakepi catukkepi sabhāyampi t̥atvā paridevanti—

“Kiṃ bho samaṇoyeva Gotamo samaṇo, mayam̐ assamaṇā. Samaṇasseva Gotamassa sāvakā samaṇā, amhākaṃ sāvakā assamaṇā. Samaṇasseva Gotamassa, sāvakānañcassa dinnam̐ mahapphalam̐, na amhākaṃ, sāvakānañca no dinnam̐ mahapphalam̐. Nanu samaṇopi Gotamo samaṇo, mayampi samaṇā. Samaṇassapi Gotamassa sāvakā samaṇā, amhākampi sāvakā samaṇā. Samaṇassapi Gotamassa sāvakānam̐ cassa dinnam̐ mahapphalam̐, amhākampi ¹sāvakānam̐ ca no dinnam̐ mahapphalañceva. Samaṇassapi Gotamassa sāvakānañcassa detha karoṭha, amhākampi sāvakānañca no detha¹ sakkaroṭha. Nanu samaṇo Gotamo purimāni divasāni uppanno, mayam̐ pana loke uppajjamāneyeva uppannā”ti.

Evam̐ nānappakāram̐ viravanti. Atha bhikkhū bhikkhuniyo upāsakā upāsikāyoti catasso parisā tesam̐ saddam̐ sutvā Bhagavato ārocesum̐ “titthiyā bhante idañcidañca kathenti”ti. Tam̐ sutvā Bhagavā “mā tumhe bhikkhave titthiyānam̐ vacanena ‘aññatra samaṇo atthī’ti saññino ahuvatthā”ti vatvā aññatitthiyesu samaṇabhāvam̐ paṭisedhento idheva ca anujānanto imissā atthuppattiyā **idheva bhikkhave samaṇoti** idam̐ suttam̐ abhāsi.

Tattha **idhevāti** imasmiṃyeva sāsane. Ayam̐ pana niyamo sesapadesupi vedītabbo. Dutiyādayopi hi samaṇā idheva, na aññattha. **Samaṇoti** sotāpanno. Tenevāha “katamo ca bhikkhave paṭhamo samaṇo, idha bhikkhave bhikkhu tiṇṇam̐ saṃyojanānam̐ parikkhayā sotāpanno hoti avinipātadhammo niyato sambodhiparāyaṇo, ayam̐ bhikkhave paṭhamo samaṇo”ti².

Dutiyoti sakadāgāmī. Tenevāha “katamo ca bhikkhave dutiyo samaṇo, idha bhikkhave bhikkhu tiṇṇam̐ saṃyojanānam̐ parikkhayā

1-1. Sāvakānam̐ ca no detha (Ka)

2. Am̐ 1. 560 piṭṭhe.

rāgadosamohānaṃ tanuttā sakadāgāmī hoti sakideva imaṃ lokam āgantvā dukkhassantaṃ karoti, ayaṃ bhikkhave dutiyo samaṇo”¹.

Tatīyoti anāgāmī. Tenevāha “katamo ca bhikkhave tatiyo samaṇo, idha bhikkhave bhikkhu pañcannaṃ orambhāgiyānaṃ saṃyojanānaṃ parikkhayā opapātiko hoti tattha parinibbāyī anāvattidhammo tasmā lokā, ayaṃ bhikkhave tatiyo samaṇo”¹.

Catutthoti arahā. Tenevāha “katamo ca bhikkhave catuttho samaṇo, idha bhikkhave bhikkhu āsavānaṃ khayā anāsavaṃ cetovimuttiṃ paññāvimuttiṃ diṭṭheva dhamme sayam abhiññā sacchikatvā upasampajja viharati, ayaṃ bhikkhave catuttho samaṇo”¹. Iti imasmim ṭhāne cattāro phalaṭṭhakasamaṇāva adhippetā.

Suññāti rittā tucchā. **Parappavādāti** cattāro sassatavādā, cattāro ekaccasassatikā, cattāro antānantikā, cattāro amarāvikkhepikā, dve adhiccasamuppannikā, soḷasa saññivādā, aṭṭha asaññivādā, aṭṭha nevasaññināsaññivādā, satta ucchedavādā, pañca diṭṭhadhammanibbānavādāti ime sabbepi Brahmajāle āgatā dvāsaṭṭhi diṭṭhiyo, ito bāhirānaṃ paresaṃ vādā **parappavādā** nāma, te sabbepi imehi catūhi phalaṭṭhakasamaṇehi suññā, na hi te ettha santi. Na kevalaṅca etheva suññā, catūhi pana maggaṭṭhakasamaṇehi catunnaṃ maggānaṃ atthāya āraddhavipassakehipīti dvādasahipi samaṇehi suññā eva. Imameva attham sandhāya Bhagavatā Mahāparinibbāne vuttaṃ—

“Ekūnatimso vayasā Subhadda,
Yam pabbajim kimkusalānu-esī.
Vassāni paññāsa samādhikāni,
Yato aham pabbajito Subhadda.
Ñāyassa dhammassa padasavattī,
Ito bahiddhā samaṇopi natthi.

Dutiyoopi samaṇo natthi, tatiyoopi samaṇo natthi, catutthopi samaṇo natthi, suññā parappavādā samaṇebhi aññehi”².

1. Am 1. 561 piṭṭhe.

2. Dī 2. 125 piṭṭhe.

Ettha hi padesavattīti āradhavi-passako adhippeto, tasmā sotāpattimag-gassa āradhavi-passakaṃ maggaṭṭhaṃ phalaṭṭhanti tayopi ekato katvā samaṇopi natthīti āha. Sakadāgā-mimag-gassa āradhavi-passakaṃ maggaṭṭhaṃ phalaṭṭhanti tayopi ekato katvā dutiyopi samaṇo natthīti āha. Itaresupi dvīsu eseva nayo.

Kasmā panete aññattha natthīti. Akhettatāya. Yathā hi na āragge sāsapo tiṭṭhati, na udakapiṭṭhe ag-gi jalati, na piṭṭhipāsāṇe bījāni ruhanti, evameva bāhiresu titthāyatanesu na ime samaṇā uppajjanti, imasmimyeva pana sāsane uppajjanti. Kasmā? Khettatāya¹. Tesam² akhettatā ca khettatā³ ca ariyamag-gassa abhāvato ca bhāvato ca veditabbā. Tenāha Bhagavā—

“Yasmim kho Subhadda dhammavinaye ariyo aṭṭhaṅgiko maggo na upalabbhati, samaṇopi tattha na upalabbhati, dutiyopi tattha samaṇo na upalabbhati, tatiyopi tattha samaṇo na upalabbhati, catutthopi tattha samaṇo na upalabbhati. Yasmim ca kho Subhadda dhammavinaye ariyo aṭṭhaṅgiko maggo upalabbhati, samaṇopi tattha upalabbhati, dutiyopi tattha -pa-catutthopi tattha samaṇo upalabbhati. Imasmim kho Subhadda dhammavinaye ariyo aṭṭhaṅgiko maggo upalabbhati, idheva Subhadda samaṇo, idha dutiyo samaṇo, idha tatiyo samaṇo, idha catuttho samaṇo, suññā parappavādā samaṇebhi aññehi”^{ti}⁴.

Evam yasmā titthāyatanaṃ akhettam, sāsanaṃ khettam, tasmā yathā surattahatthapādo sūrakesarako⁵ sīho migarājā na susāne vā saṅkārakūṭe vā paṭivasati, tiyojanasahassavitthataṃ pana Himavantaṃ ajjhogāhetvā maṇiguhāyamyeva paṭivasati. Yathā ca chaddanto nāgarājā na gocariyahatthikulādīsu navasu nāgakulesu uppajjati, shaddantakuleyeva uppajjati. Yathā ca valāhako assarājā na gadrabhakule vā ghoṭakakule vā uppajjati, Sindhuyā tīre pana sindhvakuleyeva uppajjati. Yathā ca sabbakāmadadaṃ manoharaṃ maṇiratanam na

1. Sukhettatāya (Syā, Ka)

3. Sukhettatā (Syā, Ka)

4. Dī 2. 124 piṭṭhe.

2. Sā panesā (Sī, Syā)

5. Bhāsarakesarasāṭo (Sī)

saṅkarakūṭe vā paṃsupabbatādīsu vā uppajjati,
 Vepullapabbatabbhantareyeva uppajjati. Yathā ca Timirapiṅgalo maccharājā
 na khuddakapokkharāṇīsu¹ uppajjati, caturāsītiyojanasahassagambhīre
 Mahāsamuddeyeva uppajjati. Yathā ca diyadḍhayojanasatiko supaṇṇarājā na
 gāmadvāre eraṇḍavanādīsu paṭivasati, Mahāsamuddaṃ pana ajjhogāhetvā
 simbalidahavaneyeva paṭivasati. Yathā ca Dhataratṭho suvaṇṇahaṃso na
 gāmadvāre āvāṭakādīsu paṭivasati, navutihāṃsasahassaparivāro hutvā
 Cittakūṭapabbateyeva paṭivasati. Yathā ca catuddīpissaro cakkavattirājā na
 nīcakule uppajjati, asambhinnaajātikhattiyakuleyeva pana uppajjati.
 Evamevaṃ imesu samaṇesu ekasamaṇopi na aññatitthāyatane uppajjati,
 ariyamaggaparikkhitte pana Buddhasāsaneyeva uppajjati. Tenāha Bhagavā
 “idheva bhikkhave samaṇo -pa- suññā parappavādā samaṇebhi aññehī”ti.

Sammā sīhanādaṃ nadathāti ettha **sammā**ti hetunā nayena kāraṇena.
Sīhanādanti seṭṭhanādaṃ abhītanādaṃ appaṭinādaṃ. Imesaṃ hi² catunnaṃ
 samaṇānaṃ idheva atthitāya ayaṃ nādo seṭṭhanādo nāma hoti uttamanādo.
 “Ime samaṇā idheva atthī”ti vadantassa aññato bhayaṃ vā āsaṅkā vā natthīti
 abhītanādo nāma hoti. “Amhākampi sāsane ime samaṇā atthī”ti pūraṇādīsu
 ekassāpi uttāhitvā vatthum asamatthatāya ayaṃ nādo appaṭinādo nāma
 hoti. Tena vuttaṃ “sīhanādanti seṭṭhanādaṃ abhītanādaṃ appaṭinādan”ti.

140. **Ṭhānaṃ kho panetaṃ vijjatī**ti imaṃ kho pana kāraṇaṃ vijjati.
Yaṃ aññatitthiyāti yena kāraṇena aññatitthiyā. Ettha ca titthaṃ jānitabbaṃ,
 titthakaro jānitabbo, titthiyā jānitabbā, titthiyasāvaka jānitabbā. **Titthaṃ**
 nāma dvāsaṭṭhi diṭṭhiyo. Ettha hi sattā taranti uppalavanti ummujjanimujjan
 karonti, tasmā titthanti vuccanti. Tāsaṃ diṭṭhīnaṃ uppādetā **titthakaro** nāma.
 Tassa laddhiṃ gahetvā pabbajitā **titthiyā** nāma. Tesāṃ paccayadāyakā
titthiyasāvakati veditabbā. **Paribbājakā**ti gihibandhanaṃ pahāya
 pabbajjūpagatā. **Assāsoti** avassayo paṭiṭṭhā upatthambho. **Balanti** thāmo.
Yena tumheti yena assāsena vā balena vā evaṃ vadetha.

1. Na āvāṭakhuddakapokkharāṇīsu (Sī, Syā) 2. Imesaṃ (Sī), imesaṅca (Syā, Ka)

Atthi kho no āvuso tena Bhagavatā jānatā passatā Arahatā

Sammāsambuddhenāti ettha ayaṃ saṅkhepattho—yo so Bhagavā samatimsa pāramiyo pūretvā sabbakilese bhañjitvā anuttaraṃ sammāsambodhiṃ abhisambuddho, tena Bhagavatā tesaṃ tesaṃ sattānaṃ āsayānusayaṃ **jānatā**, hatthatale ṭhapitaṃ āmalakaṃ viya sabbam̐ ñeyyadhammaṃ **passatā**. Api ca pubbenivāsādihi jānatā, dibbena cakkhunā passatā. Tīhi vijjāhi chahi vā pana abhiññāhi jānatā, sabbattha appaṭihatena samantacakkhunā passatā. Sabbadhammajānanasamatthāya paññāya jānatā, sabbasattānaṃ cakkhuvisayātītāni tirokuṭṭādigatāni vāpi rūpāni ativisuddhena maṃsacakkhunā passatā. Attahitasādhikāya samādhipadaṭṭhānāya paṭivedhapaññāya jānatā, parahitasādhikāya karuṇāpadaṭṭhānāya desanāpaññāya passatā. Arīnaṃ hatattā paccayādīnaṃ arahattā ca **arahatā**, sammā sāmañca saccānaṃ Buddhattā **Sammāsambuddhena**. Antarāyikadhamme vā jānatā, niyyānikadhamme passatā. Kilesārīnaṃ hatattā Arahatā, sammā sāmaṃ sabbadhammānaṃ Buddhattā Sammāsambuddhenāti evaṃ catuvesārājjasena catūhi ākārehi thomitena cattāro dhammā akkhātā, ye mayaṃ attani sampassamānā evaṃ vadema, na rājarājamahāmatādīnaṃ upatthambhaṃ kāyabalanti.

Satthari pasādoti “itipi so Bhagavā”ti-ādinā nayena Buddhaguṇe anussarantānaṃ uppannappasādo. **Dhamme pasādoti** “Svākkhāto Bhagavatā dhammo”ti-ādinā nayena dhammaguṇe anussarantānaṃ uppannappasādo. **Sīlesu paripūrakāritāti** ariyakantesu sīlesu paripūrakāritā. Ariyakantasīlāni nāma **pañcasīlāni**. Tāni hi bhavantaragatopi ariyasāvako attano ariyasāvakabhāvaṃ ajānantopi na vītikkamati. Sacepi hi naṃ koci vadeyya “imaṃ sakalaṃ cakkavattirajjaṃ sampaṭicchitvā khuddakamakkhikaṃ jīvitā voropehī”ti, aṭṭhānametaṃ, yaṃ so tassa vacanaṃ kareyya. Evaṃ ariyānaṃ sīlāni kantāni piyāni manāpāni. Tāni sandhāya vuttaṃ “sīlesu paripūrakāritā”ti.

Sahadhammikā kho panāti bhikkhu bhikkhunī sikkhamānā sāmaṇero sāmaṇerī upāsako upāsikāti ete satta **sahadhammacārino**. Etesu hi bhikkhu bhikkhūhi saddhiṃ sahadhammaṃ carati samānasikkhatāya.

Tathā bhikkhunī bhikkhunīhi -pa- upāsikā upāsikāhi, sotāpanno sotāpannehi, sakadāgāmī -pa- anāgāmīhi sahadhammaṃ carati. Tasmā sabbepe te **sahadhammikā**ti vuccanti. Apicettha ariyasāvakaḃeva adhippetā. Tesam hi bhavantarepi maggadassanamhi vivādo natthi, tasmā te accantaṃ ekadhammacāritāya sahadhammikā. Iminā “suppaṭipanno Bhagavato sāvakaṣaṃgho”ti-ādinā nayena saṃghaṃ anussarantānaṃ uppannappasādo kathito. Ettāvata cattāri sotāpannassa aṅgāni kathitāni honti.

Ime kho no āvusoti āvuso ime cattāro dhammā tena Bhagavatā amhākaṃ assāso ceva balañcāti akkhātā, ye mayaṃ attani sampassamānā evaṃ vadema.

141. **Yo amhākaṃ satthāti** iminā Pūraṇakassapādike cha Satthāro apadissanti. Yathā pana idāni sāsane ācariya-upajjhāyādīsu “amhākaṃ ācariyo, amhākaṃ upajjhāyo”ti gehasitapemaṃ hoti. Evarūpaṃ pemaṃ sandhāya “Satthari pasādo”ti vadanti. Thero panāha “yasmā Satthā nāma na ekassa, na dvinnaṃ hoti, sadevakassa lokassa ekova Satthā, tasmā titthiyā ‘amhākaṃ Satthā’ti ekapadeneva Satthāraṃ visuṃ katvā imināva padena viruddhā parājita”ti. **Dhamme pasādoti** idaṃ pana yathā idāni sāsane “amhākaṃ Dīghanikāyo amhākaṃ Majjhimanikāyo”ti mamāyanti, evaṃ attano attano pariyattidhamme gehasitapemaṃ sandhāya vadanti. **Sīlesūti** ajasīlagosīlameṇḍakasīlakukkurasilādīsu. **Idha no āvusoti** ettha **idhāti** pasādaṃ¹ sandhāya vadanti. **Ko adhippayāsoti** ko adhippayogo. **Yadidanti** yaṃ idaṃ tumhākaṃ ceva amhākaṃ ca nānākaraṇaṃ vadeyyātha, taṃ kiṃ nāma. Tumhākampi hi catūsū ṭhānesu pasādo, amhākampi. Nanu etasmiṃ pasāde² tumhe ca amhe ca dvedhā bhinnasuvaṇṇaṃ viya ekasadisāti vācāya samadhurā hutvā aṭṭhaṃsu.

Atha nesaṃ taṃ samadhurataṃ bhindanto Bhagavā **evaṃvādinoti**-ādimāha. Tattha **ekā nitthāti** yā tassa pasādassa pariyosāna

1. Sāsanaṃ (Ka)

2. Ekasmiṃ pasādo (Syā, Ka)

bhūtā niṭṭhā, kim sā ekā, udāhu puthūti evaṃ pucchathāti vadati. Yasmā pana tasmim tasmim samaye niṭṭham apaññapento nāma natthi, brāhmaṇānaṃ hi brahmaloko niṭṭhā, mahātāpasānaṃ Ābhassarā, paribbājakānaṃ subhakiṇhā, ājīvakānaṃ “anantamānaso”ti evaṃ parikappito asaññibhavo. Imasmim sāsane pana arahattaṃ niṭṭhā. Sabbeva cete arahattameva niṭṭhāti vadanti. Diṭṭhivasena pana brahmalokādīni paññapenti. Tasmā attano attano laddhivasena ekameva niṭṭham paññapenti, taṃ dassetuṃ Bhagavā **sammā byākaramānāti**-ādimāha.

Idāni bhikkhūnampi ekā niṭṭhā, titthiyānampi ekā niṭṭhāti dvīsu aṭṭakārakesu viya ṭhitesu Bhagavā anuyogavattaṃ dassento **sā panāvuso niṭṭhā sarāgassa, udāhu vītarāgassāti**-ādimāha. Tattha yasmā rāgarattādīnaṃ niṭṭhā nāma natthi. Yadi siyā, soṇasiṅgālādīnampi siyāti imaṃ dosaṃ passantānaṃ titthiyānaṃ “vītarāgassa āvuso sā niṭṭhā”ti-ādinā nayena byākaraṇaṃ dassitaṃ.

Tattha **viddasunoti** paṇḍitassa. **Anuruddhapaṭiviruddhassāti** rāgena Anuruddhassa kodhena paṭiviruddhassa. **Papañcārāmassa papañcaratinoti** ettha āramanti etthāti ārāmo. Papañco ārāmo assāti **papañcārāmo**. Papañce¹ rati assāti **papañcarati**. **Papañcoti** ca mattapamattākārahāvena pavattānaṃ taṇhādiṭṭhimānānametaṃ adhivacanaṃ. Idha pana taṇhādiṭṭhiyova adhippetā. **Sarāgassāti**-ādīsu pañcasu ṭhānesu ekova kilesa āgato. Tassa ākārato nānattaṃ vedittabbaṃ. **Sarāgassāti** hi vuttaṭṭhāne pañcakāmaguṇikarāgavasena gahito. **Sataṇhassāti** bhavataṇhāvasena. **Sa-upādānassāti** gahaṇavasena. **Anuruddhapaṭiviruddhassāti** yugaḷavasena. **Papañcārāmassāti** papañcuppattidassanavasena. **Sarāgassāti** vā ettha akusalamūlavasena gahito. **Sataṇhassāti** ettha taṇhāpaccayā upādānadassanavasena. Sesā purimasadisameva. Thero panāha “kasmā evaṃ viddhamsetha, ekoyeva hi ayaṃ lobho rajjanavasena rāgoti vutto. Taṇhākaraṇavasena **taṇhā**. Gahaṇaṭṭhena **upādānaṃ**. Yugaḷavasena **anurodhapaṭivirodho**. Papañcuppattidassanaṭṭhena **papañco**”ti.

1. Papañcova (Ka)

142. Idāni imesaṃ kilesānaṃ mūlabhūtaṃ diṭṭhivādaṃ dassento **dvemā bhikkhave diṭṭhiyoti-ādimāha**.

Tattha **bhavadiṭṭhī**ti sassatadiṭṭhi. **Vibhavadiṭṭhī**ti ucchedadiṭṭhi. **Bhavadiṭṭhiṃ allīnā**ti taṇhādiṭṭhivasena sassatadiṭṭhiṃ allīnā. **Upagatā**ti taṇhādiṭṭhivaseneva upagatā. **Ajjhositā**ti taṇhādiṭṭhivaseneva anupaviṭṭhā. **Vibhavadiṭṭhiyā te paṭiviruddhā**ti te sabbe ucchedavādīhi saddhiṃ “tumhe andhabālā na jānātha, sassato ayaṃ loko, nāyaṃ loko ucchijjati”ti paṭiviruddhā niccaṃ kalahabhaṇḍanapasutā viharanti. Dutiyavārepi eseva nayo.

Samudayañcāti-ādīsu dve diṭṭhīnaṃ samudayā khaṇikasamudayo paccayasamudayo ca. **Khaṇikasamudayo** diṭṭhīnaṃ nibbatti. **Paccayasamudayo** aṭṭha ṭhānāni. Seyyathidaṃ, khandhāpi diṭṭhiṭṭhānaṃ, avijjāpi, phassopi, saññāpi. vitakkopi, ayonisomanasikāropi, pāpamittopi, paratoghosopi diṭṭhiṭṭhānaṃ. “Khandhā hetu khandhā paccayo diṭṭhīnaṃ upādāya samuṭṭhānaṭṭhena. Evaṃ khandhāpi diṭṭhiṭṭhānaṃ. Avijjā, phasso, saññā, vitakko, ayonisomanasikāro, pāpamitto, paratoghoso hetu paratoghoso paccayo diṭṭhīnaṃ upādāya samuṭṭhānaṭṭhena. Evaṃ paratoghosopi diṭṭhiṭṭhānaṃ”¹. Atthaṅgamāpi dveveva khaṇikatthaṅgamo paccayatthaṅgamo ca. **Khaṇikatthaṅgamo** nāma khayō vayo bhedo paribhedo aniccataṃ antaradhānaṃ. **Paccayatthaṅgamo** nāma sotāpattimaggo. Sotāpattimaggo hi diṭṭhiṭṭhānasamugghātōti vutto.

Assādanti diṭṭhimūlakaṃ ānisaṃsaṃ. Yaṃ sandhāya vuttam “yaṃdiṭṭhiko Satthā hoti, taṃdiṭṭhikā sāvakā hontī. Yaṃdiṭṭhikā Satthāraṃ sāvakā sakkaronti, garuṃ karonti, mānenti, pūjenti, labhanti tatonidānaṃ cīvarapiṇḍapātāsenāsanagilānapaccayabhesajjaparikkhāraṃ. Ayaṃ bhikkhave diṭṭhiyā diṭṭhadhammiko ānisaṃso”ti. **Ādīnavanti** diṭṭhiggahaṇamūlakaṃ upaddavaṃ. So vaggulivatam² ukkuṭikappadhānaṃ kaṇṭakāpassayatā pañcātapatappanaṃ³ sānupapātāpatanaṃ⁴ kesamassuluñcanaṃ appānakaṃ jhānanti-ādīnaṃ vasena veditabbo. **Nissaraṇanti** diṭṭhīnaṃ nissaraṇaṃ nāma nibbānaṃ.

1. Khu 9. 132 Paṭisambhidāmagge.

3. Pañcātapatappanaṃ (Sī)

2. Vaggulivattaṃ (Syā)

4. Maruppapātāpatanaṃ (Sī, Syā)

Yathābhūtaṃ nappajānantīti ye etaṃ sabbaṃ yathāsabhāvaṃ na jānanti. **Na parimuccanti dukkhasmā**ti sakalavaṭṭadukkhato na parimuccanti. Iminā etesaṃ niṭṭhā nāma natthīti dasseti. **Parimuccanti dukkhasmā**ti sakalavaṭṭadukkhato parimuccanti. Iminā etesaṃ niṭṭhā nāma atthīti dvinnam aṭṭakāraṇaṃ aṭṭam chindanto viya sāsanasmiṃ yeva niṭṭhāya atthitaṃ patiṭṭhabeti.

143. Idāni diṭṭhicchedanaṃ dassento **cattārimāni bhikkhave upādānānī**ti-ādimāha. Tesam vitthāraṇakathā Visuddhimagge vuttāyeva.

Sabbupādānapariññāvādā paṭijānamānāti mayaṃ sabbesaṃ upādānānaṃ pariññam samatikkamaṃ vadāmāti evaṃ paṭijānamānā. **Na sammā sabbupādānapariññanti** sabbesaṃ upādānānaṃ samatikkamaṃ sammā na paññapenti. Keci kāmupādānamattassa pariññam paññapenti. Keci diṭṭhupādānamattassa paññapenti, keci sīlabbatupādānassāpi. Attavādupādānassa pana pariññam paññapento nāma natthi. Tesam pana bhedaṃ dassento **kāmupādānassa pariññam paññapenti**ti-ādimāha. Tattha sabbepi kāmupādānassa pariññam paññapentiyeva, channavuti pāsaṇḍāpi hi “kāmā kho pabbajitena na sevitabbā”ti vatthupaṭisevanam kāmam kappatīti na paññapenti, akappiyameva katvā paññapenti. Ye pana sevanti, te theyyena sevanti. Tena vuttam “kāmupādānassa pariññam paññapenti”ti.

Yasmā “natthi dinnan”ti-ādīni gaḥetvā caranti. “Sīlena suddhi vatena suddhi bhāvanāya suddhī”ti gaḥanti, attupaladdhiṃ na pajahanti, tasmā na diṭṭhupādānassa, na sīlabbatupādānassa, na attavādupādānassa pariññam paññapenti. **Tam kissa hetū**ti tam apaññāpanam etesaṃ kissa hetu kiṃ kāraṇā. **Imāni hi te bhontoti** yasmā te bhonto imāni tīṇi kāraṇāni yathāsabhāvato na jānantīti attho. Ye panettha dvinnam pariññānam paññāpanakāraṇam diṭṭhiñceva sīlabbatañca “etaṃ pahātabban”ti yathāsabhāvato jānanti. Te sandhāya parato dve vārā vuttā. Tattha ye “atthi dinnan”ti-ādīni gaḥanti, te diṭṭhupādānassa pariññam paññapenti. Ye pana “na sīlena suddhi, na vatena suddhi, na bhāvanāya suddhī”ti gaḥanti, te sīlabbatupādānassa pariññam paññapenti. Attavādupādānassa pariññam pana ekopi paññapetum na sakkoti. Aṭṭhasamāpattilābhinopi hi candimasūriye

pāṇinā parimajjitvā caramānāpi ca titthiyā tisso pariññā paññapenti. Attavādaṃ¹ muñcituṃ na sakkonti. Tasmā punappunam vaṭṭasmiṃyeva patanti, pathavijigucchanasasako viya hi etc.

Tatthāyaṃ atthasallāpikā upamā—pathavī kira sasakam āha “bho sasakā”ti. Sasako āha “ko eso”ti. “Kasmā mameva upari sabba-iriyāpathe kappento uccārapassāvaṃ karonto maṃ na jānāsī”ti. “Suṭṭhu tayā ahaṃ diṭṭho, mayā akkantaṭṭhānampi aṅgulaggehi phuṭṭhaṭṭhānam viya hoti, vissaṭṭha-udakam appamattakam, karīsam katakaphalamattam. Hatthi-assādīhi pana akkantaṭṭhānampi mahantam, passāvopi nesam ghaṭamatto hoti, uccāropi pacchimatto hoti, alam mayham tayā”ti uppatitvā aññasmiṃ ṭhāne patito. Tato nam pathavī āha “are dūram gatopi nanu mayham upariyeva patitosī”ti. So puna tam jigucchanto uppatitvā aññattha patito, evam vassasahassampi uppatitvā patamāno sasako pathaviṃ muñcituṃ na sakkoti. Evamevam titthiyā sabbupādānapariññam paññapentopi kāmupādānādīnam tiṇṇamiyeva samatikkamam paññapenti. Attavādam pana muñcituṃ na sakkonti, asakkontā punappunam vaṭṭasmiṃyeva patantīti.

Evam yaṃ titthiyā samatikkamituṃ na sakkonti, tassa vasena diṭṭhicchedavādam vatvā idāni pasādapacchedavādam dassento **evarūpe kho bhikkhave dhammavinayeti**-ādimāha. Tattha **dhammavinayeti** dhamme ceva vinaye ca, ubhayenapi aniyyānikasāsanam dasseti. “Yo Satthari pasādo so na sammaggato”ti aniyyānikasāsanamhi hi Satthā kālam katvā sihopi hoti, byaggopi hoti, dīpipi acchopi taracchopi. Sāvakā panassa migāpi sūkarāpi pasadāpi honti, so “ime mayham pubbe upaṭṭhākā paccayadāyakā”ti khantiṃ vā mettam vā anuddayam vā akatvā tesam upari patitvā lohitaṃ pivati, thūlathūlamamsānapi khādati. Satthā vā pana biḷāro hoti, sāvakā kukkuṭā vā mūsikā vā. Atha ne vuttanayeneva anukampam akatvā khādati. Atha vā Satthā nirayapālo hoti, sāvakā nerayikasattā. So “ime mayham pubbe upaṭṭhākā paccayadāyakā”ti anukampam akatvā vividhā kammakāraṇā karoti, ādittepi rathe yojeti, aṅgārapabbatampi āropeti, Lohakumbhiyampi

1. Attavādudupādānam (Sī)

kipati¹, anekehipi dukkhadhammehi sampayojeti. Sāvakā vā pana kālaṃ katvā sīhādayo honti, Satthā migādīsu aññataro. Te “imaṃ mayaṃ pubbe catūhi paccayehi upaṭṭhahimhā, Satthā no ayan”ti tasmīṃ khantiṃ vā mettaṃ vā anuddayaṃ vā akatvā vuttanayeneva anayabyasanaṃ pāpentī. Evaṃ anīyyānikasāsane yo Satthari pasādo, so na sammaggato hoti. Kañci kālaṃ gantvāpi pacchā vinassatiyeva.

Yo dhamme pasādoti anīyyānikasāsanasmīṃ hi dhamme pasādo nāma, uggahitapariyāpuṭa² dhāritavācītamattake tantidhamme pasādo hoti, vaṭṭamokkho panettha natthi. Tasmā yo ettha pasādo, so punappunaṃ vaṭṭameva gambhīraṃ karotīti sāsana-smīṃ asamaggato asabhāvato akkhāyati.

Yā sīlesu paripūrakārītāti yāpi ca anīyyānikasāsane ajasīlādīnaṃ vasena paripūrakārītā, sāpi yasmā vaṭṭamokkhaṃ bhavanissaraṇaṃ na sampāpeti. Sampajjamānā pana tiracchānayoṇiṃ āvahati, vipaccamānā nirayaṃ, tasmā sā na sammaggatā akkhāyati. **Yā sahadhammikesūti** anīyyānikasāsanasmīṃ hi ye sahadhammikā, tesu yasmā ekacce kālaṃ katvā sīhādayopi honti, ekacce migādayo. Tattha sīhādībhūtā “ime amhākaṃ sahadhammikā ahesun”ti migādībhūtesu khanti-ādīni akatvā pubbe vuttanayeneva nesāṃ mahādukkhaṃ uppādentī. Tasmā ettha sahadhammikesu piyamaṇāpatāpi asamaggatā akkhāyati.

Idaṃ pana sabbampi kāraṇabhedaṃ ekato katvā dassento Bhagavā **taṃ kissa hetu evaṃ hetam bhikkhave hotīti-ādīmāha**. Tatrāyaṃ saṅkhepattho—evaṃ hetam bhikkhave hoti, yaṃ mayā vuttaṃ “yo Satthari pasādo so na sammaggato akkhāyati”ti-ādi, taṃ evameva hoti. Kasmā? Yasmā te pasādādayo durakkhāte dhammavinaye -pa- asammasambuddhappaveditēti, ettha hi **yathā tanti** kāraṇatthe nipāto. Tattha **durakkhāteti** dukkathite, dukkathitattāyeva **duppavedite**. So panesa yasmā maggaphalattāya na niyyāti, tasmā **anīyyāniko**. Rāgādīnaṃ upasamāya asaṃvattanato **anupasamasamvattaniko**. Na Sammasambuddhena

1. Lohakumbhiyaṃ sirāṃ kipati (Syā)

2. Uggahitapariyāpuṇita (Sī, Syā)

sabbaññunā pavidoti **asammāsambuddhappavedito**. Tasmim̄ aniyyānike anupasamasamvattanike asammāsambuddhappavedite. Ettāvataḥ Bhagavā titthiyesu pasādo surāpītasiṅgāle pasādo viya niratthakoti dasseti.

Eko kira Kāḷasiṅgālo¹ rattim̄ nagaram̄ pavittṭho surājallikam̄ khāditvā punnāgavane nipajjitvā niddāyanto sūriyuggamane pabujjhitvā cintesi “imasmim̄ kāle na sakkā gantum̄, bahū amhākam̄ verino, ekam̄ vañcetum̄ vaṭṭati”ti. So ekam̄ brāhmaṇam̄ gacchantam̄ disvā imam̄ vañcessāmīti “ayya brāhmaṇa”ti āha. Ko eso brāhmaṇam̄ pakkosatīti. Aham̄ sāmī ito tāva ehīti. Kim̄ bhoti. Mam̄ bahigāmam̄ nehi, aham̄ te dve kahāpaṇasatāni dassāmīti. Sopi nayissāmīti tam̄ pādesu gaṇhi. Are bāla brāhmaṇa na mayham̄ kahāpaṇa chaḍḍitakā atthi, dullabhā kahāpaṇa, sādhum̄ mam̄ gaṇhāhīti. Katham̄ bho gaṇhāmīti, uttarāsaṅgena gaṇṭhikam̄ katvā am̄se laggetvā gaṇhāhīti, brāhmaṇo tam̄ tathā gahetvā dakkhiṇadvārasamīpaṭṭhānam̄ gantvā ettha otāremīti pucchi. Kataratṭhānam̄ nāma etanti. Mahādvāram̄ etanti. Are bāla brāhmaṇa kim̄ tava ñātakā antaradvāre kahāpaṇam̄ ṭhapenti, parato mam̄ harāti. So punappunam̄ thokam̄ thokam̄ gantvā “ettha otāremi ettha otāremi”ti pucchitvā tena tajjito² khemaṭṭhānam̄ gantvā tattha otārehīti vutto otāretvā sātakam̄ gaṇhi. Kāḷasiṅgālo āha “aham̄ te dve kahāpaṇasatāni dassāmīti avocam̄, mayham̄ pana kahāpaṇa bahū, na dve kahāpaṇasatāneva, yāva aham̄ kahāpaṇe āharāmi, tāva tvam̄ sūriyam̄ olokeno tiṭṭhā”ti vatvā thokam̄ gantvā nivattetvā puna brāhmaṇam̄ āha “ayya brāhmaṇa mā ito olokehi, sūriyameva olokeno tiṭṭhā”ti. Evañca pana vatvā ketakavanam̄ pavisitvā yathārucim̄ pakkanto. Brāhmaṇassapi sūriyam̄ oloketasseva nalāṭato ceva kacchehi ca sedā muccimsu. Atha nam̄ rukkhadavatā āha—

“Saddahāsi Siṅgālassa, surāpītassa brāhmaṇa.

Sippiyānam̄ satam̄ natthi, kuto kaṃsasatā duve”ti³.

Evam̄ yathā Kāḷasiṅgāle pasādo niratthako, evam̄ titthiyesuṭṭhi.

1. Kāṇasiṅgālo (Sī, Syā)

2. Tajjitavañcito (Sī)

3. Khu 5. 27 piṭṭhe.

144. Aniyyānikasāsane pasādassa niratthakabhāvaṃ dassetvā niyyānikasāsane tassa sātthakataṃ dassetuṃ **Tathāgato ca kho bhikkhavi-** ādimāha. Tattha **kāmupādānassa pariññāṃ paññapeti** arahattamaggena kāmupādānassa pahānapariññāṃ samatikkamaṃ paññapeti, itaresaṃ tiṇṇaṃ upādānānaṃ sotāpattimaggena pariññāṃ paññapeti. **Evarūpe kho bhikkhave dhammavinayeti** bhikkhave evarūpe dhamme ca vinaye ca. Ubhayenapi niyyānikasāsanaṃ dasseti. **Satthari pasādoti** evarūpe sāsane yo Satthari pasādo, so sammaggato akkhāyati, bhavadukkhanissaraṇāya samvattati.

Tatrimāni vatthūni—Bhagavā kira Vedisakapabbate Indasālaguhāyaṃ paṭivasati. Atheko ulūkasakuṇo Bhagavati gāmaṃ piṇḍāya pavisante upaḍḍhamaggaṃ anugacchati, nikkhamante upaḍḍhamaggaṃ paccuggamaṃ karoti, so ekadivasaṃ Sammāsambuddhaṃ sāyanhasamaye bhikkhusaṃghaparivutaṃ nisinnaṃ pabbatā oruyha vanditvā pakkhe paṇāmetvā añjalim paggayha sīsaṃ heṭṭhā katvā Dasabalaṃ namassamāno aṭṭhāsi. Bhagavā taṃ oloketvā sitaṃ pātvakāsi. Ānandatthero “ko nu kho bhante hetu ko paccayo sitassa pātukammāya”ti pucchi. “Passānanda imaṃ ulūkasakuṇaṃ, ayaṃ mayi ca bhikkhusaṃghe ca cittaṃ pasādetvā satahassakappe devesu ca manussesu ca saṃsaritvā somanasso nāma Paccekabuddho bhavissatī”ti āha.

Ulūkamaṇḍalakkhika, Vedisake ciradīghavāsika.

Sukhitosi tvaṃ ayya Kosiya, kāluṭṭhitaṃ passasi Buddhavaraṃ.

Mayi cittaṃ pasādetvā, bhikkhusaṃghe anuttare.

Kappānaṃ satahassāni, duggateso na gacchati.

Devalokā cavitvāna, kusalamūlena codito.

Bhavissati anantañāṇo, somanassoti vissutoti.

Aññānipi cettha Rājagahanagare Sumanamālākāravatthu
Mahābherivādakavatthu Morajikavatthu¹ Viṇāvādakavatthu
Saṅkhadhamakavatthūti evamādīni

1. Morajātakavatthu (Ka)

vatthūni vitthāretabbāni. Evaṃ niyyānikasāsane Satthari pasādo sammaggato hoti.

Dhamme pasādoti niyyānikasāsanamhi dhamme pasādo sammaggato hoti, saramatte nimittam gahevā suṇantānaṃ tiracchānagatānampi sampattidāyako hoti, paramatthe kiṃ pana vattabbaṃ. Ayamatto Maṇḍūkadevaputtādīnaṃ vatthuvaseṇa veditaḅbo.

Sīlesu paripūrakāritāti niyyānikasāsanamhi sīlesu paripūrakāritāpi sammaggatā hoti, saggamokkhasampattim āvahati. Tattha Chattamāṇavakavatthusāmaṇeravatthu-ādīni dīpetabbāni.

Sahadhammikesūti niyyānikasāsane sahadhammikesu piyamanāpatāpi sammaggatā hoti, mahāsampattim āvahati. Ayamatto Vimānapetavatthūhi dīpetabbo. Vuttaṃ hetam—

“Khīrodanamahamadāsīm, bhikkhuno piṇḍāya carantassa -pa-

Phāṇitaṃ -pa-. Uccukhaṇḍikaṃ.

Timbarusakaṃ. Kakkārikaṃ¹.

Eḷālukaṃ. Vallipakkaṃ.

Phārusakaṃ. Hatthapatākaṃ.

Sākamuṭṭhim. Pupphakamuṭṭhim². Mūlakaṃ.

Nimbamuṭṭhim. Ambakañjikaṃ.

Doṇinimajjanaṃ. Kāyabandhanaṃ.

Aṃsabaddhakaṃ. Āyogapaṭṭam.

Vidhūpanaṃ. Tālavaṇṭam.

Morahatthaṃ. Chattaṃ. Upāhanaṃ.

Pūvaṃ. Modakaṃ.

Sakkhalikaṃ ahamadāsīm, bhikkhuno piṇḍāya carantassa -pa-

Tassā me passa vimānaṃ, accharā kāmavaṇṇinīhamasmī”ti³.

Tam kissa hetūti-ādi vuttanayānusāreṇeva yojetvā veditaḅbaṃ.

1. Kakkārukaṃ (Sī, Syā, Ka) 2. Puthukamuṭṭhim (Sī, Syā) 3. Khu 2. 44 piṭṭhādīsu.

145. Idāni yesaṃ upādānānaṃ titthiyā na sammā pariññaṃ paññapenti, Tathāgato paññapeti, tesāṃ paccayaṃ dassetuṃ **ime ca bhikkhavi-** ādimāha. Tattha **kiṃ nidānā**ti-ādīsu nidānādīni sabbāneva kāraṇavevacanāni. Kāraṇaṃ hi yasmā phalaṃ nideti handa naṃ gaṇhathāti appeti viya, tasmā **nidānanti** vuccati. Yasmā taṃ tato jāyati samudeti pabhavati, tasmā samudayo, jāti, pabhavoti vuccati. Ayaṃ panettha padattho—kiṃ nidānaṃ etesanti **kiṃnidānā**. Ko samudayo etesanti **kiṃ samudayā**. Kā jāti etesanti **kiṃ jātikā**. Ko pabhavo etesanti **kiṃpabhavā**. Yasmā pana tesāṃ taṇhā yathāvuttena atthena nidānañceva samudayo ca jāti ca pabhavo ca, tasmā “taṇhānidānā”ti-ādīmaḥa. Evaṃ sabbapadesu attho vedītabbo. Yasmā pana Bhagavā na kevalaṃ upādānasseva paccayaṃ jānāti, upādānassa paccayabhūtāya taṇhāyapi, taṇhādīpaccayānaṃ vedanādīnampi paccayaṃ jānātiyeva, tasmā **taṇhā cāyaṃ bhikkhavi-** ādimāha.

Yato ca khoti yasmaṃ kāle. **Avijjā pahīnā hotīti** vaṭṭamūlikā avijjā anuppādanīrodhena pahīnā hoti. **Vijjā uppannāti** arahattamaggavijjā uppannā. **So avijjāvīrāgā vijjuppādāti** so bhikkhu avijjāya ca pahīnattā vijjāya ca uppannattā. **Neva kāmupādānaṃ upādiyatīti** neva kāmupādānaṃ gaṇhāti na upeti, na sesāni upādānāni. **Anupādiyaṃ na paritassatīti** evaṃ kiñci upādānaṃ aggaṇhanto taṇhāparitassanāya na paritassati. **Aparitassanti** aparitassanto taṇhaṃ anuppādentō. **Paccattaṃyeva parinibbāyatīti** sayameva kilesaparīnibbānena parīnibbāyati. Evamassa āsavakkhayaṃ dassetvā idāni khīṇāsavassa bhikkhuno paccavekkhaṇaṃ dassento **khīṇā jātīti**-ādīmaḥa. Taṃ vuttatthamevāti.

Papañcasūdaniyā Majjhimanikāyaṭṭhakathāya

Cūlasīhanādasuttavaṇṇanā niṭṭhitā.

2. Mahāsīhanādasuttavaṇṇanā

Vesālinagaravaṇṇanā

146. **Evaṃ me sutanti** Mahāsīhanādasuttam. Tattha **Vesāliyanti** evaṃnāmake nagare. Tam kira aparāparam visālībhūtātāya “Vesālī”ti saṅkham gataṃ. Tatrāyam anupubbakathā—Bārāṇasirañño kira aggamaheṣiyā kucchimhi gabbho saṅṭhāsi, sā ñatvā rañño nivedesi. Rājā gabbhaparīhāram adāsi. Sā sammā parihaṛiyamānā gabbhaparipākakāle vijāyanagharam pāvisi. Puññavantīnam paccūsasamaye gabbhavuṭṭhānam hoti, sā ca tāsam aññatarā, tena paccūsasamaye alattakapaṭalabandhujīvakapupphasadisam maṃsapesim vijāyi. Tato “aññā deviyo suvaṇṇabimbasadise putte vijāyanti, aggamaheṣī maṃsapesinti rañño purato mama avaṇṇo uppajjeyyā”ti cintetvā tena avaṇṇabhayena tam maṃsapesim ekasmiṃ bhājane pakkhipitvā paṭikujjitvā rājamuddikāya lañchetvā¹ Gaṅgāya sote pakkhipāpesi. Manussehi chaḍḍitamatte devatā ārakkham saṃvidahimsu. Suvaṇṇapaṭṭakam cettha jātihiṅgulakena “Bārāṇasirañño aggamaheṣiyā pajā”ti likhitvā bandhimsu. Tato tam bhājanam ūmibhayādīhi anupaddutam Gaṅgāsotena pāyāsi.

Tena ca samayena aññataro tāpaso gopālakakulam² nissāya Gaṅgātīre viharati. So pātova Gaṅgam otiṇṇo tam bhājanam āgacchantam disvā paṃsukūlasaññāya aggahesi. Athettha tam akkharapaṭṭikam rājamuddikālañchanam ca disvā muñcitvā tam maṃsapesim addasa, disvānassa etadahosi “siyā gabbho, tathā hissa duggandhapūtikabhāvo natthī”ti assamam netvā suddhe okāse ṭhapesi. Atha aḍḍhamāsaccayena dve maṃsapesiyo ahesum. Tāpaso disvā sādhitaram ṭhapesi. Tato puna aḍḍhamāsaccayena ekamekissā maṃsapesiyā hatthapādasīsānamatthāya pañca pañca piḷakā uṭṭhahimsu. Atha tato aḍḍhamāsaccayena ekā maṃsapesi suvaṇṇabimbasadiso dārako, ekā dārikā ahosi.

Tesu tāpasassa puttasineho uppajji, aṅguṭṭhakato cassa khīram nibbatti, tato pabhuti ca khīrabhataṃ alabhittha, so bhataṃ bhuñjitvā khīram dārakānam

1. Lañcetvā (Syā)

2. Gopakulam (Syā), gopakakulam (Sī)

mukhe āsiñcati. Tesam udaram yaṃ yaṃ pavisati, taṃ taṃ sabbam maṇibhājanagataṃ viya dissati, evaṃ nicchavī ahesuṃ. Apare āhu “sibbetvā ṭhapitā viya nesam aññamaññaṃ līnā chavi ahoṣī”ti. Evaṃ te nicchavitāya vā līnacchavitāya vā **Licchavīti** paññāyimsu.

Tāpaso dāyake posento ussūre gāmaṃ bhikkhāya¹ pavisati, atidivā paṭikkamati. Tassa taṃ byāpāraṃ ṇatvā gopālakā āhaṃsu “bhante pabbajitānaṃ dārakaposanaṃ palibodho, amhākaṃ dārake detha, mayaṃ possessāma, tumhe attano kammaṃ karoṭhā”ti. Tāpaso sādḥūti paṭissuṇi. Gopālakā dutiyadivase maggaṃ samaṃ katvā pupphehi okiritvā dhajapaṭākā ussāpetvā tūriyehi vajjamānehi assamaṃ āgatā. Tāpaso “mahāpuñña dārakā appamādena vaḍḍhetha, vaḍḍhetvā ca aññamaññaṃ āvāhavivāhaṃ karoṭha, pañcagorasena rājānaṃ tosetvā bhūmibhāgaṃ gahetvā nagaraṃ māpetha, tattha kumāraṃ abhisiñcathā”ti vatvā dārake adāsi. Te sādḥūti paṭissuṇitvā dārake netvā posesuṃ.

Dārakā vuddhimanvāya kīḷantā vivādaṭṭhānesu aññe gopālakadārake hatthenapi pādenapi paharanti. Te rodanti. “Kissa rodathā”ti ca mātāpitūti vuttā “ime nimmātāpitikā tāpasapositā amhe atipaharanti”ti vadanti. Tato tesam mātāpitaro “ime dārakā aññe dārake vināsenti dukkhāpenti, na ime saṅgahetabbā, vajjetabbā ime”ti āhaṃsu. Tato pabhuti kira so padeso **vajjīti** vuccati yojanasatiko parimāṇena. Atha taṃ padesaṃ gopālakā rājānaṃ tosetvā aggahesuṃ. Tattha ca nagaraṃ māpetvā soḷasavassuddesikaṃ kumāraṃ abhisiñcitvā rājānaṃ akaṃsu. Tāya cassa dārikāya saddhim vivāhaṃ katvā katikaṃ akaṃsu “bāhirakadārikā na ānetabbā, ito dārikā na kassaci dātabbā”ti. Tesam paṭhamasaṃvāseṇa dve dārakā jātā dhītā ca putto ca. Evaṃ soḷasakkhattuṃ dve dve jātā. Tato tesam dārakānaṃ yathākkamaṃ vaḍḍhantānaṃ āramuyyānanivāsaṭṭhānaparivārasampattiṃ gahetuṃ appahontā² nagaraṃ tikkhattuṃ gāvutantarena gāvutantarena

1. Piṇḍāya (Sī)

2. Appahontaṃ (Sī, Syā)

parikkhipimsu. Tassa punappunam visālīkatattā Vesālīteva nāmaṃ jātaṃ. Tena vuttaṃ “Vesāliyaṃ evaṃ nāmake nagare”ti.

Bahinagareti nagarassa bahi, na Ambapālivanam viya antonagarasmim. Ayaṃ pana Jīvakambavanam viya nagarassa bahiddhā vanasaṇḍo. Tena vuttaṃ “bahinagare”ti. **Aparapureti** purassa apare, pacchimadisāyanti attho. **Vana saṇḍeti** so kira vanasaṇḍo nagarassa pacchimadisāyam gāvutamatte ṭhāne. Tattha manussā Bhagavato Gandhakuṭim katvā taṃ parivāretvā bhikkhūnam rattiṭṭhānadivāṭṭhānacaṅkamaleṇakuṭimaṇḍapādīni paṭiṭṭhapesum, Bhagavā tattha viharati. Tena vuttaṃ “aparapure vanasaṇḍe”ti. **Sunakkhattoti** tassa nāmaṃ. Licchavīnam pana puttattā **Licchavi puttoti** vutto. **Acirapakkantoti** vibbhamitvā gihbhāvūpagamanena adhunāpakkanto. **Parisatīti** parisamajjhe. **Uttarimanussadhammāti** ettha **manussadhammā** nāma dasakusalakammamāthā. Te paṭisedhetum na sakkoti. Kasmā? Upārambhābhayā. Vesāliyam hi bahū manussā ratanattaye pasannā Buddhamāmakā dhammāmakā saṃghamāmakā. Te dasakusalakammamāthamattampi natthi samaṇassa Gotamassāti vutte tvam kattha Bhagavantam pāṇam hanantam addasa, kattha adinnam ādiyantanti-ādīni vatvā attano pamāṇam na jānāsi, kim dantā me atthīti pāsāṇasakkharā khādasi, ahinaṅgutṭhe gaṇhitum vāyamasī, kakacadantesu pupphāvalīkam kīlītum icchasi, mukhato te dante pātesāṃmāti vadeyyum. So tesam upārambhābhayā evam vuttum na sakkoti.

Uttarimanussadhammādivaṇṇanā

Tato uttarim pana visesādhigamaṃ paṭisedhento **uttari manussadhammā alamariyañāṇadassanaviseso**ti āha.

Tattha alamariyam nātunti **alamariyo**, ariyabhāvāya samatthoti vuttam hoti. Ñāṇadassanameva **ñāṇadassanaviseso**. Alamariyo ca so ñāṇadassanaviseso cāti **alamariyañāṇadassanaviseso**. Ñāṇadassananti dibbacakkhupi vipassanāpi maggopi phalampi paccavekkhaṇañāṇampi sabbaññutaññāṇampi vuccati. “Appamatto samāno ñāṇadassanam ārodhetī”ti¹ hi ettha dibbacakkhu ñāṇadassanam nāma. “Ñāṇadassanāya cittam

1. Ma 1. 257 Piṭṭhe.

abhinīharati abhininnāmeti”¹ti¹ ettha vipassanāñāṇaṃ. “Abhabbā te ñāṇadassanāya anuttarāya sambodhāyā”²ti² ettha maggo. “Ayamañño uttari manussadhammā alamariyañāṇadassanaviseso adhigato phāsu vihāro”³ti³ ettha phalaṃ. “Ñāṇaṅca pana me dassanaṃ udapādi, akuppā me cetovimutti, ayamantimā jāti, natthi dāni punabbhavo”⁴ti⁴ ettha paccavekkhaṇaṅñāṇaṃ. “Ñāṇaṅca pana me dassanaṃ udapādi sattāhakālaṅkato Ālāro Kālāmo”⁵ti⁵ ettha Sabbaññutaññāṇaṃ. Idha pana lokuttaramaggo adhippeto. Taṃ hi so Bhagavato paṭisedheti.

Takkapariyāhatanti iminā ācariyaṃ paṭibāhati. Evaṃ kirassa ahosi— samaṇena Gotamena ācariye upasaṅkamitvā sukhumaṃ dhammantaraṃ gahitaṃ nāma natthi, takkapariyāhataṃ pana takketvā evaṃ bhavissati evaṃ bhavissatīti takkapariyāhataṃ dhammaṃ desetīti. **Vīmaṃsānucaritanti** iminā cassa lokiyapaññaṃ anujānāti. Samaṇo Gotamo paññavā, so taṃ paññāsāṅkhātaṃ indavajirūpamaṃ vīmaṃsaṃ evaṃ vaṭṭissati evaṃ vaṭṭissatīti ito cito ca anucarāpetvā vīmaṃsāya anucaritaṃ dhammaṃ deseti. **Sayaṃpaṭibhānanti** imināssa dhammesu paccakkhabhāvaṃ paṭibāhati. Evaṃ hissa ahosi—samaṇassa Gotamassa sukhumaṃ dhammantaraṃ vipassanā vā maggo vā phalaṃ vā paccavekkhaṇā vā natthi, yaṃ pana laddhapariso, rājānaṃ cakkavattim viya naṃ cattāro vaṇṇā parivārenti, suphusitaṃ panassa dantāvaraṇaṃ, mudukā jivhā, madhuro saro, anelagaḷā vācā, so yaṃ yadevassa upaṭṭhāti, taṃ taṃ gahetvā sayaṃpaṭibhānaṃ kathento mahājanaṃ rañjetīti.

Yassa ca khvāssa atthāya dhammo desitoti yassa ca kho atthāya assa dhammo desito. Seyyathidaṃ, rāgapāṭighātatthāya asubhakammaṭṭhānaṃ, dosapāṭighātatthāya mettābhāvanā, mohapāṭighātatthāya pañca dhammā, vitakkūpacchedāya ānāpānassati.

So niyyāti takkarassa sammā dukkhakkhayāyāti so dhammo yo taṃ yathādesitaṃ karoti, tassa takkarassa sammā hetunā nayena kāraṇena vaṭṭadukkhakkhayāya niyyāti gacchati taṃ atthaṃ sādhetīti

1. Dī 1. 72 piṭṭhe.

2. Am 1. 521 piṭṭhe.

3. Ma 1. 268 piṭṭhe.

4. Vi 3. 16 piṭṭhe.

5. Ma 2. 294 piṭṭhe.

dīpeti. Idaṃ panesa na attano ajjhāsayena vadati. Buddhānaṃ hi dhammo aniyyānikoti evamevaṃ pavedeyya, na pana sakkoti vattum. Kasmā? Upārambhahayā. Vesāliyaṃ hi bahū sotāpanna sakadāgāmi anāgāmi-upāsakā. Te evaṃ vadeyyum “Sunakkhatta tvaṃ Bhagavatā desito dhammo aniyyānikoti vadasi, yadi ayaṃ dhammo aniyyāniko, imasmiṃ nagare ime kasmā ettakā sotāpannā jātā, ettakā sakadāgāmī, ettakā anāgāmīti pubbe vuttanayena upārambhaṃ kareyyun”ti. So iminā upārambhahayena aniyyānikoti vattum asakkonto ajjunena¹ vissatṭhakaṇḍaṃ viya assa dhammo amogho niyyāti, abhantare panassa kiñci natthīti vadati.

Assosi khoti Vesāliyaṃ brāhmaṇakulasetṭhikulādīsu tattha tattha parisamajjhe evaṃ bhāsamānassa taṃ vacanaṃ suṇi, na pana paṭisedhesi. Kasmā? Kāruṇṇatāya. Evaṃ kirassa ahosi ayaṃ kuddho jhāyamānaṃ Veḷuvanaṃ viya pakkhittaloṇaṃ uddhanaṃ viya ca kodhavasena paṭapaṭāyati², mayā paṭibāhito pana mayipi āghātaṃ bandhissati, evamassa Tathāgate ca mayi cāti dvīsu janesu āghāto atibhāriyo bhavissatīti kāruṇṇatāya na paṭisedhesi. Api cassa evaṃ ahosi, Buddhānaṃ avaṇṇakathanāṃ nāma puṇṇacande dosāropanasadisam, ko imassa kathaṃ gaṇhissati, sayameva kheḷe pacchinne mukhe sukkhe oramissatīti iminā kāraṇena na paṭisedhesi. **Piṇḍapātaṭapaṭikkantoti** piṇḍapātapariyesanato apagato.

147. **Kodhanoti** caṇḍo pharuso. **Moghapurisoti** tucchapuriso. Yassa hi tasmim attabhāve maggaphalānaṃ upanissayo natthi, taṃ Buddhā “moghapuriso”ti vadanti. Upanissaye satipi tasmim khaṇe magge vā phale vā asati “moghapuriso”ti vadantiyeva. Imassa pana tasmim attabhāve maggaphalānaṃ upanissayo samucchinnoyeva, tena taṃ “moghapuriso”ti āha. **Kodhā ca panassa esā vācā bhāsītāti** esā ca panassa vācā kodhena bhāsītā.

1. Ajjhanena (Syā, Ka)

2. Taṭataṭāyati (bahūsu)

Kasmā panesa Bhagavato kuddhoti. Ayaṃ hi pubbe Bhagavantam upasaṅkamitvā dibbacakkhuparikammaṃ pucchi. Athassa Bhagavā kathesi. So dibbacakkhumṃ nibbattetvā ālokaṃ vaḍḍhetvā devaloke olokento Nandanavana Cittalatāvana Phārusakavana Missakavanesu dibbasampattim anubhavamāne devaputte ca devadhītaro ca disvā etesaṃ evarūpāya attabhāvasampattiyā t̥hitānaṃ kīvamadhuro nu kho saddo bhavissatīti saddaṃ sotukāmo hutvā Dasabalaṃ upasaṅkamitvā dibbasotadhātuparikammaṃ pucchi. Bhagavā panassa dibbasotadhātuyā upanissayo natthīti ñatvā parikammaṃ na kathesi. Na hi Buddhā upanissayavirahitassa parikammaṃ kathenti. So Bhagavati āghātaṃ bandhitvā cintesi “ahaṃ samaṇaṃ Gotamaṃ paṭhamaṃ dibbacakkhuparikammaṃ pucchim, so ‘mayhaṃ taṃ sampajjatu vā mā vā sampajjatū’ti kathesi. Ahaṃ pana paccattapurisakārena taṃ nibbattetvā dibbasotadhātuparikammaṃ pucchim, taṃ me na kathesi. Addhāssa evaṃ hoti ‘ayaṃ rājapabbajito dibbacakkhuññaṃ nibbattetvā dibbasotadhātuññaṃ nibbattetvā cetopariyaññaṃ nibbattetvā āsavānaṃ khayaññaṃ nibbattetvā mayā samasamo bhavissatī’ti issāmacchariyavasena mayhaṃ na kathetī”ti. Bhiyyoso āghātaṃ bandhitvā kāsāyāni chaḍḍetvā gihibhāvaṃ patvāpi na tuṅhībhūto vicarati. Dasabalaṃ pana asatā tucchena abbhācikkhanto vicarati. Tenāha Bhagavā “kodhā ca panassa esā vācā bhāsītā”ti.

Vaṇṇo heso Sāriputtāti Sāriputta Tathāgatena satasahassakappādhikāni cattāri asaṅkhyeyyāni pāramiyo pūrantena etadatthameva vāyāmo kato “desanādhmmo me niyyāniko bhavissatī”ti. Tasmā yo evaṃ vadeyya, so vaṇṇamyeva Tathāgatassa bhāsati. Vaṇṇo heso Sāriputta Tathāgatassa, guṇo eso Tathāgatassa, na aguṇoti dasseti.

Ayampi hi nāma Sāriputtāti-ādinā kim dasseti? Sunakkhattena paṭisiddhassa uttarimanussadhammassa attani atthitaṃ dasseti. Bhagavā kira ayaṃ¹ Sāriputta Sunakkhatto moghapuriso natthi Tathāgatassa uttarimanussadhammoti vadati. Mayhaṃ ca sabbaññutaññaṃ nāma atthi, iddhividhaññaṃ nāma atthi, dibbasotadhātuññaṃ nāma atthi, cetopariyaññaṃ nāma atthi,

dasabalaññaṇaṃ nāma atthi, catuvesārajaññaṇaṃ nāma atthi, aṭṭhasu parisāsu akampanaññaṇaṃ nāma atthi, catuyoniparicchedakaññaṇaṃ nāma atthi, pañcagatiparicchedakaññaṇaṃ nāma atthi, sabbepi cete uttarimanussadhammāyeva. Evarūpesu uttarimanussadhammesu ekassāpi vijānanasamatthaṃ dhammanvayamattampi nāma etassa moghapurisassa na bhavissatīti etamatthaṃ dassetuṃ **ayampi hi nāma Sāriputtāti-ādinā** nayena imaṃ desanaṃ ārabhi. Tattha anvetīti **anvayo**, jānāti anubujjhatīti attho. Dhammassa anvayo **dhammanvayo**, taṃ taṃ sabbaññutaññāṇādidhammaṃ jānanaṇaṇāyetaṃ adhivacanaṃ. “Itipi so Bhagavā”ti-ādīhi evarūpampi nāma mayhaṃ sabbaññutaññāṇasaṅkhātāṃ uttarimanussadhammaṃ vijjamaṇameva atthīti jānituṃ tassa moghapurisassa dhammanvayopi na bhavissatīti dasseti. Iddhividhaññāṇādisupi evaṃ yojanā veditabbā.

Dasabalaññādivaṇṇanā

148. Ettha ca kiñcāpi cetopariyaññānantaraṃ tisso vijjā vattabbā siyumu, yasmā pana tāsū vuttāsū upari dasabalaññaṇaṃ na paripūrati, tasmā tā avatvā Tathāgatassa dasabalaññaṇaṃ paripūraṃ katvā dassento **dasa kho panimāni Sāriputtāti-ādimāha**. Tattha **Tathāgatabalānīti** aññehi asādhāraṇāni Tathāgatasseva balāni. Yathā vā pubbabuddhānaṃ balāni puññussayasampattiyā āgatāni, tathā āgatabalānītipi attho. Tattha duvidhaṃ Tathāgatabalaṃ kāyabalaṇca ñāṇabalaṇca. Tesu kāyabalaṃ hatthikulānusārena veditabbāṃ. Vuttaṃ hetāṃ porāṇehi—

“Kālāvakaṇca gaṅgeyyaṃ, paṇḍaraṃ tamba piṅgalaṃ.

Gandha maṅgala hemaṇca, uposathachaddantime dasā”ti.

Imāni hi dasa hatthikulāni. Tattha kālāvakanti pakatihatthikulāni daṭṭhabbāni. Yaṃ dasannaṃ purisānaṃ kāyabalaṃ, taṃ ekassa kālāvakahatthino. Yaṃ dasannaṃ kālāvakaṇaṃ balaṃ, taṃ ekassa gaṅgeyyassa. Yaṃ dasannaṃ gaṅgeyyānaṃ, taṃ ekassa paṇḍarassa. Yaṃ dasannaṃ paṇḍarānaṃ, taṃ ekassa tambassa. Yaṃ dasannaṃ tambānaṃ, taṃ ekassa piṅgalassa. Yaṃ dasannaṃ piṅgalānaṃ, taṃ ekassa gandhahatthino. Yaṃ dasannaṃ gandhahatthīnaṃ, taṃ ekassa maṅgalassa. Yaṃ dasannaṃ maṅgalānaṃ, taṃ ekassa hemavatassa. Yaṃ dasannaṃ hemavatānaṃ, taṃ ekassa uposathassa.

Yam dasannaṃ uposathānaṃ, taṃ ekassa Chaddantassa. Yam dasannaṃ Chaddantānaṃ, taṃ ekassa Tathāgatassa. Nārāyanasaṅghātabalantipi idameva vuccati. Tadetam pakatihatthigaṇanāya hatthīnaṃ koṭisahassānaṃ purisagaṇanāya dasannaṃ purisakoṭisahassānaṃ balaṃ hoti. Idam tāva Tathāgatassa **kāyabalaṃ**.

Ñāṇabalaṃ pana Pāḷiyam tāva āgatameva. Dasabalañāṇaṃ, catuvesārajañāṇaṃ, aṭṭhasu parisāsu akampanañāṇaṃ, catuyoniparicchedakañāṇaṃ, pañcagatiparicchedakañāṇaṃ. Saṃyuttake¹ āgatāni tesattati ñāṇāni sattasattati ñāṇānīti evaṃ aññānīpi anekāni ñāṇasahassāni, etaṃ **ñāṇabalaṃ** nāma. Idhāpi ñāṇabalameva adhippetam. Ñāṇāñhi akampiyaṭṭhena upatthambhanaṭṭhena ca **balanti** vuttaṃ.

Yehi balehi samannāgatoti yehi dasahi ñāṇabalehi upeto samupeto. **Āsabham** ṭhānanti seṭṭhatṭhānaṃ uttamaṭṭhānaṃ. Āsabhā vā pubbabuddhā, tesam ṭhānanti attho. Api ca gavasatajeṭṭhako usabho, gavasahassajeṭṭhako vasabho. Vajasatajeṭṭhako² vā usabho, vajasahassajeṭṭhako vasabho, sabbagavaseṭṭho sabbaparissayasaho seto pāsādiko mahābhāravaho asanisatasaddehipi akampaniyo nisato, so idha usabhoti adhippeto. Idampi hi tassa pariyāyavacanaṃ. Usabhassa idanti **āsabham**. **Ṭhānanti** catūhi pādehi pathaviṃ uppīletvā acalaṭṭhānaṃ. Idam pana āsabham viyāti āsabham. Yatheva hi nisabhasaṅkhāto usabho usabhabalena samannāgato catūhi pādehi pathaviṃ uppīletvā acalaṭṭhānena tiṭṭhati, evaṃ Tathāgatopi dasahi Tathāgatabalehi samannāgato catūhi vesārajjapādehi aṭṭhāparisapathaviṃ uppīletvā sadevake loke kenaci paccatthikena paccāmittena akampiyo acalaṭṭhānena tiṭṭhati. Evaṃ tiṭṭhamānova tam āsabham ṭhānaṃ paṭijānāti upagacchati na paccakkhāti attani āropeti. Tena vuttaṃ “āsabham ṭhānaṃ paṭijānāti”ti.

Parisāsūti aṭṭhasu parisāsu. **Sīhanādaṃ nadatīti** seṭṭhanādaṃ abhītanādaṃ nadati, sīhanādasadisam vā nādaṃ nadati. Ayamatto

1. Sam 1. 290 piṭṭhe.

2. Gavajasatajeṭṭhako (Syā)

Sīhanādasuttena dīpetabbo. Yathā vā sīho sahanato hananato ca sīhoti vuccati, evaṃ Tathāgato lokadhammānaṃ sahanato parappavādānaṃca hananato sīhoti vuccati. Evaṃ vuttassa sīhassa nādaṃ sīhanādaṃ. Tattha yathā sīho sīhabalena samannāgato sabbattha visārado vigatalomahaṃso sīhanādaṃ nadati, evaṃ Tathāgatasīhopi Tathāgatabalehi samannāgato aṭṭhasu parisāsu visārado vigatalomahaṃso iti rūpanti-ādinā nayena nānāvīdhadesanāvīlāsasampannaṃ sīhanādaṃ nadati. Tena vuttam “parisāsu sīhanādaṃ nadati”ti. **Brahmacakkaṃ pavatteti** ettha **brahmanti** seṭṭhaṃ uttamaṃ visiṭṭhaṃ. Cakkasaddo panāyaṃ—

Sampattiyāṃ lakkhaṇe ca, rathaṅge iriyāpathe.

Dāne ratanadhammūra, cakkādīsū¹ ca dissati.

Dhammacakke idha mato², taṃ ca dvedhā vibhāvaye.

“Cattārimāni bhikkhave cakkāni, yehi samannāgatānaṃ devamanussānaṃ”ti-ādīsū³ hi ayaṃ sampattiyāṃ dissati. “Pādatalesu cakkāni jātāni”ti⁴ ettha lakkhaṇe. “Cakkaṃva vahato padan”ti⁵ ettha rathaṅge. “Catucakkaṃ navadvāraṇaṃ”ti⁶ ettha iriyāpathe. “Dadaṃ bhuñja mā ca pamādo, cakkaṃ pavattaya sabbapāṇinan”ti⁷ ettha dāne. “Dibbaṃ cakkaratanaṃ pāturahosī”ti⁸ ettha ratanacakke. “Mayā pavattitaṃ cakkan”ti⁹ ettha dhammacakke. “Icchāhatassa posassa, cakkaṃ bhamati matthake”ti¹⁰ ettha uracakke¹¹. “Khurapariyantena cepi cakkena”ti¹² ettha paharaṇacakke. “Asanivicakkan”ti¹³ ettha asanimaṇḍale. Idha panāyaṃ dhammacakke adhippeto.

Taṃ pana dhammacakkaṃ duvidhaṃ hoti paṭivedhaññaṇṇe ceva desanāññaṇṇaṃ. Tattha paññāpabhāvitāṃ attano ariyabalāvahaṃ¹⁴ paṭivedhaññaṇṇaṃ. Karuṇāpabhāvitāṃ sāvakaṇaṃ ariyabalāvahaṃ desanāññaṇṇaṃ. Tattha paṭivedhaññaṇṇaṃ uppajjamānaṃ uppānanti duvidhaṃ. Tañhi abhinikkhamaṇato yāva srahattamaggā uppajjamānaṃ, phalakkhaṇe uppānaṃ nāma. Tusitabhavanato vā yāva

-
- | | |
|------------------------------------|--------------------------------|
| 1. Ratanadhammakhuracakkādīsū (Ka) | 2. Dhamme idha adhippeto (Syā) |
| 3. Am 1. 341 piṭṭhe. | 4. Dī 2. 14 piṭṭhe. |
| 5. Khu 1. 13 piṭṭhe. | 6. Sam 1. 15 piṭṭhe. |
| 7. Khu 5. 173 piṭṭhe. | 8. Dī 2. 141 piṭṭhe. |
| 9. Khu 1. 368 piṭṭhe. | 10. Khu 5. 24. 132 piṭṭhesu. |
| 11. Khuracakke (Syā, Ka) | 12. Dī 1. 49 piṭṭhe. |
| 13. Dī 3. 36; Sam 1. 427 piṭṭhesu. | 14. Ariyaphalāvahaṃ (Sī, Syā) |

Mahābodhipallaṅke arahattamaggā uppajjamānaṃ, phalakkhaṇe uppannaṃ nāma. Dīpaṅkaradasabalato paṭṭhāya vā yāva arahattamaggā uppajjamānaṃ, phalakkhaṇe uppannaṃ nāma. Desanāññaṃpi pavattamānaṃ pavattanti duvidhaṃ. Tañhi yāva Aññātakonḍaññaṃ sotāpattimaggā pavattamānaṃ, phalakkhaṇe pavattaṃ nāma. Tesu paṭivedhaññaṃ lokuttaraṃ, desanāññaṃ lokiyaṃ. Ubhayampi panetaṃ aññehi asādhāraṇaṃ, Buddhānaṃyeva orasaññaṃ.

Idāni yehi balehi samannāgato Tathāgato āsabhaṃ ṭhānaṃ paṭijānāti, yāni āditova “dasa kho panimāni Sāriputta Tathāgatassa Tathāgatabalāni”¹tinikkhittāni, tāni vitthārato dassetuṃ **katamāni dasa, idha Sāriputta Tathāgato ṭhānaṃca ṭhānatoti**-ādimāha. Tattha **ṭhānaṃca ṭhānatoti** kāraṇaṃca kāraṇato. Kāraṇaṃhi yasmā tattha phalaṃ tiṭṭhati tadāyattavuttiyāya uppajjati ceva pavattati ca, tasmā ṭhānanti vuccati. Tam Bhagavā “ye ye dhammā yesaṃ yesaṃ dhammānaṃ hetū paccayā uppādāya, taṃ taṃ ṭhānaṃ. Ye ye dhammā yesaṃ yesaṃ dhammānaṃ na hetū na paccayā uppādāya, taṃ taṃ aṭṭhānaṃ”²ti pajānanto ṭhānaṃca ṭhānato aṭṭhānaṃca aṭṭhānato yathābhūtaṃ pajānāti. Abhidhamme panetaṃ “tattha katamaṃ Tathāgatassa ṭhānaṃca ṭhānato aṭṭhānaṃca aṭṭhānato yathābhūtaṃ ṇāṇaṃ”¹ti-ādinā¹ nayena vitthāritameva. **Yampīti** yena ṇāṇena. **Idampi Sāriputta Tathāgatassāti** idampi ṭhānāṭṭhānaññaṃ Tathāgatassa Tathāgatabalaṃ nāma hotīti attho. Evaṃ sabbapadesu yojanā veditabbā.

Kammasamādānānanti samādiyivā katānaṃ kusalākusalakammānaṃ, kammameva vā kammasamādānaṃ. **Ṭhānaso hetusoti** paccayato ceva hetuto ca. Tattha gati-upadhikālapayogā vipākassa ṭhānaṃ. Kammaṃ hetu. Imassa pana ṇāṇassa vitthārakathā “atthekaccāni pāpakāni kammasamādānāni gatisampattiṭṭhānāni na vipaccanti”²ti-ādinā² nayena abhidhamme āgatāyeva.

Sabbatthagāmininti sabbagati-gāmininim agati-gāminiṃca. **Paṭipadanti** maggaṃ. **Yathābhūtaṃ pajānātīti** bahūsupi manusseku ekameva paṇaṃ ghātentesu

1. Abhi 2. 348 piṭṭhe.

2. Abhi 2. 351 piṭṭhe.

imassa cetanā nirayagāminī bhavissati, imassa cetanā tiracchānayanonigāminīti iminā nayena ekavattusmimpi kusalākusalacetanāsankhātānaṃ paṭipattīnaṃ aviparītato sabhāvaṃ jānāti. Imassa ca nāṇassa vitthārakathā “tattha katamaṃ Tathāgataṃ sabbatthagāminiṃ paṭipadaṃ yathābhūtaṃ nāṇaṃ, idha Tathāgato ayaṃ maggo ayaṃ paṭipadā nirayagāmīti pajānāti”¹ti-ādinā¹ nayena abhidhamme āgatāyeva.

Anekadhātunti cakkhuhātu-ādīhi kāmadhātu-ādīhi vā dhātūhi bahudhātum. **Nānādhātunti** tāsāmyeva dhātūnaṃ vilakkhaṇatāya nānappakāradhātum. **Lokanti** khandhāyatanadhātulokaṃ. **Yathābhūtaṃ pajānāti**ti tāsāṃ tāsāṃ dhātūnaṃ aviparītato sabhāvaṃ paṭivijjhati. Idampi nāṇaṃ “tattha katamaṃ Tathāgataṃ anekadhātunānādhātulokaṃ yathābhūtaṃ nāṇaṃ, idha Tathāgato khandhanānattaṃ pajānāti”¹ti-ādinā¹ nayena abhidhamme vitthāritameva.

Nānādhimuttikatanti hīnādīhi adhimuttīhi nānādhimuttikabhāvaṃ. Idampi nāṇaṃ “tattha katamaṃ Tathāgataṃ sattānaṃ nānādhimuttikataṃ yathābhūtaṃ nāṇaṃ, idha Tathāgato pajānāti santi sattā hīnādhimuttikā”¹ti-ādinā¹ nayena abhidhamme vitthāritameva.

Parasattānanti padhānasattānaṃ. **Parapuggalānanti** tato paresaṃ hīnasattānaṃ. Ekattameva vā etaṃ padadvayaṃ. Veneyyavasena pana dvedhā vuttaṃ. **Indriyaparopariyattanti** saddhādīnaṃ indriyānaṃ parabhāvaṃ aparabhāvaṃca, vuddhiṃca hāniṃcāti attho. Imassapi nāṇassa vitthārakathā “tattha katamaṃ Tathāgataṃ parasattānaṃ parapuggalānaṃ indriyaparopariyattaṃ yathābhūtaṃ nāṇaṃ, idha Tathāgato sattānaṃ āsayaṃ pajānāti anusayaṃ pajānāti”¹ti-ādinā¹ nayena abhidhamme āgatāyeva.

Jhānavimokkhasamādhisamāpattīnanti paṭhamādīnaṃ catunnaṃ jhānaṃ rūpī rūpāni passaṭṭīti-ādīnaṃ aṭṭhannaṃ vimokkhānaṃ savitakkasavicārādīnaṃ tiṇṇaṃ samādhīnaṃ paṭhamajjhānasamāpattī-ādīnaṃca navannaṃ anupubbasaṃpattīnaṃ. **Saṃkilesanti** hānabhāgiyadhammaṃ. **Vodānanti** visesabhāgiyadhammaṃ. **Vuṭṭhānanti** “vodānampi vuṭṭhānaṃ.

1. Abhi 2. 352 piṭṭhe.

2. Abhi 2. 353 piṭṭhe.

tamhā tamhā samādhimhā vuṭṭhānampi vuṭṭhānan”ti¹ evaṃ
vuttapaguṇajjhānañceva bhavaṅgaphalasangamāpattiyo ca. Heṭṭhimaṃ
heṭṭhimañhi paguṇajjhānaṃ uparimassa uparimassa padaṭṭhānaṃ hoti.
Tasmā ‘vodānampi vuṭṭhānan”ti vuttaṃ. Bhavaṅgena pana sabbajjhānehi
vuṭṭhānaṃ hoti. Phalasangamāpattiyā nirodhasangamāpattito vuṭṭhānaṃ hoti. Tam
sandhāya “tamhā tamhā samādhimhā vuṭṭhānampi vuṭṭhānan”ti vuttaṃ.
Idampi ñāṇaṃ “tatha katamaṃ Tathāgatassa
jhānavimokkhasamādhisangamāpattīnaṃ saṃkilesaṃ vodānaṃ vuṭṭhānaṃ
yathābhūtaṃ ñāṇaṃ, jhāyīti cattāro jhāyī, atthekacco jhāyī sampattiṃyeva
samānaṃ vipattīti pacceṭi”ti-ādinā² nayena abhidhamme vitthāritaṃ.
Sattanaṃ ñāṇānaṃ vitthārakathāvinicchayo Sammohavinodaniyaṃ
Vibhaṅgaṭṭhakathāyaṃ vutto. Pubbenivāsānussatidibbacakkhuñṇakathā
Visuddhimagge vitthāritā. Āsavakkhayakathā bhayabherave.

149. **Imāni kho Sāriputtāti** yāni pubbe “dasa kho paṇimāni Sāriputta
Tathāgatassa Tathāgatabalāni”ti avocaṃ, imāni tānīti appanaṃ karoti. Tatha
paravādīkathā hoti—**dasabalañṇānaṃ** nāma paṭiyekkaṃ natthi,
sabbaññutaññāṇassevāyaṃ pabhedoti. Tam na tathā daṭṭhabbaṃ. Aññaṃeva
hi dasabalañṇānaṃ, aññaṃ sabbaññutaññānaṃ. Dasabalañṇānañhi
sakasakakiccomeva jānāti. Sabbaññutaññānaṃ tampi tato avasesampi
pajānāti. Dasabalañṇāṇesu hi paṭhamaṃ kāraṇākāraṇameva jānāti. Dutiyaṃ
kammantaravipākantareva. Tatiyaṃ kammaparicchedameva. Catuttham
dhātunānattakāraṇameva. Pañcamaṃ sattānaṃ ajjhāsayaḍhimuttameva.
Chaṭṭham indriyānaṃ tikkhamudubhāvameva. Sattamaṃ jhānādīhi saddhim
tesaṃ saṃkilesādimeva. Aṭṭhamaṃ pubbenivutthakhandhasantatimeva.
Navamaṃ sattānaṃ cutipaṭisandhimeva. Dasamaṃ saccaparicchedameva.
Sabbaññutaññānaṃ pana etehi jānitabbañca tato uttariñca pajānāti. Etesaṃ
pana kiccaṃ na sabbam karoti. Tañhi jhānaṃ hutvā appetuṃ na sakkoti,
iddhi hutvā vikubbituṃ na sakkoti, maggo hutvā kilese khetuṃ na
sakkoti. Api ca paravādī evaṃ pucchitabbo “dasabalañṇānaṃ nāma etaṃ
savitakkasavicāraṃ avitakkavicāramattaṃ avitakka-avicāraṃ kāmāvacaraṃ
rūpāvacaraṃ arūpāvacaraṃ lokiyaṃ lokuttaraṃ”ti. Jānanto paṭipāṭiyā satta
ñāṇāni savitakkasavicārānīti vakkhati. Tato parāni

1. Abhi 2. 357 piṭṭhe.

2. Abhi 2. 355 piṭṭhe.

dve avitakka-avicārānīti vakkhati. Āsavakkhayañāṇaṃ siyā savitakkasavicāraṃ, siyā avitakkavicāramattaṃ, siyā avitakka-avicāranti vakkhati. Tathā paṭipāṭiyā satta kāmāvacarāni, tato parāni dve rūpāvacarāni, avasāne ekaṃ lokuttaranti vakkhati, sabbaññutaññāṇaṃ pana savitakkasavicārameva kāmāvacarameva lokiyamevāti vakkhati.

Evamettha anupadavaṇṇanaṃ katvā idāni yasmā Tathāgato paṭhamāmyeva ṭhānāṭṭhānañāṇena veneyyasattānaṃ āsavakkhayādhigamassa ceva anadhigamassa ca ṭhānāṭṭhānabhūtaṃ kilesavaraṇābhāvaṃ passati, lokiyasammādiṭṭhiṭṭhānadassanato niyatamicchādiṭṭhiṭṭhānābhāvadassanato ca. Atha nesaṃ kammavipākāñāṇena vipākāvaraṇābhāvaṃ passati, tihetukaṭṭhisandhidassanato. Sabbatthagāminīpaṭipadāñāṇena kammāvaraṇābhāvaṃ passati, anantariyakammābhāvadassanato. Evaṃ anāvaraṇānaṃ anekadhātunānādhātuñāṇena anukūladhammadesanattham cariyavisesaṃ passati, dhātuvemattadassanato. Atha nesaṃ nānādhimuttikatāñāṇena adhimuttiṃ passati, payogaṃ anādiyitvāpi adhimuttivasena dhammadesanattham. Athevaṃ diṭṭhādhimuttiṇaṃ yathāsatti yathābalaṃ dhammaṃ desetum indriyaparopariyattañāṇena indriyaparopariyattaṃ passati, saddhādīnaṃ tikkhamudubhāvadassanato. Evaṃ pariññātindriyaparopariyattā pana te sace dūre honti, paṭhamajjhānādīsu vasībhūtattā iddhivisesena te khippaṃ upagacchati. Upagantvā ca nesaṃ pubbenivāsānussatiñāṇena pubbjātibhāvanam, dibbacakkuñāṇānubhāvato pattabbena cetopariyañāṇena sampati cittavisesaṃ passantō āsavakkhayañāṇānubhāvena āsavakkhayagāminiyā paṭipadāya vigatasammohattā āsavakkhayāya dhammaṃ deseti. Tasmā iminā anukkamena imāni dasabalāni vuttānīti veditabbāni.

Taṃ Sāriputta vācaṃ appahāyāti-ādīsu puna evarūpiṃ vācaṃ na vakkhāmīti vadanto taṃ vācaṃ pajahati nāma. Puna evarūpaṃ cittaṃ na uppādessāmīti cintento cittaṃ pajahati nāma. Puna evarūpaṃ diṭṭhiṃ na gaṇhissāmīti pajahanto diṭṭhiṃ paṭinissajjati nāma, tathā akaronto neva pajahati na paṭinissajjati. **So yathābhatam nikkhitto evam nirayeti** yathā nirayapālehi āharitvā niraye ṭhapito, evam niraye ṭhapitoyevāti veditabbo.

Idānissa atthasādhakaṃ upamaṃ dassento **seyyathāpī**-ādimāha. Tattha **sīlasampannoti**-ādīsu lokiyalokuttarā sīlasamādhīpaññā veditabbā. Lokuttaravaseneva vinivattetumpi vaṭṭati. Ayañhi sammāvacaṅkammantājīvehi sīlasampanno, sammāvāyāmasatisamādhīhi samādhisampanno, sammādiṭṭhisāṅkappehi paññāsampanno, so evaṃ sīlādisampanno bhikkhu yathā diṭṭheva dhamme imasmiṃyeva attabhāve aññaṃ ārādheti arahattaṃ pāpuṇāti, evaṃsāmpadamidaṃ Sāriputta vadāmi imampi kāraṇaṃ evarūpameva, yathā hi maggānantaraṃ avirajjhivāva phalaṃ nibbattati, evameva imassāpi puggalassa cuti-anantaraṃ avirajjhivāva niraye paṭisandhi hotīti dasseti. Sakalasmīhi Buddhavacane imāya upamāya gāḥataraṃ katvā vutta-upamā nāma natthi.

150. **Vesārajjanī**ti ettha sārājjaṇaṃ vesārajjaṃ, catūsu ṭhānesu sārājjaḥbhāvaṃ paccavekkhantassa uppannasomanassamayaññaṃassetam nāmaṃ. **Sammāsambuddhassa te paṭijānati** ahaṃ Sammāsambuddho, sabbe dhammā mayā abhisambuddhāti evaṃ paṭijānato tava. **Anabhisambuddhāti** ime nāma dhammā tayā anabhisambuddhā. **Tatra vatāti** tesu vata anabhisambuddhāti evaṃ dassitadhammesu. **Sahadhammenāti** sahetunā sakāraṇena vacanena Sunakkhatto viya vippalapanto appamāṇaṃ. **Nimittametanti** ettha puggalopi dhammopi nimittanti adhippeto. Taṃ puggalaṃ na passāmi, yo maṃ paṭicodessati, taṃ dhammaṃ na passāmi, yaṃ dassetvā ayaṃ nāma dhammo tayā anabhisambuddhoti maṃ paṭicodessatīti ayamettha attho. **Khemappattoti** khemaṃ patto, sesapadadvayaṃ imasseva vevacanaṃ. Sabbaṃ hetam vesārajjaññaṃameva sandhāya vuttaṃ. Dasabalassa hi ayaṃ nāma dhammo tayā anabhisambuddhoti codakaṃ puggalaṃ vā codanākāraṇaṃ anabhisambuddhadhammaṃ vā apassato sabhāvabuddhoyeva vā samāno ahaṃ Buddhosmīti vadāmīti paccavekkhantassa balavataraṃ somanassaṃ uppajjati. Tena sampayuttaṃ ññaṃ **vesārajjaṃ** nāma. Taṃ sandhāya “khemappatto”ti-ādimāha. Evaṃ sabbattha attho veditabbo.

Antarāyikā dhammāti ettha pana antarāyaṃ karontīti **antarāyikā**, te atthato sañcicca vītikantā satta āpattikkhandhā. Sañcicca vītikantañhi antamaso dukkaṭa dubbhāsītampi maggaphalānaṃ antarāyaṃ karoti. Idha pana

methunadhammo adhippeto. Methunaṃ sevato hi yassa kassaci nissaṃsayameva maggaphalānaṃ antarāyo hoti. **Yassa kho pana tesu atthāyāti** rāgakkhayādīsu yassa atthāya. **Dhammo desitoti** asubhabhāvanādiddhammo kathito. **Tatra vata manti** tasmim aniyyānikadhamme maṃ. Sesāṃ vuttanayeneva veditabbāṃ.

Atṭhapaṇṇāsaṭṭhakathā

151. “Atṭha kho imā Sāriputtā”ti idaṃ kasmā āradhāṃ? Vesārajjāñāṇassa baladassanattamaṃ. Yathā hi byattāṃ parisāṃ ajjhogāhetvā viññūnaṃ cittaṃ āradhanasamatthāya kathāya dhammakathikassa chekabhāvo paññāyati, evaṃ imā atṭha parisā patvā¹ vesārajjāñāṇassa vesārajjabhāvo sakkā ñātunti vesārajjāñāṇassa balaṃ dassento **atṭha kho imā Sāriputtā**ti-ādimāha.

Tattha **khattiyapaṇṇāsaṭṭhi**ti khattiyānaṃ sannipatitvā nisinnatṭhānaṃ, esa nayo sabbattha. Mārakāyikānaṃ pana sannipatitvā nisinnatṭhānaṃ māraparisā veditabbā, na mārānaṃ. Sabbāpi cetā parisā uggatṭhānadassanavasena gahitā. Manussā hi “ettha rājā nisinno”ti pakativacanampi vattuṃ na sakkonti, kacchehi sedā muccanti. Evaṃ uggā khattiyapaṇṇāsaṭṭhi. Brāhmaṇā tīsu vedesu kusalā honti, gahapatayo nānāvohāresu ceva akkharacintāya ca. Samaṇā sakavādaparavādesu kusalā honti. Tesāṃ majjhe dhammakathākathanaṃ nāma ativiya bhāro. Amanussāpi uggā honti. Amanussoti hi vuttamattepi manussānaṃ sakalasarīraṃ saṅkampaṭi, tesāṃ rūpaṃ vā disvā saddaṃ vā sutvā sattā visaññino honti. Evaṃ amanussapaṇṇāsaṭṭhi uggā. Tāsūpi dhammakathākathanaṃ nāma ativiya bhāro. Iti uggatṭhānadassanavasena tā gahitāti veditabbā.

Ajjhogāhatīti anupavisati. **Anekasataṃ khattiyapaṇṇāsaṭṭhi**ti Bimbisārasamāgama ñāṭisamāgama Licchavīsamāgamasadisāṃ. Aññesūpi cakkavāḷesu labbhatīyeva. Kim pana Bhagavā aññāni cakkavāḷānīpi gacchatīti, āma gacchatī. Kīdiso hutvā? Yādisā te, tādisoyeva. Tenevāha

1. Imāhi atṭhahi parisāhipi (Syā, Ka)

“abhiñānāmi kho pañāhaṃ Ānanda anekasataṃ khattiyaparisaṃ upasaṅkamitā, tattha yādisako tesaṃ vaṇṇo hoti, tādīsako mayhaṃ vaṇṇo hoti. Yādisako tesaṃ saro hoti, tādīsako mayhaṃ saro hoti. Dhammiyā kathāya sandassemi samādapemi samuttejemi sampahaṃsemi. Bhāsamānañca maṃ na jānanti ‘ko nu kho ayaṃ bhāsati devo vā manusso vā’ti. Dhammiyā kathāya sandassetvā samādapetvā samuttejetvā sampahaṃsetvā antaradhāyāmi. Antarahitañca maṃ na jānanti ‘ko nu kho ayaṃ antarahito devo vā manusso vā’ti”¹.

Khattiyā keyūraṅgadamālāgandhādivibhūsitā nānāviraḡavasanaṃ āmukkamaṇikuṇḍalā² moḡidharā honti. Kiṃ Bhagavāpi evaṃ attānaṃ maṇḍeti. Te ca odātāpi honti kāḡāpi maṅgulacchavīpi. Kiṃ Satthāpi evarūpo hotīti. Satthā attano pabbajitaveseneva gacchati, tesaṃ pana tādīsō hutvā upaṭṭhāti, gantvā rājāsane nisinnaṃ attānaṃ dasseti, tesaṃ “ajja amhākaṃ rājā ativiya virocātī”ti hoti. Te ca bhinnassarāpi³ honti gaggarrassarāpi⁴ kākassarāpi. Satthā brahmassareneva dhammaṃ katheti. Tādīsako mayhaṃ saro hotīti idaṃ pana bhāsantaraṃ sandhāya kathitaṃ. Manussānaṃ pana taṃ sutvā “ajja rājā madhurena sarena kathetī”ti hoti. Kathetvā pakkante ca Bhagavati puna rājānaṃ āgataṃ disvā “ko nu kho ayaṃ”ti vīmaṃsā uppajjati.

Idaṃ vuttaṃ hoti—ko nu kho ayaṃ imasmim̄ ṭhāne idāneva Māgadhabhāsāya Sīhaḡabhāsāya madhurena sarena kathento antarahito, kiṃ devo udāhu manussoti. Kimatthaṃ panevaṃ ajānantānaṃ dhammaṃ desetīti. Vāsanatthāya. Evaṃ sutopi hi dhammo anāgate paccayo hotiyevāti anāgataṃ paṭicca desetīti.

Sannisinnapubbanti saṅgama nisinnapubbaṃ. **Sallapitapubbanti** ālāpasallāpo katapubbo. **Sākacchāti** dhammasākacchāpi samāpajjitapubbā. **Anekasataṃ brāhmaṇaparisaṃti**-ādīnampi⁵ soṇadaṇḡasamāgamādivasena ceva aññacakkavāḡavasena ca sambhavo veditabbo.

1. Dī 2. 92 piṭṭhe.

2. Āmuttamaṇikuṇḍalā (Sī, Syā, Ka)

3. Chinnassarāpi (Sī)

4. Baddhassarāpi (Sī), gambhīrassarāpi (Syā)

5. Ādinā hi (Syā), ādināpi (Ka)

Catuyonivaṇṇanā

152. Catasso kho imā Sāriputta yonisoti ettha yonīti

khandhakoṭṭhāsassapi kāraṇassapi passāvamaggassapi nāmaṃ. “Catasso nāgayoniyo catasso supaṇṇayoniyo”¹ ettha hi khandhakoṭṭhāso yoni nāma. “Yoni hesā bhūmija phalassa adhigamāyā”² ettha kāraṇaṃ. “Na cāhaṃ brāhmaṇaṃ brūmi, yonijaṃ mattisambhavan”³ ettha passāvamaggo. Idha pana khandhakoṭṭhāso yonīti adhippeto. Tattha aṇḍe jātā **aṇḍajā**. Jalābumhi jātā **jalābujā**. Saṃsede jātā **saṃsedajā**. Vinā etehi kāraṇehi uppatitvā viya nibbattā abhinibbattāti **opapātikā**. **Abhinibbhijja jāyantī**ti bhinditvā nikkhamanavasena jāyanti. **Pūrikuṇape vāti**-ādīhi anīṭṭhaṭṭhānāneva⁴ dassitāni. Itṭhesupi sappitelamadhuḥāṇitādīsu sattā jāyanti eva. **Devāti**-ādīsu Cātumahārājikato paṭṭhāya uparidevā opapātikāva honti. Bhūmadevā⁵ pana catuyonikā. **Ekacce ca manussāti** manussesu keci devā viya opapātikā ca honti. Yebhuyyena panete jalābujāva, aṇḍajāpi ettha Kontaputtā⁶ Dvebhātiyattherā viya, saṃsedajāpi padumagabbhe nibbattapokkharasātibrāhmaṇa Padumavatidevī-ādayo viya, evaṃ vinipātikesu, nijjhāmatanḥikapetā nerayikā viya opapātikāyeva, avasesā catuyonikāpi honti. Yathā te, evaṃ yakkhāpi sabbacatuppadapakkhijātīdīghajāti-ādayopi sabbe catuyonikāyeva.

Pañcagativaṇṇanā

153. Pañca kho imā Sāriputta gatiyoti ettha sukata dukkaṭakammavasena

gantabbāti gatiyo. Api ca gatigati nibbattigati ajjhāsaya gati vibhava gati nipphattigatīti bahuvidhā gati nāma. Tattha “taṃ gatiṃ pecca gacchāmi”⁷ ca, “yassa gatiṃ na jānanti, devā gandhabbamānusa”⁸ ca ayam **gatigati** nāma. “Imesaṃ kho ahaṃ bhikkhūnaṃ silavantānaṃ neva jānāmi gatiṃ vā agatiṃ vā”⁹ ayam **nibbattigati** nāma. “Evampi kho te ahaṃ

1. Saṃ 2. 202 piṭṭhādīsu.

3. Ma 2. 410; Khu 1. 70 piṭṭhādīsu.

5. Bhummadevā (Sī, Syā)

7. Am 1. 494 piṭṭhe.

2. Ma 3. 182 piṭṭhe.

4. Ādīni anīṭṭhāneva (Sī)

6. Koṇḍaputtā (Ka)

9. Ma 1. 409 piṭṭhe.

8. Khu 1. 73 piṭṭhe.

brahme gatiṃ ca pajānāmi jutiṃ ca pajānāmi”¹ti¹ ayam **ajjhāsayagati** nāma. “Vibhavo gati dhammānaṃ, nibbānaṃ arahato gati”²ti² ayam **vibhavagati** nāma. “Dveveva gatiyo bhavanti anaññā”³ti³ ayam **nipphattigati** nāma. Tāsu idha gatigati adhippetā.

Nirayoti-ādīsu nirati-atthēna nirassādaṭṭhēna **nirayo**. Tiriyaṃ añchitāti **tiracchānā**. Tesam yoni **tiracchānayoni**. Peccabhāvaṃ pattānaṃ visayoti **pettivisayo**. Manaso ussannattā **manussā**. Pañcahi kāmagaṇehi attano attano ānubhāvehi ca dibbantīti **devā**. **Nirayañcāham Sāriputtāti**-ādīsu nirayoti saddhiṃ okāseṇa khandhā. **Tiracchānayoniṃ cāti**-ādīsipi eseva nayo. **Maggaṃ paṭipadanti** ubhayenāpi vuttagatisaṃvattanikakammameva dasseti. **Yathā ca paṭipannoti** yena maggena yāya paṭipadāya paṭipannoti ubhayampi ekato katvā niddisati. **Apāyanti**-ādīsu vaḍḍhisāṅkhātā sukhasāṅkhātā vā ayā apētattā **apāyo**. Dukkassa gati paṭissaraṇanti **duggati**. Dukkaṭakārino ettha vinipatantīti **vinipāto**. **Nibbānañcāhanti** idaṃ pana na kevalaṃ gatigatimeva, gatinissaraṇaṃ nibbānampi jānāmīti dassanattamaṃ āha. Idha **maggo paṭipadāti** ubhayenāpi ariyamaggo vutto.

Ñāṇappavattākāraṇaṇā

154. Idāni yathāvuttesu sattasu ṭhānesu aṭṭhasu ṭhānesu attano ñāṇappavattākāraṇaṇaṃ dassento **idhāham Sāriputtāti**-ādīmāha.

Tattha **ekantadukkhāti** niccadukkhā nirantaradukkhā. **Tibbāti** bahalā. **Kaṭukāti** kharā. **Seyyathāpīti**-ādīni opammadassanattamaṃ vuttāni. Tattha **kāsūti** āvāṭopi vuccati rāsipi.

“Kinnu santaramānova, kāsūṃ khaṇasi sārathi.

Puṭṭho me samma akkhāhi, kiṃ kāsuyā karissasī”⁴—

Ettha hi āvāṭo kāsū nāma.

1. Ma 1. 404 piṭṭhe.

3. Dī 1. 83; Dī 2. 14 piṭṭhesu.

2. Vi 5. 263 piṭṭhe.

4. Khu 6. 149 piṭṭhe.

“Aṅgārakāsum apare phunanti, narā rudantā paridaḍḍhagattā”¹—

Ettha rāsi. Idha pana āvāto adhippeto. Tenevāha “sādhikaporisā”^{ti}.
Tattha sādhiḱam porisaṃ pamāṇaṃ assāti **sādhikaporisā**,
atirekapañcaratanāti attho. **Vītaccikānam vītadhūmānanti** etaṃ pariḷāhassa
balavabhāvādīpanatthaṃ vuttaṃ, acciyā vā sati dhūme vā sati vāto
samuṭṭhāti, tena pariḷāho na balavā hoti. **Ghammaparetoti** ghammānugato.
Tasitoti jātataṇho. **Pipāsitoti** udakaṃ pātukāmo. **Ekāyanena maggenāti**
ekapatheneva maggena, anukkamaniyena ubhosu passesu
nirantarakaṇṭakarukkhagahanena. **Paṇidhāyāti** aṅgārakāsuyaṃ patthanā
nāma natthi, aṅgārakāsum ārabha pana iriyāpathassa ṭhapitattā evaṃ
vuttaṃ.

Evameva khoti ettha idaṃ opammasaṃsandanaṃ—aṅgārakāsu viya hi
nirayo daṭṭhabbo. Aṅgārakāsumaggo viya nirayūpagaṃ kammaṃ.
Maggāruḷho viya kammaṃsaṃgīpuggalo. Cakkhumā puriso viya
dibbacakkhuko Bhagavā. Yathā so puriso maggāruḷhaṃ disvā vijānāti
“ayaṃ iminā maggena gantvā aṅgārakāsuyaṃ patissatī”^{ti}, evamevaṃ
Bhagavā paṇātipātādisu yaṃkiñci kammaṃ āyūhantaṃ evaṃ jānāti “ayaṃ
imaṃ kammaṃ katvā niraye nibbattissatī”^{ti}. Yathā so puriso aparabhāge
taṃ aṅgārakāsuyā patitaṃ passati, evameva Bhagavā aparabhāge “so puriso
taṃ kammaṃ katvā kuhiṃ nibbatto”^{ti} ālokaṃ vaḍḍhetvā dibbacakkhunā
olokento niraye nibbattaṃ passati pañcavidhabandhanādimaḥādukkhaṃ
anubhavantaṃ. Tattha kiñcāpi tassa kammāyūhanakāle añño vaṇṇo, niraye
nibbattassa añño, athāpi “so satto taṃ kammaṃ katvā kattha nibbatto”^{ti}
olokentassa anekasahassānaṃ sattānaṃ majjhe ṭhitopi “ayaṃ so”^{ti} soyeva
satto āpāthaṃ āgacchati, “dibbacakkhubalaṃ nāma etan”^{ti} vadanti.

Dutiya-upamāyaṃ yasmā aṅgārakāsuyaṃ viya gūthakūpe pariḷāho
natthi, tasmā “ekantadukkhā”^{ti} avatvā “dukkhā”^{ti} ādimāha. Etthāpi
purimanayeneva opammasaṃsandanaṃ veditabbaṃ. Imampi hi puggalaṃ
Bhagavā

1. Khu 6. 189 piṭṭhe.

hatthiyoni-ādīsu yattha katthaci nibbattaṃ vadhabandhana-
ākaḍḍhanavikaḍḍhanādīhi mahādukkhaṃ anubhavamānaṃ passatiyeva.

Tatiya-upamāyaṃ **tanupattapalāsoti** na abbhapaṭalaṃ viya tanupaṇṇo,
viraḷapaṇṇattaṃ panassa sandhāya idaṃ vuttaṃ. **Kabaracchāyoti**
viraḷacchāyo. **Dukkhabahulāti**¹ pettivisayasmim̐ hi dukkhameva bahulaṃ
sukhaṃ parittaṃ, kadāci anubhavitabbaṃ hoti, tasmā evamāha. Etthāpi
purimanayeneva opammasaṃsandanaṃ veditabbaṃ.

Catuttha-upamāyaṃ **bahalapattapalāsoti** nirantarapaṇṇo pattasañchanno.
Santandāyoti pāsānacchattaṃ viya ghanacchāyo. **Sukhabahulā vedanāti**
manussaloke khattiyakulādīsu sukhabahulā vedanā veditabbā hoti, tā
vedayamānaṃ nipannaṃ vā nisinnaṃ vā passāmīti dasseti. Idhāpi
opammasaṃsandanaṃ purimanayeneva veditabbaṃ.

Pañcama-upamāyaṃ **pāsādoti** dīghapāsādo. **Ullittāvalittanti** anto ceva
ullittaṃ bahi ca avalittaṃ. **Phusitaggalanti** dvārabāhāhi saddhim̐
supihitakavāṭaṃ. **Gonakatthato**ti caturaṅgulādhikalomena kāḷakojevana
atthato. **Paṭikatthato**ti uṇṇāmayena seta-attharaṇena atthato. **Paṭalikatthato**ti
ghanapupphakena uṇṇāmaya-attharaṇena atthato.
Kadalimigapavarapaccattharaṇoti kadalimigacammamayena
uttamapaccattharaṇena atthato. Taṃ kira paccattharaṇaṃ setavatthassa upari
kadalimigacammaṃ attharivā sibbetvā karonti. **Sa-uttaracchadoti** saha
uttaracchadena, uttaribaddhena rattavitānena saddhinti attho.
Ubhatolohitakūpadhānoti sīsūpadhānañca pādūpadhānañcāti pallaṅkassa
ubhato ṭhapitalohitakūpadhāno. Idhāpi upamāsaṃsandanaṃ purimanayeneva
veditabbaṃ.

Ayaṃ panettha aparabhāgayojanā, yathā so puriso maggāruḷhameva
jānāti “ayaṃ etena maggena gantvā pāsādaṃ āruyha kūṭāgāraṃ pavisitvā
pallaṅke nisīdissati vā nipajjissati vā”ti, evamevaṃ Bhagavā dānādīsu
puññakiriyavatthūsu yaṃkiñci kusalakammaṃ āyūhantaṃyeva puggalaṃ
disvā “ayaṃ imaṃ katvā devaloke nibbattissati”ti jānāti. Yathā so puriso

1. Dukkhabahulanti (Syā, Ka)

aparabhāge taṃ pāsādaṃ āruyha kūṭāgāraṃ pavisitvā pallaṅke nisinnaṃ vā nipannaṃ vā ekantasukhaṃ nirantarasukhaṃ vedanaṃ vedayamānaṃ passati, evamevaṃ Bhagavā aparabhāge “so taṃ kalyāṇaṃ katvā kuhiṃ nibbatto”ti ālokaṃ vaḍḍhetvā dibbacakkhunā olokeno devaloke nibbattaṃ passati Nandanavanādīsu accharāsaṃghaparivutaṃ dibbasampattiṃ anubhavamānaṃ.

Āsavakkhayavāraṇṇanā

Āsavakkhayavāre “dibbena cakkhunā”ti avatvā “tameṇaṃ passāmi”ti vuttaṃ. Taṃ kasmāti ce, niyamābhāvā. Imaṃ hi puggalaṃ dibbacakkhunāpi passissati, cetopariyaññeṇāpi jānissati, sabbaññutaññāṇeṇapi jānissatiyeva. **Ekantasukhā vedanā**ti idaṃ kiñcāpi devalokasukhena saddhiṃ byañjanato ekaṃ, atthato pana nānā hoti. Devalokasukhaṃ hi rāgapariḷāhādīnaṃ atthitāya na ekanteneva sukhaṃ. Nibbānasukhaṃ pana sabbapariḷāhānaṃ vūpasamāya sabbākārena ekantasukhaṃ. Upamāyampi “yathā pāsāde ekantasukhā”ti vuttaṃ. Taṃ maggapariḷāhassa avūpasantatāya chātājhattatāya pipāsābhibhūtātāya ca na ekantameva sukhaṃ. Vanasaṅḍe pana pokkharāṇiyaṃ oruyha rajojallassa pavāhitattā maggadarathassa vūpasantatāya bhisamūlakhādanena ceva madhurodakapānena ca khuppipāsānaṃ vinītātāya udakasāṭakaṃ parivattetvā maṭṭhadukūlaṃ nivāsetvā taṇḍulathavikaṃ ussīsake katvā udakasāṭakaṃ piḷetvā hadaye ṭhapetvā mandamandena ca vātena bījayaṃānassa nipannattā sabbākārena ekantasukhaṃ hoti.

Evameva khoti ettha idaṃ opammasaṃsandanaṃ—pokkharāṇī viya hi ariyamaggo daṭṭhabbo. Pokkharāṇimaggo viya pubbabhāgapapaṭipadā. Maggāruḷho viya paṭipadāsamaṅgīpuggalo. Cakkhumā puriso viya dibbacakkhu Bhagavā. Vanasaṅḍo viya nibbānaṃ. Yathā so puriso maggāruḷhaṃ disvāva jānāti “ayaṃ iminā maggena gantvā pokkharāṇiyaṃ nhatvā ramaṇīye vanasaṅḍe rukkhamūle nisīdissati vā nipajjissati vā”ti, evamevaṃ Bhagavā paṭipadaṃ pūrentameva nāmarūpaṃ paricchindantameva paccayapariggahaṃ karontameva lakkhaṇārammaṇāya vipassanāya kammaṃ karontameva jānāti “ayaṃ imaṃ paṭipadaṃ pūretvā sabba-āsave khepetvā anāsavaṃ cetovimuttiṃ paññāvimuttinti evaṃ vuttaṃ phalasaṃpattiṃ

upasampajja viharissatī”ti. Yathāso puriso aparabhāge tāyaṃ pokkharāṇiyaṃ nhatvā vanasaṇḍaṃ pavisitvā nisinnaṃ vā nipannaṃ vā ekantasukhaṃ vedanaṃ vedayamānaṃ passati, evamevaṃ Bhagavā aparabhāge taṃ puggalaṃ paṭipadaṃ puretvā maggaṃ bhāvetvā phalaṃ sacchikatvā nirodhasayanavaragataṃ nibbānārammaṇaṃ phalasamāpattim appetvā ekantasukhaṃ vedanaṃ vedayamānaṃ passati.

Dukkarakārikādisuddhivaṇṇanā

155. “Abhijānāmi kho paṇāhaṃ Sāriputta caturaṅgasamannāgatan”ti idaṃ kasmā āradham? Pāṭiyekkaṃ anusandhivasena āradham. Ayaṃ kira Sunakkhatto dukkarakārikāya suddhi hotīti evamladdhiko. Athassa Bhagavā mayā etasmim attabhāve ṭhatvā caturaṅgasamannāgataṃ dukkaraṃ kataṃ, dukkarakāraṇaṃ nāma mayā sadiso natthi. Dukkarakārena suddhiyā sati ahameva suddho bhavyanti dassetuṃ imaṃ desanaṃ ārabhi. Api ca ayaṃ Sunakkhatto dukkarakārikāya pasanno, so cassa pasannabhāvo “addasā kho Bhaggava Sunakkhatto Licchaviputto acelaṃ korakkhattiyaṃ catukkuṇḍikaṃ chamānikīṇṇaṃ bhakkhasaṃ mukhena khādantaṃ mukhena bhuñjantaṃ, disvānassa etadahosi ‘sādhu rūpo vata bho ayaṃ¹ samaṇo catukkuṇḍiko chamānikīṇṇaṃ bhakkhasaṃ mukheneva khādati, mukheneva bhuñjati’ti” evamādinā Pāthikasutte² āgatanayene veditabbo.

Atha Bhagavā ayaṃ dukkarakārikāya pasanno, mayā ca etasmim attabhāve ṭhatvā caturaṅgasamannāgataṃ dukkaraṃ kataṃ, dukkarakāre pasīdantenāpi anena mayi pasīditabbaṃ siyā, sopissa pasādo mayi natthīti dassento³ imaṃ desanaṃ ārabhi.

Tatra **brahmacariyanti** dānampi veyyāvaccampi sikkhāpadampi brahmavihārāpi dhammadesanāpi methunaviratipi sadārasantosopi uposathopi ariyamaggopi sakalasāsanampi ajjhāsayopi vīriyampi vuccati.

1. Arahaṃ (Sī)

2. Dī 3. 5 piṭṭhe.

3. Dassentopi (Sī)

“Kiṃ te vataṃ kiṃ pana brahmacariyaṃ,
Kissa suciṇṇassa ayaṃ vipāko.
Iddhī jutī balavīriyūpapatti,
Idaṅca te nāga¹ mahāvīmānaṃ.

Ahaṅca bhariyā ca manussaloke,
Saddhā ubho dānapatī ahumhā.
Opānabhūtaṃ me gharaṃ tadāsi,
Santappitā samaṇabrāhmaṇā ca.

Taṃ me vataṃ taṃ pana brahmacariyaṃ,
Tassa suciṇṇassa ayaṃ vipāko.
Iddhī jutī balavīriyūpapatti,
Idaṅca me dhīra mahāvīmānaṃ”^{ti}²—

Imasmiṅhi Puṇṇakajātake dānaṃ brahmacariyanti vuttaṃ.

“Kena pāṇi kāmadaḍḍo, kena pāṇi madhussavo.
Kena te brahmacariyena, puññaṃ pāṇimhi ijjhati.
Tena pāṇi kāmadaḍḍo, tena pāṇi madhussavo.
Tena me brahmacariyena, puññaṃ pāṇimhi ijjhatī”^{ti}³—

Imasmiṃ Aṅkurapetavatthusmiṃ veyyāvaccāṃ brahmacariyanti vuttaṃ. “Evaṃ kho taṃ bhikkhave tittiriyaṃ nāma brahmacariyaṃ ahoṣī”^{ti}⁴ imasmiṃ Tittirajātake pañcasikkhāpadaṃ brahmacariyanti vuttaṃ. “Taṃ kho pana me pañcasikha brahmacariyaṃ neva nibbidāya na virāgāya na nirodhāya, yāvadeva brahmalokūpapattiyā”^{ti}⁵ imasmiṃ Mahāgovindasutte brahmavihārā brahmacariyanti vuttā. “Ekasmiṃ brahmacariyasmiṃ, sahasaṃ macchāyinaṃ”^{ti}⁶ ettha dhammadesanā brahmacariyanti vuttā. “Pare abrahmacārī bhavissanti, mayamettha brahmacārī bhavissāmā”^{ti}⁷ Sallekhasutte methunavirati brahmacariyanti vuttā.

1. Akkhāhi me nāga (Sī, Syā, Ka)

2. Khu 6. 303. 304 Vidhuraajātake.

3. Khu 2. 156 piṭṭhe.

4. Vi 4. 311 piṭṭhe.

5. Dī 2. 201 piṭṭhe.

6. Saṃ 1. 156 piṭṭhe.

7. Ma 1. 51 piṭṭhe.

“Mayañca bhariyā nātikkamāma,
Amhe ca bhariyā nātikkamanti.
Aññatra tāhi brahmacariyaṃ carāma,
Tasmā hi amhaṃ daharā na mīyare”¹—

Mahādhammapālajātake sadārasantoso brahmacariyanti vutto.

“Hīnena brahmacariyena, khattiye upapajjati.
Majjhimena ca devattaṃ, uttamaena visujjhati”².

Evam Nimijātake attadamanavasena kato aṭṭhaṅgiko uposatho brahmacariyanti vutto. “Idaṃ kho pana me pañcasikha brahmacariyaṃ ekantanibbidāya virāgāya -pa-. Ayameva ariyo aṭṭhaṅgiko maggo”³ Mahāgovindasuttasmiññeva ariyamaggo brahmacariyanti vutto. “Tayidaṃ brahmacariyaṃ iddhañceva phītañca vitthārikaṃ bāhujaññaṃ puthubhūtaṃ yāva devamanussehi suppakāsitaṃ”⁴ Pāsādikasutte sikkhattayasaṅgahaṃ sāsaṇaṃ brahmacariyanti vuttaṃ.

“Api ataramānānaṃ, phalāsāva samijjhati.
Vipakkabrahmacariyosmi, evaṃ jānāhi gāmaṇī”⁵—

Ettha ajjhāsayo brahmacariyanti vutto. Idha pana vīriyaṃ brahmacariyanti adhippetam. Vīriyabrahmacariyassa hi idameva suttam. Tadetam ekasmiṃ attabhāve catubbidhassa dukkarassa katattā caturaṅgasamannāgatanti vuttaṃ.

Tapassī sudam homīti sudanti nipātamattaṃ, tapanissitako homīti attho. **Paramatapassīti** paramo tapassī, tapanissitakānaṃ uttamo. **Lūkho sudam homīti** lūkho homi. **Jegucchīti** pāpajegucchiko. **Pavivitto sudam homīti** pavivitto aham homi. **Tatrāssu me idam Sāriputtāti** tatra caturaṅge brahmacariye idam mama tapassitāya hoti, tapanissitakabhāve mayham idam acelakāditapassitakataṃ hotīti dasseti.

1. Khu 5. 214 piṭṭhe.

2. Khu 5. 183 piṭṭhe.

3. Dī 2. 201 piṭṭhe.

4. Dī 3. 102 piṭṭhe.

5. Khu 5. 3 piṭṭhe.

Tattha **acelakoti** niccelo naggo. **Muttācāroti** visaṭṭhācāro, uccārakammādīsu lokiyakulaputtācārena virahito, ṭhitakova uccāraṃ karomi, passāvaṃ karomi, khādāmi bhuñjāmi ca. **Hatthāpalekhanoti** hatthe piṇḍamhi ṭhite jivhāya hatthaṃ apalikhāmi, uccāraṃ vā katvā hatthasmiññeva daṇḍakasaññī hutvā hatthena apalikhāmīti dasseti. Te kira daṇḍakaṃ sattoti paññapenti, tasmā tesāṃ paṭipadaṃ pūrento evamakāsi. Bhikkhāgahaṇatthaṃ ehi bhaddanteti vutto na etīti **na-ehibhaddantiko**. Tena hi tiṭṭha bhaddanteti vuttopi na tiṭṭhatīti **natiṭṭhabhaddantiko**. Tadubhayampi titthiyā evaṃ etassa vacanaṃ kataṃ bhavissatīti na karonti. Ahampi evaṃ akāsinti dasseti. **Abhihaṇanti** puretaraṃ gahetvā āhaṇaṃ bhikkhaṃ. **Uddissakatanti** idaṃ tumhe uddissa katanti evaṃ ārocitabhikkhaṃ. **Na nimantananti** asukaṃ nāma kulaṃ vā vīthiṃ vā gāmaṃ vā paviseyyāthāpi evaṃ nimantitabhikkhampi na sādīyāmi na gaṇhāmi.

Na kumbhimukhāti kumbhito uddharitvā diyyamānaṃ bhikkhaṃ na gaṇhāmi. **Na kaḷopimukhāti kaḷopīti** ukkhali vā pacchi vā, tatopi na gaṇhāmi. Kasmā? Kumbhikaḷopiyo maṃ nissāya kaṭacchunā pahāraṃ¹ labhantīti. **Na eḷakamantaranti** ummāraṃ antaraṃ katvā diyyamānaṃ na gaṇhāmi. Kasmā? Ayaṃ maṃ nissāya antarakaraṇaṃ labhatīti. Daṇḍamusalesupi eseva nayo. **Na dvinnanti** dvīsu bhuñjamānesu ekasmiṃ utṭhāya dente na gaṇhāmi. Kasmā? Kabaḷantarāyo hotīti. **Na gabbhiniyāti-**ādīsu pana gabbhiniyā kucchiyaṃ dārako kilamati, pāyantiyā dārakassa khīrantarāyo hoti, purisantaragatāya rati-antarāyo hotīti na gaṇhāmi. **Na samkittīsūti** samkittetvā katabhatesu. Dubbhikkhasamaye kira acelakasāvakā acelakānaṃ atthāya tato tato taṇḍulādīni samādapetvā bhattaṃ pacanti. Ukkaṭṭhācelako tatopi na paṭiggaṇhāti.

Na yattha sāti yattha sunakho piṇḍaṃ labhissāmīti upaṭṭhito hoti, tattha tassa adatvā āhaṇaṃ na gaṇhāmi. Kasmā? Etassa piṇḍantarāyo hotīti. **Sanḍasaṇḍacārinīti** samūhasamūhacārinī, sace hi acelakaṃ disvā imassa bhikkhaṃ dassāmāti mānusakā bhattagehaṃ pavisanti. Tesu ca pavisantesu kaḷopimukhādīsu nilīnā makkhikā uppatitvā sṇaḍasaṇḍā caranti.

1. Kaṭacchupahāraṃ (Ka)

tato āhaṭaṃ bhikkhaṃ na gaṇhāmi, kasmā? Maṃ nissāya makkhikānaṃ gocarantarāyo jātoti, ahampi tathā akāsiṃ. **Na thusodakanti** sabbasassasambhārehi¹ kataṃ loṇasovīrakam², ettha ca surāpānameva sāvajjamaṃ, ayaṃ pana sabbesupi sāvajjasaññī.

Ekāgārikoti yo ekasmiññeva gehe bhikkhaṃ labhitvā nivattati. **Ekālopikoti** yo ekeneva ālopena yāpeti. **Dvāgārikā**dīsupi eseva nayo. **Ekissāpi dattiyāti** ekāya dattiyā. **Datti** nāma ekā khuddakapāti hoti, yattha aggabhikkhaṃ pakkhipitvā ṭhapenti. **Ekāhikanti** ekadivasantarikaṃ. **Addhamāsikanti** addhamāsantarikaṃ. **Pariyāyabhattabhojananti** vārabhattabhojanaṃ. Ekāhavārena dvīhavārena sattāhavārena aḍḍhamāsavārenāti evaṃ divasavārena ābhaṭaṃ bhattabhojanaṃ.

Sākabhakkhoti allasākabhakkho. **Sāmākabhakkhoti** sāmākataṇḍulabhakkho. **Nīvārādīsu nīvārā** nāma tāva araññe sayamjātavihiyāti. **Daddulanti** cammakārehi cammaṃ likhitvā chaḍḍitakasaṭaṃ. **Haṭaṃ** vuccati silesopi sevālopi kaṇikārādirukkhanīyyāsopi. **Kaṇanti** kuṇḍakaṃ. **Ācāmoti** bhata-ukkhalikāya laggo jhāma-odano, taṃ chaḍḍitaṭṭhāne gahetvā khādati. “Odanakañjiyan”tipi. **Piññākā**dayo pākaṭā eva. **Pavattaphalabhojīti** patitaphalabhojī.

Sāṇānīti sāṇavākacoḷāni. **Masāṇānīti** missakacoḷāni. **Chavadussānīti** matasarīrato chaḍḍitavatthāni. Erakatiṇāḍḍīni vā ganthetvā katanivāsānāni. **Paṃsukūlānīti** pathaviyaṃ chaḍḍitanantakāni. **Tiritānīti** rukkhattacavatthāni. **Ajinanti** ajinamigacammaṃ. **Ajinakkhipanti** tadeva majjhe phālitaṃ. Sakhurakantipi vadanti. **Kusacīranti** kusatiṇaṃ ganthetvā katacīraṃ. **Vākacīraphalakacīresūpi** eseva nayo. **Kesakambalanti** manussakesehi katakambalaṃ. Yaṃ sandhāya vuttaṃ “yāni kānici bhikkhave tantāvutānaṃ vatthānaṃ, kesakambalo tesāṃ paṭikuṭṭho akkhāyati. Kesakambalo bhikkhave sīte sīto, uṇhe uṇho dubbaṇṇo duggandho dukkhasamphasso”ti³. **Vālakambalanti** assavālādihi katakambalaṃ. **Ulūkapakkhanti** ulūkapattāni ganthetvā katanivāsanaṃ. **Ubbhaṭṭhakoti** uddhaṃ ṭhitako. **Ukkuṭīkappadhānamanuyuttoti** ukkuṭīkavīriyaṃ anuyutto, gacchantopi ukkuṭīkova hutvā

1. Sabbasambhārehi (Ka)

2. Suvīrakam (Sī), loṇasocīrakam (Syā)

3. Am 1. 290 piṭṭhe.

uppatitvā uppatitvā gacchati. **Kaṇṭakāpassayikoti** ayakantaṅtake vā pakatikaṅtake vā bhūmiyaṃ koṭṭetvā tattha cammaṃ attharivā ṭhānacaṅkamādīni karomīti dasseti. **Seyyanti** sayantopi tattheva seyyaṃ kappemi. Sāyaṃ tatiyamassāti **sāyatatiyakam̐**. Pāto majjhanhike sāyanti divasassa tikkhattuṃ pāpaṃ pavāhessāmīti udakoroḥaṇānuyogaṃ anuyutto viharāmīti dasseti.

156. **Nekavassagaṇikanti** nekavassagaṇasañjākam̐. **Rajojallanti** rajamalaṃ, idaṃ attano rajojallakavatasamādānakālaṃ sandhāya vadati. **Jegucchisminti** pāpajigucchanabhāve. **Yāva udakabindumhipīti** yāva udakathevakepi mama dayā paccupaṭṭhitā hoti. Ko pana vādo aññesu sakkharaḥaḥaladaṇḍakavālikādīsu. Te kira udakabinduṃ ca ete ca sakkharaḥaḥalādayo khuddakapāṇāti paññapenti. Tenāha “yāva udakabindumhipi me dayā paccupaṭṭhitā hoti”ti. Udakabindumpi na hanāmi na vināsemi, kiṃ kāraṇā. **Māhaṃ khuddake pāṇe visamagate saṅghātaṃ āpādesinti** ninnathalaṭṭiṇaggarukkhasākhādīsu visamaṭṭhāne gate udakabindusaṅkhāte khuddakapāṇe saṅghātaṃ vadhaṃ mā āpādesinti. Etamatthaṃ “satova abhikkamāmī”ti dasseti. Acelakesu kira bhūmiṃ akkantaḥalato pabhuti sīlavā nāma natthi. Bhikkhācāraṃ gacchantāpi dussīlavā hutvā gacchanti, upaṭṭhākānaṃ gehe bhuñjantāpi dussīlavā hutvā bhuñjanti. Āgacchantāpi dussīlavā hutvā āgacchanti. Yadā pana morapiñchena phalakaṃ sammajjitvā sīlaṃ adhiṭṭhāya nisīdanti, tadā sīlavantā nāma honti.

Vanakammikanti kandaṃ mūlaphalāphalādīnaṃ atthāya vane vicarantaṃ. **Vanena vananti** vanato vanaṃ, esa nayo sabbattha. **Sampatāmīti** gacchāmi. **Āraññakoti** araññe jātavuddho, idaṃ attano ājīvakaḥalāṃ sandhāya vadati. Bodhisatto kira pāsandaḥapariggahaṇatthāya taṃ pabbajjaṃ pabbajji, niratthakabhāvaṃ pana ñatvāpi na uppabbajjito, bodhisattā hi yaṃ yaṃ ṭhānaṃ upenti, tato anivattitadhammā honti, pabbajitvā pana mā maṃ koci addasāti tatova araññaṃ paviṭṭho. Tenevāha “mā maṃ te addasaṃsu ahañca mā te addasan”ti.

Goṭṭhāti govajā. **Paṭṭhitagāvoti** nikkhantagāvo. Tattha **catukkuṇḍikoti** vananteveva ṭhito gopālakānaṃ gāvīhi saddhiṃ apagatabhāvaṃ

disvā dve hatthe dve ca jaṇṇukāni bhūmiyaṃ ṭhapetvā evaṃ catukkuṇḍiko upasaṅkamitvāti attho. **Tāni sudam āhāremī**ti mahallakavacchakānaṃ gomayāni kasaṭāni nirojāni honti, tasmā tāni vajjetvā yāni taruṇavacchakānaṃ khīrapāneneva vaḍḍhantānaṃ sa-ojāni gomayāni, tāni kucchipūraṃ khāditvā puna vanasaṅḍameva pavisati. Tam sandhāyāha “tāni sudam āhāremī”ti. **Yāvakīvañca meti** yattakaṃ kālaṃ mama sakaṃ muttakarīsaṃ aparikkhīṇaṃ hoti. Yāva me dvāraṇaḷaṅjo pavattittha, tāva tadeva āhāremīti attho. Kāle pana gacchante gacchante parikkhīṇamaṃsalohito upacchinnadvāraḷaṅjo vacchakānaṃ gomayāni āhāremi. **Mahāvikaṭabhojanasminti** mahante vikaṭabhojane, apakatibhojaneti attho.

157. **Tatrāssudam Sāriputta bhīmsanakassa vanasaṅḍassa bhīmsanakatasmim hotīti tatrāti** purimavacanāpekkhanaṃ. **Sudanti** padapūraṇamatte nipāto. **Sāriputtāti** ālapanam. Ayaṃ panettha atthayojanā— **tatrāti** yaṃ vuttaṃ aññataṃ bhīmsanakaṃ vanasaṅḍanti, tatra yo so bhīmsanako vanasaṅḍo vutto, tassa bhīmsanakassa vanasaṅḍassa bhīmsanakatasmim hoti, bhīmsanakakiriyāya hotīti attho. Kim hoti, idaṃ hoti, yo koci avītarāgo -pa- lomāni haṃsanīti.

Atha vā **tatrāti** sāmi-atthe bhummaṃ. Su-iti nipāto, kiṃsu nāma te bhonto samaṇabrāhmaṇāti-ādīsu viya. **Idanti** adhippetamatthaṃ paccakkham viya katvā dassanavacanam. **Sudanti** su idaṃ, sandhivasena ikāralopo veditabbo cakkhundriyaṃ itthindriyaṃ anaññātaññassāmīndriyaṃ kiṃsūdhavittanti-ādīsu viya. Ayaṃ panettha atthayojanā, tassa Sāriputta bhīmsanakassa vanasaṅḍassa bhīmsanakatasmim idaṃsu hotīti.

Bhīmsanakatasminti bhīmsanakabhāveti attho. Ekassa takārassa lopo daṭṭhabbo. “Bhīmsanakattasmin”tiyeva vā pāṭho, bhīmsanakatāya iti vā vattabbe liṅgavipallāso kato, nimittatthe cetam bhumavacanam. Tasmā evaṃ sambandho veditabbo. Bhīmsanakabhāve idaṃsu hoti, bhīmsanakabhāvanimittam bhīmsanakabhāvahesu bhīmsanakabhāvapaccayā idaṃsu hoti, yo koci avītarāgo tam vanasaṅḍam pavisati, yebhuyyena lomāni

haṁsanti bahutarāni lomāni haṁsanti, uddhaṁ mukhāni sūcisadisāni kaṇṭakasadisāni ca hutvā tiṭṭhanti, appāni na haṁsanti, bahutarānaṁ vā sattānaṁ haṁsanti, appakānaṁ atisūrapurisānaṁ na haṁsanti.

Antaraṭṭhakāti māghamāsassa avasāne catasso, phagguṇamāsassa ādimhi catassoti evaṁ ubhinnaṁ antare aṭṭharatti. **Abbhokā**seti mahāsatto himapātasamaye rattim abbhokāse viharati, athassa lomakūpesu āvutamuttā viya himabindūni tiṭṭhanti, sarīraṁ setadukūlapārutaṁ viya hoti. **Divā vanasaṇḍeti** divā himabindūsu sūriyātapasamphassena vigatesu assāsopi bhavye, ayam pana sūriye uggacchanteyeva vanasaṇḍaṁ pavisati, tatrāpissa sūriyātapena paggharantaṁ himaṁ sarīreyeva patati. **Divā abbhokāse viharāmi rattim vanasaṇḍeti** gimhakāle kiresa divā abbhokāse vihāsi, tenassa kacchehi sedadhārā muccimsu, rattim assāso bhavye, ayam pana sūriye atthaṁ gacchanteyeva vanasaṇḍaṁ pavisati. Athassa divā gahita-usme vanasaṇḍe aṅgarakāsuyaṁ pakkhitto viya attabhāvo paridayhittha. **Anacchariyā**ti anu-acchariyā. **Paṭibhāsī**ti upaṭṭhāsī.

Sotattoti divā ātapena rattim vana-usmāya sutatto. **Sosinnoti** rattim himena divā himodakena suṭṭhu tinto. **Bhimsanaketi** bhayajanake. **Naggoti** niccelo. Nivāsanapārupane hi sati sītaṁ vā uṇhaṁ vā na atibādheyya, tampi me natthīti dasseti. **Na caggimāsinoti** aggimpi na upagato. **Esanāpasutoti** suddhi-esanattāya pasuto payutto. **Munī**ti tadā attānaṁ munīti katvā katheti.

Chavaṭṭhikāti upadḍhadadḍhāni aṭṭhīni. **Upadhāyā**ti yathā sīsūpadhānaṅca pādūpadhānaṅca paññāyati, evaṁ santharivā tattha seyyaṁ kappemīti dasseti. **Gāmaṇḍalā**ti¹ gopālakadāyakā. Te kira bodhisattassa santikaṁ gantvā sumedha tvaṁ imasmim ṭhāne kasmā nisinno, kathehīti vadanti. Bodhisatto adhomukho nisīdati, na katheti. Atha naṁ te akathetuṁ na dassāmāti parivāretvā **oṭṭhubhanti** sarīre kheḷaṁ pātentī.

1. Gomaṇḍalāti (Sī, Syā, Ka)

Bodhisatto evampi na katheti. Atha nam tvaṃ na kathesīti **omuttenti** passāvamassa upari vissajjenti. Bodhisatto evampi na kathetiyeva. Tato nam kathehi kathehīti paṃsukena okiranti. Bodhisatto evampi na kathetiyeva. Athassa na kathesīti daṇḍakasalākā gahetvā kaṇṇasotesu pavesenti. Bodhisatto dukkhā tibbā kaṭukā vedanā adhivāsento kassaci kiñci na karissāmīti matako viya acchati. Tenāha “na kho panāham Sāriputta abhijānāmi tesu pāpakaṃ cittaṃ uppādetā”ti. Na mayā tesu pāpakaṃ cittaṃ uppāditanti attho. **Upekkhāvihārasmiṃ hotīti** upekkhāvihāro hoti. Vihāro eva hi vihārasminti vutto. Teneva ca “idaṃsu me”ti etthāpi ayaṃsu meti evaṃ attho veditabbo. Iminā nayena aññānipi evarūpāni padāni veditabbāni. Iminā ito ekanavutikappe pūritaṃ upekkhāvihāraṃ dasseti. Yaṃ sandhāyāha—

“Sukhapatto na rajjāmi, dukkhe na homi dummano.
Sabbattha tulito homi, esā me upekkhāpāramī”ti.

Āhārasuddhivaṇṇanā

158. **Āhārena suddhīti** kolādinā ekaccena parittaka-āhārena sakkā sujjhītunti evaṃdiṭṭhino honti. **Evamāhāraṃsūti** evaṃ vadanti. **Kolehīti** padarehi. **Kolodakanti** kolāni madditvā katapānakaṃ. **Kolavikatinti** kolasāḷavakolapūvakolagulaḍḍikolavikāraṃ. **Etaparamoti** etaṃ pamāṇaṃ paramaṃ assāti etaparamo. Tadā ekanavutikappamatthake pana na beluvapakkatālapakkapamāṇo kolo hoti, yaṃ etarahi kolassa pamāṇaṃ, ettakova hotīti attho.

159. **Adhimattakasimānanti** ativiya kisabhāvaṃ. **Āsītikapabbāni vā kāḷapabbāni vāti** yathā āsītikavalliyā vā kāḷavalliyā vā sandhiṭṭhānesu milāyitvā majjhe unnatunnatāni honti, evaṃ mayhaṃ aṅgapaccaṅgāni hontīti dasseti. **Oṭṭhapadanti** yathā oṭṭhassa padaṃ majjhe gambhīraṃ hoti, evamevaṃ bodhisattassa milāte maṃsalohite vaccadvārassa antopaviṭṭhattā ānisadaṃ majjhe gambhīraṃ hoti. Athassa bhūmiyaṃ nisinnaṭṭhānaṃ

sarapoṅkhena akkantaṃ viya majjhe unnataṃ hoti. **Vaṭṭanāvaḷī**ti yathā rajjuyā āvunitvā katā vaṭṭanāvaḷī vaṭṭanānaṃ antarantarā ninnā hoti, vaṭṭanaṭṭhānesu unnatā, evaṃ piṭṭhikaṇṭako unnatāvanato hoti, **jarasālāya gopānasiyoti** jīṇṇasālāya gopānasiyo, tā vaṃsato muccitvā maṇḍale paṭiṭṭhahanti, maṇḍalato muccitvā bhūmiyanti evaṃ ekā upari hoti, ekā heṭṭhāti oluggaviluggā bhavanti. Bodhisattassa pana na evaṃ phāsuḷiyo, tassa hi lohite chinne maṃse milāte phāsuḷantarehi cammāni heṭṭhā otiṇṇāni, taṃ sandhāyetaṃ vuttaṃ.

Okkhāyikāti heṭṭhā anupaviṭṭhā. Tassa kira lohite chinne maṃse milāte akkhi-āvāṭakā matthaluṅgaṃ āhacca aṭṭhamsu, tenassa evarūpā akkhitārakā ahesuṃ. **Āmakacchinnoti** atitaruṇakāle chinno, so hi vātātapena saṃphusati ceva milāyati ca. **Yāvassu me Sāriputtā**ti Sāriputta mayhaṃ udaracchavi yāva piṭṭhikaṇṭakaṃ allīnā hoti. Atha vā yāvassu me Sāriputta bhāriyabhāriyā ahoṣi dukkarakārikā, mayhaṃ udaracchavi yāva piṭṭhikaṇṭakaṃ allīnā ahoṣīti evamettha sambandho veditabbo. **Piṭṭhikaṇṭakamyeva pariggaṇhāmīti** saha-udaracchaviṃ gaṇhāmi. **Udaracchaviṃyeva pariggaṇhāmīti** sahapīṭṭhikaṇṭakaṃ gaṇhāmi. **Avakujjo papatāmīti** tassa hi uccārapassāvattāya nisinnassa passāvo neva nikkhamati, vaccaṃ pana ekaṃ dve kaṭakaṭṭhimattaṃ nikkhamati. Balavadukkhaṃ uppādeti. Sarīrato sedā muccanti, tattheva avakujjo bhūmiyaṃ patati. Tenāha “avakujjo papatāmī”ti. **Tameva kāyanti** taṃ ekanavutikappamatthake kāyaṃ. Mahāsaccakasutte pana pacchimabhavikākāyaṃ¹ sandhāya imameva kāyanti āha. **Pūtimūlānīti** maṃse vā lohite vā sati tiṭṭhanti. Tassa pana abhāve cammakhaṇḍe lomāni viya hattheyeva lagganti, taṃ sandhāyāha “pūtimūlāni lomāni kāyasmā patantī”ti.

Alamariyañāṇadassanavisesanti ariyabhāvaṃ kātum samatthaṃ lokuttaramaggaṃ. **Imissāyeva ariyāya paññāyāti** vipassanāpaññāya anadhigamā. **Yāyaṃ ariyāti** yā ayaṃ maggapaññā adhigatā. Idaṃ vuttaṃ hoti—yathā etarahi vipassanāpaññāya adhigatattā maggapaññā adhigatā, evaṃ

1. Pacchimabhavakāyaṃ (Ka)

ekānavutikappamatthake vipassanāpaññāya anadhigatattā lokuttaramaggapaññam nidhigatosmiti, Majjhimabhāṇakattherā panāhu, imissāyevāti vuttapaññāpi yāyam ariyāti vuttapaññāpi maggapaññāyeva. Atha ne bhikkhū āhaṃsu “evam sante maggassa anadhigatattā maggam nādhigatosmiti idaṃ vuttam hoti bhante”ti, āvuso kiñcāpi dīpetum na sakkomi, dvepi pana maggapaññāyevāti, etadeva cettha yuttam. Itarathā hi yā ayanti niddeso ananurūpo siyā.

Samsārasuddhi-ādivaṇṇanā

160. **Samsārena suddhīti** bahukam samsarivā sujjhantīti vadanti. **Upapattiyā suddhīti** bahukam upapajjitvā sujjhantīti vadanti. **Āvāsena suddhīti** bahūsu ṭhānesu vasitvā sujjhantīti vadanti. Tīsupi ṭhānesu samsaraṇakavasena **samsāro**. Upapajjanakavasena **upapatti**. Vasanakavasena **āvāsoti** khandhāyeva vuttā. **Yaññenāti** bahuyāge yajitvā sujjhantīti vadanti. **Muddhāvasittenāti** tīhi saṅkhehi khattiyābhisekena muddhani abhisittene. **Aggipāricariyāyati** bahu-aggiparicaraṇena sujjhantīti vadanti.

161. **Daharoti** taruṇo. **Yuvāti** yobbanena samannāgato. **Susukālakasoti** suṭṭhu kālakeso. ¹ **Bhadrena yobbanena samannāgatoti** imināssa yena yobbanena samannāgato yuvā, tam yobbanam bhaddam laddhakanti dasseti. **Paṭhamena vayasāti** paṭhamavayo nāma tottiṃsa vassāni, tena samannāgatoti attho¹, **paññāveyyattiyenāti** paññāveyyattibhāvena. **Jiṇṇoti** jarājiṇṇo. **Vuddhoti** vaḍḍhitvā ṭhita-aṅgepaccaṅgo. **Mahallakoti** jātimahallako. **Addhagatoti** me bahu-addhānam gato cirakālātikanto. **Vayo anuppattoti** vassasatassa tatiyakoṭṭhāsam pacchimavayam anuppatto. **Āsītiko me vayo vattatīti** imam kira suttam Bhagavā parinibānasamvacchare kathesi. Tasmā evamāha. **Paramāyāti** uttamāya. **Satiyāti-ādīsu** padasatampi padasahassampi vadantasseva gahaṇasamatthatā **sati** nāma. Tadeva ādhāraṇa-upanibandhanasamatthatā **gati** nāma. Evam gahitam dhāritam sajjhāyam

1-1. Natthi Syāma-potthake.

kātuṃ samatthavīriyaṃ **dhiti** nāma. Tassa atthañca kāraṇaṃca dassanasamatthatā **paññāveyyattiyaṃ** nāma.

Daḷhadhammā dhanuggahoti daḷhaṃ dhanuṃ gahetvā ṭhito issāso. **Daḷhadhanu** nāma dvisahassathāmaṃ vuccati, dvisahassathāmaṃ nāma yassa āropitassa jiyābaddho lohasīsādīnaṃ bhāro daṇḍe gahetvā yāva kaṇḍappamāṇā¹ ukkhittassa pathavito muccati. **Sikkhitoti** dasa dvādasa vassāni ācariyakule uggahitasippo. **Katahatthoti** koci sippameva uggaṇhāti. Katahattho na hoti, ayaṃ pana katahattho ciṇṇavasībhāvo. **Katūpāsānoti** rājakulādīsu dassitasippo. **Lahukena asanenāti** anto susiraṃ katvā tulādīni pūretvā katalākhāparikkammaṃ sallahukakaṇḍena. Evaṃ kataṃ hi eka-usabhagāmī dve usabhāni gacchati, aṭṭha-usabhagāmī soḷasa-usabhāni gacchati. **Appakasirenāti** nidukkhena. **Atipāteyyāti** atikkameyya. **Evaṃ adhimattasatimantoti** yathā so dhanuggaho taṃ vidatthicatoraṅgulachāyaṃ sīghameva atikkameti, evaṃ padasatampi padasahassampi uggahetuṃ upadhāretuṃ sajjhāyituṃ atthakāraṇāni ca upaparikkhituṃ samatthāti² attho. **Aññatra asitapītakhāyitasāyitāti** asitapītādīni hi Bhagavatāpi kātabbāni honti, bhikkhūhipi. Tasmā tesāṃ karaṇamattakālaṃ ṭhapetvāti dasseti.

Apariyādinnāyevāti aparikkhīṇā eva. Sace hi eko bhikkhu kāyānupassanaṃ pucchati, añño vedanānupassanaṃ, añño cittānupassanaṃ, añño dhammānupassanaṃ. Iminā puṭṭhaṃ ahaṃ pucchissāmīti eko ekaṃ na oloketi. Evaṃ santepi tesāṃ vāro paññāyati. Evaṃ Buddhānaṃ pana vāro na paññāyati, vidatthicatoraṅgulachāyaṃ atikkamanato puretaraṃyeva Bhagavā cuddasavidhena kāyānupassanaṃ, navavidhena vedanānupassanaṃ, soḷasavidhena cittānupassanaṃ, pañcavidhena dhammānupassanaṃ katheti. Tiṭṭhantu vā tāva ete cattāro. Sace hi aññe cattāro sammappadhānesu, aññe iddhipādesu, aññe pañca indriyesu³, aññe pañca balesu⁴, aññe satta bojjhaṅgesu, aññe aṭṭha maggaṅgesu pañhaṃ puccheyyūṃ, tampi Bhagavā katheyya. Tiṭṭhantu vā ete aṭṭha. Sace aññe sattatimsa janā bodhipakkhiyesu

1. Kaṇṭhappamāṇā (Sī, Syā, Ka)

2. Samatthoti (Ka)

3. Aññe indriyesu (Ka)

4. Aññe balesu (Ka)

pañhaṃ puccheyyūṃ, tampi Bhagavā tāvadeva katheyya. Kasmā? Yāvata hi lokiyamahājanā ekaṃ padaṃ kathenti. Tāva Ānandatthero aṭṭha padāni katheti. Ānandatthere pana ekaṃ padaṃ kathenteyeva Bhagavā soḷasa padāni katheti. Kasmā? Bhagavato hi jivhā mudukā dantāvaraṇaṃ suphusitaṃ vacanaṃ agalitaṃ bhavaṅgaparivāso lahuco. Tenāha “apariyādinnāyevassa Sāriputta Tathāgatassa dhammadesanā”ti.

Tattha **dhammadesanā**ti tantiṭṭhapanā. **Dhammapadabyañjananti** Pāḷiyā padabyañjanaṃ, tassa tassa atthassa byañjanaṃ akkharāṃ. **Pañhapaṭibhānanti** pañhabyākaraṇaṃ. Iminā kiṃ dasseti? Tathāgato pubbe daharakāle akkharāni sampiṇḍetvā padaṃ vattum sakkoti, padāni sampiṇḍetvā gāthaṃ vattum sakkoti, catu-akkharehi vā aṭṭha-akkharehi vā soḷasa-akkharehi vā padehi yuttāya gāthāya atthaṃ vattum sakkoti. Idāni pana mahallakakāle akkharāni sampiṇḍetvā padaṃ vā, padāni sampiṇḍetvā gāthaṃ vā, gāthāya atthaṃ vā vattum na sakkotīti evaṃ natthi. Daharakāle ca mahallakakāle ca sabbametaṃ Tathāgatassa apariyādinnaevāti imaṃ dasseti. **Mañcakena cepi manti** idaṃ Buddhabaladīpanatthameva parikkappetvā āha. Dasabalaṃ pana mañcake āropetvā gāmanigamarājadhāniyo pariharaṇakālo nāma natthi. Tathāgatā hi pañcama āyukoṭṭhāse khaṇḍiccādīhi anabhibhūtā suvaṇṇavaṇṇasarīrassa vevaṇṇiye ananuppatte devamanussānaṃ piyamanāpakāleyeva parinibbāyanti.

162. **Nāgasamāloti** tassa therassa nāmaṃ. Paṭhamabodhiyaṃ hi vīsativassabbhantare Upavānanāgitameghiyattherā viya ayampi Bhagavato upaṭṭhāko ahosi. **Bijayamānoti** mandamandena tālavaṇṭavātena Bhagavato utusukhaṃ samuṭṭhāpayamāno. **Etadvocāti** sakalasuttantaṃ sutvā Bhagavato pubbacaritaṃ dukkarakāraṃ āgamma pasanno etaṃ “acchariyaṃ bhante”ti-ādivacanaṃ avoca. Tattha accharaṃ paharituraṃ yuttanti **acchariyaṃ**. Abhūtapubbaṃ bhūtanti **abbhutaṃ**. Ubhayenapi attano vimhayameva dīpeti. **Ko nāmo ayaṃ bhanteti** idaṃ bhaddako vatāyaṃ dhammapariyāyo, handassa Bhagavantaṃ āyācitvā nāmaṃ gaṇhāpemīti adhippāyena āha. Athassa Bhagavā nāmaṃ gaṇhanto **tasmā tiha tvanti-**ādīmāha. Tassattho, yasmā idaṃ suttaṃ sutvā tava lomāni haṭṭhāni, tasmā tiha

tvaṃ nāgasamāla imaṃ dhammapariyāyaṃ “Lomahaṃsanapariyāyo”tveva nam dhārehīti.

Papañcasūdaniyā Majjhimanikāyaṭṭhakathāya

Mahāsīhanādasuttavaṇṇanā niṭṭhitā.

3. Mahādukkhakkhandhasuttavaṇṇanā

163. **Evaṃ me sutanti** Mahādukkhakkhandhasuttaṃ. Tattha vinayapariyāyena tayo janā sambahulāti vuccanti, tato paraṃ saṃgho. Suttantapariyāyena tayo tayo eva, tato uddhaṃ sambahulāti vuccanti. Idha suttantapariyāyena sambahulāti veditabbā. **Piṇḍāya pāvisimsūti** paviṭṭhā, te pana na tāva paviṭṭhā, pavisissāmāti nikkhantattā pana pavisimsūti vuttā. Yathā gāmaṃ gamissāmīti nikkhantapuriso taṃ gāmaṃ appattopi “kuhim itthannāmo”ti vutte “gāmaṃ gato”ti vuccati, evaṃ. **Paribbājakānaṃ ārāmōti** Jetavanato avidūre aññatitthiyānaṃ paribbājakānaṃ ārāmo atthi, taṃ sandhāya evamāhaṃsu. **Samaṇo āvusoti** āvuso tumhākaṃ Satthā samaṇo Gotamo. **Kāmānaṃ pariññanti** kāmānaṃ pahānaṃ samatikkamaṃ paññāpeti. Rūpavedanāsupi eseva nayo.

Tattha titthiyā sakasamayaṃ jānantā kāmānaṃ pariññaṃ paññapeyyuṃ paṭhamajjhānaṃ vadamānā, rūpānaṃ pariññaṃ paññapeyyuṃ arūpabhavaṃ vadamānā, vedanānaṃ pariññaṃ paññapeyyuṃ asaññabhavaṃ vadamānā. Te pana “idaṃ nāma paṭhamajjhānaṃ ayaṃ rūpabhavo ayaṃ arūpabhavo”tipi na jānanti. Te paññāpetuṃ asakkontāpi kevalaṃ “paññāpema paññāpemā”ti vadanti. Tathāgato kāmānaṃ pariññaṃ anāgāmimaggena paññāpeti, rūpavedanānaṃ arahattamaggena. Te evaṃ mahante visese vijjamānepi **idha no āvuso ko visesoti**-ādimāhaṃsu.

Tattha **idhāti** imasmim paññāpane. **Dhammadesanāya vā dhammadesananti** yadidaṃ samaṇassa vā Gotamassa dhammadesanāya saddhiṃ amhākaṃ dhammadesanaṃ, amhākaṃ vā dhammadesanāya saddhiṃ samaṇassa Gotamassa dhammadesanaṃ ārabha nānākaraṇaṃ vuccetha, taṃ kinnāmāti vadanti. Dutiyapadepe eseva

nayo. Iti vemajjhe bhinnasuvaṇṇaṃ viya sāsanaena saddhiṃ attano laddhivacanamattena samadhuraṃ ṭhapayimsu. **Neva abhinandimsūti** evametanti na sampaṭicchimsu. **Nappaṭikkosimsūti** nayidaṃ evanti nappaṭisedhesuṃ. Kasmā? Te kira titthiyā nāma andhasadisā¹, jānitvā vā ajānitvā vā katheyuntī nābhinandimsu, pariññanti vacanena īsakam sāsanaṅgandho atthīti nappaṭikkosimsu. Janapadavāsino vā te sakasamayaparasamayesu na suṭṭhu kusalātipi ubhayaṃ nākaṃsu².

165. **Na ceva sampāyissantīti** sampādetvā kathetuṃ na sakkhissanti. **Uttariṇca vighātanti** asampāyanato uttarimpi dukkhaṃ āpajjissanti. Sampādetvā kathetuṃ asakkontānaṃ nāma hi dukkhaṃ uppajjati. **Yathā taṃ bhikkhave avisayasminti** ettha **yathāti** kāraṇavacanāṃ, **tanti** nipātamattaṃ. Yasmā avisaye paṇho pucchito hotīti attho. **Sadevake**ti saha devehi sadevake. **Samārakā**dīsupi eseva nayo. Evaṃ tīṇi ṭhānāni loke pakkhipitvā dve pajāyāti pañcahipi sattalokameva pariyādiyitvā etasmim sadevakādibhede loke taṃ devaṃ vā manussaṃ vā na passāmīti dīpeti. **Ito vā pana sutvāti** ito vā pana mama sāsanaato sutvā atathāgatopi atathāgatasāvakopi ārādheyya paritoseyya. Aññathā ārādhanāṃ nāma natthīti dasseti.

166. Idāni attano tesam pañhānaṃ veyyākaraṇena cittārādhanāṃ dassento **ko ca bhikkhaveli**-ādīmāha. **Kāmaguṇāti** kāmayitabbaṭṭhena **kāmā**. Bandhanaṭṭhena **guṇā**. “Anujānāmi bhikkhave ahatānaṃ vatthānaṃ diguṇaṃ saṅghāṭin”³ ettha hi⁴ paṭalaṭṭho guṇaṭṭho. “Accentī kālā tarayanti rattiyo, vayogūṇā anupubbaṃ jahantī”⁵ ettha rāsaṭṭho guṇaṭṭho. “Sataguṇā dakkhiṇā pāṭikaṅkhitabbā”⁶ ettha ānisaṃsaṭṭho guṇaṭṭho. “Antaṃ antaguṇaṃ”⁷ kayirā mālāguṇe bahū”⁸ ettha bandhanaṭṭho guṇaṭṭho. Idhāpi eseva adhippeto, tena vuttaṃ “bandhanaṭṭhena guṇā”^{ti}.

1. Andhajātā (Sī)

2. Akāṃsu (Ka)

3. Vi 3. 403 piṭṭhe.

4. Ettha (Syā), idha (Ka)

5. Sam 1. 3 piṭṭhe.

6. Ma 3. 298 piṭṭhe.

7. Khu 1. 2; Dī 2. 234 piṭṭhādīsū.

8. Khu 1. 21 piṭṭhe.

Cakkhuvīññeyyāti cakkhuvīññānaena passitabbā. Etenupāyena **soṭavīññeyyā**disupi attho veditabbo. **Iṭṭhā**ti pariyiṭṭhā vā hontu mā vā, iṭṭhārammaṇabhūtāti attho. **Kantā**ti kamanīyā. **Manāpā**ti manavaḍḍhanakā. **Piyarūpā**ti piyajātikā. **Kāmūpasamhitā**ti ārammaṇaṃ katvā uppajjamānaena kāmena upasamhitā. **Rajanīyā**ti rajjanīyā, rāgupattikāraṇabhūtāti attho.

167. **Yadi muddāyā**ti-ādīsu **muddā**ti aṅgulipabbesu saññaṃ ṭhapetvā hatthamuddā. **Gaṇanā**ti acchiddagaṇanā. **Saṅkhānanti** piṇḍagaṇanā. Yāya khettaṃ oloketvā idha ettakā vīhī bhavissanti, rukkhaṃ oloketvā idha ettakāni phalāni bhavissanti, ākāsaṃ oloketvā ime ākāse sakuṇā ettakā nāma bhavissantīti jānanti. **Kasī**ti kasikammaṃ. **Vañijjā**ti jaṅghavañijjathalavañijjādivaṇippatho. **Gorakkhanti** attano vā paresaṃ vā gāvo rakkhitvā pañcagorasavikkayaena jīvanakammaṃ¹. **Issatto** vuccati āvudhaṃ gahetvā upaṭṭhānakammaṃ. **Rājaporisanti** āvudhena rājakammaṃ katvā upaṭṭhānaṃ. **Sippaññataranti** gahitāvasesaṃ hatthi-assaṣippādi. **Sītassa purakkhatoti** lakkhaṃ viya sarassa sītassa purato, sītena bādhīyamānoti attho. Uṇhepi eseva nayo. **Ḍaṃsā**disu **ḍaṃsā**ti piṅgalamakkhikā. **Makasā**ti sabbamakkhikā, **sarīsapā**ti ye keci saritvā gacchanti. **Rissamānoti** ruppamāno² ghaṭṭiyamāno. **Mīyamānoti** maramāno. **Ayaṃ bhikkhveti** bhikkhave ayaṃ muddādīhi jīvikakappaṇaṃ āgamma sītādipaccayo ābādho. **Kāmānaṃ ādīnavoti** kāmesu upaddavo, upassaggoti attho. **Sandiṭṭhikoti** paccakkho sāmaṃ passitabbo. **Dukkhakkhandhoti** dukkharāsi. **Kāmahetūti-**ādīsu paccayaṭṭhena kāmā assa hetūti kāmahetu. Mūlaṭṭhena kāmā nidānamassāti **kāmanidāno**. Liṅgavipallāsenā pana kāmānidānanti vutto. Kāraṇaṭṭhena kāmā adhikaraṇaṃ assāti **kāmādhikaraṇo**. Liṅgavipallāseneva pana kāmādhikaraṇanti vutto. **Kāmānameva hetūti** idaṃ niyamavacanaṃ, kāmāpaccayā uppajjatiyevāti attho.

1. Jīvitakappaṇaṃ (Ka)

2. Rissamānoti kampamāno (Syā, Ka), rissamānoti piṭṭiyamāno ruppamāno ghaṭṭiyamāno (Cūḷaniṭṭha)

Uṭṭhahatoti ājīvasamuṭṭhāpakavīriyena uṭṭhahantassa. **Ghaṭatoti** taṃ vīriyaṃ pubbenāparaṃ ghaṭentassa. **Vāyamatoti** vāyāmaṃ parakkamaṃ payogaṃ karontassa. **Nābhiniṭṭhantoti** na niṭṭhanti, hatthaṃ nābhiruhanti. **Socatīti** citte uppannalavasokena socati. **Kilamatīti** kāye uppannadukkhena kilamati. **Paridevatīti** vācāya paridevati. **Urattāḷinti** uraṃ tāḷetvā. **Kandatīti** rodati. **Sammohaṃ āpajjatīti** visaññī viya sammūḷho hoti. **Moghanti** tucchāṃ. **Aphaloti** nipphalo. **Ārakkhādhikaraṇanti** ārakkhakāraṇā. **Kintīti**¹ kena nu kho upāyena. **Yampi meti** yampi mayhaṃ kasikammādāni katvā uppāditaṃ dhaṇaṃ ahosi. **Tampi no natthīti** tampi amhākaṃ idāni natthi.

168. “Puna caparaṃ bhikkhave kāmahetū”ti-ādināpi kāraṇaṃ dassetvāva ādinavaṃ dīpeti. Tattha **kāmahetūti** kāmapaccayā rājānopi rājūhi vivadanti. **Kāmanidānanti** bhāvanapuṃsakaṃ, kāme nidānaṃ katvā vivadantīti attho. **Kāmādhikaraṇanti** bhāvanapuṃsakameva, kāme adhikaraṇaṃ katvā vivadantīti attho. **Kāmānameva hetūti** gāmanigamanagarasenāpatipurohitaṭṭhānantarādīnaṃ kāmānameva hetu vivadantīti attho. **Upakkamantīti** paharanti. **Asicammanti** asim ceva khetakaphalakādīni ca. **Dhanukalāpaṃ sannayhitvāti** dhaṇuṃ gahetvā sarakalāpaṃ sannayhitvā. **Ubhatobyūḷanti** ubhato rāsibhūtaṃ. **Pakkhandantīti** pavisanti. **Usūsūti** kaṇḍesu. **Vijjotalantesūti** viparivattantesu. **Te tathāti** te tasmim saṅgāme.

Addāvalepanā upakāriyoti cettha manussā pākārapādaṃ assakhuraṣaṅghānena iṭṭhakāhi cinitvā upari sudhāya limpanti. Evaṃ katā pākārapādā upakāriyoti vuccanti. Tā tintena² kalalena sittä addāvalepanā nāma honti. **Pakkhandantīti** tāsāṃ heṭṭhā tikhīṇa-ayasulādīhi vijjhīyamānāpi pākārassa picchilabhāvena ārohituṃ asakkontāpi upadhāvantiyeva. **Chakaṇakāyāti** kuthitagomayena³. **Abhivaggenāti** satadantena. Taṃ aṭṭhadantākārena katvā “nagaradvāraṃ

1. Kinti meti (Syā, Ka)

2. Tattena (Ka)

3. Pakkaṭṭhiyāti kaṭhitagomayena (Sī), chakaṇaṭṭhiyāti kuṭṭhitagomayena (Syā)

bhinditvā pavisissāmā”ti āgate uparidvāre ṭhitā tassa bandhanayottāni chinditvā tena abhivaggena omaddanti.

169. **Sandhimpī chindantī**ti gharasandhimpī chindanti. **Nillopanti** gāme paharitvā mahāvilopaṃ karonti. **Ekāgārikanti** paṇṇāsamattāpi saṭṭhimattāpi parivāretvā jīvaggāhaṃ gahetvā āharāpentī. **Paripanthepi tiṭṭhantī**ti panthadūhanakammaṃ karonti. **Aḍḍhadanḍakehī**ti muggarehi pahārasādhanatthaṃ vā catuhatthadaṇḍaṃ dvedhā chetvā gahitadaṇḍakehi. **Bilaṅgathālikanti** kañjiya-ukkhalikammakāraṇaṃ¹, taṃ karontā sīsakapālaṃ uppāṭetvā tattaṃ ayoguḷaṃ saṇḍāsena gahetvā tattha pakkhipanti, tena matthaluṅgaṃ pakkuthitvā² upari uttarati. **Saṅkhamuṇḍikanti** saṅkhamuṇḍakammakāraṇaṃ, taṃ karontā uttarotṭha-ubhatokaṇṇacūḷikagaḷavāṭakaparicchena cammaṃ chinditvā sabbakese ekato gaṇṭhiṃ katvā daṇḍakena vallitvā³ uppāṭenti, saha kesehi cammaṃ uṭṭhahati. Tato sīsakaṭāhaṃ thūlasakkharāhi ghaṃsitvā dhovantā saṅkhavaṇṇaṃ karonti.

Rāhumukhanti rāhumukhakammakāraṇaṃ, taṃ karontā saṅkunā mukhaṃ vivaritvā antomukhe dīpaṃ jālenti. Kaṇṇacūḷikāhi vā paṭṭhāya mukhaṃ nikhādanena khaṇanti. Lohitaṃ paggharitvā mukhaṃ pūreti. **Jotimālikanti** sakalasarīraṃ telapilotikāya veṭhetvā ālimpanti. **Hatthapajjotikanti** hatthe telapilotikāya veṭhetvā dīpaṃ viya jālenti⁴. **Erakavattikanti** erakavattakammakāraṇaṃ, taṃ karontā gīvato⁵ paṭṭhāya cammabaddhe kantitvā gopphake ṭhapenti. Atha naṃ yottehi bandhitvā kaḍḍhanti. So attano cammabaddhe akkamitvā akkamitvā patati. **Cīrakavāsikanti** cīrakavāsikakammakāraṇaṃ, taṃ karontā tatheva cammabaddhe kantitvā kaṭiyaṃ ṭhapenti. Kaṭīto paṭṭhāya kantitvā gopphakesu ṭhapenti. Uparimehi heṭṭhimasarīraṃ cīrakanivāsananivatthaṃ viya hoti. **Ṇeṇyyakanti** ṇeṇyyakakammakāraṇaṃ. Taṃ karontā ubhosu kapparesu ca jāṇūsu ca ayavalayāni datvā ayasūlāni koṭṭenti. So catūhi ayasūlehi bhūmiyaṃ patiṭṭhahati. Atha naṃ parivāretvā aggiṃ karonti. “Ṇeṇyyako jotipariggaho

1. ...kammakāraṇaṃ (Syā)

2. Pakkaṭṭhitvā (Sī), pakkhipitvā (Syā)

3. Cāletvā (Sī), valitvā (Syā)

4. Pajjālenti (Sī)

5. Heṭṭhā gīvato (Sī)

yathā”ti āgataṭṭhānepi idameva vuttaṃ. Taṃ kālena kālaṃ sūlāni apanetvā catūhi aṭṭhikoṭṭhiyeva ṭhapenti. Evarūpā kāraṇā nāma natthi.

Baḷisamaṃsikanti ubhatomukhehi baḷisehi paharitvā cammamaṃsanhārūni uppāṭenti. **Kahāpaṇikanti** sakalasarīraṃ tiṇhāhi vāsīhi koṭito paṭṭhāya kahāpaṇamattaṃ kahāpaṇamattaṃ pātentā koṭṭenti. **Khārāpatacchikanti** sarīraṃ tattha tattha āvudhehi paharitvā kocchehi khāraṃ ghaṃsanti. Cammamaṃsanhārūni paggharitvā savanti. Aṭṭhikasāṅkhalikāva tiṭṭhati. **Palighaparivattikanti** ekena passena nipajjāpetvā kaṇṇacchidde ayasūlaṃ koṭṭetvā pathaviyā ekābaddhaṃ karonti. Atha naṃ pāde gahetvā āvijjhanti. **Palālapīṭhakanti** chekā kāraṇikā chavicammaṃ acchinditvā nisadapotehi aṭṭhīni bhinditvā kesesu gahetvā ukkhipanti. Maṃsarāsiyeva hoti, atha naṃ keseheva pariyonandhitvā gaṇhanti. Palālavaṭṭim viya katvā pana veṭhenti. **Sunakhehipīti** katipayāni divasāni āhāraṃ adatvā chātakehi sunakhehi khādāpentī. Te muhuttena aṭṭhisāṅkhalikameva karonti. **Samparāyikoti** samparāye dutiyattaḥve vipākoti attho.

170. **Chandarāgavinayo chandarāgappahānanti** nibbānaṃ. Nibbānaṃhi āgamma kāmesu chandarāgo vinīyati ceva pahīyati ca, tasmā nibbānaṃ chandarāgavinayo chandarāgappahānanti ca vuttaṃ. **Sāmaṃ vā kāme pariṇānissantīti** sayam vā te kāme tīhi pariṇānāhi pariṇānissanti. **Tathattāyāti** tathabhāvāya. **Yathāpaṭipannoti** yāya paṭipadāya paṭipanno.

171. **Khattiyakaññā vāti**-ādi aparittena vipulena kusalena gahitapaṭisandhikaṃ vatthālaṅkāradīni labhanaṭṭhāne nibbattaṃ dassetuṃ vuttaṃ. **Pannarasavassuddesikāti** pannarasavassavayā. Dutiyapadepi eseva nayo. Vayapadesaṃ kasmā gaṇhāti? Vaṇṇasampattidassanattaṃ. Mātugāmassa hi duggatakule nibbattassāpi etasmim kāle thokaṃ thokaṃ vaṇṇāyatanam pasīdati. Purisānaṃ pana vīsativassakāle pañcavīsativassakāle pasannaṃ hoti. **Nātidighāti**-ādīhi chadosavirahitaṃ sarīrasampattim dīpeti. **Vaṇṇanibhāti** vaṇṇoyeva.

Jiṇṇanti jarājiṇṇaṃ. **Gopānasivaṅkanti** gopānasī viya vaṅkaṃ. **Bhogganti** bhaggaṃ, imināpissa vaṅkabhāvameva dīpeti. **Daṇḍaparāyaṇanti** daṇḍapaṭṭisaraṇaṃ daṇḍadutiyaṃ. **Pavedhamānanti** kampamānaṃ. **Āturanti** jarāturaṃ. **Khaṇḍadantanti** jiṇṇabhāvena khaṇḍitadantaṃ. **Palitakesanti** paṇḍarakesaṃ. **Vilūnanti** luñcitvā gahitakesaṃ viya khallātaṃ. **Khalitasiranti** mahākhallāṭasīsaṃ. **Valinanti** saṅjātavaliṃ. **Tilakāhatagattanti** setakāḷatilakehi vikiṇṇasarīraṃ. **Ābādhikanti** byādhikaṃ. **Dukkhitanti** dukkhapattaṃ.

Bāḷhagilānanti adhimattagilānaṃ. **Sivathikāya chaḍḍitanti** āmakasusāne pātitaṃ. Sesamettha satipaṭṭhāne vuttameva. Idhāpi nibbānaṃyeva chandarāgavinayo.

173. **Neva tasmim samaye attabyābādhāyāti** tasmim samaye attanopi dukkhatthāya na ceteti. **Abyābajjhaṃyevāti** niddukkameva.

174. **Yaṃ bhikkhave vedanā aniccāti** bhikkhave yasmā vedanā aniccā, tasmā ayaṃ aniccādi-ākārova vedanāya ādīnavoti attho, nissaraṇaṃ vuttappakāramevāti.

Papañcasūdaniyā Majjhimanikāyaṭṭhakathāya

Mahādukkhakkhandhasuttavaṇṇanā niṭṭhitā.

4. Cūḷadukkhakkhandhasuttavaṇṇanā

175. **Evaṃ me sutanti** Cūḷadukkhakkhandhasuttaṃ. Tattha **Sakkesūti** evaṃnāmake janapade. So hi janapado Sakyānaṃ rājakumārānaṃ vasanaṭṭhānattā Sakyātveva saṅkhyāṃ gato. Sakyānaṃ pana uppatti Ambaṭṭhasutte āgatāva. **Kapilavattusminti** evaṃnāmake nagare, tañhi Kapilassa isino nivāsaṭṭhāne katattā Kapilavattūti vuttaṃ, taṃ gocaragāmaṃ katvā. **Nigrodhārāmeti Nigrodho** nāma sakko, so ñāṭisamāgamakāle Kapilavattum āgate Bhagavati attano ārāme vihāraṃ kāretvā Bhagavato niyyātesi, tasmim viharatīti attho. **Mahānāmoti** Anuruddhattherassa bhātā Bhagavato Cūḷapituputto.

Suddhodano Sukkodano Sakkodano Dhotodano Amitodanoti ime pañca janā bhātaro. **Amitā** nāma devī tesaṃ bhaginī. Tissatthero tassā putto. Tathāgato ca Nandatthero ca Suddhodanassa puttā, Mahānāmo ca Anuruddhatthero ca Sukkodanassa. Ānandatthero Amitodanassa, so Bhagavato kaniṭṭho. Mahānāmo mahallakataro sakadāgāmī ariyasāvako.

Dīgharattanti mayhaṃ sakadāgāmiphaluppattito paṭṭhāya cirarattaṃ jānāmīti dasseti. **Lobhadhammāti** lobhasaṅkhātā dhammā, nānappakārakaṃ lobhaṃyeva sandhāya vadati. Itaresupi dvīsu eseva nayo. **Pariyādāya tiṭṭhantīti** khepetvā tiṭṭhanti. Idaṃ hi pariyādānaṃ nāma “sabbaṃ hatthikāyaṃ pariyādiyitvā sabbaṃ assakāyaṃ sabbaṃ rathakāyaṃ sabbaṃ pattikāyaṃ pariyādiyitvā jīvantānyeva naṃ osajjeyyan”¹ ettha gahaṇe āgataṃ. “Aniccaaññā bhikkhave bhāvitā bahulīkatā sabbaṃ kāmarāgaṃ pariyādiyati”² ettha khepane. Idhāpi khepane adhippetāṃ. Tena vuttaṃ “pariyādiyitvāti khepetvā”³ti.

Yena me ekadā lobhadhammāpīti yena mayhaṃ ekekasmiṃ kāle lobhadhammāpi cittaṃ pariyādāya tiṭṭhantīti pucchati. Ayaṃ kira rājā “sakadāgāmimaggena lobhadosaṃmohā niravasesā pahīyanti”⁴ti saññī ahoṣi, ayaṃ “appahīnaṃ me atthī”⁵tipi jānāti, appahīnakaṃ upādāya pahīnakampi puna pacchatovāvattatīti⁶ saññī hoti. Ariyasāvakassa evaṃ sandeho uppajjati. Āma uppajjati. Kasmā? Paṇṇattiyā akovidattā. “Ayaṃ kilesa asukamaggavajjho”⁷ti imissā paṇṇattiyā akovidassa hi ariyasāvakassapi evaṃ hoti. Kiṃ tassa paccavekkhaṇā natthīti. Atthi. Sā pana na sabbesaṃ paripuṇṇā hoti. Eko hi pahīnakilesameva paccavekkhati. Eko avasiṭṭhakilesameva, eko maggameva, eko phalameva, eko nibbānameva. Imāsu pana pañcasu paccavekkhaṇāsu ekaṃ vā dve vā no laddhuṃ na vaṭṭanti. Iti yassa paccavekkhaṇā na paripuṇṇā, tassa maggavajjhakilesapaṇṇattiyā akovidattā evaṃ hoti.

1. Aggahesinti (Sī, Syā, Ka) Saṃ 1. 85 piṭṭhe.

2. Saṃ 2. 126 piṭṭhe.

3. Pahīnakaṃ puna pucchanto vaṭṭatīti (Ka)

176. **So eva kho teti** soyeva lobho doso moho ca tava santāne appahīno, tvaṃ pana pahīnasaññī ahoṣīti dasseti. **So ca hi teti** so tuyhaṃ lobhadosamohadhammo. **Kāmeti** duvidhe kāme. **Na paribhuñjeyyāsīti** mayaṃ viya pabbajeyyāsīti dasseti.

177. **Appassādāti** parittasukhā. **Bahudukkhāti** diṭṭhadhammikasamparāyikadukkhamevettha bahukaṃ. **Bahupāyāsāti** diṭṭhadhammikasamparāyiko upāyāsakilesoyevettha bahu. **Ādīnavoti** diṭṭhadhammikasamparāyiko upaddavo. **Ettha bhīyyoti** etesu kāmesu ayam ādīnavoyeva bahu. Assādo pana Himavantam upanidhāya sāsapo viya appo parittako. **Iti cepi Mahānāmāti** Mahānāma evaṃ cepi ariyasāvakaṃ. **Yathābhūtanti** yathāsabhāvaṃ. Sammā nayena kāraṇena paññāya suṭṭhu diṭṭhaṃ hotīti dasseti. Tattha **paññāyāti** vipassanāpaññāya, heṭṭhāmaggadvayaññenāti attho. **So cāti** so eva maggadvayena diṭṭhakāmādīnavo ariyasāvako. **Pītisukhanti** iminā sappītikāni dve jhānāni dasseti. **Aññāṃ vā tato santataranti** tato jhānadvayato santataraṃ aññāṃ uparijhānadvayañceva maggadvayañca. **Neva tāva anāvattī kāmesu hotīti** atha kho so dve magge paṭivijjhivā ṭhitopi ariyasāvako upari jhānānaṃ vā maggānaṃ vā anadhigatattā neva tāva kāmesu anāvattī hoti, anāvattīno anābhogo na hoti. Āvaṭṭīno sābhogoyeva hoti. Kasmā? Catūhi jhānehi vikkhambhanappahānassa, dvīhi maggehi samucchadappahānassa abhāvā.

Mayhampi khoti na kevalaṃ tuyheva, atha kho mayhampi. **Pubbeva sambodhāti** maggasambodhito paṭhamatarameva. **Paññāya sudiṭṭhaṃ hotīti** ettha orodhanāṭakā pajahanapaññā adhippetā. **Pītisukhaṃ nājjhagamanti** sappītikāni dve jhānāni na paṭilabhim. **Aññāṃ vā tato santataranti** idha upari jhānadvayaṃ ceva cattāro ca maggā adhippetā. **Paccaññāsīti** paṭi-aññāsīm.

179. **Ekamidāhaṃ Mahānāma samayanti** kasmā āradhaṃ? Ayam pāṭiyekko anusandhi. Heṭṭhā kāmānaṃ assādopi ādīnavopi

kathito, nissaraṇaṃ na kathitaṃ, taṃ kathetuṃ ayaṃ desanā āradhā.
Kāmasukhallikānuyogo hi eko anto attakilamathānuyogo ekoti imehi antehi
muttaṃ mama sāsananti upariphalasamāpattisīsenā sakalasāsanāṃ
dassetumpi ayaṃ desanā āradhā.

Gijjhakūṭe pabbateti tassa pabbatassa gijjhasadisāṃ kūṭaṃ atthi, tasmā
Gijjhakūṭoti vuccati. Gijjhā vā tassa kūṭesu nivasantītipi Gijjhakūṭoti
vuccati. **Isigilipasseti** Isigilipabbatassa passe. **Kālasilāyanti** kālavaṇṇe
piṭṭhipāsāṇe. **Ubbhaṭṭhakā** hontīti uddhamyeva¹ ṭhitakā honti anisinnā.
Opakkamikāti ubbhaṭṭhakādīnā attano upakkamena nibbattitā. **Nigaṇṭho**
āvusoti aññaṃ kāraṇaṃ vattuṃ asakkontā Nigaṇṭhassa upari pakkhipimsu.
Sabbaññū sabbadassāvīti so amhākaṃ Satthā atītānāgatapaccuppannaṃ
sabbaṃ jānāti passatīti dasseti. **Aparisesaṃ ñāṇadassanaṃ paṭijānātīti** so
amhākaṃ Satthā aparisesaṃ dhammaṃ jānanto aparisesasaṅkhātāṃ
ñāṇadassanaṃ paṭijānāti, paṭijānanto ca evaṃ paṭijānāti “carato ca me
tiṭṭhato ca -pa- paccupaṭṭhitan”ti. Tattha **satatanti** niccaṃ. **Samitanti** tasseva
vevacanaṃ.

180. **Kim pana tumhe āvuso Nigaṇṭhā jānātha ettakaṃ vā dukkhaṃ
nijjiṇṇanti** idaṃ Bhagavā puriso nāma yaṃ karoti, taṃ jānāti.
Vīsatikahāpaṇe iṇaṃ gahetvā dasa datvā “dasa me dinnā dasa avasiṭṭhā”ti
jānāti, tepi datvā “sabbaṃ dinnan”ti jānāti. Khettassa tatiyabhāgaṃ lāyitvā
“eko bhāgo lāyito, dve avasiṭṭhā”ti jānāti. Puna ekaṃ lāyitvā “dve lāyitā,
eko avasiṭṭho”ti jānāti. Tasmimpī lāyite “sabbaṃ niṭṭhitan”ti jānāti, evaṃ
sabbakiccesu katañca akatañca jānāti, tumhehipi tathā ñātābbaṃ siyāti
dasseti. **Akusalānaṃ dhammānaṃ pahānanti** iminā akusalaṃ pahāya
kusalaṃ bhāvetvā suddhantaṃ² patto Nigaṇṭho nāma tumhākaṃ sāsane
atthīti pucchati.

Evaṃ santeti tumhākaṃ evaṃ ajānanabhāve sati. **Luddāti** luddācārā.
Lohitapāṇinoti pāṇe jīvītā voropentā lohiteṇa makkhitapāṇino. Pāṇaṃ hi
hanantassapi yassa lohiteṇa pāṇi na

1. Ubbhāmyeva (Sī), ubbhāyeva (Syā)

2. Suddhattaṃ (Sī, Syā)

makkhiyati, sopi lohitaṇṇāveva vuccati. **Kurūrakammantā**ti dāruṇakammā. Mātari pitari dhammikasamaṇabrāhmaṇādīsu ca katāparādhā. Māgavikādayo vā kakkhaḷakammā.

Na kho āvuso Gotamāti idaṃ nigaṇṭhā “ayaṃ amhākaṃ vāde dosaṃ deti, mayampissa dosaṃ āropemā”ti maññamānā ārabhimsu. Tassattho “āvuso Gotama yathā tumhe paṇṭacīvarāni dhārentā sālīmaṃsodanaṃ bhuñjantā devavimānavaṇṇāya Gandhakuṭiyā vasamānā sukhena sukhaṃ adhigacchatha, na evaṃ sukhena sukhaṃ adhigantabbaṃ. Yathā pana mayaṃ ukkuṭikappadhānādīhi nānappaṅkārakaṃ dukkhaṃ anubhavāma, evaṃ dukkhena sukhaṃ adhigantabbaṃ”ti. **Sukhena ca hāvusoti** idaṃ sace sukhena ca sukhaṃ adhigantabbaṃ siyā. Rājā adhigaccheyyāti dassanattamaṃ vuttaṃ. Tattha **Māgadhoti** Magadharaṭṭhassa issaro. **Seniyoti** tassa nāmaṃ. **Bimbīti** attabhāvassa nāmaṃ. So tassa sārabhūto dassanīyo pāsādiko attabhāvasamiddhiyā **Bimbisāroti** vuccati. **Sukhavihāritaroti** idaṃ te Nigaṇṭhā rañño¹ tīsu pāsādesu tividhavaṃyehi nātakehi saddhīṃ sampatti-anubhavanaṃ sandhāya vadanti. **Addhāti** ekaṃsena. **Sahasā appaṭisaṅkhāti** sāhasaṃ katvā appaccavekkhitvāva yathā ratto rāgavasena duṭṭho dosavasena mūlho mohavasena bhāsati, evamevaṃ vācā bhāsītāti dasseti.

Tattha paṭipucchissāmīti tasmīṃ atthe pucchissāmi. **Yathā vo khameyyāti** yathā tumhākaṃ ruceyya. **Pahotīti** sakkoti.

Aniñjamānoti acalamāno. **Ekantasukhaṃ paṭisaṃvedīti** nīrantarasukhaṃ paṭisaṃvedī. “Ahaṃ kho āvuso Nigaṇṭhā pahomi -pa-ekantasukhaṃ paṭisaṃvedī”ti idaṃ attano phalasaṃpattisukhaṃ dassento āha. Ettha ca kathāpaṭiṭṭhāpanattham rājavāre satta ādīṃ katvā pucchā katā. Satta rattindivāni nappahotīti hi vutte cha pañca cattārīti sukhaṃ pucchitum hoti. Suddhavāre² pana sattāti vutte puna cha pañca cattārīti vuccamānaṃ anacchariyaṃ hoti, tasmā ekaṃ ādīṃ katvā desanā katā. Sesaṃ sabbattha uttānatthamevāti.

Papañcasūdaniyā Majjhimanikāyaṭṭhakathāya

Cūḷadukkhakkhandhasuttavaṇṇanā niṭṭhitā.

1. Te rañño (Sī, Syā)

2. Buddhavāre (Sī, Syā, Ka)

5. Anumānasuttavaṇṇanā

181. **Evam me sutanti** Anumānasuttam. Tattha **Bhaggesūti** evamnāmake janapade, vacanattho panettha vuttānusāreneva veditabbo. **Susumāragireti** evamnāmake nagare. Tassa kira nagarassa vatthupariggahadivase avidūre udakarahade susumāro saddamakāsi, giram nicchāresi. Atha nagare niṭṭhite¹ **Susumāragiram**vevassa nāmaṃ akaṃsu. **Bhesakaḷāvaneti** Bhesakaḷānāmake vane. “Bhesakaḷāvane”tipi pāṭho. **Migadāyeti** taṃ vanam migapakkhīnam abhayadinnaṭṭhāne jātam, tasmā **Migadāyoti** vuccati.

Pavāretīti icchāpeti. **Vadantūti** ovādānusāsānivasena vadantu, anusāsantūti attho. **Vacanīyomhīti** aham tumhehi vattabbo, anusāsitabbo ovaditabboti attho. **So ca hoti dubbacoti** so ca dukkhena vattabbo hoti, vutto na sahati. **Dovacassakaranehīti** dubbacabhāvākārakehi upari āgatehi soḷasahi dhammehi. **Appadakkhiṇaggāhī anusāsaninti** yo hi vuccamāno tumhe maṃ kasmā vadatha, aham attano kappiyākappiyam sāvajjānavajjam atthānattham jānāmīti vadati, ayaṃ anusāsaniṃ padakkhiṇato na gaṇhāti, vāmato gaṇhāti, tasmā **appadakkhiṇaggāhīti** vuccati.

Pāpikānam icchānanti lāmakānam asantasambhāvanapatthanānam. **Paṭippharatīti** paṭiviruddho, paccanīko hutvā tiṭṭhati, **apasādetīti** kim nu kho tuyham bālassa abyattassa bhaṇitena, tvampi nāma bhaṇitabbam maññissasīti evam ghaṭṭeti. **Paccāropetīti** tvampi khosi itthannāmam āpattim āpanno, taṃ tāva paṭikarohīti evam paṭi-āropeti.

Aññenaññam paṭicaratīti aññena kāraṇena vacanena vā aññam kāraṇam vacanam vā paṭicchādeti, “āpattim āpannosī”ti vutte “ko āpanno, kim āpanno, kismim āpanno, kam bhaṇatha, kim bhaṇathā”ti vā vadati, “evarūpam kiñci tayā diṭṭhan”ti vutte “na suṇāmī”ti sotaṃ vā upaneti. **Bahiddhā katham apānāmetīti** “itthannāmam āpattim āpannosī”ti puṭṭho “pāḷaliputtam gatomhī”ti vatvā puna “na tava Pāḷaliputtagamanam pucchāma,

1. Nimmite (Sī)

āpattiṃ pucchāmā”ti vutte “tato rājagehaṃ gatomhī”ti, rājagehaṃ vā yāhi brāhmaṇagehaṃ vā, āpattiṃ āpannosīti. Tattha me sukaramaṃsaṃ laddhanti-ādīni vadanto kathaṃ bahiddhā vikkhipati.

Apadāneti attano cariyāya. **Na sampāyatīti** āvuso tvaṃ kuhiṃ vasasi, kaṃ nissāya vasasīti vā, yaṃ tvaṃ vadesi “mayā esa āpattiṃ āpanno diṭṭho”ti. Tvaṃ tasmiṃ samaye kiṃ karosi, ayaṃ kiṃ karoti, kattha vā tvaṃ acchasi, kattha vā ayanti-ādīnā nayena cariyaṃ puṭṭho sampādetvā kathetuṃ na sakkoti.

183. **Tatrāvusoti** āvuso tesu soḷasasu dhammesu. **Attanāva attānaṃ evaṃ anuminitabbanti** evaṃ attanāva attā anumetabbo tuletabbo tīretabbo.

184. **Paccavekkhitabbanti** paccavekkhitabbo. **Ahorattānusikkhināti** divāpi rattimpi sikkhantena, rattiṃ ca divā ca kusalesu dhammesu sikkhantena pītipāmojjameva uppādetabbanti attho.

Acche vā udakapatteti pasanne vā udakabhājane. **Mukhanimittanti** mukhapaṭibimbaṃ. **Rajanti** āgantukarajaṃ. **Aṅgaṇanti** tattha jātakam tilakam vā piḷakam vā. **Sabbepime pāpake akusale dhamme pahīneti** iminā sabbappahānaṃ kathesi. Kathaṃ? Ettakā akusalā dhammā pabbajitassa nānucchavikāti paṭisaṅkhānaṃ uppādayato hi **paṭisaṅkhānappahānaṃ** kathitaṃ hoti. Sīlaṃ padaṭṭhānaṃ katvā kaṣiṇaparikkammaṃ ārabhitvā aṭṭha samāpattiyo nibbattentassa **vikkhambhanappahānaṃ** kathitaṃ. Samāpattiṃ padaṭṭhānaṃ katvā vipassanaṃ vaḍḍhentassa **tadaṅgappahānaṃ** kathitaṃ. Vipassanaṃ vaḍḍhetvā maggaṃ bhāventassa **samucchedappahānaṃ** kathitaṃ. Phale āgate **paṭippassaddhippahānaṃ**, nibbāne āgate **nissaraṇappahānanti** evaṃ imasmiṃ sutte sabbappahānaṃ kathitaṃva hoti.

Idaṃ hi suttaṃ **bhikkhupātimokkhaṃ** nāmāti porāṇā vadanti. Idaṃ divasassa tikkhattuṃ paccavekkhitabbaṃ. Pāto eva vasanaṭṭhānaṃ pavisitvā nisinnena “ime ettakā kilesā atthi nu kho mayhaṃ natthī”ti paccavekkhitabbā. Sace atthīti passati, tesam pahānāya vāyamitabbaṃ. No ce passati,

supabbajitosmīti attamanena bhavitabbaṃ. Bhattakiccaṃ katvā rattiṭṭhāne vā divāṭṭhāne vā nisīditvāpi paccavekkhitabbaṃ. Sāyaṃ vasanaṭṭhāne nisīditvāpi paccavekkhitabbaṃ. Tikkhattum asakkontena dve vāre paccavekkhitabbaṃ. Dve vāre asakkontena pana avassaṃ ekavāraṃ paccavekkhitabbaṃ, appaccavekkhitum na vaṭṭatīti vadanti. Sesam sabbattha uttānatthamevāti.

Papañcasūdaniyā Majjhimanikāyaṭṭhakathāya

Anumānasuttavaṇṇanā niṭṭhitā.

6. Cetokhilasuttavaṇṇanā

185. **Evam me sutanti** Cetokhilasuttam. Tattha **cetokhilāti** cittassa thaddhabhāvā kacavarabhāvā khāṇukabhāvā. **Cetasovinibandhāti** cittaṃ bandhitvā muṭṭhiyaṃ katvā viya gaṇhantīti cetasovinibandhā. **Vuddhinti-**ādīsu sīlena vuddhiṃ, maggena viruḷhiṃ, nibbānena vepullaṃ. Sīlasamādhīhi vā vuddhiṃ, vipassanāmaggehi viruḷhiṃ, phalanibbānehi vepullaṃ. **Satthari kaṅkhatīti** Satthu sarīre vā guṇe vā kaṅkhati. Sarīre kaṅkhamāno dvattiṃsavaralakkhaṇappaṭimaṇḍitaṃ nāma sarīraṃ atthi nu kho natthīti kaṅkhati, guṇe kaṅkhamāno atītānāgatapaccuppannajānanasamatthaṃ sabbaññutaññāpaṃ atthi nu kho natthīti kaṅkhati. **Vicikicchati** vicinanto kicchati, dukkhaṃ āpajjati, vinicchetaṃ na sakkoti. **Nādhimuccatīti** evametanti adhimokkhaṃ na paṭilabhati. **Na sampasīdatīti** guṇesu otaritvā nibbicikicchabhāvena pasīditum, anāvilo bhavatum na sakkoti. **Ātappāyāti** kilesasantāpakavīriyakaraṇatthāya. **Anuyogāyāti** punappunaṃ yogāya. **Sātaccāyāti** satatakiriya. **Padhānāyāti** padahanatthāya. **Ayaṃ paṭhamo cetokhiloti** ayaṃ Satthari vicikicchāsāṅkhāto paṭhamo cittassa thaddhabhāvo, evametassa bhikkhuno appahīno hoti. **Dhammeti** pariyattidhamme ca paṭivedhadhamme ca. Pariyattidhamme kaṅkhamāno Tepītaṃ Buddhavacanaṃ caturāsītiddhammakhandhasahassānīti vadanti, atthi nu kho etaṃ natthīti kaṅkhati. Paṭivedhadhamme kaṅkhamāno vipassanānissando maggo nāma, magganissando phalaṃ nāma, sabbasaṅkhārapaṭinissaggo nibbānaṃ nāmāti vadanti, taṃ atthi nu kho natthīti kaṅkhati. **Samghe kaṅkhatīti** suppaṭipannoti-ādīnaṃ padānaṃ vasena evarūpaṃ paṭipadaṃ

paṭipannā cattāro maggaṭṭhā cattāro phalaṭṭhāti aṭṭhannaṃ puggalānaṃ samūhabhūto **saṃgho** nāma, so atthi nu kho natthīti kaṅkhati. **Sikkhāya kaṅkhamāno** adhisīlasikkhā nāma adhiccittasikkhā nāma adhipaññāsikkhā nāmāti vadanti, sā atthi nu kho natthīti kaṅkhati. **Ayaṃ pañcamoti** ayaṃ sabrahmacārīsu kopasaṅkhāto pañcamo cittassa thaddhabhāvo kacavarabhāvo khāṇukabhāvo.

186. Vinibandhesu **kāmeti** vatthukāmepe kilesakāmepe. **Kāyete** attano kāye. **Rūpeti** bahiddhārūpe. **Yāvadatthanti** yattakaṃ icchati, tattakaṃ. **Udarāvadehakanti** udarapūraṃ. Tañhi udaraṃ avadehanato udarāvadehakanti vuccati. **Seyyasukhanti** mañcapīṭhasukhaṃ, utusukhaṃ vā. **Passasukhanti** yathā samparivattakaṃ sayantassa dakkhiṇapassavāmapassānaṃ sukhaṃ hoti, evaṃ uppannasukhaṃ. **Middhasukhanti** niddāsukhaṃ. **Anuyuttoti** yuttappayutto viharati.

Pañidhāyāti patthayitvā. **Sīlenāti**-ādīsu **sīlanti** catupārisuddhisīlaṃ. **Vatanti** vatasamādānaṃ. **Tapoti** tapacaraṇaṃ. **Brahmacariyanti** methunavīrati. **Devo vā bhavissāmīti** mahesakkhadevo vā bhavissāmi. **Devaññataro vāti** appesakkhadevesu vā aññataro.

189. Iddhipādesu chandaṃ nissāya pavatto samādhi **chandasaṃādhi**. Padhānabhūtā saṅkhārā **padhānasaṅkhārā**. **Samannāgatanti** tehi dhammehi upetaṃ. Iddhiyā pādāṃ, iddhibhūtāṃ vā pādanti **iddhipādāṃ**. Sesesupi eseva nayo, ayamettha saṅkhepo. Vitthāro pana Iddhipādavibhaṅge āgato eva. Visuddhimaggepissa attho dīpito. Iti imehi catūhi iddhipādehi vikkhambhanappahānaṃ kathitaṃ. **Ussolīyeva pañcamīti** ettha **ussolīti** sabbattha kattabbavīriyaṃ dasseti. **Ussolīpannarasaṅgasamannāgatoti** pañca cetokhilappahānāni pañca vinibandhappahānāni cattāro iddhipādā ussolīhīti evaṃ ussolīhiyā saddhiṃ pannarasahi aṅgehi samannāgato. **Bhabboti** anurūpo anucchaviko. **Abhinibbhidāyāti** nāṇena kilesabhedāya. **Sambodhāyāti** catumaggasambodhāya. **Anuttarassāti** seṭṭhassa. **Yogakkhemassāti** catūhi yogehi khemassa arahattassa. **Adhigamayāti** paṭilābhāya. **Seyyathāti** opammatthe nipāto. **Pīti** sambhāvanatthe. Ubhayenāpi seyyathāpi nāma bhikkhaveti dasseti.

Kukkuṭiyā aṇḍāni aṭṭha vā dasa vā dvādasa vāti ettha pana kiñcāpi kukkuṭiyā vuttappakāro unādhikānīpi aṇḍāni honti, vacanasiliṭṭhatāya pana evaṃ vuttaṃ. Evaṃ hi loke siliṭṭhaṃ vacanaṃ hoti. **Tānassūti** tāni assu, bhaveyyunti attho. **Kukkuṭiyā sammā adhisayitānī**ti tāya janettiyā kukkuṭiyā pakkhe pasāretvā tesāṃ upari sayantiyā sammā adhisayitāni. **Sammā pariseditānī**ti kālena kālaṃ utuṃ gāhāpentiyā suṭṭhu samantato seditāni usmīkatāni. **Sammā paribhāvitānī**ti kālena kālaṃ suṭṭhu samantato bhāvitāni, kukkuṭagandhaṃ gāhāpitānīti attho. **Kiñcāpi tassā kukkuṭiyā**ti tassā kukkuṭiyā imaṃ¹ tividhakiriyākaraṇena appamādaṃ katvā kiñcāpi na evaṃ icchā uppajjeyya. **Atha kho bhābbāva teti** atha kho te kukkuṭapotakā vuttanayena sotthinā abhinibbhijjituṃ bhābbāva. Te hi yasmā tāya kukkuṭiyā evaṃ tihākārehi tāni aṇḍāni paripālīyamānāni na pūṭini honti. Yopi nesāṃ allasineho, sopi pariyādānaṃ gacchati, kapālaṃ tanukaṃ hoti, pādanakhasikhā ca mukhatuṇḍakañca kharaṃ hoti, sayāṃ paripākāṃ gacchati, kapālassa tanuttā bahi āloko anto paññāyati, tasmā “ciraṃ vata mayāṃ saṅkuṭītahatthapādā sambādhe sayimhā, ayañca bahi āloko dissati, ettha dāni no sukhavihāro bhavissati”ti nikkhamitukāmā hutvā kapālaṃ pādena paharanti, gīvaṃ pasārenti, tato taṃ kapālaṃ dvedhā bhijjati. Atha te pakkhe vidhunantā taṅkhaṇānurūpaṃ viravantā nikkhamantiyeva, nikkhamitvā ca gāmakkhetaṃ upasobhayamānā vicaranti.

Evameva khoti idaṃ opammasampañipādanaṃ. Taṃ evaṃ atthena saṃsandetvā veditabbaṃ—tassā kukkuṭiyā aṇḍesu tividhakiriyākaraṇaṃ viya hi imassa bhikkhuno ussoḷhīpannarasehi aṅgehi samannāgatabhāvo. Kukkuṭiyā tividhakiriyāsampādanena aṇḍānaṃ apūtibhāvo viya pannarasaṅgasamannāgatassa bhikkhuno tividhānupassanāsampādanena vipassanāñāṇassa aparihāni. Tassā tividhakiriyākaraṇena aṇḍānaṃ allasinehāpariyādānaṃ viya tassa bhikkhuno tividhānupassanāsampādanena bhavattayānugatanikantisinehāpariyādānaṃ. Aṇḍakalāpānaṃ tanubhāvo

1. Idha (Sī)

viya bhikkhuno avijjaṇḍakosassa tanubhāvo. Kukkuṭapotakānaṃ pādanakhamukhatuṇḍakānaṃ thaddhakharabhāvo viya bhikkhuno vipassanāñāṇassa tikkhakharavippasannasūrabhāvo. Kukkuṭapotakānaṃ pariṇāmakālo viya bhikkhuno vipassanāñāṇassa pariṇāmakālo vaḍḍhitakālo gabbhaggahaṇakālo. Kukkuṭapotakānaṃ pādanakhasikhāya vā mukhatuṇḍakena vā aṇḍakosaṃ padāletvā pakkhe papphoṭetvā sotthinā abhinikkhamanakālo viya tassa bhikkhuno vipassanāñāṇagabbham gaṇhāpetvā vicarantassa tajjātikaṃ utusappāyaṃ vā bhojanasappāyaṃ vā puggalasappāyaṃ vā dhammassavanasappāyaṃ vā labhitvā ekāsane nisinnasseva vipassanaṃ vaḍḍhentassa anupubbādhiगतena arahattamaggena avijjaṇḍakosaṃ padāletvā abhiññāpakke papphoṭetvā sotthinā arahattapattakālo veditabbo. Yathā pana kukkuṭapotakānaṃ pariṇatabhāvaṃ ñatvā mātāpi aṇḍakosaṃ bhindati, evaṃ tathārūpassa bhikkhuno ñāṇaparipākaṃ ñatvā Satthāpi—

“Ucchinda sinehamattano, kumudaṃ sārādikaṃva pāṇinā.
Santimaggameva brūhaya, nibbānaṃ Sugatena desitaṃ”¹—

Ādinā nayena obhāsaṃ pharitvā gāthāya avijjaṇḍakosaṃ paharati, so gāthāpariyosāne avijjaṇḍakosaṃ bhinditvā arahattaṃ pāpuṇāti. Tato paṭṭhāya yathā te kukkuṭapotakā gāmakkhetaṃ upasobhayamānā tattha tattha vicaranti, evaṃ ayampi mahākhīṇāsavo nibbānārammaṇaṃ phalasaṃpattim appetvā saṃghārāmaṃ upasobhayamāno vicarati.

Iti imasmim sutte cattāri pahānāni kathitāni. Kathaṃ, cetokhilānañhi cetovinibandhānaṃ pahānena **paṭisaṅkhānappahānaṃ** kathitaṃ, iddhipādehi **vikkhambhanappahānaṃ** kathitaṃ, magge āgate **samucchedappahānaṃ** kathitaṃ, phale āgate **paṭippassaddhippahānaṃ** kathitaṃ. Sesaṃ sabbattha uttānatthamevāti.

Papañcasūdaniyā Majjhimanikāyaṭṭhakathāya

Cetokhilasuttavaṇṇanā niṭṭhitā.

1. Khu 1. 54 Dhammapade.

7. Vanapatthapariyāyasuttavaṇṇanā

190. **Evaṃ me sutanti** Vanapatthapariyāyaṃ. Tattha vanapatthapariyāyanti vanapatthakāraṇaṃ, vanapatthadesanaṃ vā.

191. **Vanapattham upanissāya viharatīti** manussūpacārātikkantaṃ vanasaṇḍasenāsaṇaṃ nissāya samaṇadhammaṃ karonto viharati. **Anupaṭṭhitāti** ādīsu pubbe anupaṭṭhitā sati taṃ upanissāya viharatopi na upaṭṭhāti, pubbe asamāhitaṃ cittaṃ na samādhiyati, pubbe aparikkhīṇā āsavā na parikkhayaṃ gacchanti, pubbe ananuppattaṃ anuttaraṃ yogakkhemaśaṅkhātāṃ arahattaṅca na pāpuṇātīti attho. **Jīvitaparikkhārāti** jīvitasambhārā. **Samudānetabbāti** samāharitabbā. **Kasirena samudāgacchantīti** dukkhena uppajjanti. **Rattibhāgaṃ vā divasabhāgaṃ vāti** rattikoṭṭhāse vā divasakoṭṭhāse vā. Ettha ca rattibhāge paṭisañcikkhamānena ñatvā rattimyeva pakkamitabbaṃ, rattim caṇḍavāḷādīnaṃ paribandhe¹ sati aruṇuggamaṇaṃ āgametabbaṃ. Divasabhāge ñatvā divāva pakkamitabbaṃ, divā paribandhe¹ sati sūriyatthaṅgamaṇaṃ āgametabbaṃ.

192. **Saṅkhāpīti** evaṃ samaṇadhammassa anipphajjanabhāvaṃ jānitvā. Anantaravāre pana saṅkhāpīti evaṃ samaṇadhammassa nipphajjanabhāvaṃ jānitvā.

194. **Yāvajīvanti** yāva jīvitaṃ pavattati, tāva vatthabbameva.

195. **So puggaloti** padassa nānubandhitabboti iminā sambandho. **Anāpucchāti** idha pana taṃ puggalaṃ anāpucchā pakkamitabbanti attho.

197. **Saṅkhāpīti** evaṃ samaṇadhammassa anipphajjanabhāvaṃ ñatvā so puggalo nānubandhitabbo, taṃ āpucchā pakkamitabbaṃ.

198. **Api panujjamānenāpīti** apinikkaḍḍhīyamānenāpi. Evarūpo hi puggalo sacepi dārukalāpasataṃ vā udakaghaṭasataṃ vā vālikambaṇasataṃ vā daṇḍaṃ āharāpeti, mā idha vasīti nikkaḍḍhāpeti vā, taṃ taṃ khamāpetvā yāvajīvaṃ vattabbamevāti.

Papañcasūdaniyā Majjhimanikāyaṭṭhakathāya

Vanapatthapariyāyasuttavaṇṇanā niṭṭhitā.

1. Paripantho (Sī, Syā)

8. Madhupiṇḍikasuttavaṇṇanā

199. **Evaṃ me sutanti** Madhupiṇḍikasuttam. Tattha **mahāvananti** Himavantena saddhim ekābaddham aropimam¹ jātivanam, na yathā Vesāliyam ropitāropitamissakam. **Divāvihārāyāti** divā paṭisallānatthāya. **Beluvalatṭhikāyāti** taruṇabeluvarukkhasa. **Daṇḍapāṇīti** na jarādubbalatāya daṇḍahattho. Ayañhi taruṇo paṭhamavaye ṭhito, daṇḍacittatāya pana suvaṇṇadaṇḍam gahetvā vicarati, tasmā **daṇḍapāṇīti** vutto. **Jaṅghāvihāranti** jaṅghākilamathavinodanattam jaṅghācāram. **Anucaṅkamamāno anuvicaramānoti** āramadassana vanadassana pabbatadassanādīnam atthāya ito cito ca vicaramāno. Adhiccanikkhamano kiresa kadāci deva nikkhamitvā evam vicarati. **Daṇḍamolubbhāti** daṇḍam olumbhitvā gopālakadāyako viya daṇḍam purato ṭhapetvā daṇḍamatthake dve hatthe patiṭṭhāpetvā piṭṭhipāṇim hanukena uppīletvā ekamantam aṭṭhāsi.

200. **Kimvādīti** kimdiṭṭhiko. **Kimakkhāyīti** kim katheti. Ayam rājā Bhagavantam avanditvāva paṭisanthāramattakameva katvā pañham pucchati. Tampi na aññātukāmatāya, acittikārena pucchati. Kasmā? Devadattassa pakkhiko kiresa, Devadatto attano santikam āgacchamāne Tathāgate bhindati. So kira evam vadeti “samaṇo Gotamo amhākam kulena saddhim verī, na no kulassa vuddhim icchati, bhaginīpi me cakkavattiparibhogā, tam pahāya ‘nassatesā’ti nikkhamitvā pabbaji, bhāgineyyopi me cakkavattibījanti ñatvā amhākam kulassa vaḍḍhiyā atussanto ‘nassatetan’ti tampi daharakāleyeva pabbājesi. Aham pana tena vinā vattitum asakkonto anupabbajito, evam pabbajitampi mam pabbajitadivasato paṭṭhāya na ujukehi akkhīhi oloketi, parisamajjhe bhāsantopi mahāpharasunā paharanto viya āpāyiko Devadattoti-ādīni bhāsati”ti. Evam ayampi rājā Devadattena bhinno, tasmā evamakāsi.

Atha Bhagavā yathā ayam rājā mayā pañhe pucchite na kathetīti vattum na labhati, yathā ca bhāsitassa attham na jānāti,

1. Aropitam (Syā, Ka)

evamassa kathessāmīti tassānucchavikaṃ kathento **yathāvādī khoti**-ādimāha.

Tattha **na kenaci loke viggayha tiṭṭhatīti** loke kenaci saddhiṃ viggāhikakathaṃ na karoti na vivadati. Tathāgato hi lokena saddhiṃ na vivadati, loko pana Tathāgatena saddhiṃ aniccanti vutte niccanti vadamāno, dukkhaṃ, anattā, asubhanti vutte subhanti vadamāno vivadati. Tenevāha “nāhaṃ bhikkhave lokena vivadāmi, lokova kho bhikkhave mayā vivadati, tathā na bhikkhave dhammavādī kenaci lokasmiṃ vivadati, adhammavādīva kho bhikkhave vivadati”¹. **Yathāti** yena kāraṇena. **Kāmehīti** vatthukāmehipi kilesakāmehipi. **Taṃ brāhmaṇanti** taṃ khīṇāsavaṃ brāhmaṇaṃ. **Akatharūkathinti** nibbicikicchaṃ. **Chinnakukkuccanti** vippaṭṭisārakukkuccassa ceva hatthapādakukkuccassa ca chinnattā chinnakukkuccaṃ. **Bhavābhaveti** punappunabbhave, hīnapaṇīte vā bhave, paṇīto hi bhavo vuddhippatto abhavoti vuccati. **Saññāti** kilesasaññā. Kilesāyeva vā idha saññānāmena vuttā, tasmā yena kāraṇena kāmehi visaṃyuttaṃ viharantaṃ taṃ loke nibbānavādī² khīṇāsavabrāhmaṇaṃ kilesasaññā nānusenti, taṃca kāraṇaṃ ahaṃ vadāmīti ayamettha attho. Iti Bhagavā attano khīṇāsavabhāvaṃ dīpeti. **Nillāletvāti** nīharitvā kilāpetvā. **Tivisākhanti** tisākhaṃ. **Nalāṭikanti** valibhaṅgaṃ³ nalāṭe tisso rājiyo dassento valibhaṅgaṃ vuṭṭhāpetvāti attho. **Daṇḍamolubbhāti** daṇḍaṃ uppīletvā. “Daṇḍamālubbhā”³tipi pāṭho, gahetvā pakkāmīti attho.

201. **Aññataroti** nāmena apākaṭo eko bhikkhu. So kira anusandhikusalo, Bhagavatā yathā daṇḍapāṇī na jānāti, tathā mayā kathitanti vutte kinti nu kho Bhagavatā aviññeyyaṃ katvā pañho kathitoti anusandhiṃ gahetvā Dasabalaṃ yācitvā imaṃ pañhaṃ bhikkhusaṃghassa pākaṭaṃ karissāmīti uṭṭhāyāsanaṃ ekamsaṃ uttarāsaṅgaṃ karitvā dasanakhasamujjalaṃ añjalim paggayha **kimvādī pana bhante Bhagavāti**-ādimāha.

1. Saṃ 2. 113 piṭṭhe.

2. Nibbivādaṃ (Sī)

3. Valibhaṅge (Ka)

Yatonidānanti bhāvanapuṁsakaṃ etaṃ, yena kāraṇena yasmiṃ kāraṇe satīti attho. **Papañcasaññāsaṅkhāti** ettha **saṅkhāti** koṭṭhāsā. **Papañcasaññāti** taṇhāmānadiṭṭhipapañcasampayuttā saññā, saññānāmena vā papañcāyeva vuttā. Tasmā papañcakoṭṭhāsāti ayamettha attho. **Samudācarantīti** pavattanti. **Ettha ce natthi abhinanditabbanti** yasmiṃ dvādasāyatanasaṅkhāte kāraṇe sati papañcasaññāsaṅkhā samudācaranti, ettha ekāyatanampi ce abhinanditabbam abhivaditabbam ajjhositabbam natthīti attho. Tattha **abhinanditabbanti** ahaṃ mamanti abhinanditabbam. **Abhivaditabbanti** ahaṃ mamanti vattabbam. **Ajjhositabbanti** ajjhositvā gilivā pariniṭṭhapetvā gahetabbayuttam. Etenettha taṇhādīnaṃyeva appavattim katheti. **Esevantoti** yaṃ abhinandanādīnaṃ natthibhāvova rāgānusayādīnaṃ anto. Eseva nayo sabbattha.

Daṇḍādānādisu pana yāya cetanāya daṇḍam ādiyati, sā **daṇḍādānam**. Yāya sattham ādiyati parāmasati, sā **satthādānam**. Matthakappattam **kalaham**. Nānāgāhamattam¹ **viggaḥam**. Nānāvādamattam² **vivādam**. **Tuvarṃ tuvanti** evaṃ pavattam tuvarṃ tuvarṃ. Piyasuññakaraṇam **pesuññam**. Ayathāsabhāvam musāvādam karoti, sā **musāvādoti** veditabbā. **Ettheteti** ettha dvādasasu āyatanesu ete kilesā. Kilesā hi uppajjamānāpi dvādasāyatanāni nissāya uppajjanti, nirujjhamānāpi dvādasasu āyatanesuyeva nirujjhanti. Evaṃ yatthuppannā, tattheva niruddhā honti. Svāyamattho samudayasaccapañhena dīpetabbo—

“Sā kho panesā taṇhā kattha uppajjamānā uppajjati, kattha nivisamānā nivisatī”ti vatvā “yaṃ loke piyarūpaṃ sātārūpaṃ, etthesā taṇhā uppajjamānā uppajjati, ettha nivisamānā nivisati. Kiñca loke piyarūpaṃ sātārūpaṃ. Cakkhu loke piyarūpaṃ sātārūpaṃ”ti-ādīnā³ nayenadvādasasuyeva āyatanesu tassā uppatti ca nirodho ca vutto. Yatheva ca taṇhā dvādasasu āyatanesu uppajjitvā nibbānaṃ āgamma niruddhāpi āyatanesu puna samudācārassa abhāvato āyatanesuyeva niruddhāti vuttā, evamimepi pāpakā akusalā dhammā āyatanesu nirujjhantīti veditabbā. Atha vā yvāyam abhinandanādīnaṃ abhāvova

1. Nānāgāhappattam (Sī, Syā) 2. Nānāvādapattam (Sī, Syā) 3. Abhi 2. 106 piṭṭhe.

rāgānusayādīnaṃ antoti vutto. Etthete rāgānusayādīnaṃ antoti laddhavohāre nibbāne pāpakā akusalā dhammā aparisesā nirujjhanti. Yañhi yattha natthi, taṃ tattha niruddhaṃ nāma hoti, svāyamattho nirodhapañhena¹ dīpetabbo. Vuttaṃ hettaṃ “dutiyaṃ jhānaṃ samāpannaṃ vitakkavicārā vacīsaṅkhārā paṭippassaddhā hontī”ti-ādi².

202. **Satthu ceva saṃvaṇṇitoti** Satthārā ca pasaṃsito. **Viññūnanti** idampi karaṇatthe sāmivacanaṃ, paṇḍitehi sabrahmacārīhi ca sambhāvitoti attho. **Pahotīti** sakkoti.

203. **Atikkammeva mūlaṃ atikkamma khandhanti sāro** nāma mūle vā khandhe vā bhavye, tampi atikkamitvāti attho. **Evaṃsampadanti** evaṃsappattikaṃ, īdisanti attho. **Atisitivāti** atikkamitvā. **Jānaṃ jānātīti** jānitabbameva jānāti. **Passaṃ passatīti** passitabbameva passati. Yathā vā ekacco viparītaṃ gaṇhanto jānantopi na jānāti, passantopi na passati, na evaṃ Bhagavā. Bhagavā pana jānanto jānātiyeva, passanto passatiyeva. Svāyaṃ dassanapariṇāyakaṭṭhena **cakkhubhūto**. Viditakaraṇaṭṭhena **ñāṇabhūto**. Aviparītasabhāvaṭṭhena pariyattidhammappavattanato vā hadayena cintevā vācāya nicchāritadhammamayoti **dhammabhūto**. Setṭhaṭṭhena **brahmabhūto**. Atha vā cakkhu viya bhūto **cakkhubhūto**ti evametesu padesu attho veditabbo. Svāyaṃ dhammassa vattanato **vattā**. Pavattāpanato **pavattā**. Atthaṃ nīharitvā dassanasamatthatāya **atthassa ninnetā**. Amatādhiḡamāya paṭipattiṃ dadātīti **amatassa dātā**. **Agaruṃ katvāti** punappunaṃ āyācāpentopi³ hi garuṃ karoti nāma, attano sāvakaḡaramīñāṇe ṭhatvā Sinerupādato vālukaṃ uddharamāno viya dubbīñṇeyyaṃ katvā kathentopi garuṃ karotiyeva nāma. Evaṃ akatvā amhe punappunaṃ āyācāpetvā suviñṇeyyampi no katvā kathehīti vuttaṃ hoti.

204. **Yaṃ kho no āvusoti** ettha kiñcāpi “yaṃ kho vo”ti vattabbaṃ siyā, te pana bhikkhū attanā saddhiṃ saṅgaṇhanto “yaṃ kho no”ti āha. Yasmā vā uddesova tesāṃ uddiṭṭho. Bhagavā pana therassāpi

1. Abhi 2. 109 piṭṭhe.

2. Khu 9. 96 piṭṭhe.

3. Yācāpentopi (Sī)

tesampi Bhagavāva. Tasmā Bhagavāti padaṃ sandhāyapi evamāha, yaṃ kho amhākaṃ Bhagavā tumhākaṃ saṃkhittena uddesaṃ uddisivāti attho.

Cakkhuñcāvusoti-ādīsu ayamattho, āvuso nissayabhāvena cakkhupasādañca ārammaṇabhāvena catusamuṭṭhānikarūpe ca paṭicca cakkhuviññāṇaṃ nāma uppajjati. **Tiṇṇaṃ saṅgati phassoti** tesaṃ tiṇṇaṃ saṅgatiyā phasso nāma uppajjati. Taṃ phassaṃ paṭicca sahajātādivasena phassapaccayā vedanā uppajjati. Tāya vedanāya yaṃ ārammaṇaṃ vedeti, tadeva saññā sañjānāti, yaṃ saññā sañjānāti, tadeva ārammaṇaṃ vitakko vitakketi. Yaṃ vitakko vitakketi, tadevārammaṇaṃ papañco papañceti. **Tatonidānanti** etehi cakkhurūpādīhi kāraṇehi. **Purisaṃ papañcasaññāsankhā samudācarantīti** taṃ apariññātakāraṇaṃ purisaṃ papañcakoṭṭhāsā abhibhavanti, tassa pavattantīti attho. Tattha phassavedanāsaññā cakkhuviññāṇena sahajātā honti. Vitakko cakkhuviññāṇanantarādīsu savitakkacittesu daṭṭhabbo. Papañcasankhā javanena sahajātā honti. Yadi evaṃ kasmā atītānāgataggahaṇaṃ katanti. Tathā uppajjanato. Yatheva hi etarahi cakkhudvāriko papañco cakkhuñca rūpe ca phassavedanāsaññāvitakke ca paṭicca uppanno, evamevaṃ atītānāgatesupi cakkhuviññeyyesu rūpesu tassuppattim dassento evamāha.

Sotañcāvusoti-ādīsupi eseva nayo. Chaṭṭhadvāre pana **mananti** bhavaṅgacittam. **Dhammeti** tebhūmakadhammārammaṇaṃ. **Manoviññāṇanti** āvajjanaṃ vā javanaṃ vā. Āvajjane gahite phassavedanāsaññāvitakkā āvajjanasahajātā honti. Papañco javanasahajāto. Javane gahite sahvājjanaṃ bhavaṅgaṃ mano nāma hoti, tato phassādayo sabbepi javanena sahajātāva. Manodvāre pana yasmā atītādibhedaṃ sabbampi ārammaṇaṃ hoti, tasmā **atītānāgatapaccuppannesūti** idaṃ yuttameva.

Idāni vaṭṭaṃ dassento **so vatāvusoti** desanaṃ ārabhi. **Phassapaññattim paññāpessatīti** phasso nāma eko dhammo uppajjatīti evaṃ phassapaññattim paññāpessati, dassessatīti attho. Esa nayo sabbattha. Evaṃ imasmim sati idaṃ hotīti dvādasāyatanavasena sakalaṃ vaṭṭaṃ dassetvā idāni dvādasāyatanapaṭikkhepavasena vivaṭṭaṃ dassento **so vatāvuso**

cakkhusmiriṃ asatīti desanaṃ ārabhi. Tattha vuttanayeneva attho veditabbo.

Evam pañhaṃ vissajjetvā idāni sāvakena pañho kathitoti mā nikkāṅkhā ahuvattha, ayaṃ Bhagavā sabbaññutaññāṇatulaṃ gahetvā nisinno, icchamānā tameva upasaṅkamitvā nikkāṅkhā hothāti uyyojento **ākaṅkhamānā ca panāti**-ādimāha.

205. **Imehi ākārehīti** imehi kāraṇehi papañcuppattiyā pāṭiyekakāraṇehi ceva vaṭṭavivaṭṭakāraṇehi ca. **Imehi padehīti** imehi akkharasampiṇḍanehi. **Byañjanehīti** pāṭiyekka-akkharehi. **Paṇḍitoti** paṇḍiccena samannāgato. Catūhi vā kāraṇehi paṇḍito dhātukusalo āyatanakusalo paccayākāraṅkusalo kāraṇākāraṅkusaloti. **Mahāpaññoti** mahante atthe mahante dhamme mahantā niruttiyo mahantāni paṭibhānāni pariggahaṇasamatthāya mahāpaññāya samannāgato. **Yathā taṃ Mahākaccānenāti** yathā Mahākaccānena byākatam, taṃ sandhāya **tanti** vuttam. Yathā Mahākaccānena byākatam, ahampi taṃ evamevaṃ byākareyyanti attho.

Madhupiṇḍikanti mahantaṃ guḷapūvaṃ baddhasattuguḷakam vā. **Asecanakanti** asecatibbakam. Sappiḥṇāṇitamadhusakkarādisu idaṃ nāmettha mandaṃ idaṃ bahukanti na vattabbaṃ samayojitarasaṃ. **Cetasoti** cintakajātiko. **Dabbajātikoti** paṇḍitasabhāvo. **Ko nāmo ayanti** idaṃ thero “atibhaddako¹ ayaṃ dhammapariyāyo, Dasabalassa sabbaññutaññāṇenevassa nāmaṃ gaṇhāpessāmī”ti cintetvā āha. **Tasmāti** yasmā madhupiṇḍiko viya madhuro, tasmā madhupiṇḍikapariyāyotveva naṃ dhārehīti vadati. Sesam sabbattha uttānatthamevāti.

Papañcasūdaniyā Majjhimanikāyaṭṭhakathāya

Madhupiṇḍikasuttavaṇṇanā niṭṭhitā.

1. Atigaruko (Syā)

9. Dvedhāvitakkasuttavaṇṇanā

206. **Evam me sutanti** Dvedhāvitakkasuttaṃ. Tattha **dvidhā katvā dvidhā katvāti** dve dve bhāge katvā. **Kāma**vitakkoti kāmapaṭisaṃyutto vitakko. **Byāpāda**vitakkoti byāpādapaṭisaṃyutto vitakko. **Vihimsā**vitakkoti vihimsāpaṭisaṃyutto vitakko. **Ekam bhāganti** ajjhataṃ vā bahiddhā vā oḷāriko vā sukhumo vā sabbopāyaṃ vitakko akusalapakkhikoyevāti tayopi kāmabyāpādavihimsāvitakke ekam koṭṭhāsamakāsiṃ. Kāmehi nissaṭo nekkhammapaṭisaṃyutto vitakko **nekkham**vitakko nāma, so yāva paṭhamajjhānā vaṭṭati. Abyāpādapaṭisaṃyutto vitakko **abyāpāda**vitakko, so mettāpubbabhāgato paṭṭhāya yāva paṭhamajjhānā vaṭṭati. Avihimsāpaṭisaṃyutto vitakko **avihimsā**vitakko, so karuṇāpubbabhāgato paṭṭhāya yāva paṭhamajjhānā vaṭṭati. **Dutiyaṃ bhāganti** sabbopāyaṃ kusalapakkhikoyevāti dutiyaṃ koṭṭhāsamakāciṃ. Iminā bodhisattassa vitakkaniggahaṇakālo kathito.

Bodhisattassa hi chabbassāni padhānaṃ padahantassa nekkhamavitakkādayo puñjapuñjā mahānadiyaṃ oghā viya pavattiṃsu. Satisammosena pana sahasā kāmaavitakkādayo uppajjitvā kusalavāraṃ pacchinditvā sayam akusalajavanavārā hutvā tiṭṭhanti. Tato bodhisatto cintesi “mayham ime kāmaavitakkādayo kusalavāraṃ pacchinditvā tiṭṭhanti, handāham ime vitakke dve bhāge katvā viharāmi”ti kāmaavitakkādayo akusalapakkhikāti ekam bhāgaṃ karoti nekkhamavitakkādayo kusalapakkhikāti ekam. Atha puna cintesi “akusalapakkhato āgataṃ vitakkaṃ mantena kaṇhasappaṃ uppīletvā gaṇhanto viya amittaṃ gīvāya akkamanto viya ca niggaḥessāmi, nāssa vaḍḍhituṃ dassāmi. Kusalapakkhato āgataṃ vitakkaṃ megghasamaye meggham viya sukhette sālakalyāṇipotakam viya ca sīgham vaḍḍhessāmi”ti. So tathā katvā akusalavitakke niggaṇhi, kusalavitakke vaḍḍhesi. Evam iminā bodhisattassa vitakkaniggahaṇakālo kathitoti veditabbo.

207. Idāni yathāssa te vitakkā uppajjiṃsu, yathā ca ne niggaḥesi, taṃ dassento **tassa mayham bhikkh**aveti-ādimāha. Tattha **appamatt**assāti

satiyā avippavāse ʒhitassa. **Ātāpinoti** ātāpavīriyavantassa. **Pahitattassāti** pesitacittassa. **Uppajjati kāmavitakkoti** bodhisattassa chabbassāni padhānam padahato rajjasukham vā ārabba, pāsāde vā nāṭakāni vā orodhe vā kiñciveva vā sampattiṃ ārabba kāmavitakko nāma na uppannapubbo.

¹Dukkarakārikāya panassa āhārūpacchedena adhimattakasmānam² pattassa etadahosi “na sakkā āhārūpacchedena¹ visesaṃ nibbattetuṃ, yaṃ nūnāhaṃ oḷārikam āhāraṃ āhāreyyaṃ”ti. So Uruvelaṃ piṇḍāya pāvīsi. Manussa “mahāpuriso pubbe āharitvā dinnampi na gaṇhi, addhāssa idāni manoratho matthakam patto, tasmā sayameva āgato”ti paṇitapaṇītaṃ āhāraṃ upaharīmsu. Bodhisattassa attabhāvo nacirasseva pākatiko ahoṣi. Jarājiṇṇattabhāvo hi sappāyabhojanaṃ labhitvāpi pākatiko na hoti. Bodhisatto pana daharo. Tenassa sappāyabhojanaṃ bhujjato attabhāvo nacirasseva pākatiko jāto, vipassannāni indriyāni, parisuddho chavivaṇṇo, samuggatatārāgaṇaṃ viya nabhaṃ paripuṇṇadvattimsamahāpurisalakkhaṇappaṭimaṇḍitasarīraṃ ahoṣi. So taṃ oloketvā “tāva kilanto nāma attabhāvo evaṃ paṭipākatiko jāto”ti cintetvā attano paññāmahantatāya evaṃ parittakampi vitakkaṃ gahetvā kāmavitakkoti akāsi.

Paṇṇasālāya purato nisinna camarapasadagavaya rohitamigādike magagaṇe manuññasaddaravane moravanakukkuṭādike pakkhigaṇe nīluppalakumudakamalādīsañchannāni pallalāni nānākusumasañchannaviṭapā vanarājiyo maṇikkhandhanimmalajalapavāhañca naḍiṃ Nerañjaraṃ passati. Tassa evaṃ hoti “sobhanā vatime migajātā pakkhigaṇā pallalāni vanarājiyo naḍi Nerañjarā”ti. So tampi evaṃ parittakam vitakkaṃ gahetvā kāmavitakkaṃ akāsi, tenāha “uppajjati kāmavitakko”ti.

Attabyābādhāyapīti attadukkhāyapi. Eseva nayo sabbattha. Kiṃ pana mahāsattassa ubhayadukkhāya saṃvattanakavitakko nāma atthīti. Natthi. Apariññāyaṃ ʒhitassa pana vitakko yāva ubhayabyābādhāya saṃvattatīti etāni tīṇi nāmāni labhati, tasmā evamāha. **Paññānirodhikoti**

1-1. Dukkarakārikāya panassa āhārūpacchedena (Ka)

2. Adhimattakasmādānaṃ (Syā, Ka)

anuppannāya lokiyalokuttarāya paññāya uppajjitum na deti, lokiyapaññaṃ pana aṭṭhasamāpattipañcābhiññāvasena uppannampi samucchinditvā khipatīti **paññānirodhiko**. **Vighātapakkhiko**ti dukkhakoṭṭhāsiko. Asaṅkhatam nibbānam nāma, tam paccakkham kātum na detīti **anibbānasamvattaniko**. **Abbattham gacchatīti** khayam natthibhāvam gacchati. Udakapupphulako¹ viya nirujjhati. **Pajahamevāti** pajahimeva². **Vinodamevāti** nīharimeva³. **Byantameva nam akāsinti** vigatantam nissesam parivaṭumam paricchinnameva nam akāsim.

208. **Byāpādavittakko**ti na bodhisattassa parūpaghātappaṭisaṃyutto nāma vittakko citte uppajjati, athassa ativassa-accuṇha-atisītādīni pana paṭicca cittavipariṇāmaabhāvo hoti, tam sandhāya “byāpādavittakko”ti āha. **Vihimsāvittakko**ti na mahāsattassa paresam dukkhuppādanappaṭisaṃyutto vittakko uppajjati, citte pana uddhatākāro anekaggatākāro hoti, tam gahetvā vihimśāvittakkaṃ akāsi. Paṇṇasāladvāre nisinnō hi sīhabyagghādike vālamige sūkarādayo khuddamige vihimśante passati, atha bodhisatto imasmimpi nāma akutobhaye araṇṇe imesam tiracchānagatānam paccatthikā uppajjanti, balavanto dubbale khādanti, balavantakhādītā⁴ vattantīti kāruṇṇam uppādeti. Aññepi biḷārādayo kukkuṭamūsikādīni khādante passati, gāmam piṇḍāya pavitṭho manusse rājakammikehi upaddute vadhabandhādīni anubhavante attano kasivāṇijjādīni kammāni katvā jīvitum na labhantīti kāruṇṇam uppādeti, tam sandhāya “uppajjati vihimśāvittakko”ti āha. **Tathā tathāti** tena tena ākārena. Idam vuttam hoti—kāmavittakkādīsu yaṃ yaṃ vittakkehi, yaṃ yaṃ vittakkaṃ pavatteti, tena tena cassākārena kāmavittakkādibhāvo cetaso na hi hotīti. **Pahāsi nekkhammavittakkanti** nekkhammavittakkaṃ pajahati. **Bahulamakāsīti** bahulam karoti. **Tassa tam kāmavittakkāya cittanti** tassa tam cittam kāmavittakkatthāya. Yathā

1. Udakabubbūlako (Sī, Syā)

2. Chaḍḍitameva (Syā, Ka)

3. Nīharitameva (Syā, Ka) Pāliyam “pajahameva, vinodamevā”ti imāni dve “kāmavittakkaṃ”ti kammassa atītakālikakiriyapadāni, pacchato nanti kammassa visum dassanato.

4. Dubbalakhādakā (Sī, Syā)

kānavitakkasampayuttaṃ hoti, evamevaṃ namatīti attho. Sesapadesupi eseva nayo.

Idāni atthadīpikaṃ upamaṃ dassento **seyyathāpī**ti-ādimāha. Tattha **kiṭṭhasambādheti** sassasambādhe. **Ākoṭeyyāti** ujukaṃ piṭṭhiyaṃ pahareyya. **Paṭikoṭeyyāti** tiriyaṃ phāsukāsu pahareyya. **Sannirundheyyāti** āvaritvā tiṭṭheyya. **Sannivāreyyāti** ito cito ca gantuṃ na dadeyya. **Tatonidānanti** tena kāraṇena, evaṃ arakkhitānaṃ gunnaṃ paresaṃ sassakhādanakāraṇeṇāti attho. Bālo hi gopālako evaṃ gāvo arakkhamāno “ayaṃ amhākaṃ bhattavetaṇaṃ khādati, ujuṃ gāvo rakkhitumpi na sakkoti, kulehi saddhiṃ veraṃ gaṇhāpeti”ti gosāmikānampi santikā vadhādīni pāpuṇāti, kiṭṭhasāmikānampi. Paṇḍito pana imāni cattāri bhayāni sampassanto gāvo sādhukaṃ rakkhati, taṃ sandhāyetaṃ vuttaṃ. **Ādīnavanti** upaddavaṃ. **Okāranti** lāmakam¹, khandhesu vā otāraṃ². **Samkilesanti** kiliṭṭhabhāvaṃ. **Nekkhammeti** nekkhammamhi. **Ānisaṃsanti** visuddhipakkhaṃ. **Vodānapakkhanti** idaṃ tasseva vevacanaṃ, kusalānaṃ dhammānaṃ nekkhammamhi visuddhipakkhaṃ addasanti attho.

209. **Nekkhammanti** ca kāmehi nissaṭaṃ sabbakusalaṃ, ekadhamme saṅgayhamāne nibbānameva. Tatridaṃ opammaṃsandanaṃ—kiṭṭhasambādhaṃ viya hi rūpādi-ārammaṇaṃ, kūṭagāvo viya kūṭacittaṃ, paṇḍitagopālako viya bodhisatto, catubbidhabhayaṃ viya attaparūbhayaabyābādḥāya saṃvattanavitakko, paṇḍitagopālakassa catubbidhaṃ bhayaṃ disvā kiṭṭhasambādhe appamādena gorakkhaṇaṃ viya bodhisattassa chabbassāni padhānaṃ padahato attabyābādḥādibhayaṃ disvā rūpādīsu ārammaṇesu yathā kānavitakkādayo na uppajjanti, evaṃ cittarakkhaṇaṃ. **Paññāvuddhikoti**-ādīsu anuppannāya lokiyalokuttarapaññāya uppādāya, uppannāya ca vuddhiyā saṃvattatīti **paññāvuddhiko**. Na dukkhakoṭṭhāsāya saṃvattatīti **avighātapakkhiko**. Nibbānadhātusacchikiriyāya saṃvattatīti **nibbānasamvattaniko**. **Rattim cepi nam bhikkhave anuvitakkeyyanti** sakalarattim cepi taṃ vitakkaṃ pavatteyyaṃ. **Tatonidānanti** taṃmūlakaṃ. **Ohañneyyāti** ugghāṭiyeyya, uddhaccāya

1. Lāmakabhāvaṃ (Sī, Syā, Ka)

2. Okāraṃ (Sī, Syā, Ka)

saṁvatteyyāti attho. **Ārāti** dūre. **Samādhimhāti** upacārasamādhitopi appanāsamādhitopi. **So kho ahaṁ bhikkhave ajjhattameva cittanti** so ahaṁ bhikkhave mā me cittaṁ samādhimhā dūre hotūti ajjhattameva cittaṁ saṅghapemi, gocarajjhatte ṭhapemīti attho. **Sannisādemīti** tattheva ca naṁ sannisīdāpemi. **Ekodim karomīti** ekaggaṁ karomi. **Samādahāmīti** sammā ādahāmi, suṭṭhu āropemīti attho. **Mā me cittaṁ ūhaññīti** mā mayhaṁ cittaṁ ugghātīyittha, mā uddhaccāya saṁvattatūti attho.

210. **Uppajjati abyāpādavitakko -pa- avihimsāvitakkoti** ettha yo so imāya heṭṭhā vuttataruṇavipassanāya saddhim uppannavitakko kāmappaccanīkaṭṭhena **nekkhammavitakkoti** vutto. Soyeva byāpādapaccanīkaṭṭhena **abyāpādavitakkoti** ca, vihiṁsāpaccanīkaṭṭhena **avihimsāvitakkoti** ca vutto.

Ettāvatā bodhisattassa samāpattim nissāya vipassanāpaṭṭhapanakālo kathito. Yassa hi samādhipi taruṇo, vipassanāpi. Tassa vipassanaṁ paṭṭhapetvā aticiraṁ nisinnassa kāyo kilamati, anto aggi viya uṭṭhahati¹, kacchehi sedā muccanti, matthakato usumavaṭṭi viya uṭṭhahati¹, cittaṁ haññati vihaññati vipphandati. So puna samāpattim samāpajjitvā taṁ paridametvā mudukaṁ katvā samassāsetvā puna vipassanaṁ paṭṭhapeti. Tassa puna aticiraṁ nisinnassa tatheva hoti. So puna samāpattim samāpajjitvā tatheva karoti. Vipassanāya hi bahūpakārā samāpatti.

Yathā yodhassa phalakakoṭṭhako nāma bahūpakāro hoti, so taṁ nissāya saṅgāmaṁ pavisati, tattha hatthīhipi assehipi yodhehipi saddhim kammaṁ katvā āvudhesu vā khīnesu bhuñjitukāmatādibhāve vā sati nivattitvā phalakakoṭṭhakaṁ pavisitvā āvudhānipi gaṇhāti, vissamatipi, bhuñjatipi, pānīyampi pivati, sannāhampi paṭisannayhati, taṁ taṁ katvā puna saṅgāmaṁ pavisati, tattha kammaṁ katvā puna uccārādipīlito vā kenacideva vā karaṇīyena phalakakoṭṭhakaṁ pavisati. Tattha santhambhitvā

1. Upaṭṭhahati (Sī)

puna saṅgāmaṃ pavisati, evaṃ yodhassa phalakoṭṭhako viya vipassanāya bahūpakārā samāpatti.

Samāpattiyā pana saṅgāmaṃ nittharaṇakayodhassa phalakoṭṭhakatopi vipassanā bahūpakāratarā. Kiñcāpi hi samāpattim nissāya vipassanaṃ paṭṭhabeti, vipassanā pana thāmajātā samāpattimpi rakkhati. Thāmajātaṃ karoti.

Yathā hi thale nāvampi nāvāya bhaṇḍampi sakaṭabhāraṃ karonti. Udakaṃ patvā pana sakaṭampi sakaṭabhāṇḍampi yuttagoṇepi nāvābhāraṃ karonti. Nāvā tiriyaṃ sotaṃ chinditvā sotthinā supaṭṭanaṃ gacchati, evamevaṃ kiñcāpi samāpattim nissāya vipassanaṃ paṭṭhabeti, vipassanā pana thāmajātā samāpattimpi rakkhati, thāmajātaṃ karoti. Thalaṃ patvā sakaṭaṃ viya hi samāpatti. Udakaṃ patvā nāvā viya vipassanā. Iti bodhisattassa ettāvataṃ samāpattim nissāya vipassanāpaṭṭhapanakālo kathitoti veditabbo.

Yaññadevāti-ādi kaṇhapakkhe vuttānusāreṇeva veditabbaṃ, idhāpi atthadīpikaṃ upamaṃ dassetuṃ **seyyathāpīti**-ādimāha. Tattha **gāmantasambhatesūti** gāmantaṃ āhaṭesu. **Satikaraṇīyameva hotīti etā gāvoti** sati-uppādanamattameva kātabbaṃ hoti. Ito cito ca gantvā ākoṭṭanādikkiccam natthi. **Ete dhammāti** ete samathavipassanā dhammāti satuppādanamattameva kātabbaṃ hoti. Iminā bodhisattassa samathavipassanānaṃ thāmajātakālo kathito. Tadā kirassa samāpattim appanattāya nisinnassa aṭṭha samāpattiyo ekāvajjanena āpāthaṃ āgacchanti, vipassanaṃ paṭṭhabetvā nisinnō satta anupassanā ekappahāreṇeva āruḥhova hoti.

215. **Seyyathāpīti** idha kim dasseti? Ayaṃ pāṭiyekko anusandhi, sattānañhi hitūpacāraṃ attano Satthubhāvasampadañca dassento Bhagavā imaṃ desanaṃ ārabhi. Tattha **araññeti** aṭaviyaṃ. **Pavaneti** vanasaṇḍe. Atthato hi idaṃ dvayaṃ ekameva, paṭhamassa pana dutiyaṃ vevacanaṃ. **Ayogakkhemakāmoti** catūhi yogehi khemaṃ nibbhayaṭṭhānaṃ anicchanto bhayameva

icchanto. **Sovatthikoti** suvatthibhāvāvaho. **Pītigamanīyoti** tuṭṭhim gamanīyo. “Pītigamanīyo”ti vā pāṭho. **Pidaheyyāti** sākḥādīhi thakeyya. **Vivareyyāti** visadamukhaṃ katvā vivaṭaṃ kareyya. **Kummagganti** udakavanapabbatādīhi sanniruddhaṃ amaggaṃ. **Odaheyya okacaranti** tesam oke caramānaṃ viya ekaṃ dīpakamigaṃ ekasmiṃ ṭhāne ṭhapeyya. **Okacārikanti** dīgharajjuyā bandhitaṃyeva migiṃ.

Migaluddako hi araññaṃ migānaṃ vasanaṭṭhānaṃ gantvā “idha vasanti, iminā maggena nikkhamanti, ettha caranti, ettha pivanti, iminā maggena pavisanti”ti sallakkhetvā maggaṃ pidhāya kummaggaṃ vivarivā okacaraṇca okacārikaṇca ṭhapetvā sayam paṭicchannaṭṭhāne sattim gahetvā tiṭṭhati, atha sāyanhasamaye migā akutobhaye araññe carivā pānīyam pivivā migapotakehi saddhim kīlamānā vasanaṭṭhānasantikam āgantvā okacaraṇca okacārikaṇca disvā “sahāyakā no āgatā bhavissanti”ti nirāsaṅkā pavisanti, te maggaṃ pihitaṃ disvā “nāyam maggo, ayam maggo bhavissati”ti kummaggaṃ paṭipajjanti. Migaluddako na tāva kiñci karoti, pavitṭhesu pana sabbapacchimaṃ saṅkamaṃ paharati, so uttasati, tato sabbe uttasivā “bhayam uppannaṃ”ti purato oloketā udakena vā vanena vā pabbatena vā sanniruddhaṃ maggaṃ disvā ubhoḥi passehi aṅgulisāṅkhalikam viya gahanavanaṃ pavisituṃ asakkontā pavitṭhamaggeneva nikkhamituṃ ārabhanti. Luddako tesam nivattanabhāvaṃ ṇatvā ādito paṭṭhāya timsampi cattālīsampi mige ghātetī. Idaṃ sandhāya **evam hi so bhikkhave mahāmigasaṅgho aparena samayena anayabyasanaṃ āpajjeyyāti** vuttaṃ.

“Nandīrāgassetam adhivacanaṃ, avijjāyetaṃ adhivacanaṃ”ti ettha yasmā ime sattā avijjāya aññāṇā hutvā nandīrāgena ābandhitvā rūpāramaṇādīni upanīta vattadukkhassattiyā ghātaṃ labhanti. Tasmā Bhagavā okacaram nandīrāgoti, okacārikam avijjāti katvā dassesi.

Migaluddako hi ekadāpi tesam sākḥābhaṅgena sarīraṃ puñchivā manussagandham apanetvā okacaram ekasmiṃ ṭhāne ṭhapetvā okacārikam saha rajjuyā vissajjetvā attānaṃ paṭicchādetvā sattim ādāya okacarassa santike tiṭṭhati, okacārikā migagaṇassa caraṇaṭṭhānābhimukhī

gacchati. Taṃ disvā migā sīsāni ukkhipitvā tiṭṭhanti, sāpi sīsāni ukkhipitvā tiṭṭhati, te “amhākaṃ samajātikā ayan”ti gocaraṃ gaṇhanti. Sāpi tiṇāni khādantī viya saṅikaṃ upagacchati. Ārañṇiko yūthapatimigo tassā vātaṃ labhitvā sakabhariyaṃ¹ vissajjetvā tadabhimukho hoti.

Sattānañhi navanavameva piyaṃ hoti. Okacārikā ārañṇikassa migassa accāsannabhāvaṃ adatvā tadabhimukhīva pacchato paṭikkamitvā okacarassa santikaṃ gacchati, yattha yatthassā rajju laggati, tattha tattha khurena paharivā moceti, ārañṇiko migo okacaraṃ disvā okacārikāya sammatto hutvā okacare usūyaṃ katvā piṭṭhiṃ nāmetvā sīsāni kampaṇāni tiṭṭhati, tasmīṃ khaṇe sattiṃ jivhāya lehantopi “kiṃ etan”ti na jānāti, okacaropi sacassa uparibhāgena taṃ migāni paharituṃ sukhaṃ hoti, piṭṭhiṃ nāmeti. Sacassa heṭṭhābhāgena paharituṃ sukhaṃ hoti, hadayaṃ unnāmeti. Atha luddako ārañṇikaṃ migāni sattiyaṃ paharivā tattheva ghātetvā maṃsaṃ ādāya gacchati. Evameva yathā so migo okacārikāya sammatto okacare usūyaṃ katvā sattiṃ jivhāya lehantopi kiñci na jānāti, tathā ime sattā avijjāya sammattā andhabhūtā kiñci ajānantā rūpādīsu nandīrāgaṃ upagamma vaṭṭadukkhasattiyā vadhaṃ labhantīti Bhagavā okacaraṃ nandīrāgoti, okacārikaṃ avijjāti katvā dassesi.

Iti kho bhikkhave vivaṭo mayā khemo maggoti iti kho bhikkhave mayā imesaṃ sattānaṃ hitacaraṇena sammāsambodhiṃ patvā ahaṃ Buddhosmīti tuṅhībhūtena anisīditvā dhammacakkappavattanato paṭṭhāya dhammaṃ desentena vivaṭo khemo ariyo aṭṭhaṅgiko maggo, pihito kummaggo, Aññātakonḍaññādīnaṃ bhābapuggalānaṃ ūhato okacaro nandīrāgo dvedhā chetvā pātito, nāsītā okacārikā avijjā sabbena sabbāni samugghātītīti attano hitūpacāraṃ dassesi. Sesaṃ sabbattha uttānatthamevāti.

Papañcasūdanīyā Majjhimanikāyaṭṭhakathāya

Dvedhāvitakkasuttavaṇṇanā niṭṭhitā.

1. Sakapariyaṃ (Sī, Syā)

10. Vitakkasaṅghānasuttavaṇṇanā

216. **Evam me sutanti** Vitakkasaṅghānasuttam. Tattha **adhicittamanuyuttenā**ti dasakusalakamma pathavasena uppannam cittam cittameva, vipassanāpādaka-aṭṭhasamāpatticittam tato cittato adhikam cittanti **adhicittam**. **Anuyuttenā**ti tam adhiccittam anuyuttena, tattha yuttappayuttenāti attho.

Tatrāyam bhikkhu purebhattam piṇḍāya caritvā pacchābhattam piṇḍapātappaṭikkanto nisīdanam ādāya asukasmim rukkhamūle vā vanasaṅde vā pabbatapāde vā pabbhāre vā “samaṇadhammam karissāmi”ti nikkhamanto pi, tattha gantvā hatthehi vā pādehi vā nisajjaṭṭhānato tiṇapaṇṇāni apanento pi¹ adhiccittam anuyutto yeva. Nisīditvā pana hatthapāde dhovitvā pallaṅkam ābhujitvā mūlakammaṭṭhānam gahetvā viharantopi adhiccittam anuyutto yeva.

Nimittāti kāraṇāni. **Kālena kālanti** samaye samaye. Nanu ca kammaṭṭhānam nāma muhuttampi achaḍḍetvā nirantaram manasikātabbam? Kasmā Bhagavā “kālena kālan”ti āhāti? Pāḷiyam hi aṭṭhatimsa kammaṭṭhānāni vibhattāni, tesu bhikkhunā attano cittarucitam kammaṭṭhānam gahetvā nisinnena yāva kocid eva upakkilesa nuppajjati, tāva imesam nimittānam manasikāra kiccaṃ natthi. Yadā pana uppajjati, tadā imāni gahetvā citte uppannam abbudam nīharitabbanti dassento evamāha.

Chandūpasaṅhitāti chandasahagatā rāgasampayuttā. Imesam pana tiṇṇam vitakkānam khettaṅca ārammaṅca jānitabbam. Tattha chandūpasaṅhitānam aṭṭha lobhasahagatacittāni khettaṃ, dosūpasaṅhitānam dve domanassasahagatāni, mohūpasaṅhitānam dvādasapi akusalacittāni. Vicikicchā-uddhaccasampayuttacittāni pana dve etesam pāṭipuggalikaṃ khettaṃ. Sabbesampi sattā ceva saṅkhārā ca ārammaṇam, iṭṭhāniṭṭha-asamapekkhitesu hi sattesu ca saṅkhāresu ca te uppajjanti. **Aññampi nimittam manasi kātabbam kusalūpasaṅhitanti** tato nimittato aññam kusalanissitam nimittam manasikātabbam. Tattha **aññam nimittam** nāma chandūpasaṅhite vitakke sattesu uppanne asubhabhāvanā aññam nimittam nāma, saṅkhāresu uppanne aniccamanasikāro aññam

1. Upanentopi (Ka)

nimittam nāma. Dosūpasañhite sattesu uppanne mettābhāvanā aññaṃ nimittam nāma, sañkhāresu uppanne dhātumanasikāro aññaṃ nimittam nāma. Mohūpasañhite yattha katthaci uppanne pañcadhammūpanissayo aññaṃ nimittam nāma.

“Imassa hatthā vā sobhanā pādā vā”ti-ādinā nayena hi sattesu lobhe uppanne asubhato upasamharitabbaṃ. “Kimhi sāratto’si, kesesu sāratto’si, lomesu -pa- muttesu sāratto’si. Ayam attabhāvo nāma tīhi aṭṭhisatehi ussāpito, navahi nhārusatehi ābaddho, navahi maṃsapesisatehi anulitto, allacammena pariyonaddho, chavirāgena paṭicchanno, navahi vaṇamukhehi navanavutilomakūpasahasseehi ca asuci paggharati, kuṇapapūrito, duggandho, jeguccho, paṭikūlo, dvattimsakuṇapasañcayo, natthettha sāraṃ vā varaṃ vā”ti evaṃ asubhato upasamharantassa sattesu uppanno lobho pahīyati, tenassa asubhato upasamharaṇaṃ aññaṃ nimittam nāma hoti.

Pattacīvarādīsū sañkhāresu lobhe uppanne dvīhākārehi sañkhāramajjhataṃ samuṭṭhāpetīti Satipaṭṭhānavaṇṇanāyaṃ vuttanayena assāmikatāvakālikabhāvavasena manasikaroto so pahīyati, tenassa aniccato manasikāro aññaṃ nimittam nāma hoti. Sattesu dose uppanne pana āghātavinayakakacopamovādādīnaṃ vasena mettā bhāvetabbā, taṃ bhāvayato doso pahīyati, tenassa mettābhāvanā aññaṃ nimittam nāma hoti. Khāṇukaṇṭakatiṇapaṇṇādīsū pana dose uppanne “tvaṃ kassa kuppassi? Kim pathavīdhātuyā, udāhu āpodhātuyā? Ko vā panāyaṃ kuppatti nāma? Kim pathavīdhātu udāhu āpodhātu? ti-ādinā nayena dhātumanasikāraṃ karontassa doso pahīyati, tenassa dhātumanasikāro aññaṃ nimittam nāma hoti.

Mohe pana yattha katthaci uppanne—

“Garusaṃvāso uddeso, uddiṭṭhaparipucchanam,
Kālena dhammassavanam, ṭhānāṭṭhānavinicchayo.
Pañca dhammūpanissāya, mohadhātu¹ pahīyatī”ti—

1. Moho (Syā)

Ime pañca dhammā upanissitabbā. Garuṃ upanissāya viharanto hi bhikkhu¹ “ācariyo gāmapavesanaṃ anāpucchantassa pattakāle vattaṃ akarontassa ghaṭasata-udakāharaṇādidaṇḍakammaṃ karotī”ti yattappaṭiyatto hoti, athassa moho pahīyati. Uddesaṃ gaṇhanto pi² “ācariyo uddesakāle uddesaṃ aggaṇhantassa asādhukaṃ sajjhāyantassa ca daṇḍakammaṃ karotī”ti yattappaṭiyatto hoti, evampissa moho pahīyati. Garubhāvaniye bhikkhū upasaṅkamtivā “idaṃ bhante kathaṃ? Imassa ko attho”ti paripucchantopi kaṅkhaṃ vinodeti, evampissa moho pahīyati. Kālena Dhammassavanaṭṭhānaṃ gantvā sakkaccaṃ Dhammaṃ suṇantassāpi tesu tesu ṭhānesu attho pākaṭo hoti. Evampissa moho pahīyati. “Idamassa kāraṇaṃ, idaṃ na kāraṇaṃ”ti ṭhānāṭṭhānavinicchaye cheko hoti, evampissa moho pahīyati, tenassa pañcadhammūpanissayo aññaṃ nimittaṃ nāma hoti.

Api ca aṭṭhatimsāya ārammaṇesu yaṃ kiñci bhāventassāpi ime vitakkā pahīyanti eva. Imāni pana nimittāni ujuvipaccanīkāni paṭipakkhabhūtāni. Imehi pahīnā rāgādayo suppahīnā honti. Yathā hi aggim allakaṭṭhehipi paṃsūhipi sākhādīhipi pothetvā nibbāpentī yeva, udakaṃ pana aggissa ujuvipaccanīkaṃ, tena nibbuto sunibbuto hoti, evamimehi nimittehi pahīnā rāgādayo suppahīnā honti. Tasmā etāni kathitānī veditabbāni.

Kusalūpasamhitanti kusalanissitaṃ kusalassa paccayabhūtaṃ **ajjhattamevāti** gocarajjhattameva. **Palagaṇḍoti** vaḍḍhakī. **Sukhumāya āṇiyāti** yaṃ āṇim nīharitukāmo hoti, tato sukhumatarāya sārādāru-āṇiyā. **Oḷārikam āṇinti** candaphalake vā sārāphalake vā ākoṭitaṃ visamāṇim. **Abhinihaneyyāti** muggarena ākoṭento haneyya. **Abhinīhareyyāti** evaṃ abhinihananto phalakato nīhareyya. **Abhinivatteyyāti** “idāni bahu nikkhantā”ti³ ñatvā hatthena cāletvā

1. Viharato hi (Syā, Ka)

2. Gaṇhatopi (Syā, Ka)

3. Idāni ime bahū nikkhantāti (Syā, Ka)

nikkaḍḍheyya. Tattha phalakaṃ viya cittaṃ, phalake visamāṇī viya akusalavitakkā, sukhumāṇī viya aññaṃ asubhabhāvanādikusalanimittaṃ, sukhumāṇiyā oḷārikāṇinīharaṇaṃ viya asubhabhāvanādīhi kusalanimittehi tesāṃ vitakkānaṃ nīharaṇaṃ.

217. **Ahikuṇapenāti**-ādi atijegucchapaṭikūlakuṇapadassanatthaṃ vuttaṃ. **Kaṇṭhe āsattenāti** kenacid eva paccatthikena ānetvā kaṇṭhe baddhena paṭimukkena. **Aṭṭiyeyyāti** aṭṭo dukkhito bhaveyya. **Harāyeyyāti** lajjeyya. **Jiguccheyyāti** sañjātajiguccho bhaveyya.

Pahīyantīti evaṃ imināpi kāraṇena “ete akusalā dhammā sāvajjā dukkhavipākā”ti attano paññābalena upaparikkhato ahikuṇapādīni viya jigucchantassa pahīyanti. Yo pana attano paññābalena upaparikkhituṃ na sakkoti, tena ācariyaṃ vā upajjhāyaṃ vā aññataraṃ vā garuṭṭhāniyaṃ sabrahmacāriṃ saṃghattheraṃ vā upasaṅkamtivā ghaṇḍim paharivā Bhikkhusaṃghameva vā sannipātetvā ārocetabbaṃ. Bahūnaṃ hi sannipāte bhavissateva eko paṇḍitamanusso, svāyaṃ “evaṃ etesu ādīnavo daṭṭhabbo”ti kathessati, kāyavicchindanīyakathādīhi¹ vā pana te vitakke niggaṇhissatīti.

218. **Asati-amanasikāro āpajjitabboti** neva so vitakko saritabbo na manasikātabbo, aññavihitakena bhavitabbaṃ. Yathā hi rūpaṃ apassitukāmo puriso akkhīni nimīleyya, evameva mūlakammaṭṭhānaṃ gahetvā nisinnena bhikkhunā cittaṃhi vitakke uppanne aññavihitakena bhavitabbaṃ, evamassa so vitakko pahīyati, tasmim pahīne puna kammaṭṭhānaṃ gahetvā nisīditabbaṃ.

Sace na pahīyati, uggahito dhammakathāpabandho hoti, so mahāsaddena sajjhāyitabbo. Evampi ce aññavihitakassa sato so na pahīyati. Thavikāya muṭṭhipotthako hoti, yattha ca Buddhavaṇṇāpi dhammavaṇṇāpi likhitā honti, taṃ nīharitvā vācentena aññavihitakena bhavitabbaṃ. Evampi ce na pahīyati, thavikato araṇisahitāni nīharitvā

1. Kāyavicchandaniyakathādīhi (Sī)

2. Uggāṇhato (Syā, Ka)

“ayaṃ uttrāraṇī, ayaṃ adharāraṇī”ti āvajjantena aññavihitakena bhavitabbaṃ. Evampi ce na pahīyati, sipāṭikāṃ nīharitvā “idaṃ āraṇṇakāṃ nāma, ayaṃ pipphalako nāma, idaṃ nakhacchedanaṃ nāma, ayaṃ sūci nāmā”ti parikkhāraṃ samannānentena aññavihitakena bhavitabbaṃ. Evampi ce na pahīyati, sūciṃ gahetvā cīvare jīṇaṭṭhānaṃ sibbantena aññavihitakena bhavitabbaṃ. Evaṃ yāva na pahīyati, tāva taṃ taṃ kusalakammaṃ karontena aññavihitakena bhavitabbaṃ. Pahīne puna mūlakammaṭṭhānaṃ gahetvā nisīditabbaṃ, navakammaṃ pana na paṭṭhapetabbaṃ. Kasmā? Vitakke pacchinne kammaṭṭhānāmanasikāraṃ okāso na hoti.

Porāṇakapaṇḍitā pana navakammaṃ katvāpi vitakkaṃ pacchindimsu. Tatridaṃ vatthu—Tissasāmaṇerassa kira upajjhāyo Tissamahāvihāre vasati. Tissasāmaṇero “bhante ukkaṇṭhitomhī”ti āha. Atha naṃ thero “imasmiṃ vihāre nhāna-udakaṃ dullabhaṃ, maṃ gahetvā Cittalapabbataṃ gacchāhī”ti āha. So tathā akāsi. Tattha naṃ thero āha “ayaṃ vihāro accantasāṃghiko, ekaṃ puggalikaṭṭhānaṃ karohī”ti. So “sādhu bhante”ti ādito paṭṭhāya Saṃyuttakanikāyaṃ pabbhārasodhanaṃ tejodhātukasiṇaparikkammaṃ tīpi ekato ārabhitvā kammaṭṭhānaṃ appanaṃ pāpesi, Saṃyuttakanikāyaṃ pariyoṣāpesi, leṇakammaṃ niṭṭhāpesi, sabbaṃ katvā upajjhāyassa saññaṃ adāsi. Upajjhāyo “dukkhena te sāmaṇera kataṃ, ajja tāva tvaṃ yeva vasāhī”ti āha. So taṃ rattiṃ leṇe vasanto utusappāyaṃ labhitvā vipassanaṃ vaḍḍhetvā arahattaṃ patvā tattheva parinibbāyi. Tassa dhātuyo gahetvā cetiyaṃ akaṃsu, ajjāpi **Tissattheracetiyaṃ** paññāyati. Idaṃ pabbaṃ asatipabbaṃ nāma.

219. Imasmiṃ ṭhatvā vitakke niggaṇhituṃ asakkonto “idha ṭhatvā niggaṇhissatī”ti vitakkamūlabhedāṃ pabbaṃ dassento puna **tassa ce bhikkhaveti**-ādimāha. Tattha **vitakkasaṅkhārasaṅṭhānaṃ manasikātabbanti** saṅkharotīti **saṅkhāro**, paccayo, kāraṇaṃ mūlanti attho. Santiṭṭhati etthāti **saṅṭhānaṃ**, vitakkasaṅkhāraṃ saṅṭhānaṃ **vitakkasaṅkhārasaṅṭhānaṃ**, taṃ manasikātabbanti. Idaṃ vuttaṃ hoti, ayaṃ vitakko kiṃ hetu kiṃ paccayā kiṃ kāraṇā uppannoti vitakkānaṃ mūlaṅca mūlamūlaṅca manasikātabbanti. **Kim nu kho ahaṃ**

sīghaṃ gacchāmiti kena nu kho kāraṇena ahaṃ sīghaṃ gacchāmi? **Yaṃ nūnāhaṃ saṇikaṃ gaccheyyanti** “kiṃ me iminā sīghagamanena, saṇikaṃ gacchissāmi”ti cintesi. **So saṇikaṃ gaccheyyāti** so evaṃ cintetvā saṇikaṃ gaccheyya. Esa nayo sabbattha.

Tattha tassa purisassa sīghagamanakālo viya imassa bhikkhuno vitakkasamāruḷhakālo, tassa saṇikagamanakālo viya imassa vitakkacārapacchedakālo, tassa ṭhitakālo viya imassa vitakkacāre pacchinne mūlakammaṭṭhānaṃ cittotaraṇakālo, tassa nisinnakālo viya imassa vipassanaṃ vaḍḍhetvā arahattappattakālo, tassa nipannakālo viya imassa nibbānārammaṇāya phalasaṃpattiyā divasaṃ vītivattanakālo. Tattha “ime vitakkā kiṃhetukā kiṃpacchayāti? Vitakkānaṃ mūlamūlaṃ gacchantassa vitakkacāro sithilo hoti. Tasmim̐ sithilībhūte matthakaṃ gacchante vitakkā sabbaso nirujjhanti. Ayamatto Duddubhajātakena¹ dīpetabbo—

Sasakassa kira beluvarukkhamūle niddāyantassa beluvapakkaṃ vaṇṭato chijjivā kaṇṇamūle patitaṃ². So tassa saddena “pathavī bhijjati”ti saññāya uṭṭhahitvā vegena palāyi. Taṃ disvā purato aññepi catuppadaṃ palāyimsu. Tadā bodhisatto sīho hoti, so cintesi “ayaṃ pathavī nāma kappavināse bhijjati, antarā pathavībhedo nāma natthi, yaṃ nunāhaṃ mūlamūlaṃ gantvā anuvijjeyyan”ti. So hatthināgato paṭṭhāya yāva sasakaṃ pucchi “tayā tāta pathavī bhijjamānā diṭṭhā”ti. Saso “āma devā”ti āha. Sīho “ehi bho dassehī”ti. Saso “na sakkomi sāmī”ti. “Ehi re mā bhāyī”ti saṇhamudukena gahetvā gato saso rukkhasa avidūre ṭhatvā—

“Duddubhāyati bhaddante, yasmim̐ dese vasāmahaṃ.

Ahampetaṃ na jānāmi, kimetaṃ duddubhāyati”ti³—

Gāthāmāha. Bodhisatto “tvaṃ ettheva tiṭṭhā”ti rukkhamūlaṃ gantvā sasakassa nipannaṭṭhānaṃ addasa, beluvapakkaṃ addasa, uddhaṃ oloketvā vaṇṭaṃ addasa, disvā “ayaṃ saso ettha nipanno, niddāyamāno imassa

1. Daddabhajātakena (Sī)

2. Pati (Sī)

3. Khu 5. 104 piṭṭhe.

kaṇṇamūle patitassa saddena ‘pathavī bhijjati’ ti evaṃsaññī hutvā palāyī” ti ñatvā taṃ kāraṇaṃ sasaṃ pucchi. Saso “āma devā” ti āha. Bodhisatto imaṃ gāthamāha—

“Beluvaṃ patitaṃ sutvā, duddubhanti saso javi.
Sasassa vacanaṃ sutvā, santattā migavāhini” ti¹.

Tato bodhisatto “mā bhāyathā” ti migagaṇe assāsesi. Evaṃ vitakkānaṃ mūlamūlaṃ gacchantassa vitakkā pahīyanti.

220. “Imasmiṃ vitakkamūlabhedapabbe ṭhatvā vitakke niggaṇhituṃ asakkontena pana evaṃ niggaṇhitabbā” ti aparampi kāraṇaṃ dassento puna tassa ce bhikkhaveti-ādimāha.

Dantebhidantamādhāyāti heṭṭhādante uparidantaṃ ṭhapetvā. **Cetasā cittanti** kusalacittena akusalacittaṃ abhiniggaṇhitabbaṃ. **Balavā purisoti** yathā thāmasampanno mahābālo puriso dubbalaṃ purisaṃ sīse vā gale vā khandhe vā gahetvā abhiniggaṇheyya abhinippīleyya abhisantāpeyya, santattaṃ kilantaṃ mucchāparetaṃ viya kareyya, evameva bhikkhunā vitakkehi saddhiṃ paṭimallena hutvā “ke ca tumhe ko cāhan” ti abhibhavitvā “kāmaṃ taco ca nhāru ca aṭṭhi ca avasissatu sarīre upasussatu maṃsalohitan” ti² evaṃ mahāvīriyaṃ paggayha vitakkā niggaṇhitabbāti dassento imaṃ atthadīpikaṃ upamaṃ āhari.

221. **Yato kho bhikkhaveti** idaṃ pariyādānabhājanīyaṃ nāma, taṃ uttānatthameva. Yathā pana satthācariyo tiroraṭṭhā āgataṃ rājaputtaṃ pañcāvudhasippaṃ uggaṇhāpetvā “gaccha, attano raṭṭhe rajjaṃ gaṇha, sace te antarāmagge corā uṭṭhahanti, dhanunā kammaṃ katvā gaccha, sace te dhanu nassati vā bhijjati vā sattiya asinā” ti evaṃ pañcahipi āvudhehi kattabbaṃ dassetvā uyyojeti, so tathā katvā sakaraṭṭhaṃ gantvā rajjaṃ gahetvā rajjasiriṃ anubhoti, evamevaṃ Bhagavā adhiccittamanuyuttaṃ bhikkhuṃ arahattagaṇaṭṭhāya uyyojento “sacassa antarā akusalavitakkā uppajjanti, aññanimittapabbe ṭhatvā te niggaṇhitvā vipassanaṃ vadḍhetvā

1. Khu 5. 104 piṭṭhe.

2. Am 1. 52 piṭṭhe.

arahattaṃ pāpuṇissati, tatha asakkonto ādīnavapabbe ṭhatvā, tatrāpi asakkonto asatipabbe ṭhatvā, tatrāpi asakkonto vitakkamūlabhedapabbe ṭhatvā, tatrāpi asakkonto abhiniggaṇhanapabbe ṭhatvā vitakke niggaṇhitvā vipassanaṃ vadḍhetvā arahattaṃ pāpuṇissatī”ti imāni pañca pabbāni desesi¹.

Vasī vitakkapariyāyapathesūti vitakkavārapathesu ciṇṇavasī paṇṇavasīti vuccati. **Yaṃ vitakkaṃ ākaṅkhissatīti** idamassa vasībhāvākāradassanattamaṃ vuttaṃ. Ayaṃ hi pubbe yaṃ vitakkaṃ vitakketukāmo hoti, taṃ na vitakketi. Yaṃ na vitakketukāmo hoti, taṃ vitakketi. Idāni pana vasībhūtattā yaṃ vitakkaṃ vitakketukāmo hoti, taṃ yeva vitakketi. Yaṃ na vitakketukāmo, na taṃ vitakketi. Tena vuttaṃ “yaṃ vitakkaṃ ākaṅkhissati, taṃ vitakkaṃ vitakkessati. Yaṃ vitakkaṃ nākaṅkhissati, na taṃ vitakkaṃ vitakkessatī”ti. **Acchechi taṇhanti-**ādi Sabbāsavasutte vuttamevāti.

Papañcasūdaniyā Majjhimanikāyaṭṭhakathāya

Vitakkasaṅghānasuttavaṇṇanā niṭṭhitā.

Dutiyavaggavaṇṇanā niṭṭhitā.

Mūlapaṇṇāsāṭṭhakathāya paṭhamo bhāgo niṭṭhito.

Mūlapaṇṇāsaṭṭhakathāya paṭhamabhāge

Samvaṇṇitapadānaṃ anukkamaṇikā

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Akathamkathim	378	Ajjhositā	317
Akasiralābhī	166	Aññataro	185, 378
Akicchalābhī	166	Aññā	305
Akusalamūlaṃ	206	Aññāṇaṃ	229
Akusalaṃ	117	Aññenaññaṃ paṭicarati	370
Aṅgaṇaṃ	144, 371	Aṭṭiyeyya	394
Aggapiṇḍaṃ	150	Aḍḍhadaṇḍakehi	363
Agaruṃ katvā	380	Aṇḍajā	341
Agārasmā	115, 184	Aṇumattesu	160
Agāriyaṃ	184	Attanāva attānaṃ	73
Aggipāricariyāya	356	Attabyābādḥāyapi	384
Agocarō	84	Attamaṇā te bhikkhū	90
Acirapakkantassa	103	Attamanavācaṃ nicchāresi	156
Acelako	349	Antaraṭṭhakā	353
Acchariyaṃ	358	Antaradhānaṃ	221
Acchechi taṇhaṃ	90	Antarāpaṇaṃ	154
Acchaṃ	179	Antarāyikā	338
Ajjatagge	141	Antarena sinānena	181
Ajinakkhipaṃ ajinaṃ	350	Attavādappaṭisaṃyuttā	186
Ajjhattameva	393	Attavādupādānaṃ	224
Ajjhattaṃ	161	Atikkamma rūpe	166
Ajjhattaṃ kathamkathī	72	Atipāteyya	357
Ajjhogāhati	339	Atimānī	193
Ajjhositabbaṃ	379	Atimāno	111, 175

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Atirekadhammo	97	Aniyyāniko	320
Atisitvā	380	Anirākatajjhāno	161
Attukkaṃsanakā	120	Anukampitarūpā	133
Atha	113	Anukampaṃ upādāya	199
Athakhvāhaṃ	156	Anucaṅkamamāno	377
Atthavedaṃ	178	Anuttaraṃ	43, 56, 284
Atthassa ninnetā	380	Anuddhamṣessati	147
Atthi me attā	73	Anupaṭṭhitā	376
Attho	178	Anuppattasadattho	45
Adanto	197	Anuppannā ceva āsavā	
Adinnādāyī	191	uppajjanti	68
Andhakāre	134	Anuppanno vā kāmāsavo	69
Addhagato	356	Anupassanā nāma	161
Addhamāsikaṃ	350	Anupassī	249
Addhā	369	Anupādiyaṃ na paritassati	324
Addhānaṃ	71	Anumodeyyaṃ	151
Addhāvalepanā		Anuyutto	373
upakāriyo	362	Anuyogāya	372
Adhimattakasimānaṃ	354	Anuruddhapaṭiviruddhassa	316
Adhimattasatimanto	357	Anurodhapaṭivirodho	316
Adhimānikā	187	Anu vicaramāno	377
Anagāriyaṃ	115, 184	Anusenti	187
Anacchariyā	353	Anekadhātum	335
Anabhāvaṃ gameti	85	Anekavihitā	186
Anāgāmitā	305	Anekasataṃ khattiyapariṣaṃ	339
Anāthapiṇḍikassa ārāme	62	Anodhi	177
Anāpucchā	376	Appakasirena	357
Anāvaṭṭī kāmesu	367	Appaṭipuggalo	149
Anāvattidhammo	168	Appadakkhiṇaggāhī	370
Aniṅjamāno	369	Apadāne	371

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Appamattassa	130, 383	Abhinihaneyya	393
Aparapure	327	Abhinīhareyya	393
Aparitassaṃ	324	Abhibhū	37
Apariyādinnāyeva	357	Abhivaditabbaṃ	379
Aparisuddhakāyakammanta-		Abhivādetvā	185
sandosahetu	117	Abhisambuddho	57
Aparisuddhakāyakammantā	117	Abhihaṭaṃ	349
Aparisesaṃ ñāṇadassanaṃ		Abbhutaṃ	358
paṭijānāti	368	Amatassa dātā	380
Appassādā	367	Ayogakkhemakāmo	388
Apasādeti	370	Ayoniso	
Appassutā	193	manisikāro	66, 285
Appaharite	98	Ayaṃ vo amhākaṃ	
Apāpuritvā	154	anusāsanī	199
Apāyo	342	Araññavanapatthāni	116
Api panujjamānenāpi	376	Aratī	164
Appeva nāma passeyyaṃ	123	Arahatā	314
Abyāpādavitaṅko	383, 387	Arahatāṃ	185
Abbhatthaṃ gacchati	385	Arahaṃ Sammāsambuddho	44, 54
Abhi	122	Ariyadhammassa akovido	23
Abhikkantaṃ bho Gotama	133	Ariyā	118
Abhiceto	165	Alamariyañāṇadassana-	
Abhiṃjhā	173, 205	viseso	327, 355
Abhiṃjhālu	119, 192	Avakujjo papatāmi	355
Abhiññāya saṃvattati	108	Avhāyanti	117
Abhinanditabbaṃ	379	Avijjāsamudayā	228-229
Abhinibbhijja jāyanti	341	Avijjāsavo	70
Abhinibbhidāya	373	Avinipātadhammo	167
Abhininnāmesim	129	Avinīto	197
Abhinivatteyya	393		

Padānukkamo	Piṭṭhaṅko	Padānukkamo	Piṭṭhaṅko
[A]		[Ā]	
Asati-amanasikārā		Āturam	365
āpajjitabbo	394	Ādīnavam	317, 367, 386
Asantaṃ	285, 294	Ādhānaggāhī	194
Assaddhā	156, 193	Āpaṇā vā kammārakulā vā	145
Asampajānā	121	Āpādim	118
Asammāsambuddhappavedito	321	Āpādesim	351
Asamāhitā	121, 284	Ābādhikam	365
Asammohadhammo	127	Ābhatā	145
Asallīnam	128	Ābhassarā	36
Asātā	82	Āmakacchinno	355
Assādam	317	Āmisaññataram	98
Asāraddho	128	Āyasmantaṃyeva Sāriputtam	
Assāso	313	paṭibhātu	104
Asicammaṃ	362	Āyo	246
Assutavā puthujjano	21	Ārakkhādhikaraṇam	362
Asecanakam	382	Āraññako	351
Assosi kho	329	Āraddhavīriyā	194
Ahirikā	193	Ārambhadhātu	288
Aho vata	149	Ārā	387
Ahorattānusikkhinā	371	Ārāmacetiyaṇi	123
Ahosimnukho	71	Āvāsena suddhi	356
[Ā]		Āvuso bhikkhave	103
Ākaṅkheyya ce	161	Āsabham ṭhānam	332
Ākoṭeyya	386	Āsavasamudayā	229
Ācāmo	350	Āsavā	63
Ācāragocarasampannā	160	Āsavānam khayañāṇāya	131
Ājīvako	156	Āsavānam khayam	65
Ātappāya	372	Āsavā vighātapariḷāhā	80
Ātāpino	130, 384	Āhārena suddhi	354
Ātāpī	248, 249	Āhāram	210

Padānukkamo	Piṭṭhaṅko	Padānukkamo	Piṭṭhaṅko
[I]		[U]	
Icchāvacarānaṁ	147	Upaṭṭhitassatī	194
Iṭṭhā	361	Upadhāya	353
Iti	57	Upanāhī	193
Iti rūpassa atthaṅgamo	291	Upanāho	110, 173
Iti rūpassa samudayo	291	Uppannaṁ	164
Itthattāya	185	Upapatti	356
Indriyaparopariyattaṁ	335	Upapattidevā	35
Indriyesu aguttadvārā	157	Upapattiyā suddhi	356
Idaṁ dukkhanti yathābhūtaṁ pajānāti	304	Upasampajja	169, 184
Idaṁ vatvāna Sugato	102	Upasamāya saṁvattati	108
Idha 78, 105, 191, 245, 315		Upādāya	227
Idha bhikkhave bhikkhu	252	Upādānaṁ	316
Iddhipādaṁ	373	Upāsakaṁ maṁ	139
Idheva	310	Upekkhāvihārasmiṁ	354
Issā	110, 174	Uposatho sadā	183
Issukī	193	Ubbhaṭṭhako	350, 368
[U]		Ubhatobyūḷaṁ	362
Ukkaṭṭhāyaṁ viharati	12	Ubhatomukhā	275
Ukkāmukhaṁ	179	Ubho mahānāgā	157
Ukkujjeyya	134	Urattāḷiṁ	362
Ukkuṭṭikappadhānaṁ manuyutto	350	Ussolhī	373
Uṭṭhahato	362	[E]	
Uṭṭhāyāsanaṁ vihāraṁ pāvīsi	102	Ekattaṁ	39, 116
Uttarimanussadhammā	327	Ekantadukkhā	342
Udaracchaviṁyeva pariggaṇhāmi	355	Ekantasukhaṁ paṭisaṁvedi	369
Udarāvadehakaṁ	373	Ekamantaṁ	114
Uddhata	120, 193	Ekamidāhaṁ	367
Unnaḷā	156	Ekāgāriko	350
		Ekāgārikaṁ	363

Padānukkamo	Piṭṭhaṅko	Padānukkamo	Piṭṭhaṅko
[E]		[O]	
Ekā niṭṭhā	315	Opilāpessāmi	98
Ekāyanena maggena	343	Omuttenti	354
Ekālopiko	350	Ohaññeyya	386
Ekāhamataṃ	277	Oḷāriko	211
Ekāhikaṃ	350	Oḷigallam	83
Ekissāpi dattiyā	350	[Ka]	
Ekodiṃ karomi	387	Kiñcāpi	99
Ettāvatāpi	201, 219	Kaṇṭakāpassayiko	351
Etaparamo	354	Kaṇṭakataṭṭhānaṃ	83
Evametaṃ	187	Kaṇṭhe āsattena	394
Evameva kho	343, 345, 374	Kaṇaṃ	350
Evaṃ	4-6, 11	Katakaṇṭhāyo	44
Evambhāvī	277	Katakibbisam	183
Evam bhāveyya	305	Katahattho	357
Evam me sutam	91, 185	Katūpāsano	357
Evaṃsa te	80	Kataṃ kaṇṭhāyaṃ	132, 185
Evaṃsappadam	380	Kantāro	74
Esevanto	379	Kandati	362
[O]		Kabaracchāyo	344
Okappeyyuṃ	84	Kabaḷikāro āhāro	211
Okkamaṃ	105	Kammasamādānānaṃ	334
Okkhāyikā	355	Kalaṃ	379
Okāraṃ	386	Kalyāṇamittā	193
Oṭṭhapadaṃ	354	Kasirena samudāgacchanti	376
Oṭṭhubhanti	353	Kahāpaṇikaṃ	364
Odaheyya okacaraṃ	389	Kaḷopi	349
Odhi	177	Kāmaṇṭakko	383
Opakkamikā	368	Kāmahetu	362
Opapātikā	168, 341	Kāmanidāno	361

Padānukkamo	Piṭṭhaṅko	Padānukkamo	Piṭṭhaṅko
[Ka]		[Ka]	
Kāmā	360	Kusalaṁ	208
Kāmādhikaraṇo	361	Kusītā	121, 193
Kāmānaṁ ādīnavo	361	Ketabino	156
Kāmānaṁ pariññaṁ	359	Kesakambalaṁ	350
Kāmāsavo	70	Kodhanā	193
Kāmupādānaṁ	223	Kodho	110, 173
Kāmūpasamhitā	361	Ko nāmo ayaṁ	382, 358
Kāmesu tibbasārāgā	119	Kolavikaṭṭim	354
Kāmesumicchācāro	202	Kolodakaṁ	354
Kāyasaṅkhāro	227	Kaṁsapāti	145
Kāye	246, 373	[Kha]	
Kāyena phusitvā	166	Khajjamānaṁ	278
Kāyo passambhati	178	Khaṇḍadantaṁ	365
Kālakiriya	221	Khaṇḍiccaṁ	220
Kāḷasilāyaṁ	368	Khattiyaparisā	339
Kālena kālaṁ	391	Khayā	45, 56
Kālo	60, 221	Kharā	82
Kālaṁ karissati	145	Khalitasiraṁ	365
Kiṭṭhasambādhe	386	Khāṇum	83
Kittāvatā	104	Khīṇāsavo	44
Kissa hetu	154	Khemataṁ	183
Kimjātikā kimnidānā	324	Khemappatto	338
Kuṇapaṁ	154	Kho	14, 113
Kupito	150-151	Kho pana	177, 191
Kummaggaṁ	389	[Ga]	
Kulaputtā	115, 184	Gati	356
Kurūrakammantā	369	Gate	273
Kusaciraṁ	350	Gayā	182
Kusalamūlaṁ	209		
Kusalūpasamhitā	393		

Padānukkamo	Piṭṭhaṅko	Padānukkamo	Piṭṭhaṅko
[Ga]		[Ca]	
Garuṃ kareyyuṃ	152	Cetokhilā	372
Gahanam	74	Cetovimuttim paññāvimuttim	169
Gāthāhi ajjhabhāsi	182	Cetosamathanuyutto	161
Gāmaṇḍalā	353	[Cha]	
Gāmantasambhatesu	388	Chakaṇakāya	362
Gārayhā	106	Chaḍḍaniyadhammo	97
Gijjhakūṭe pabbate	368	Chandarāgavinayo	
Goṭṭhā	351	chandarāgappahānam	364
Gopānasivaṅkam	365	Chandasamādhi	373
Gorakkham	361	Chandūpasamhitā	391
[Gha]		Chambhī	120
Ghaṭato	362	Chavaṭṭhikāni	353
Ghammapareto	343	Chavadussāni	350
[Ca]		Chinnakukkucam	378
Cakkhukaraṇī	108	Jaṅghāvihāram	377
Cakkhundriyasamvarasamvuto	78	Jaññajaññam viya	154
Cakkhuvīñṇeyyā	361	[Ja]	
Cakkhubhūto	380	Jalābujā	341
Catukkuṇḍiko	351	Jāgarite	273
Cattam	177	Jāgariyam ananuyuttā	157
Candanikam	83	Jāṇussoṇī	113
Capalā	157	Jānatā	314
Cittasaṅkhāro	228	Jānato	65
Cittam abhininnāmesim	131	Jānam jānāti	380
Cittam samādhīyati	178	Jiguccheyya	394
Cuṇṇakajātāni	278	Jighacchā dubbalyaparetā	98
Cetaso vinibandhā	372	Jighacchitānampi	155
Cetiyaṇi	123	Jiṇṇo	356

Padānukkamo	Piṭṭhaṅko	Padānukkamo	Piṭṭhaṅko
[Ja]		[Ta]	
Jīvikatthā	156	Tathāgato	47
Jīvitaparikkhārā	376	Tathā tathā	385
Jegucchī	348	Tathābhūtaṃ tathābhūto vā	124
Jegucchismiṃ	351	Tadaṅgappahānaṃ	371
Jetavane	62	Tadanuttaraṃ	184
[Jha]		Tandi	288
Jhānavimokkhasamādhī-		Tanupattapalāso	344
samāpattīnaṃ	335	Tapo	373
Jhāyatha	199	Tasmātiha	56
[Ña]		Tasito	343
Ñāṇakaraṇī	108	Tassetāṃ pāṭikaṅkhaṃ	145
Ñāṇabhūto	380	Tāni sudaṃ āhāremi	352
Ñāṇabalaṃ	332	Tānassu	374
Ñātapariññā	30	Tiṇṇaṃ saṅgati passso	381
Ñāti	164	Titthakaro	313
Ñāyassa adhiḡamāya	241	Titthiyasāvaka	313
[Tha]		Titthiyā	313
Ṭhitiyā	211	Tibbā	82, 342
Ṭhānaṅca ṭhānato	334	Tiracchānayoni	342
Ṭhānaso hetuso	334	Tiritāni	350
Ṭhānaṃ kho panetaṃ vijjati	313	Tilakāhatagattaṃ	365
[Da]		Tivisākhāṃ	378
Ḍaṃsā	361	Tīraṇapariññā	30
[Ta]		Tesamahaṃ aṅṅataro	118
Takkapariyāhataṃ	328	Tesaṃ te kārā	163
Tatra	14, 107, 145	Tesaṃ tesaṃ	219
Tatonidānaṃ	381, 386	Taṃ	130, 360
Tathāgatabalāni	331	Taṃ kissa hetu	171, 318
		Taṃ brāhmaṇaṃ	378
		Taṃ suṇātha	19

Padānukkamo	Piṭṭhaṅko	Padānukkamo	Piṭṭhaṅko
[Tha]		[Da]	
Thaddhā	193	Dukkhaṃ	55, 75, 219
Thambho	111, 174	Duggati	342
[Da]		Duggati pāṭikaṅkhā	172
Daṇḍaparāyaṇaṃ	365	Duppaṭinissaggī	194
Daṇḍapāṇī	377	Duppaññā	121, 194
Daṇḍamolubbha	377	Duppavedite	320
Daṇḍādānaṃ	379	Dubbacā	193
Dantebhīdantaṃdhāya	397	Durakkhāte	320
Dabbajātiko	382	Durattavaṇṇamevassa	171
Dassanā pahātabbā	69, 77	Durabhiramaṃ	116
Diṭṭhadhammo	165	Durabhisambhavāni hi	116
Diṭṭhānugatiṃ āpajjati	115	Dūratopi	104
Diṭṭhigataṃ	74	Devaññataro vā	373
Diṭṭhimānānusayaṃ	209	Devā	341-342
Diṭṭhiyo	186	Desessāmi	19
Diṭṭhupādānaṃ	223	Dovacassakaraṇehi	370
Diṭṭheva dhamme	169, 184	Doso	107, 206
Diṭṭhaṃ maññati	38	[Dha]	
Divāyeva samānaṃ	125	Dhanukalāpaṃ sannayhitvā	362
Divāvihārāya	377	Dhammadesanā	358
Dīgharattaṃ	366	Dhammanvayo	331
Dukkaraṃ pavivekaṃ	116	Dhammapadabyañjanaṃ	358
Dukkakkhandho	361	Dhammapariyāyena	157
Dukkhadomanassānaṃ		Dhammabhūto	380
atthaṅgamāya	237	Dhammavicayo	87
Dukkhabahulā	344	Dhammavinaye	319
Dukkassantaṃ kareyya	168	Dhammavedaṃ	178
Dukkhitāṃ	365	Dhāressanti	104
Dukkhe aññānaṃ	228		

Padānukkamo	Piṭṭhaṅko	Padānukkamo	Piṭṭhaṅko
[Dha]		[Na]	
Dhiti	357	Nigrodhārāme	365
Dhuvo	74	Nibbānasaṃvattaniko	386
Dhammūpasañhitam		Nibbānāya saṃvattati	108
pāmojjaṃ	178	Nibbānassa sacchikiriyāya	241
Dhamme	85, 372	Nibbānaṃ	40, 108
Dhamme pasādo	314-315, 323	Nimittāni	391
Dhammo	135, 178	Nimaṃsalohitamakkhitam	278
[Na]		Nirayo	342
Na-ehibhaddantiko	349	Nirāmisā	283
Nacirasseva	184	Nillāḷetvā	378
Na ceva sampāyissanti	360	Nillopaṃ	363
Natiṭṭhabhaddantiko	349	Nivāsetvā	156
Natthi me attā	73	Nissaraṇaṃ	317
Nandī	55	Nissaraṇappahānaṃ	371
Nalāṭikaṃ	378	Nīvārā	350
Na sampāyati	371	Nu	104
Na saṃkittīsu	349	Nekavassagaṇikaṃ	351
Nāgā	157	Nekkhammavitakko	383, 387
Nānattaṃ	39	Nekkhammaṃ	386
Nānādhātuṃ	335	Netam mama	187
Nānādhimuttikataṃ	335	Nemantaniko	155
Nānāvihitassa	275	Nevassa taṃ hoti	
Nāparaṃ itthattāya	132, 185	antarāyāya	179
Nāmarūpasamudayā	226	[Pa]	
Nāmaṃ	226	Pakkhando	182
Nikkamadhātu	288	Pakkhandanti	362
Nikāmayamānā	120	Pakkhassa	123
Nikāmalābhī	165	Paccāropeti	370
Nikkujjitaṃ	134	Pacchimañca janataṃ	
Nikkhittadhurā	105	anukampamāno	133

Padānukkamo	Piṭṭhaṅko
[Pa]	
Pañcasu upādānakkhandhesu	291
Pajāpatim	35
Pajahati	175
Paccavekkhitabbaṃ	371
Paccupaṭṭhito	156
Paññānirodhiko	384-385
Paññāya sudiṭṭham hoti	367
Paññāveyyattiyena	356
Paññāvuddhiko	386
Paññāsampannā	194
Pañhapaṭibhānaṃ	358
Paṭikujjhivā	154
Paṭikoṭeyya	386
Paṭinissaggī	194
Paṭinissaṭṭham	177
Paṭipajjeyyūṃ	154
Paṭipadā	108, 334
Paṭippharati	370
Paṭibhāsi	353
Paṭilābho	222
Paṭisaṅkhānappahānaṃ	371, 375
Paṭisaṅkhā yoniso	78
Paṭisallānaṃ	185
Paṭhamena vayasā	356
Paṭṭhitagāvo	351
Paṇḍito	382
Paṇipāto	137
Paṇidhāya	373
Paṇītānaṃ cīvarānaṃ	153
Paṇṇasakaṭaṃ ereti	124

Padānukkamo	Piṭṭhaṅko
[Pa]	
Pattacīvaramādāya	156
Pantāni	116
Pathaviṃ pathavito	26
Pathaviṃ maññati	27
Pathaviṃ abhinandati	30
Paduṭṭhamanasāṅkappā	119
Padhānāya	372
Padhānasaṅkhārā	373
Pannarasavassuddesikā	364
Papañcasaññā	379
Papañcārāmo	316
Papātamaṃ	83
Pabbajitā	115
Pabbajanti	184
Pamattā	193
Pamādo	111, 175
Pamuditassa pīti jāyati	178
Payāgā	182
Parakkamadhātu	288
Parappavādā	311
Paramatapassī	348
Paramāya	356
Paramatthadesanā	142
Pariññātaṃ tassa	45
Pariññeyyaṃ tassa	43
Paripanthepi tiṭṭhanti	363
Parinibbāyī	168
Paripucchakatā	294
Paribbājakā	313

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Parimuccanti dukkhasmā	318	Passaṃ passati	380
Pariyantānaṃ	116	Passaddhakāyo sukhaṃ	178
Pariyādāya tiṭṭhanti	366	Passaddhi	87
Pariyāya	19	Passaddho kāyo	128
Pariyāyabhattabhojanaṃ	350	Pahitattassa	130, 384
Pariyodapeyyuṃ	146	Pahīnaṃ	177
Pariyodātaṃ	179	Pahoti	369, 380
Pariyonaddhā	145	Paḷāso	110, 174
Pariyosito	97	Pāṭikaṅkhaṃ	305
Pariññātantaṃ Tathāgatassa	54	Pātimokkhasaṃvarasaṃvutā	160
Parisati	327	Pātubhāvo	222
Parisāsu	332	Pāṇātipātī	191
Parisuddhakāyakammantā	118	Pāṇupetaṃ	141
Parisuddhaṃ	179	Pāṇaharā	82
Pare	191	Pāsādo	344
Palagaṇḍo	393	Pāpakammaṇaṃ	183
Palitakesaṃ	365	Pāpake akusale	85
Palipaṃ palipanno	197	Pāpikānaṃ icchānaṃ	370
Pallomaṃ	118	Pāpake mitte	84
Pavane	388	Pāpamittā	193
Pavattaphalabhojī	350	Pi	373
Pavattā	380	Piññāka	350
Pavivitto sudaraṃ homi	348	Piṇḍapātaṭṭikkanto	329
Pavedhamānaṃ	365	Piṇḍāya pāvisimsu	359
Paviveke	105	Piyo ca assaṃ	161
Pavārito	97	Pisuṇavācā	192, 203
Pavāheti	182	Pīti	87
Passatā	314	Pītigamaṇīyo	389
Passato	65	Pītimaṇassa	178
Passasukhaṃ	373	Pītisukhaṃ	367

Padānukkamo	Piṭṭhaṅko	Padānukkamo	Piṭṭhaṅko
[Pa]		[Ba]	
Puggalā	142	Bahussutā	193
Puññasammata	182	Byañjanchi	382
Pubbaṅgamo	115	Byañjanam	155
Pubbaṅhasamayaṃ	156	Byantameva nam akāsim	385
Pubbeva sambodhā	117, 367	Byantīkaroti	85
Purakkhatvā purakkhatvā	150	Brahmacakkaṃ	333
Purāṇayānakāraputto	156	Brahmacariyapariyosānam	184
Purisaṃ -pa- samudācaranti	381	Brahmacariyaṃ 132, 185, 346, 373	
Pettivisayo	342	Brahmacārī	192
Pesuññaṃ	379	Brahmabhūto	380
Pūjeyyuma	152	Bālo	182
Pūtikuṇape vā	341	Bāhukaṃ	182
Pūtimūlāni	355	Bāhulikā	105
Paṃsukūlāni	350	Bāḷhagilānānam	365
[Pha]		Byāpannacittā	119, 192
Pharusavācā	192, 203	Byāpādo	173, 205
Phassapaññattim		Byāpādavitakko	383, 385
paññapessati	381	Brāhmaṇo	113
Phusitaggaḷaṃ	344	Bimbisāro	369
[Ba]		Bījayamāno	358
Balavā puriso	397	Bujjhati	86
Balaṃ	313	Brūhetā suññāgārānam	161
Bahalapattapalāso	344	Beluvalaṭṭhikāya	377
Bahiddhā kathaṃ apanāmeti	370	Bojjhaṅgesu	293
Bahiddhā vā	254, 257	Bodhi	56
Bahinagare	327	Bodhisattasseva sato	117
Bahukāro	115	[Bha]	
Bahujanasukhāya	127	Bhagavā	11-14
Bahupāyāsā	367	Bhagavantaṃ abhivādetvā	185
Bahulamakāsi	385		

Padānukkamo	Piṭṭhaṅko	Padānukkamo	Piṭṭhaṅko
[Bha]		[Bha]	
Bhaggesu	370	Bhimsanakāni	123
Bhattagge	150	Bhimsanake	353
Bhattasammado	288	[Ma]	
Bhadante	16	Makasa	361
Bhadrena yobbanena	356	Makkho	110, 173
Bhabbo	373	Maggo	75, 109, 236
Bhayadassāvī	160	Maggo paṭipadaṃ	342
Bhayabheravaṃ	117	Maggaṃ ācikkheyya	134
Bhavataṇhā	224	Macchariyaṃ	174
Bhavaditṭhi	317	Maccharī	193
Bhavasamyojanāni	45	Maccheraṃ	111
Bhavābhava	378	Mado	111, 175
Bhavāsavo	70	Madhupiṇḍikaṃ	382
Bhavantaṃ Gotamaṃ saraṇaṃ		Manasikaraṇīye dhamme	69
gacchāmi	135	Manasikaroto	69
Bhāvanānayo	112	Manasikarotha	20
Bhāvanīyo	161	Manāpo	161
Bhāveti	88	Manussā	342
Bhāsissāmi	20	Mano	116
Bhikkhave	19, 21, 245	Manaṃ	381
Bhikkhavo	15	Mamaṃ uddissa	116
Bhikkhupātimokkhaṃ	371	Masāṇāni	350
Bhiyyo	118	Mahapphalā mahānisamsā	163
Bhīrukajātikā	120	Mahallako	356
Bhuttāvī	97	Mahācundo	185
Bhūte abhinandati	34	Mahānāgā	158
Bhūte bhūtato sañjānāti	33	Mahāpaṇṇo	382
Bheravaṃ	117	Mahābhūtāni	227
Bhesakaḷāvane	370	Mahāvanaṃ	377
Bhojane amattaṇṇuno	157		
Bhimsanakatasmiṃ	352		

Padānukkamo	Piṭṭhaṅko
[Ma]	
Mahāvikaṭabhojanasmim	352
Mānasam	42
Mānābhisamayā	90
Māno	111-112
Māneyyūm	152
Mā pacchā vippaṭisārino ahuvattha	199
Mā pamādattha	199
Mā me cittam ūhaññi	387
Māyā	111, 174
Māyāvī	193
Māro	35
Migadāye	370
Micchāññāṇī	192
Micchādiṭṭhi	205
Micchādiṭṭhī	192
Micchāsati	192
Micchāsāṅkappā	192
Micchāvimuttī	192
Middhasukham	373
Mīyamāno	361
Mukhanimittam	371
Mukharā	157
Muni	353
Muṭṭhassatī	121, 194
Muttācāro	349
Muttam	39, 177
Muddā	361
Muddhāvasittena	356
Mūlam	13, 55

Padānukkamo	Piṭṭhaṅko
[Ma]	
Musāvādī	192
Musāvādo	203, 379
Mūḷhassa	134
Moghapuriso	329
Mogham	362
[Ya]	
Yañhissa	79-80, 83-84
Yaññena	356
Yato	176-177
Yato kho	200
Yato ca kho	324
Yatonidānam	379
Yathā	130, 360
Yathā ca	285
Yathā tam	320
Yathābhūtam	187, 367
Yathābhūtam pajānāti	334
Yathābhūtam yāthābhūtaṣṣa	124
Yathā vo khomeyya	369
Yathodhi kho	177
Yadidaṁ	242
Yadi nīlakāya	171
Yāva udakabindumhipi	351
Yassa	69
Yassa ca khvāssa atthāya	328
Yānakāraputto	156
Yāvakīvañca me	352
Yāvajīvaṁ	376
Yāvadattho	97

Padānukkamo	Piṭṭhaṅko	Padānukkamo	Piṭṭhaṅko
[Ya]		[La]	
Yāvadattham	373	Lahukena asanena	357
Yāvadeva	255	Lābhasakkārasilokaṃ	120
Yāvassu me Sāriputta	355	Lūkhabhāvaṃ	182
Yā sīlesu paripūrakāritā	320	Lūkho sudam homi	348
Yuvā	356	Lokyasammata	182
Yogakkhemassa	373	Lokkhasammata	182
Yoni	341	Lokānukampāya	127
Yoniso manasi-		Lokadhammā	366
kāro	66, 286	Lohitapāṇino	368
Yo hi koci bhikkhave	305		
Yaṃ aññatitthiyā	313	[Va]	
Yaṃ idhekaccassa	147	Vajjesu	228
Yamṇūnāhaṃ	98	Vacīsaṅkhāro	160
Yaṃ bhikkhave vedanā		Vatṭanāvaḷi	355
aniccā	365	Vañijjā	361
[Ra]		Vattā	380
Raṅgajāte	171	Vataṃ	373
Racayitvā	154	Vantaṃ	177
Rājagahaṃ	155	Vado	73
Rajanīyā	361	Vadhukā	154
Rajāpathe	145	Vanakammikaṃ	351
Rajojallaṃ	351	Vanacetiyaṇi	123
Rati	164	Vanapattham	116, 376
Rattimyeva samānaṃ	125	Vanasaṇḍe	327
Rāgadosamohānaṃ		Vayo anupatto	356
tanuttā	167	Valinaṃ	365
Rāgavirāgo	135	Vasavattirājā	35
Rājaporisaṃ	361	Vassaṃvuṭṭhapavāraṇā	97
Rāhumukhaṃ	363	Vālakambalaṃ	350
Rissamāno	361	Vikiṇṇavācā	157
Rukkhacetiyaṇi	123		

Padānukkamo	Piṭṭhaṅko	Padānukkamo	Piṭṭhaṅko
[Va]		[Va]	
Vikkhittam	284	Vivekanissitam	88
Viggaham	379	Vivekam nānusikkhanti	104-105
Vighātapakkhiko	385	Visamalobho	173
Vicikicchāṭṭhānīyā	289	Visuddhidevā	35
Vicikicchati	372	Visūkam	74
Vicikicchī	193	Viharati	43, 248-249
Vicitakāḷakam	155, 179	Vihimsakā bhavissanti	191
Vijambhitā	288	Vihimsāvitakko	383, 385
Vijjā	130	Vītaccikānam vītadhūmanam	343
Vijjam uppādetvā	210	Vītarāgam	284
Viññātam	39	Vītināmeyyam	98
Viññūnam	380	Vīmaṃsānucaritam	328
Vitakkasaṅkhārasaṭṭhānam	395	Vīriyam	87
Viddasuno	316	Vuddho	356
Vinipāto	342	Vuddhim	372
Vinīlakam	277	Vusitam	132, 185
Vineyya	248, 250	Vusitavā	44
Vinodameva	385	Vūpakatṭho	184
Vipassanāya samannāgato	161	Vedanā	225-226, 250
Vipubbakajātam	277	Vedanākāyā	225
Vipphanditam	74	Vedeyyo	73
Vibbhantacittā	121	Vedo	178
Vibhavataṇhā	224	Veramaṇī	206
Vibhavadiṭṭhi	317	Verim	183
Vimuccittha	131	Vesārajjāni	338
Vimuttasmiṃ vimuttamiti		Vesāliyam	325
ñānam	131	Vehapphalā	37
Vimokkhā	166	Vo	19, 118, 191
Vivareyya	134	Vodānam	335
Vivattayi samyojanam	90	Vodānapakkham	386
Vivādam	379		

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Sa-upādānassa	316	Santā	166
Sa-uttaraṃ	284	Santā ete vihārā	190
Sa-uttaracchaddo	344	Santike	104
Sakadāgāmi	168	Sandacchāyo	344
Sakkareyyuṃ	152	Salomahaṃsāni	123
Sakkāro	120	Sassatisamaṃ	74
Sakideva imaṃ lokam		Sassato	74
āgantvā	168	Sahadhammikā	314-315
Saṅkhāpi	376	Sahadhammikesu	323
Saṅkhānam	361	Sahadhammena	338
Saṅkhāro	227	Sahadhammacārino	314
Saccato thetato	73	Sahasā appaṭisaṅkhā	369
Saññā	226, 378	Sākacchā	340
Saṭṭhā	156, 193	Sākabhakkho	350
Saṇḍasaṇḍacārini	349	Sāṅgaṇo	144-145
Sattanikāye	220	Sāṭṭheyyaṃ	111, 174
Sati	356	Sāṇāni	350
Satikaraṇīyameva	388	Sātaccāya	373
Satipaṭṭhānā	242	Sāthalikā	105
Satimā	248, 250	Sādhikaporisā	343
Sati vā upādisese	305	Sādhu vata	157
Satisambojjhaṅgaṃ	293	Sādhukaṃ manasi karoṭha	19
Satthari kaṅkhati	372	Sāmākabhakkho	350
Satthari pasādo	314, 322	Sāmisā	283
Satthā dānaṃ	379	Sāyatatiyakam	351
Saddahāno amaccharī	183	Sāraṇīyam	114
Sadā phaggū	183	Sārambho	111, 174
Saddhā	115-116	Sāro	380
Sadevake	360	Sālarājā	13
		Sālīnam	179

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Sālohitā	164	Suhito	97
Sāvattihī	62	Sekkho	42
Sikkhito	357	Seniyo	369
Sippaññataram	361	Seyyathāpi	373, 388
Siloko	120	Seyyasukham	373
Sivathikāya chaḍḍitam	277, 365	Seyyam	351
Sītassa purakkhato	361	Sokaparidevānam	
Silabbatupādānam	224	samatikkamāya	237
Sīlasampanno	338	Sotatto	353
Sīlasamvaro	23	Sotāpanno	166
Sīlesu	315	Sobbham	83
Sīlesvevassa paripūrakārī	161	Sovatthiko	389
Sīlesu paripūrakāritā	314	Sosinno	353
Sīlam	158, 373	Saṅkiliṭṭhacitto	145
Sīhanādam	313	Saṅkiliṭṭham malaggahitam	171
Sukhabahulā vedanā	344	Saṅkilesam	335, 386
Sukhavihāritaro	369	Saṅkhittam	284
Sukhumāya āṇiyā	393	Saṅghe kaṅkhati	372
Sukham vedanam	279	Saṅgho	135, 373
Suññā	311	Saṃpatāmi	351
Suññāgārāni	199	Saṃyojanāni	166
Sutte	273	Saṃvaro	64
Sutam	5-8, 11-12, 39	Saṃsārena suddhi	356
Sudam	352	Saṃsāro	356
Suddhassa	183	Saṃsedajā	341
Subhakiṇhā	37	[Ha]	
Subhagavane	12	Haṭam	350
Subharatāya	100	Hatthapajjotikam	363
Suvacā	193	Hatthāpalekhano	349
Susumāragire	370	Hatthaṭṭhikam	278

Padānukkamo	Piṭṭhaṅko	Padānukkamo	Piṭṭhaṅko
[Ha]		[Ha]	
Haranti maññe	116	Hitāya	127
Harāyeyya	394	Hitesinā	199
Have	117	Hirimanā	193
Hi	104	Hīnavīriyā	121

Mūlapaṇṇāsaṭṭhakathāya paṭhamabhāge

Nānāpāṭhā

Paṭhamo mūlapāṭho, Sī = Sīhaḷapotthakaṃ, Syā = Syāmapotthakaṃ,
Kaṃ = Kambojapotthakaṃ, I = Inḡalisapotthakaṃ, Ka = kesuci
Marammapotthakesu dissamānapāṭho, Ka-Sī = kesuci Sīhaḷapotthakesu
dissamānapāṭho, Ṭṭha = Aṭṭhakathā.

Mūlapaṇṇāsaṭṭhakathāya

Nānāpāṭhā	Piṭṭhaṅkā
[A]	
Agatim̄ = Agatipatham̄ (Sī)	238
Aggakulassa = Aggakulikassa (Sī, Syā, Ka)	115
Agorasamaṃsatāya = Agorasatāya (Ka, Sī)	
Agocaratāya (Ka-Sī) Abhogamaṃsatāya (Syā)	216
Ajjuṇena = Ajjhanena (Syā, Ka)	329
Ajjhosannā = Ajjhāpannā (Sī)	22
Attapariccāgo = Dhanapariccāgo (Syā)	308
Atibhaddako = Atigaruko (Syā)	382
Adhiṭṭhāsi = Aṭṭhāsi (Ka)	207
Adhimattakasimānaṃ = Adhimattakasamādānaṃ (Syā, Ka)	384
Adhimuccantoyeva = Amuñcantoyeva (Sī, Syā)	43
Adhobhāgaṅgamanīyāti = Adhobhāvaṅgamanīyāti (Sī, Syā)	196
Ananuyuttanti = Anupaddutanti (Sī, Syā)	43
Apadisitabbā = Avadisitabbā (Sī, Syā)	95
Abhikantaṃ = Atikantaṃ (Sī)	134
Ariyakoṭiyavāsī Mahādattathero = Pāṭiyakoṭiyavāsī	
Mahādattathero (Ka)	165
Ariyabalāvahaṃ = Ariyaphalāvahaṃ (Sī, Syā)	333

Nānāpāṭhā

Piṭṭhaṅkā

[A]

Aruṇuggaṃ = Aruṇaggaṃ (Sī)	8
Aropimaṃ = Aropitaṃ (Syā, Ka)	377

[Ā]

Ācikkhantena = Āvikarontena (Sī, Syā)	135
Ādiyā = Ādissā (Sī, Syā)	95
Ābhujatīti = Ābhuñjatīti (Sī)	272
Āmukkamaṇikuṇḍalā = Āmuttamaṇikuṇḍalā (Sī, Syā, Ka)	340
Āyatanamaccho = Ānandamaccho (Sī, Syā)	174
Āyācāpentopi = Yācāpentopi (Sī)	380

[I]

Ittarāni = Itarāni (Sī)	267
Itthabhāvāya = Itthambhāvāya (Sī, Syā)	132

[U]

Uṭṭhahati = Upaṭṭhahati (Sī)	387
Uttaruttari = Uttaruttariṃ (Sī)	255
Uttānīkaromīti = Uttāniṃ karomīti (Ka)	57
Udakatumbato = Udakakumbhato (Syā)	273
Udakapupphulaḷako = Udakabubbūlaḷako (Sī, Syā)	385
Uddhamyeva = Ubbhamyeva (Sī) Ubbhāyeva (Syā)	368
Uparipatantaṃ = Uparipatanaṃ (Ka)	204
Uparibhāgaṅgamanīyataṃ = Uparibhāvaṅgamanīyataṃ (Sī, Syā)	196
Uparīkato = Upanītato (Sī, Syā)	239
Uracakke = Khuracakke (Syā, Ka)	333
Usūyato = Usūyāyato (Syā)	292

[E]

Etarahi kathāya = Antarākathāya (Sī, Syā, Ka)	59
---	----

Nānāpāṭhā

Piṭṭhāṅkā

[O]

Okkantitvā = Okkhanditvā (Sī)	243
Otāraṃ = Okāraṃ (Sī, Syā, Ka)	386
Ovādiyamānattherānaṃ = Ovāditattherānaṃ (Ka)	188
Osajjeyyanti = Aggahesinti (Sī, Syā, Ka) Saṃ 1. 85 piṭṭhe.	366

[Ka]

Kakkārikaṃ = Kakkārukaṃ (Sī, Syā, Ka)	323
Kaṭacchunā pahāraṃ = Kaṭacchupahāraṃ (Ka)	349
Kaṇḍappamaṇā = Kaṇṭhappamaṇā (Sī, Syā, Ka)	357
Kampi maññe = Tampi aññe (Ka)	105
Kammaṃ vā phalena = Kammaphalena saṃyojenti yasmā (Ka)	166
Kāyavicchindaniyakathādīhi = Kāyavicchandaniyakathādīhi (Sī)	394
Kāḷasiṅgālo = Kāṇasigālo (Sī, Syā)	321
Kurūsu janapade = Kurujanapade (Sī, Syā, Ka)	230
Ketabinoti = Keṭubhinoti (Bahūsu)	156
Kontaputtā = Koṇḍaputtā (Ka)	341

[Kha]

Khajjupasaṃghānaṃ = Khajjupasaṅkhānaṃ (Sī)	309
Khipamānaṃ = Khipiyamānaṃ (Sī), Pakkhipayamānaṃ (Syā), Pakkhipamānaṃ (Ka)	281
Khettatā = Sukhettatā (Syā, Ka)	312
Khettatāya = Sukhettatāya (Syā, Ka)	312

[Ga]

Gaggarassarāpi = Baddhassarāpi (Sī), Gambhīrassarāpi (Syā)	340
Gacchanto = Gantā (Sī, Syā) Ṭikā oloketabbā.	256
Gatapaccāgatikavattaṃ = Gatapaccāgatavattaṃ (Ka)	262
Gāmaṇḍalāti = Gomaṇḍalāti (Sī, Syā, Ka)	353
Gūthādī viya = Sāva (Sī, Syā)	41
Gopayitāti = Gopāyitāti (Syā) Gopāpayitāti (Ka)	127
Gopālakakulaṃ = Gopakulaṃ (Syā) Gopakakulaṃ (Sī)	325

Nānāpāṭhā

Piṭṭhaṅkā

[Gha]

Ghasanti = Gilanti (Sī, Syā) 157

[Ca]

Cittacāraṃ = Cittavāraṃ (Syā) 18

Cūlasīhanādasuttaṃ = Cullasīhanādasuttaṃ (Syā) 307

Cetovinīvaraṇasappāyā = Cetovivaraṇasappāyā (Ka) 101

Cokkhacokkhaṃ = Mokkhamokkhaṃ (Syā) 154

[Cha]

Chakaṇākāyāti kuthitagomayena = Pakkaṭṭhiyāti kaṭhitagomayena (Sī)

Chakaṇāṭiyāti

kuṭṭhitagomayena (Syā) 362

[Ja]

Jāleri = Pajjāleri (Sī) 363

Jīvanakammaṃ = Jīvitakappaṇaṃ (Ka) 361

Jīvamānāpi = Jīvantīpi (Syā) 233

[Ta]

Taṇhāvicaritāni = Taṇhānaṃ vicaritāni (Sī) 224

Tadatthāya = Tathattāya (Sī, Syā) 96

Tantiyā = Pariyattiyā (Syā, Ka) 58

Tappaccanīyakilese = Tappaccanīkakilese (Syā) 109

Talaṅgara = Vāḷaṅgara (Ka) 188

Tātā = Hantā (Sī, Syā) 135

Tintena = Tattena (Ka) 362

Tirokkhakāle = Parokkhakāle (Syā) 153

[Tha]

Theravaṃsadīpānaṃ = Theravaṃsappadīpānaṃ (Syā) 2

Nānāpāṭhā

Piṭṭhaṅkā

[Da]

Dassento = Desento (Sī, Syā)	11
Diṭṭhadhammassa sukhavihāranti = Diṭṭhadhammassa sukhavihāraṃ diṭṭhadhammasukha- vihāranti (Sī, Syā)	133
Duddubhajātakena = Daddabhajātakena (Sī)	396

[Dha]

Dhane dhañṇe = Thane thañṇaṃ (Sī)	39
Dhātā = Dhatā (Sī, Syā)	8

[Na]

Natumhākavaggaṃ = Natumhākavākyam (Dī-Tṭha 2. 340 piṭṭhe).	239
Nānāgāhamattaṃ = Nānāgāhappattaṃ (Sī, Syā)	379
Nānāvādamattaṃ = Nānāvādapattaṃ (Sī, Syā)	379
Niṭṭhite = Nimmite (Sī)	370
Nibbattetvā = Vinivaṭṭetvāva (Sī)	282
Niyyātentō = Niyyādentō (Ka)	96
Nirassati = Nidassati (Ka)	83
Niraṃkatvā = Nirākatvā (?)	161
Nissineho = Nisneho (Sī)	174
Nīharimeva = Nīharitameva (Syā, Ka)	385
Neyyapuggalassa = Veneyyapuggalassa (sabbattha)	305

[Pa]

Pakkuthivā = Pakkaṭṭhitvā (Sī) Pakkhipivā (Syā)	363
Pañcātapatappanaṃ = Pañcātapatappanaṃ (Sī)	317
Pajahimeva = Chadditameva (Syā, Ka)	385
Paṭapaṭāyantā = Taṭataṭāyantā (bahūsu)	265
Paṭapaṭāyati = Taṭataṭāyati (bahūsu)	329
Paṭisallo = Paṭimallo (Sī, Syā)	149
Paṇipātenāti = Pāṇipātenāti (Syā, Ka)	136

Nānāpāṭhā

Piṭṭhānkā

[Pa]

Patikuṭṭho = Patikiṭṭho (Sī)	140
Patitaṃ = Pati (Sī)	396
Patiṭṭhito = Pahito (Sī, Syā)	231
Pabbatakandarasarasākhā = Pabbatakandarapadarasākhā (Sī, Syā)	102
Pabbam pabbam sandhi sandhi odhi odhi = Pabbapabbam sandhisandhim odhi-odhim (Sī)	265
Pariccātipi = Paṭiccātipi (Sī, Syā)	199
Paribandhe = Paripanthe (Sī, Syā)	376
Pasaṭacittaṃ = Pasavacittaṃ (Syā)	284
Pahīnakampi puna pacchato vāvattatīti = Pahīnakaṃ puna pucchanto vaṭṭatīti (Ka)	366
Pāṭibhogam = Pātibhogam (Ka)	238
Pāṭikaputtadamanādīni = Pāṭikaputtadamanādīni (Syā)	309
Pāpappahānam = Pāpappavāhanam (Sī)	181
Pāribandhike = Pāripanthike (Sī, Syā)	166
Pītamallatthero = Dīpamallatthero (Syā)	239
Puṭoḷi = Mūtoḷi (Sī, Syā)	275
Pupphakamuṭṭhim = Puthukamuṭṭhim (Sī, Syā)	323

[Pha]

Phuṭṭhagatto = Phuṭitagatto (Sī)	231
----------------------------------	-----

[Ba]

Balavantakhādītā = Dubbalakhādakā (Sī, Syā)	385
Bālhaso = Bāliṣo (Sī, Syā)	41
Bondhissa = Mandassa (Sī) Bimbassa (Syā)	41

[Bha]

Bhikkhāya = Piṇḍāya (Sī)	326
Bhinnassarāpi = Chinnassarāpi (Sī)	340
Bhūmadevā = Bhummadevā (Sī, Syā)	341
Bhojanavelāya = Bhojanasālāya (Sī, Syā)	126

Nānāpāṭhā

Piṭṭhaṅkā

[Ma]

Maṅgulabhattā = Maṅkulabhattaṃ (Ka) Maṅkuṇabhattā (Sī)	199
Madhurarasam	
dhammadesanam = Madhurasaram dhammadesanam (Sī)	
Madhurasaddhammadesanam (Syā)	115
Manussabhāvo = Manussattabhāvo (Syā)	231
Mamāyantā = Dhanāyantā (Ka)	303
Mammāni tudivā = Mammāni bhindivā tudivā (Sī)	118
Mahāvihāre nivāsīnam = Mahāvihārādhivāsīnam (Sī)	
Mahāvihāravāsīnam (Syā)	2
Mahāvāḷo = Mahāsappo (Syā)	208
Mukhe bandham = Mukhabandhanam (Sī)	58
Mudhāpasanno = Muddhappasanno (Sī, Syā)	295
Morajikavatthu = Morajātakavatthu (Ka)	322

[Ya]

Yathāpi = Yathā hi (Sī)	253
Yojanānaye = Yojanānayena (Syā)	31
Yvāham bhāvanīyassa garuno = Sāham Buddharakkhitattherassa (Ka)	207

[Ra]

Ratanadhammūracakkādīsu = Ratanadhammakhuracakkādīsu (Ka)	333
Rissamānoti ruppamāno = Rissamānoti kampamāno (Syā, Ka)	
Rissamānoti pīḷiyamāno ruppamāno	
ghaṭṭiyamāno (Cūḷani-Ṭṭha)	361
Romanthayamāno = Romatthayamāno (Syā, Ka)	120

[La]

Lañchetvā = Lañcetvā (Syā)	325
Lāmakadhammam = Lāmakakammam (Ka)	191
Loṇasovīrakam = Loṇasuvīrakam (Sī)	
Loṇasocirakam (Syā)	350

Nānāpāṭhā

Piṭṭhānkā

[Va]

Vaggulivatam = Vaggulivattam (Syā)	317
Vañcaniyaṭṭhena = Paccanikaṭṭhena (Sī, Syā)	228
Vattapaṭipattim = Vattapaṭivattam (Sī, Syā)	23
Vanayaṭīti = Vanatīti (Ka)	12
Vallitvā = Cāletvā (Sī) Valitvā (Syā)	363
Valibhaṅgam = Valibhaṅge (Ka)	378
Vicikiccho = Vicikicchī (Sī, Syā)	72
Vijambhita = Pavijumbhita (Sī)	16
Vibhūtākāro = Vibhūtakālo (Ka)	275
Vimuttattā = Vimuttā (Sī)	166
Visuddhipavāraṇam = Visuddhipavāraṇaya (Ka)	263
Vuccissanti = Bujjhissanti (Ka)	77
Vedayāmīti = Vedyāmīti (Sī, Syā)	279
Voṭṭhabbanakiccam = Votthapanakiccam (Sī)	78

[Sa]

Sakabhariyam = Sakapariyam (Sī, Syā)	390
Saṭṭhihattha-asītihatthappamāṇena = Sattatihattha-asīti- hatthappamāṇena (Ka)	297
Sanṭhātum = Sandhāretum (Ka)	165
Sadvārā = Sannadvārā (Ka)	170
Santharivā = Pattharivā (Sī, Syā)	69
Sannirumbhanesu = Sannirujjhanesu (Ka)	265
Sannirumbhanam = Sannirujjhanam (Ka)	265
Sappitelamadhusakkarādipūritānam = Sappitelamaṃsasakkarādi- pūritānam (Ka), Sappitelamaṃsarasādi- pūritānam (Syā)	153
Sabbasassasambhārehi = Sabbasambhārehi (Ka)	350
Sampaṭicchantesu = Paṭipannesu (Syā)	245
Sānupapātapatanam = Maruppapātapatanam (Sī, Syā)	317
Suddhantam = Suddhattam (Sī, Syā)	368

Nānāpāṭhā

Piṭṭhaṅkā

[Sa]

Suddhavāre = Buddhavāre (Sī, Syā, Ka)

369

Sūpaṭṭhapitaṃ = Sūpaṭṭhitaṃ (Sī)

263

[Ha]

Haṅkanavihāraṃ = Taṅkhaṇavihāraṃ (Ka)

188

Mūlapaṇṇāsattḥakathāyaṃ

Āhaṭāni aniddiṭṭhāni sesasādhakasuttāni

Sādhakasuttāni	Piṭṭhānkā
Evam dhammā te Bhagavanto (Dī 2. 7; Ma 3. 160 piṭṭhesu)	18
Yo bhikkhave pathaviḍhātum abhinandati (Saṃ 1. 383 piṭṭhe)	30
Sotānaṃ saṃvaram brūmi (Khu 1. 434; Khu 8. 30 piṭṭhesu)	65
Vijjā ca kho bhikkhave pubbaṅgamā (Khu 1. 218 piṭṭhe)	112
Passelamūgaṃ uragaṃ dujivhaṃ (Khu 5. 161 piṭṭhe Jātake)	122
Sāriputto bhikkhave pahoti cattāri (Ma 3. 291 piṭṭhe)	210
Seyyathāpi bhikkhave ayaṃ kāyo (Saṃ 3. 58 piṭṭhe)	213
Tathā “Phassapaccayā vedanā, saṅkhārapaccayā (Saṃ 2. 243 piṭṭhādīsu)	213
Yathā mahārāja gehe patante aññena (Khu 11. 35 Milindapañhe)	214
Tassa saṅghāṭipi ādittā sampajjalitā (Saṃ 1. 451 piṭṭhe)	215
Seyyathāpi bhikkhave gāvī niccammā (Saṃ 1. 323 piṭṭhe)	215
Seyyathāpi bhikkhave aṅṅarakāsu (Saṃ 1. 324 piṭṭhe)	215
Seyyathāpi bhikkhave coraṃ āgucāriṃ (Saṃ 1. 324 piṭṭhe)	215
Ulūkamaṇḍalakkhika -pa- vissuto (Khuddaka-Ṭṭha 1 Maṅgalasutte samaṇānañca dassananti padavaṇṇanāyaṃ)	322

Imā pana pāliyo gavesitabbā

Senāya pasuto	5
Yāva majjhanhike kāle chāyā pharati -pa- rukkhamūlaṃ	13
Sabbaṃ rūpaṃ aniccaṃ sabbā vedanā -pa- dhammesu	18
Jātidhammā jarādhammā atho maraṇadhammino (Am 1. 145 piṭṭhe thokaṃ visadisam)	18
Sabbe dhammā sabbākārena Buddhassa Bhagavato (Khu 9. 376 piṭṭhe thokaṃ visadisam)	18
Yeva te ariyā teva te sappurisā -pa- tajjāte taññevāti	25
Cattāro āsavā kāmāsavo -pa- tena vuccati khīṇāsavoti	44
Thambhaṃ niraṃ katvā nivātavutti	161

Sādhakasuttāni

Piṭṭhaṅkā

Yo hissa bhikkhave samādhī -pa- paññāvimuttīti.	169
Putto yadā homi jayadisassa -pa- pasādayim.	232
Ubho pādāni bhinditvā, -pa- arahattamapāpuṇim	238
Yamdiṭṭhiko Satthā hoti -pa- dhammiko ānisaṁsoti.	317
Sukhapatto na rajjāmi -pa- esā me upekkhāpāramīti	354